




IMAGE EVALUATION TEST TARGET (MT-3)



6"



Photographic
Sciences
Corporation

23 WEST MAIN STREET
WEBSTER, N.Y. 14580
(716) 872-4503

0
10
20
30
40
50
60
70
80
90
100
110
120
130
140
150
160
170
180
190
200
210
220
230
240
250
260
270
280
290
300
310
320
330
340
350
360
370
380
390
400

**CIHM/ICMH
Microfiche
Series.**

**CIHM/ICMH
Collection de
microfiches.**



Canadian Institute for Historical Microreproductions / Institut canadien de microreproductions historiques

© 1987

Technical and Bibliographic Notes/Notes techniques et bibliographiques

The Institute has attempted to obtain the best original copy available for filming. Features of this copy which may be bibliographically unique, which may alter any of the images in the reproduction, or which may significantly change the usual method of filming, are checked below.

- Coloured covers/
Couverture de couleur
- Covers damaged/
Couverture endommagée
- Covers restored and/or laminated/
Couverture restaurée et/ou pelliculée
- Cover title missing/
Le titre de couverture manque
- Coloured maps/
Cartes géographiques en couleur
- Coloured ink (i.e. other than blue or black)/
Encre de couleur (i.e. autre que bleue ou noire)
- Coloured plates and/or illustrations/
Planches et/ou illustrations en couleur
- Bound with other material/
Relié avec d'autres documents
- Tight binding may cause shadows or distortion
along interior margin/
La reliure serrée peut causer de l'ombre ou de la
distortion le long de la marge intérieure
- Blank leaves added during restoration may
appear within the text. Whenever possible, these
have been omitted from filming/
Il se peut que certaines pages blanches ajoutées
lors d'une restauration apparaissent dans le texte,
mais, lorsque cela était possible, ces pages n'ont
pas été filmées.
- Additional comments:/
Commentaires supplémentaires:

L'Institut a microfilmé le meilleur exemplaire qu'il lui a été possible de se procurer. Les détails de cet exemplaire qui sont peut-être uniques du point de vue bibliographique, qui peuvent modifier une image reproduite, ou qui peuvent exiger une modification dans la méthode normale de filmage sont indiqués ci-dessous.

- Coloured pages/
Pages de couleur
- Pages damaged/
Pages endommagées
- Pages restored and/or laminated/
Pages restaurées et/ou pelliculées
- Pages discoloured, stained or foxed/
Pages décolorées, tachetées ou piquées
- Pages detached/
Pages détachées
- Showthrough/
Transparence
- Quality of print varies/
Qualité inégale de l'impression
- Includes supplementary material/
Comprend du matériel supplémentaire
- Only edition available/
Seule édition disponible
- Pages wholly or partially obscured by errata
slips, tissues, etc., have been refilmed to
ensure the best possible image/
Les pages totalement ou partiellement
obscurcies par un feuillet d'errata, une pelure,
etc., ont été filmées à nouveau de façon à
obtenir la meilleure image possible.

This item is filmed at the reduction ratio checked below/
Ce document est filmé au taux de réduction indiqué ci-dessous.

10X	14X	18X	22X	26X	30X
			/		
12X	16X	20X	24X	28X	32X

The copy filmed here has been reproduced thanks to the generosity of:

Seminary of Quebec
Library

The images appearing here are the best quality possible considering the condition and legibility of the original copy and in keeping with the filming contract specifications.

Original copies in printed paper covers are filmed beginning with the front cover and ending on the last page with a printed or illustrated impression, or the back cover when appropriate. All other original copies are filmed beginning on the first page with a printed or illustrated impression, and ending on the last page with a printed or illustrated impression.

The last recorded frame on each microfiche shall contain the symbol → (meaning "CONTINUED"), or the symbol ▽ (meaning "END"), whichever applies.

Maps, plates, charts, etc., may be filmed at different reduction ratios. Those too large to be entirely included in one exposure are filmed beginning in the upper left hand corner, left to right and top to bottom, as many frames as required. The following diagrams illustrate the method:

L'exemplaire filmé fut reproduit grâce à la générosité de:



Séminaire de Québec
Bibliothèque

Les images suivantes ont été reproduites avec le plus grand soin, compte tenu de la condition et de la netteté de l'exemplaire filmé, et en conformité avec les conditions du contrat de filmage.

Les exemplaires originaux dont la couverture en papier est imprimée sont filmés en commençant par le premier plat et en terminant soit par la dernière page qui comporte une empreinte d'impression ou d'illustration, soit par le second plat, selon le cas. Tous les autres exemplaires originaux sont filmés en commençant par la première page qui comporte une empreinte d'impression ou d'illustration et en terminant par la dernière page qui comporte une telle empreinte.

Un des symboles suivants apparaîtra sur la dernière image de chaque microfiche, selon le cas: le symbole → signifie "A SUIVRE", le symbole ▽ signifie "FIN".

Les cartes, planches, tableaux, etc., peuvent être filmés à des taux de réduction différents. Lorsque le document est trop grand pour être reproduit en un seul cliché, il est filmé à partir de l'angle supérieur gauche, de gauche à droite, et de haut en bas, en prenant le nombre d'images nécessaire. Les diagrammes suivants illustrent la méthode.





BO
68
P

BQ
6837
P219

Item 28 422

A. DISPUTATIONES THEOLOGICÆ

SEU

COMMENTARIA

IN SUMMAM THEOLOGICAM D. THOMÆ

2008

DE INCARNATIONE VERBI

(III,

AUCTORE

ALOISIO-ADULPHO PAQUET

SACRA THEOLOGIE DOCTORE ET PROFESSORE IN UNIV.
LAVALLENSI



QUEBECI
EX TYPOGRAPHIA FRATRUM DEMER

ROMÆ

Apud F. PUSTET
librarium pontificum
(Fontana di Trevi 81-85)

NEO-EBORACI

Apud Fratres BENZIGER
typographos pontificios
(Barclay street 36-38)

1899

3909

IMPRIMATUR

† L. N. ARCHIEP. QUEBECEN.



Cum ex Seminarii Quebecensis præscripto recognitum fuerit opus
cui titulus est *Disputationes theologicae seu Commentaria in Summam
theologicam D. Thomæ: De Incarnatione Verbi, auctore Aloisio-
Adulpho Paquet, nihil obstat quin typis mandetur.*

J. C. K. LAFLAMME, Pter,

S. S. Q.

Quebec, die 23^a Feb. 1899.

EPISTOLA

EMINENTISSIMI CARD. RAMPOLLA
NOMINE LEONIS XIII

AD AVOREM MISSA

Revme Domine,

Tria, quæ misisti, Disputationum theologicarum volumina eisque adnexæ litteræ observantissimæ, obsequium Sancto Patri gratissimum attulerunt.

Tuæ quidem Dominationi Revmæ libuit in illis litteris ad mentem Suæ Sanctitatis revocare ea quæ, peracta a te coram augustissimo Pontifice theologica disputatione, Ipse ad foven- dum scientiae zelum tibi tunc fuerat elocutus. Atque idem Beatus Pontifex de hoc maxime lætatur quod non solum memoriam ejus dictorum retinueris, verum etiam quod facto comprobaveris te libenti obsequentique animo ea suscepisse.

Laudat igitur Summus Pontifex studium quod adhibes illustrandis aureis Thomæ Aquinatis doctrinis, Eique gratulationi est quod in illo efficiendo opere validam mentis disciplinam magnumque ingenii acumen demonstres. Quocirca, dum Ipse te ad opus tam utile, in sanæ philosophiæ bonum, prosequendum hortatur, libentissime paternoque motus affectu tibi imploratam benedictionem impartitur.

Gaudeo hanc mihi occurrere opportunitatem tibi significandi meos in te præcipuæ existimationis sensus meque profundi

Tuæ Dominationis Revmæ

Devotissimum servum

M. CARD. RAMPOLLA.

En textus italicus

(quem supra in latinum vertimus).

Revmo Signore,

I tre volumi delle Disputazioni teologiche e l'unita lettera osse-
quiosissima, sono stati omaggio ben grato al Santo Padre.

La S. V. Revma ha voluto richiamare alla mente di Sua Santità
gl'incoraggiamenti che Essa Le rivolse in occasione della disputa
da Lei fatta alla Sua augusta presenza. E la stessa Santità Sua
molto si compiace che Ella non pure abbia serbata memoria di
quelle parole, ma abbia altresì mostrato coi fatti l'animo volente-
roso ed ossequente con che le accolse.

Si congratula adunque il Sommo Pontefice dell'impegno che Ella
pone nell'illustrare le auree dottrine dell'Aquinate e della prova
che in ciò dà di forte studio e di molto acume. Ed esortandola a
proseguire in così utile occupazione a vantaggio del retto filosofare,
ben volentieri e con paterno affetto Le imparte l'implorata bene-
dizione.

Godò dell'incontro per attestarle i sensi della più distinta stima
con cui mi raffermo

Di V. S. Revma

Affmo per servirla

M. CARD. RAMPOLLA.

Roma, 17 Marzo 1898.

PRÆFATIO

Primam commentariorum nostrorum in *Summam theologicam* seriem, in qua de Deo secundum se, de processu creaturarum ab Ipso, deque creaturæ rationalis motu seu reditu in Ipsum per gratiam peccati reparatricem agendum erat, tribus editis voluminibus explevimus. Altera nunc series ejusdem operis perficienda suscipitur, ubi disputandum venit de ipso Reparatore nostro Jesu Christo, neconon de gratiæ fontibus quos hominiibus in sacramentis aperuit et quibus fideles finem æternæ vitæ sibi comparare valeant.

Porro mysterium Christi seu *Verbi Incarnatio*, circa quam præsens lucubratio versabitur, inter divina opera præcipuum gradum tenet et "maxime rationem excedit: nihil enim mirabilius excogitari potest divinitus factum quam quod verus Deus Dei Filius fieret homo verus¹"; unde *D. Thomas* opus illud pronuntiare non dubitat "miraculum omnium miraculorum²".—Certe tanta hæc tamque stupenda divini Portenti magnitudo nos ab arripiendo calamo deterret, nisi ad scribendum invitaret præfulgens Scholasticorum doctrina, præsertim vero excellentissimi illius Magistri sapientia, quem Duxem tutissimum elegimus, et de quo Christus ipse perhibuisse fertur incomparabile testimonium: *Bene*

1—Cont. Gent. l. IV, c. 27.

2—3 Sent. D. III, Q. II, a. 2.

*scripsisti de me, Thoma*¹.—Alioqui, nihil prope est ad speculandum nobilius, nihil ad cognoscendum suavius, nihil ad meditandum utilius quam mysterium dominice Incarnationis. Qua de causa effabatur *D. Paulus* (1 Cor. II, 2): *Non enim judicari ne scire aliquid inter vos, nisi Jesum Christum, et hunc crucifixum.* Et *S. Bernardus* (Serm. 44 in Cant.): “Sublimior philosophia est scire Jesum.”

Tractatio, quam nunc juxta usitatum nobis morem aggredimur, quæque *Tertiam Summæ Partem* a Quæst. I^a ad LIX^{am} usque persequitur, ab Auctore dividitur in duas partes, quarum prior *strictè dogmatica* peragit de mysterio Incarnationis (Q. I-XXVI), posterior vero *dogmatico-historica* de mysteriis vitæ Verbi Incarnati (Q. XXVII-LIX): eumdem ordinem servabimus.—In prima parte, dicemus de *convenientia Incarnationis* (Disp. I), de modo Unionis seu assumptionis naturæ humanæ a Verbo (Disp. II), de *coassumptis* perfectionibus et defectibus (Disp. III), de *consequentialibus* Unionem, sive *absolute* (Disp. IV), sive *relative* (Disp. V).—In secunda parte, post exactam præviam de Matre Christi dissertationem quam *Marialogiam* vocant (Disp. VI), agemus de *ingressu* Christi in mundum (Disp. VII), de *progressu* vitæ ejus in mundo (Disp. VIII), de *exitu* ipsius ab hoc mundo (Disp. IX), tandem de ejus *triumpho* cœlestique gloria (Disp. X).

¹—Testimonium hoc refert *Leo XIII* in Litt. Apost. *Nostra ergo ad Ministrum generalem Ord. FF. Minorum missis* (1898):

est ad
s, nihil
ncarna-
II, 2):
Jesum
erm. 44

aggre-
. I^a ad
as par-
ysterio
o-histo-
-LIX):
mus de
nis seu
e coas-
conse-
relative
am de
vocant
p. VII),
exitu
umpho

ra ergo

PARS PRIMA

DE MYSTERIO INCARNATIONIS

PROCEMIUM

Consuetudini morem gerentes, nonnulla breviter præmittamus circa nomen, possibilitatem et existentiam Incarnationis, itemque circa errores de ea exortos.

I. Nomen Incarnationis. — Nomen istud, quo intelligitur unio naturæ humanae cum divina in una Verbi persona, desumptum videtur ex Joan. I, 14: *Verbum caro factum est.* Quamvis autem SS. Patres interdum alias voces adhibuerint, puta inhumanationem (Damascenus), corporationem (Hilarius), frequentius tamen *incarnationis* appellatio recurrit: cujus rei rationes assignant¹, 1^o quia saepè in Scriptura totus homo nomine carnis significatur, v. g. (Luc. III, 6): *Videbit omnis caro salutare Dei*; 2^o quia caro, sub sensibus cadens, aptior est ad exprimendum hocce mysterium quo Deus factus est visibilis; 3^o quia manifestius commendatur Dei bonitas et humilitas qui quod remotissimum erat a Divinitate assumpsit, nec abjectionem et infirmitatem nostram, carnis significatione contentam, despexit.

II. Possibilitas Incarnationis. — Tria observanda sunt. Et 1^o negat nemo possibilitatem Incarnationis *solo naturali creatæ mentis lumine demonstrari non posse*, juxta illud Cenc. Toletani XI: "Si ratione ostendi posset, non esset mirabile; si exemplo, non esset singulare." Sane, demonstratio, si quæ dari posset, possibilitatis tanti mysterii, quo divina natura cum humana hypostatice conjungitur, supponeret exploratam utriusque naturæ quidditatem. Atqui neque homo, neque Angelus perspectam naturaliter habet

Sic post de la Conveniens de l'Incarn. Si Convint, ergo possibilia est incarnationis.
1—Of. III, Q. V, a. 3 ad 1.

quidditatem divini esse intimamque divinarum Personarum indolem. Ergo.

2º Tamen possiblitas illa, preterquam quod facto ipso Incarnationis fidelibus certo innoteat, infidelibus suaderi valet dupli ratione, scil. tum negative, tum positive. a) Negative quidem; quatenus solubilia sunt omnia argumenta quæ contra mysterium Unionis proponi possunt: verum namque vero contradicere non potest. b) Positive etiam; quatenus præsto sunt rationes probabiles vel exempla quæ Incarnationem possibilem esse aliqualiter ostendant. Hujusmodi est exemplum insertionis a S. Thoma adductum (3 S. D. I, Q. I, a. 1): "Incarnatio insertioni comparatur: sicut enim in insertione in eodem trunco in quo erat unus ramus per naturam, fit ramus alius per insertionem, ita in eadem persona in qua naturaliter erat divina natura, est per unionem humana natura."

3º S. Thomas, qui in 3 lib. Sent. (*l. cit.*) speciale articulum de possibilitate Incarnationis instituerat, hic tamen in *Summa* eamdem quæstionem omisit: quo motivo, ipse non declarat; verum ratio esse videtur, tum quia convenientia, de qua late disserit, possibilitem subaudit, tum quia occurrendo objectionibus mysterii naturam impetentibus se satis pro possibilitate fecisse aestimavit.¹

III. Existentia Incarnationis.—Quia omnis scientia supponit suum subjectum vel per se notum vel alio ex fonte acceptum, mirandum non est quod Doctor Angelicus nihil de facto ipso Incarnationis in presenti tractatu præmisserit.

Enim vero 1º Messialogia, quæ ad *Theologiam Fundamentalē* dogmaticam pertinet, pro munere habet ostendere Messiam a Prophetis prænuntiatum et a Judæis exspectatum reapse advenisse; hunc autem, prouti vaticinia multaque signa miraculosa demonstrant, esse Jesum Nazarenū, Christianæ religionis et Ecclesiæ institutorem. Porro pleraque illa, quibus divinitas missionis Christi probatur, probant etiam personalē ejus divinitatem ideoque Incarnationis unionem.

1.—Objectiones contra assertam Inc. possibilitem solutas habet penes Auctorem (3 Sent. *l. cit.*) penesque Thomistas, ut Gonet, Bilhart, etc.

a) infidelibus
in peccatis
Toutefois les
objections
b) probabilis
par invincibili.

Sera la personne
divine / est
fructus la nature
humaine il
est la cause une
seul trone qui
porte en tant que
place au tout

PROCEMIUM



2^o Tota fere *Scriptura N. T.* (præsertim textus qui afflent in Tract. de *Trinitate* ad demonstrandam divinitatem Verbi), historiæ cum evangelicæ tum ecclesiasticæ documenta eamdem veritatem multiplici argumentorum genere confirmant. Præcipua summatim complexus est *D. Thomas* scribens (*C. G. IV*, 27): "Hanc Dei incarnationem mirabilem auctoritate divina tradente, confitemur. a) Dicitur enim: *Et Verbum caro factum est, et habitavit in nobis* (*Joæn. I*, 14); et Apost. dicit, de Filio Dei loquens: *Cum in forma Dei esset, non rapinam arbitratus est esse se aequalem Dœo; sed semetipsum exinanivit*, etc (*Phil. II*, 6-7). b) Hoc etiam ipsius *D. J. C.* verba manifeste ostendunt, quum de se quandoque loquatur humilia et humana, ut est illud: *Pater major me est* (*Joan. XIV*, 28), et: *Tristis est anima mea usque ad mortem* (*Matth. XXVI*, 38), quæ ei secundum humanitatem assumptam conveniunt; quandoque vero sublimia et divina, ut est illud: *Ego et Pater unus sumus* (*Joan. X*, 30), et: *Omnia quæcumque habet Pater mea sunt* (*Joan. XVI*, 15), que certum est ei secundum naturam divinam competere. c) Ostendunt etiam hoc ipsius Domini *facta quæ de ipso leguntur*. Quod enim timuit, tristatus est, esurit, mortuus est, pertinet ad humanam naturam; quod propria potestate infirmos sanavit, quod mortuos suscitavit et elementis mundi efficaciter imperavit, quod dæmones expulit, quod peccata dimisit, quod a mortuis quæcum voluit resurrexit, quod denique cælos ascendit, divinam in eo virtutem demonstrant."—Haec modo sufficient ad fidem de Incarnatione adstruendam. Verum infra (*Disp. II*, Q. I) specialibus argumentis *Divinitatem Christi* contra adversarios vindicabimus.

IV. Errorum summa.—In controversiis Christologicis, mysterii Incarnationis hostes aut ejus *existentiam* impugnant aut ejus *naturam* adulterant: unde in duas classes secernendi sunt.

1^o classis adversariorum comprehendit *Judeos* qui negant ac negant Messiam divinitus promissum advenisse;—*Gentiles* et *infideles* despiciētes lucem veram, quæ illuminat omnem hominem venientem in hunc mundum (*Joan. I*, 9);—*Incredulos* inficiētes realitatem vel historicitatem Christi;—*Agnosticos* scepticismo cuidam religioso addictos nihilque sollicitos de supernarum rerum veritate.

2^o *classis* adversariorum ulterius dispesci potest in tria genera¹, prouti error versetur vel circa divinitatem Christi, vel circa ejus humanitatem, vel circa utriusque naturae unionem.

1^o Circa divinitatem Christi errarunt *Cerinthus* et *Ebion*, *Paulus Samosatenus*, *Photinus* aliique veteres qui in Christo solum naturam humanam confitebantur, divinam vero excellenter participatam et meritis acquisitam in eo fuisse confingebant².—Hanc hæresim jamdiu protritam renovarunt *Sociniani* (sæc. XVI), quos nunc deteriori impietatis pervicacia *Rationalistæ* omnigeni et *Protestantes*, ut aiunt, *heterodoxi*³ sequuntur: ex istorum enim sensu Christus (si quem admittant) purus est homo, etsi valde sapiens riteque comparandus cum celebratoribus viris qui olim sive philosophiæ cultu sive novis religionis institutis præstiterunt. Ita *Baur*, *Richter*, *Renan*, etc.

2^o Circa humanitatem Christi referuntur errores *Manichæorum* docentium Filiū Dei non verū corpus, sed phantasticum assumpsisse;—*Valentini* ponentis corpus verū, sed de cœlo asportatum;—*Apollinaris* eo usqne desipientis ut contendeter Verbum conversum fuisse in carnem;—*Arii* vero aliorumque subducentium animam de humanitate assumpta, quasi Verbum solam carnem assumpsisset⁴.

3^o Circa ipsam *Incarnationis unionem* duo sunt extremi et capitales errores, scil. *Nestorianismus* et *Eutychianismus*⁵.—a) *Nestorius*, post *Theodorum Mopsuestenum*, dogmatizavit in Christo duas esse personas, quarum una divina et Filius Dei, altera autem humana.—b) *Eutyches*, volens Nestorium confutare, in oppositam incidit hæresim ponendo Christi personam ex duabus naturis esse, non tamen in duabus naturis subsistere, sed naturam divinam et humanam in unam coivisse. Ab Eutychianismo⁶ non longe dis-

1.—*S. Thom.* in cap. 1 *Matth.*

2.—*C. G. I.* IV, c. 28.

3.—Sic vocant eos *Protestantes* hodiernos qui, relictio primævo Protestantismo, in *Rationalismum* declinant.

4.—*C. G. IV*, 29-33.

5.—*Ibid.* c. 34-36.

6.—Supersunt adhuc in Oriente propagines Nestorii et Eutychetis.

tant *Lutherani* dicentes attributa Divinitatis, in specie ubiqutatem¹, communicari in Christo humanitati; nec minus aberrant *Pantheistæ moderni* qui cum *Schleiermacher* Christum quemdam fabricant unius naturæ humano-divinæ, in qua relucere contendunt idealem humanitatis perfectionem unum anthropologica Divinitatis forma.

Locus est repetendi verba *Leonis M.* (ad Flavianum, cap. I): "Ideo magistri erroris existunt, quia veritatis discipuli non fuere²."

1.—Lutheranis hac in re obstiterunt Calvinistæ;—cf. P. Schaff, *The creeds of Christendom*, Ed. 4, Vol. I, pp. 285 sqq.

2.—De historia hæresium circa Incarnationem cfr. in primis Petavius, *de Inc. Verbi*, l. I.

DISPUTATIO PRIMA

QUÆSTIO UNICA

DE CONVENIENTIA INCARNATIONIS

“ Si quis, ait *S. Thomas* (C. G. IV, 54), diligenter et pie Incarnationis mysteria consideret, inveniet tantam sapientiae profunditatem quod omnem humanam cognitionem excedat, secundum illud Ap. (1 Cor. I, 25) : *Quod stultum est Dei, sapientius est hominibus.* Unde fit ut pie consideranti semper magis ac magis admirabiles rationes hujus mysterii manifestentur.”

Tripliciter potest convenientia Incarnationis investigari : *absolute* maximeque ex parte Dei (art. 1), *relate ad finem* seu ex parte hominis lapsi (art. 2-4), et *relate ad tempus* (art. 5-6).—Ex parte vero hominis Incarnatio considerationi objicitur vel sub respectu *utilitatis* ad peccatum reparandum (art. 2), vel sub ratione *connexionis* cum peccato reparando (art. 3), vel secundum *determinationem peccati* principaliiter reparandi (art. 4).—Demum, quia temporis est initium, medium et finis, convenientia Incarnationis in plenitudine temporum implendæ ita demonstrari debet ut excludatur eadem congruentia ab initio (art. 5) et fine mundi (art. 6).

ARTICULUS I.

Utrum conveniens fuerit Deum incarnari.

Convenientia hic sumitur non pro exigentia vel necessitate ejus cuius carentia sit inconveniens, sed pro *decentia* vel *competentia* quadam, adeo ut nec incongruum fuisse Deum

non incarnari.—Decentia autem illa demonstranda assumitur ex propriis Dei per respectum ad creaturam absolute inspectam.

Conclusio.—CONVENIENS, IMO CONVENIENTISSIMUM FUIT DEUM INCARNARI.

Prob. 1) ex attributis Dei.—Maxime conveniens videtur ut per visibilia invisibilia Dei patefiant, secundum sententiam Apostoli (Rom. I, 20). Atqui per mysterium Incarnationis præcipua Dei attributa, scil. sapientia, caritas et misericordia, justitia, potentiaque mirifice patescunt¹: ergo.—
a) Sapientia quidem, in quantum Deus (ut ait Damascenus, l. III Orth. Fid. c. 1) “invenit difficillimi pretii decentissimam solutionem,” concilians scil. vindicationem justitiae cum benignitate clementiae, juxta illud (Ps. LXXXIV, 14): *Justitia et pax osculante sunt.*—*b) Caritas et misericordia*, “quoniam non despexit proprii plasmatis infirmitatem” (Damasc. *ibid.*). Unde dicitur (Eph. II, 4-5): *Deus, qui dives est in misericordia, propter nimiam caritatem suam qua dilexit nos, cum essemus mortui peccatis, convivificavit nos in Christo.*—*c) Justitia* quoque, “quoniam, homine victo, non alio quam homine fecit vinci tyrannum, neque vi eripuit ex morte hominem” (Damasc. *ibid.*), sed per libera-ram Dei-hominis substitutionem quem proposuit Deus propitiacionem, per fidem in sanguine ipsius, ad ostensionem justitiae sue (Rom. III, 25).—*d) Demum potentia*; nam “qui in forma Dei erat inclinans cœlos descendit... novorum omnium maxime novum, imo quod unum sub sole novum est infinitamque Dei potentiam declarat. Quid enim majus quam Deum hominem fieri?” (Damasc. *ibid.*). Idcirco in Scripturis (Habacuc, III, 2) Incarnatio vocatur autonomastice *opus* Dei.

Prob. 2) ex natura divina.—Unicuique rei conveniens est illud quod ei competit secundum rationem proprie naturæ, v. g. ratiocinari in homine. Atqui Incarnatio maxime congruit indoli naturæ divinæ: ergo. *Min. prob.* Cum natura Dei sit ipsa bonitas essentialiter et transcendentaliter sumpta, quidquid pertinet ad rationem boni simpliciter con-

1—Cf. Gonet, *De Incarn.* Diap. III, a. 1.

*L'incarnation
nous manifeste
à la fois la bonté
de justice, de
régle et de
puissance de Dieu*

15 octobre 1880
p. 10780

venit Deo, sive ex necessitate naturæ, sive ex voluntatis arbitrio. Atqui pertinet ad rationem boni simpliciter ut se aliis communicet. Ergo Deo, qui est summum Bonum, convenit se summo modo creature communicare. Jam vero summa omnium communicationum Dei ad extra est Incarnationis. Ergo Incarnatio convenientissima est.—Ad declarationem argumenti tria subjicere juvabit. Et primo bonum est sui diffusivum, quatenus eo finaliter tendit ut alia in se trahat et veluti convertat. Id autem contingit per communicationem sui, in quantum ens in se bonum et perfectum natum est alia perficere et se in illis quodammodo multiplicare: quæ quidem communicatio non necessario afferit perfectionem intrinsecam communicanti, sed magis illis quibus bonum communicatur, unde etiam Bono infinito convenire potest.—Secundo cum Cajetano (in h. art.) observandum est tribus modis omnino diversis Deum se creature communicare. a) Primus modus est naturalis ordinis, juxta quem res a Deo creatæ et conservatæ aliqualem ejus similitudinem participant, dum tamen supremus omnium Provisor extra et supra totum universum in sui ipsius fruitione solus consistit. b) Alter et excellenter modus supernaturalis est, quo Deus omnes intellectuales et rationales substantias elevat in consortium suæ naturæ, ita ut, inchoate quidem per gratiam, consummate vero per gloriam, eis communicet propriam suam felicitatem et seipsum in ordine intelligibili. c) Postremus modus, omnium excellentissimus, est per communicationem personalem, qua Deus (o mirabile dictu!) propriam personam, secundum subsistentiam quam in semetipsa habet, creature copulat in uno esse reali: hæc est unio Incarnationis.—Tertio assumendo naturam humanam corpore spirituque compositam, in qua veluti mundi synthesis continetur, non immerit Deus dicitur absolute se creature totique universo communicare. Huc referri possunt verba S. Thomæ (Opusc. II, c. 201): “Perficitur per hoc quodammodo totius operis divini universitas, dum homo, qui est ultimo creatus, circulo quodam in suum reddit principium, ipsi rerum principio per opus Incarnationis unitus.”

Solv. obj.—OBJ. 1.—Sic optimum et necessarium est Deum esse, sicut fuit ab æterno. Atqui ab æterno fuit absque carne. Ergo.

RESP. *D. M*:...Deum esse in se, sicut fuit ab eterno, *C*; in creaturis, *N*.—*C.d.m*:...atque ideo non immutatur in se per assumptionem carnis, *C*; nec convenit creaturam iminutari per respectum ad Deum, *N*.—*Neg. conseq.*

^{1º} Incarnationis mysterium non est impletum per hoc quod Deus sit aliquo modo a suo aeternali statu remotus, sed per hoc quod novo modo se creature univit, vel *potius eam sibi*.—^{2º} Cum creatura sit essentialiter mutabilis et perfectibilis, conveniens erat ut reapse mutaretur et in majus illud hypostaticæ unionis bonum elevaretur.

OBJ. 2.—Quæ sunt in infinitum distantia, inconvenienter junguntur. Atqui Deus et caro in infinitum ab invicem distant. Ergo.

RESP. *D. M*:...considerata solâ distantia entitatis, *C*; considerata etiam habitudine proportionalitatis et perfectibilitatis, *N*.—*C.d.m*:...entitative, *C*; quin caro dicat ad Deum ordinem perfectibilitatis, *N*.—*Neg. conseq.*

Certe uniri Deo in unitate personæ non fuit conveniens carni humanæ *entitative* sumptæ et secundum conditionem suæ naturæ, quia hoc erat supra dignitatem ipsius.—Attamen inspecto proportionis ordine, juxta quem creatura a Deo summe perfecto summe *perfectibilis* est, congruebat infinitæ excellentiæ Bonitatis divinæ ut sibi carnem pro salute humana coujungeret.

OBJ. 3.—Sic distat corpus a summo spiritu, sicut malitia a summa bonitate. Atqui omnino inconveniens foret Deum, maxime bouum, malitiam assumere. Ergo.

RESP. *D. M*:... lato quodam sensu, *C*; stricte et absolute, *N*.—*C.m*.—*Neg. conseq.*

Creaturarum *corporalium* et *mutabilium* conditio, quæ tantopere a Creatore differunt, ab ipsa Dei sapientia instituta est et ad ejus bonitatem ordinata; immo et malum *pœnæ* a divina justitia est introductum propter Dei gloriam. Sed malum *culpæ* committitur per recessum ab arte divinæ sapientiæ et ab ordine divinæ bonitatis. Quapropter Deo conveniens esse potuit assumere naturam corpoream, mutabilem et *pœnalitati* subjectam, non tamen assumere malum culpæ.

OBJ. 4.—Repugnat eum qui immensus est et omnium provisor, contineri in corpusculo. Atqui Deo competit immensitas naturæ, sicut et universalitas Providentiæ. Ergo.

RESP. *D. M*:...i. e. contrahere ad corpusculum immensitatem suæ naturæ et virtutis, *C*; uniri corpusculo secundum novum subsistentię et providentię effectum, salva tamen manente sua natura et quin magnitudo sua virtutis ulla in angusto sentiat angustias, *N*.—*C.m.*—*Neg. conseq.* (August. epist. 137 ad Volusianum)¹.

ARTICULUS II.

*Utrum necessarium fuerit ad reparationem generis
humani Verbum Dei incarnari.*

Agitur de determinanda Incarnationis convenientia *ex parte hominis* et respectu humanæ restorationis.—Porro non defuere, ut *S. Anselmus* aliique antiqui, quibus videatur Incarnationem fuisse necessariam ad reparandum humanum genus.—Verum eorum verba intelligenda sunt sub luce distinctionis a *D. Thoma* traditæ, quatenus aliquid potest esse necessarium ad finem dupliciter: uno modo *absolute*, utpote *sine quo finis attingi non possit*, v. g. cibus respectu vitæ; alio modo *secundum quid*, quia per illud *melius* et convenientius ad finem pervenitur, v. g. equus ad iter faciendum.—Hæc duo materiam præbent duarum conclusionum, in quarum posteriori breviter controversiam tangemus de *sufficientia satisfactionis* pro peccato.

Conclusio 1^a.—**DEUM INCARNARI NON FUIT ABSOLUTE NECESSARIUM AD REPARATIONEM HUMANÆ NATURÆ.**—Hæc est sententia communis et ita certa ut negari non possit sine temeritate (*Suarez*, de Incarn. Disp. IV).

Sane Deus liberrimus est atque potentissimus, efficere valens quidquid contradictionem non involvit. Poterat igitur humanam naturam multis aliis modis reparare, puta gratuito prorsus remittendo peccatum², vel aliqualem tantum satis-

1—Vid. plura in C. G. IV, 53–55.

2—Cf. III, Q. XLVI, a. 2 ad 3.

factionem ab homine exigendo, etc.—Unde *S. Thomas* (3 S. D. XX, Q. I, a. 4): “Ex parte Dei fuit alius modus possibilis nostræ liberationis, quia ejus potentia limitata non est; quem si elegisset, convenientissimus fuisse: non tamen habuisset rationem redēptionis sed liberationis, quia liberatio non fuisse facta per solutionem pretii.”

Conclusio 2^a.—INCARNATIO PER UTILIS ET VALDE CONVENIENS FUIT AD REPARANDAM HUMANAM NATURAM, SPECIATIM VERO AD SATISFACIENDUM PRO PECCATO.

1^a Pars inuititur innumeris utilitatibus quæ ex mysterio Verbi Incarnati consecutæ sunt: decem proponit *S. Thomas* sequenti ordine digestas.

1^a Quantum ad promotionem hominis in bonum.—
 a) Roboratur *fides*, turn ex parte divinæ veritatis in *Verbo* humanato veluti incarnata, tum ex parte motivi credendi, quatenus ipsi Deo sensibiliter loquenti creditur juxta illud (*Joan. I, 18*): *Unigenitus Filius, qui est in sinu Patris, ipse enarravit*; unde *August.* (de Civ. Dei, I. XI, c. 2): “Ut (homo) fidentius ambularet ad veritatem, ipsa veritas Deus Dei Filius, homine assumpto, non Deo consumpto, constituit atque fundavit fidem.”—b) Erigitur *spes* ex ostensione tantæ erga nos sollicitudinis divinæ; unde idem *August.* (de Trin. I. XIII, c. 10): “Quid tam necessarium fuit ad erigendam spem nostram... quam ut demonstraretur nobis (ineundo nostræ naturæ consortium) quanti nos penderet Deus quantumque diligeret?”—c) Inflammatur *caritas* ex manifestatione divinæ dilectionis per modum familiaris amicitiæ; unde rursus *August.* (de Catech. rud. c. 4): “Si amare pigebat, saltem redmare non pigeat.”—d) Fovetur *cultus omnium virtutum* per documenta Christi verbo et exemplo firmata: nam “*homo sequendus non erat, qui videri poterat; Deus sequendus erat, qui videri non poterat.* Ut ergo exhiberetur homini et qui videretur ab homine et quem homo sequeretur, Deus factus est homo” (*August. Serm. de Nat. Dom., 22 de Temp.*).—e) Tandem conjunctio humanæ nature in esse reali unitatis hypostaticæ preambula est et dispositiva ad plenam Dei participationem in ordine intelligibili per *actum beatificæ visionis*; unde illud *August.* (Serm. de Nat. Dom., 13 de Temp.): “*Factus est Deus homo, ut homo fieret Deus.*”

2^a Quantum ad remotionem mali, præteriti ac futuri.—

Ch 174 pth

a) Homo enim per tantam sui elevationem instruitur ne sibi diabolum preferat eumque veneretur peccati auctorem; de quo *August.* (de Trin. l. XIII, c. 17): "Quandoquidem sic Deo conjungi potuit humana natura ut ex duabus substantiis fieret una persona,...superbi illi maligni spiritus... non ideo se audeant homini præponere, quia non habent carnem".—b) Præterea, edicti sublimem naturæ nostræ dignitatem, Christi voce avertimur ab ea peccato inquinanda; quod eloquenter monet *S. Leo P.* (Serm. de Nativ. 1): "Agnosce, o Christiane, dignitatem tuam; et divinæ consors factus naturæ, noli in veterem vilitatem degeneri conversatione redire. Memento cujus capit is et cujus corporis sis mem-brum".—c) Per hoc quoque tollitur hominis presumptio, quatenus "gratia Dei nobis sine ullis meritis præcedentibus in homine Christo commendatur" (*August.* de Trin. l. XIII, c. 17); nec enim ipse ut Filius Dei fieret ullis est meritis propriis assecutus, utpote nullam habens hypostasim neque operationem ante unionem¹.—d) Amplius, superbia hominis, malorum parens, retunditur, juxta illud *S. August.* (Tract 25 in Joan. n. 16): "Puderet te fortasse imitari humi-lem horuinem, saltem imitare humilem Deum".—e) Denique Incarnatio maxime congruebat ad liberandum hominem a servitute peccati, quatenus in una eademque persona haberetur et qui posset, ut Deus, et qui deberet, ut homo, pro peccato satisfacere: sed hoc jam ulterius declarandum est.

*Dates pacifico
valde conuenient*

2^a Pars ergo eo adstruetur sensu quod speciatim Incar-natio Verbi requirebatur ad exhibendam Deo condignam satisfactionem; quam homo purus (sine gratia aut cum gratia) offerre non poterat, tametsi posset imperfecte satis-facere.

*magistris
ab aliis
bonis propriis*

Prænotanda. — Nomine satisfactionis intelligi debet active quidem recompensatio illate injuriæ, objective vero ipsum opus satisfactorium.—Triplex distingui potest satisfac-tionis genus: quippe alia dicitur rigorosa seu secundum omnem justitiæ formam exhibita², ad quam pertinet quod aliquis satisfaciat de bonis propriis; alia condigna et æqui-valens seu tantum reddens quantum fuerit per offensam

1—III, Q. II, a. 11.

2—Vide infra (Disp. IX, Q. III, a. 2) conditiones strictæ justitiae; ubi plura de satisfactione Chr'sti discutiuntur.

Satisfaction $\left\{ \begin{array}{l} \text{1, rigorosa : nullus bonus pectoris pati potest rigorosa} \\ \text{2, Condigna : Homo sine gratia : nullus pectoris} \\ \text{3, imperfecta : Homo cum gratia : reparatio creaturae} \end{array} \right.$
 QUEST. UN. ART. II. 19

a) *Hoc est abducere*
in alienum, non suum
et perfundere
 ablatum; alia manca et deficiens, quam persona læsa pro sua benignitate acceptare dignatur, quamvis condigna non sit.

1^o Facile intelligitur hominem purum, quicumque sit, non posse offerre Deo pro peccato rigorosam satisfactionem, sicut nec ex rigore justitiae mereri; siquidem totum bonum quod habet aut operatur a Deo est. — At questio est num homo, suppositis divinis naturæ vel gratiæ donis, potuerit condigne satisfacere pro culpa originali vel actuali.

2^a) Itaque dico nullum hominem extra gratiam potuisse condigne seu æquivalenter satisfacere pro peccato originali humani generis. — Imprimis ad hominem lapsum referre fas est verba S. Thomæ (3 S. D. I. Q. I. a. 2 ad 9) quod “totum quod potest, pro se Deo debet; unde non relinquitur sibi ut pro alio satisfacere possit.” — Universalius vero valeat sequens argumentum: peccatum contra Deum commissum quamdam ducit infinitatem non solum ex infinito beatitudinis bono quod per illud aufertur¹, sed maxime ex infinitate divinæ majestatis in quam delinquitur; siquidem pro dignitate personæ offendit crescit culpæ malitia. Atqui satisfactio cuiuslibet creature, cum ejus valor ex persona satisfaciente desumatur, insufficiens est ad resarcendam talem injuriæ. Ergo.

b) Sin autem homo gratiæ donatus consideretur, vel supponitur homo reparatus, vel homo in justitia creatus. — Quod ad primum seu ad hominem reparatum pertinet, certe non valet pro se (nec consequenter pro tota natura humana cuius est individuum) condignam satisfactionem exhibere. Creatura enim non habet ex se gratiam, sed illam a Deo, tituloque gratuito, recipit. Porro gratia peccatori non conferatur nisi simul eodemque influxu reatus æternæ poenæ, quidquid sit de poena temporali, tollatur. Ergo ipsa receptione gratie in illo condignæ satisfactioni detrahit. — Quod spectat ad hominem in justitia creatum, nec ipse potuisset pro peccato originali condigne satisfacere. Etenim (ut docet S. Thomas h. art. resp. ad 2, et 3 S. D. I. Q. I. a. 2) tota natura humana fuit per peccatum originales corrupta. Atqui corruptionis hæc infinitatem quamdam subjectivam sortitur ex indole naturæ in qua supposita in infinitum multiplicari possunt. Ergo bonum alicujus personæ creatæ vel etiam plurium, utpote subjective finitum (etsi objective infinitum).

1—3 S. D. XX, Q. I, a. 2.



S. 14
Sc.

Olyctum in iniuria eis persona dignitatis imperiale
Ergo iniuria est infinita, nulus bonus patitur.

ratione caritatis in Deum), nequaquam poterat per æquiparantiam totius naturæ detrimentum recompensare.

3º Igitur purus homo, quicumque sit, non valet pro peccato humani generis satisfacere nisi *imperfecte* et *deficienter*, scil. offerendo compensationem de se inadæquatam. Porro omne imperfectum presupponit aliquid perfectum a quo sustentetur. Ergo conveniens fuit ut imperfecta hominis satisfactio efficaciam haberet a satisfactione Christi, per quam et merendi et satisfaciendi vim, scil. gratiam, consequimur, et opera nostra satisfactiva (secundum reversibilitatis legem in corpore mystico) valorem divinum induunt.

4º Ex dictis colligitur quare D. Thomas, loquens de peccato *actuali*, dixerit (3 S. D. XV, Q. I, a. 2) hominem posse ex gratia (saltem pro alio) "secundum aequalitatem proportionis" satisfacere, hanc rationem reddens (*ibid. ad 1*) quod "sicut offensa habuit quamdam infinitatem ex infinitate divinae majestatis, ita et satisfactio accipit quamdam infinitatem ex infinitate divinae misericordiae, prout est gratia informata, per quam acceptum redditur quod homo reddere potest." Hæc certe satisfactio quodammodo æquivalens¹, nedum frustretur satisfactionem Christi, eam presupponit cœlum fundamentalē omnium peccatorum, maximeque peccati originalis, expiationem.

N.B.
~~Sufficientia
non est perfecta~~
~~Peccato~~
~~non est perfecto~~
~~Ratio misericordie~~
~~Cum misericordie~~
~~ratio est fundamento~~
~~æquivalens~~
*ad. a. p.
aut s.
recte*

Solv. obj. (cont. 2nd concl.).—OBJ. 1.—Non debet Deus plus ab homine requirere quam iste possit. Atqui potest homo actum contrarium peccato elicere. Ergo id habendum erat tanquam sufficientissima naturæ humanae reparatio.

RESP. D. M.:... quiam possit sive ut purus homo sive ut homo-Deus, C; ut purus homo tantum, S.d: potuisset absolute Deus non plus requirere, C; non convenientius fuit ut plus requereret, N.—D. m:... et hunc actum contrarium ex se elicit, N; cum gratia, S.d: quin tamen iste actus puri hominis condigne adæquet culpam humani generis, C; ita ut ei coæquetur, N.—Neg. conseq.

OBJ. 2.—In primo parente idem fuit peccatum originale et

1—Dicitur quodammodo æquivalens; nam (prout tenent plerique theologi), deest æquivalentia absoluta, eo quod gravius videtur Deum per peccatum subjici creature quam ei honorificum sit creaturam se Deo per caritatem subjicere.

Dans les motifs prochains de l'Incarnation
est ce que le premier est le motif immédiat que Dieu a voulu

Sls: Femide au peche, pas de peche, donc pas d'Incarnation.

Scot: Motif = Perfection du monde; donc même si pas de faute, Dieu
actuelle. Atqui ipse per premitentiam de peccato actuali satis-
fecit. Ergo ¹. Devant faudrait même s'incarner - Voilà

RESP. D. M: ... i.e. qualem actu utrumque ortum est, C;
eadem fuit utriusque ratio formalis, N.—D.m: ipse satis- lessence de
fecit pro peccato actuali secundum quod ex actu malo pro- la discursio
venit corruptio totius naturae, N; quantum ad corruptionem
boni personalis, S.d: per se, N; adjutorio gratiae misericor- Depente
diter elargitae intuitu futura satisfactionis Christi, et praeser- natio finaria
tim quoad poenam temporalem, C.—Neg. conseq. defuisse in-
carnationis?

OBJ. 3.—Ad salutem hominis præcipue pertinet ut Deum
reveretur. Atqui Deus magis reverendus dici debet extra
carneum quam in carne. Ergo /

RESP. C. M.—D.m: secundum se, Trans; quoad nos et
secundum quod per carnis assumptionem inducimur ad illum
melius cognoscendum, N.—Neg. conseq.

d. à qui incarne- — Pas function de party de l'incarnation
ment se produire? — Le motif ultime de l'incarnation
ut communément? ARTICULUS III. C est l'espérance & dieu pas de délivrance
Utrum, si homo non peccasset, Deus incarnatus fuisset.
Utrum obstructione parti de perte d'adulte
de l'incarnation

1^o Præmittendum est Wicelsum docuisse absolutam Incar-
nationis necessitatem; quam necessitatem in hypothesi crea-
tionis itidem defensarunt Raym. Lullus, Malebranchius
et Leibnitzius secundum Optimismi systema.—Optimismum
autem tum theologice tum philosophice falsum esse, in com-
perto est.

2^a) Proposita questio non instituitur de possibilite
quam nullus negat catholicus, sed de facto et secundum vim
præsentis decreti Incarnationem regulantis.—b) Circa quod
duplex obtinuit opinio. Scotus enim, quem seuti sunt
Suarez, Isambert, aliique nonnulli, posuit futuram Incarna-
tionem, etiam peccato non existente; verum plerique theologi
præsertim moderni contrarium sentiunt: et in hoc ducem
sectantur D. Thoma qui, quanquam in 3 Lib. Sent.
(D. I, Q. I, a. 3) utramque sententiam probabilem admiserat,

1—3 S. D. I, Q. I, a. 2, arg. 7.

Motifs prochains de l'incarnation:

Sls. le 1^{er} Remedium peccati: donc pas d'inc-
Scot le 1^{er} Perfectio mundi. donc INCARTA T.O.

1^o Les choses qui dépendent seulement de la volonté de Dieu, ne peuvent pas nous être connues que si Dieu veut nous les montrer par le S. Escri. Or le motif que partant la 1^e écriture donne de l'Incarnation, c'est le péché du premier homme. —

Il apparaît 2^o

plus probable que l'Incarnation a été ordonnée au peccatum comme remède, à tel tamen in Summa, mente proiectior, negativæ parti magis factum que assentiendum declarat.

Sans le peccatum Conclusio. — ADAMO NON PECCANTE, FILIUS DEI PROBABILITER INCARNATUS NON FUSET.

Etenim 1^o ea quae ex sola Dei voluntate proveniunt, supra omne debitum creaturæ, nobis innotescere non possunt nisi revelatione divina, præcipue in Scripturis contenta. Atqui in Sacra Scriptura ubique Incarnationis ratio ex peccato primi hominis assignatur: ergo. Min. ostend. ex illustrioribus locis, puta (Luc. XIX, 10): *Venit Filius hominis querere et salvum facere quod perierat;* (Joan. III, 17): *Misit Deus Filium suum in mundum,...ut salvetur mundus per ipsum;* et (1 Tim. I, 15): *Christus Jesus venit in hunc mundum peccatores salvos facere.*

2^o His cohæret unanimis *Patrum* traditio: paucos referamus. Ita S. Irenæus (Adv. hær. I, V, c. 14) ait: "Si non haberet caro salvari, nequaquam Verbum Dei caro factum esset." S. J. Chrysost. (Hom. 31 in Matth.): "Adeo procul abest, ne peccatores abominetur, ut solum eorum causa se advenisse testetur." Et S. August. (Serm. 175, al. 9): "Nulla causa fuit veniendi Christo Domino, nisi peccatores salvos facere. Tolle morbos, tolle vulnera, et nulla est medicinæ causa. Si venit de cœlo magnus medicus, magnus per totum orbem jacebat ægrotus."

3^o Ecclesiæ sensus perspicue elucet tum ex Symbolo Nicæno-Cpno ferente: "Qui propter nos homines et propter nostram salutem descendit de cœlis;" tum ex precibus liturgicis præsertim Sabb. Sancti, quando cantatur: "O felix culpa quæ tam ac tantum meruit habere Redemptorem!" Et iterum: "O certe necessarium Adæ peccatum quod tali morte deletum est!"

4^o *Rationes congruentiae* adducit S. Bonaventura (3 S. D. I, Q. I, a. 3), ubi ait: "Opinio dicentium Deum non fuisse incarnatum, nisi homo peccasset, magis consonat fidei pietati, quia in Scripturis ratio Incarnationis communiter assignatur liberatio a peccato. Magis quoque devotionem accedit, dicendo Deum incarnatum esse ad succurrendum tot ac tantis miseriis nostris. Deum etiam magis honorat quam opinio alia; nam illa quasi includit Deum intra perfectionem universi et quamdam necessitatatem videtur Incarnationis præfigere, dicendo opera Dei sine ea perfecta non esse."

ne pourra
faire p. Eme
conservé.

vide, à tel
deux probables

15-18

elle est
à omniel
fatos...

l'heure
certainement -

Quant à la gloire essentielle des Anges, le Christ n'est pas le premier prédestiné, bien qu'il reste supérieur aux Anges.

Christ est le 1^{er} prédestiné dans l'ordre de la réparation

QUAST. UN. ART. III.

23

5º Ad præcavendas Scoti aliorumve argutiones, diligenter notetur in omni hypothesi motivum ultimum Incarnationis esse supremam Dei gloriam, in praesenti vero œconomia motivum ejus proximum esse Redemptionem humani generis, quæ quasi medium ad gloriam Christi et Dei ulterius ordinatur. Porro nihil absurdum nec inconvenientis est quod sic Deus non decreverit Incarnationem nisi dependenter a lapsu Adæ et ex voluntate redimendi homines: siquidem ex una parte ipse non tenetur de facto velle quidquid in se melius et appetibilius est; ex altera autem parte destinatio Incarnationis ex occasione peccati, misericordiam divinam provocantis, maxime contulit in augendam Christi glorificationem et in demonstrandam Dei sapientiam ac potentiam, quatenus ex malo præstantissimum bonum eruere scivit ac valuit!

Solv. obj. — OBJ. 1. — Manente causa, manet effectus. Atqui præter liberationem a peccato multæ sunt aliæ causæ Incarnationis. Ergo.

RESP. Trans. M.—D.m : ...quæ tamen peccatum præsupponunt, C; quæ non pertinent ad remedium peccati, S.d.; præcisive, C; comprehensive, N.—**Neg. conseq.**

Rationes adductæ in præc. art. pro Incarnatione præsupponunt peccatum, scil. hominem ad corporalia delapsum et per corporalia seu per assumptam carnem a Verbo Dei reparandum; si enim homo non peccasset, perfusus lumine sapientiae et justitiae rectitudine perfectus immediate fuisset. — Quæ vero motiva de se, et præcisione facta a Redemptione humani generis, sufficientia fuissent ad Incarnationem, ea tamen de facto et comprehensive connectuntur cum prævisione peccati, cuius reparatio fuit causa motiva Verbi incarnandi.

OBJ. 2.—Ad omnipotentiam divinam pertinet ut se per infinitum effectum demonstret et universum perficiat. Atqui id requirit Incarnationem. Ergo.

RESP. D. M : ...ut se demonstret per effectum infinitum ex modo productiois atque universum debita perfectione compleat, C; ut se demonstret per effectum in se infinitum et universum supernaturaliter seu præter debitum perficiat, N.—**C.d.m** : effectus infinitus in se et supernaturalis mundi

1—Cfr. Cajetanus (in. h. art.), qui omnia argumenta Scotti subtiliter dissolvit.

Anges sont prédestinés avant le Christ, non ex merito Christi
Hommes sont ... après le Christ en vertu des merits qu'ils peuvent en faire.

Christ est le premier prédestiné dans l'ordre de la réparation
mais non par rapport aux Anges. La gloire essentielle est
antérieure à la Rédemption, une gloire accidentelle l'a été donnée par l'acte.

Le bien le plus grand doit être voulu le 1^{er}, ensuite le bien secondaire
On ~~peut~~ l'Incarnation est un plus grand bien que la Rédemption
in ordine ad Redemptiōnēm

perfectio requirunt Incarnationem, C; effectus infinitus secundum productionem *ex nihilo* et naturalis rerum perfectio requirunt Incarnationem, N.—*Neg. conseq.*

OBJ. 3.—Natura humana, etiam peccato non existente, capax fuisset gratiae Unionis hypostaticæ. Atqui Deus non subtrahit bonum cuius natura nostra est capax. Ergo.

RESP. D. M:...secundum potentiam *naturalem*, N; secundum potentiam *obedientialem* qua quævis creatura obedit divinae potentiae ad nutum, C.—C.d.m: scil. Deus semper implet capacitem *naturalem*, C; capacitem *obedientiam*, N.—*Neg. conseq.*

ORJ. 4.—Prædestinatio Dei non potest non impleri. Atqui Christus ab æterno prædestinatus est (Rom. I, 4). Ergo etiam sine peccato etc.

RESP. D. M:...independenter ab omni futurorum præscientia, N; secundum ea quæ prævisa et præstituta sunt, C.—D. m: prædestinatus est æternali Dei actu, C; independenter a prævisione lapsus humani generis, N.—*Neg. conseq.*

Prædestinatio presupponit præscientiam eorum quæ sunt in finem prædestinationis ordinanda; et ideo sicut Deus prædestinat salutem alicujus hominis per orationes aliorum implendam, ita etiam prædestinavit opus Incarnationis in remedium peccati æternaliter prævisi.

OBJ. 5.—Incarnationis mysterium fuit primo homini revelatum. Atqui Adam non potuit esse præscius sui casus. Ergo.

RESP. D. M:...secundum quod ordinatur ad gloriam Dei et humanæ naturæ sublimationem, C; quasi revelari simul debuerit secundum omnes suas causas, N.—C.d.m:...et ideo non cognovit tunc Incarnationem ut *redemptivam*, C; neque ut *glorificativam*, N.—*Neg. conseq.*¹

1—Alias objectiones refutatas invenies penes Billuart, Diss. III, a. 3.

finis effectus non est tempus malitiae

ARTICULUS IV.

Utrum principalius Christi incarnatio facta fuerit ad tollendum peccatum originale quam actuale.

Ex præcedentibus liquet finem *proximum* Incarnationis fuisse liberationem hominis a peccato. Peccatum autem duplex est, originale seu origine a parentibus contractum, et actuale seu propria voluntatis actu commissum. Hinc suborum est dubium, sequenti propositione enodandum.

Conclusio.—CHRISTUS VENIT IN MUNDUM AD DELENDUM PECCATUM TUM ORIGINALE TUM ACTUALE, PRINCIPALIUS TAMEN AD DELENDUM ORIGINAL^T

1^a PARS certo evincentur ex SS. Litteris (1 Joan. I, 7): *Sanguis J. C. emundat nos ab omni peccato*; et (II, 2): *Ipse est propitiatio pro peccatis nostris, non pro nostris autem tantum, sed etiam pro totius mundi.*—Id vero intellegendum est quoad plenam sufficientiam auxillii praestiti, non quoad omnimodam efficientiam; siquidem Incarnationis opus accommodari debuit conditioni hominis, qui ex libertate habet ut possit Christi beneficia recusare, juxta illud (Joan. III, 19): *Lux venit in mundum, et dilexerunt homines magis tenebras quam lucem.*

2^a PARS concl. ostend:—1^o ex illo (Joan. I, 29): *Ecce Agnus Dei, ecce qui tollit peccatum mundi*; quod expōnens Beda (Hom. in Oct. Epiph.) ait: “Peccatum mundi dicitur originale peccatum, quod est communio totius mundi.”

—2^o Ratione. Christus ad illius peccati deletionem principalius venisse censendus est quod est simpliciter majus. Atqui, simpliciter loquendo, peccatum originale majus est: ergo. Min. prob. Licet peccatum actuale sit majus intensive quam originale, quia plus habet de voluntario; tamen peccatum originale gravius est extensive, in quantum inficit totum humanum genus. Atqui hæc est major gravitas simpliciter dicta, a) tum quia opponitur bono communio quod “divinus et eminentius est quam bonum unius” (1 Ethic. c. 2), b) tum quia fons est et origo peccatorum actualium ad quæ nativa propensione inclinat. Ergo.

*Christus officia une
sufficiunt
tant que che*

Solv. obj.—OBJ. 1.—Deus incarnatus est ad medendum peccato quod gravius ex gravitate poenæ judicatur. Atqui peccato originali levissima poena debetur (August. c. Julianum, l. V, c. 11). Ergo.

• RESP. C. M.—D.m:...in ratione poenæ, C; in ratione mali, N.—*Neg. conseq.*

Poena, qua talis, respondet quantitati intensivæ peccati seu gradui voluntarii, qui minor est in peccato originali quam in actuali; unde minor poena originali culpæ debetur.—Atta-
men hæc poena, quæ consistit in privatione fruitionis Dei attingente totum humanum genus, certe secundum *mali* rationem maxima est.

OBJ. 2.—Peccato originali debetur poena damni, non sensus. Atqui Christus pœnam sensus sustinuit, non damni. Ergo.

RESP. D. M:...in futura retributione, C; quin pœnalitates præsentis vitæ ex peccato originali procedant, N.—C.m.—*Neg. conseq.*

OBJ. 3.—Quisque æstimare debet Christi beneficia quasi sibi soli et pro suorum peccatorum deletione præstata, juxta illud (Gal. II, 20): *Dilexit me, et tradidit semetipsum pro me.* Atqui propria peccata nostra sunt actualia, dum origi-
nale commune est. Ergo.

RESP. D. M:...eo sensu quod in unoquoque remedium peccati ita perfectum est ac si uni tantum concessum fuisse, C; quasi illud remedium non fuerit principaliter toti naturæ adhibitum, N.—C.m.—*Neg. conseq.*

ARTICULUS V.

Utrum conveniens fuerit Deum incarnari ab initio mundi.

Convenientia Incarnationis modo inquirenda est relate ad *tempus*; quod quia considerari potest secundum initium, medium et finem, extrema excludenda sunt ut aptior Christi ætas constituatur in medietate sæculorum.—Ordiamur a removendo *initio mundi*.

Habacuc: In medio annorum nostra facies
"Tu appareras in milieus des Tempel."

QUAEST. UN. ART. V.

27

Conclusio.—CONVENIENS NON FUIT UT DEUS A PRINCIPIO HUMANI GENERIS INCARNARETUR.

Etenim 1º in operibus Dei, tam sapienti consilio dispositis, ab esse rei ad ejus convenientiam valet illatio. Atqui Deus prædefinivit Incarnationem futuram *in medio annorum* (Habacuc, III, 2) et *in plenitudine temporis* (Gal. IV, 4). Ergo convenientia Christianæ ætatis admittenda est præ tempore primordiali.

2º a) Conveniens non fuit Deum incarnari ante peccatum: quandoquidem medicina non datur nisi jam iufirmis. Unde Dominus ait (Matth. IX, 12-13): *Non est opus valentibus medico, sed male habentibus...non enim veni vocare justos, sed peccatores.*

b) Sed nec etiam statim post peccatum, ob quadruplicem rationem.

Primo, ob conditionem hominis.—Nam, quia humanum peccatum ex superbia provenerat, eu modo erat homo liberandus quo humiliatus agnosceret se liberatore egere. Atqui hoc requirebat certum illud temporis spatium, quod interfuit post casum Adæ, antequam Filius Dei mitteretur: siquidem sub lege naturæ, obscurata primæva fide, homo expertus est ignorantiam sui intellectus; lex autem Moysis medela fuit illius ignorantiae, sed naturæ, non legis, vitio excrevit debilitas voluntatis morbusque invaluit; ita ut, cognita sua infirmitate, homo clamaret ad medicum uberiorisque gratiæ expeteret auxilium.

Secundo, ob ordinis exigentiam.—Promotio enim in bonum, secundum innatam rerum legem, ab imperfecto ad perfectum progreditur. Atqui homo per Incarnationem in summum bonum erat promovendus. Ergo congruebat ut prius in servitute dejectionis vitæ jaceret quam ad nobilitatem christianæ libertatis accederet, juxta illud Ap. (1 Cor. XV, 46-47): *Non prius quod spirituale est, sed quod animale, deinde quod spirituale. Primus homo de terra, terrenus; secundus homo de cœlo, cœlestis.*

Tertio, ob dignitatem Verbi incarnati.—Pertinebat enim ad Christi venturi majestatem ut secundum temporum progressum historique evolutionem augusta ejus persona divinaque munera prenuntiarentur. Atqui id contigisse constat, juxta illud August. (Tract. 31 in Joan. n. 5): “Quanto

major judex veniebat, tanto præconum longior series prædebat; " quippe Patriarchæ primum et cumulatim, postea vero et divisim Prophetae, sacerdotes, et reges, summam Christi scientiam et sanctitatem et potestatem præluserunt ac præfigurarunt. Ergo.

*ofin d'allemand
mu plus grande
monde*

Quarto, ob efficaciam Redemtionis. — Opus Incarnationis fieri oportebat eo tempore quo majorem hominum multitudinem efficaciori influxu attingeret. Porro, si a principio mundi perfectum fuisset, fidei et caritatis fervor temporis prolixitate teperceret; nam etiam secundum præsentem statum circa finem mundi languescat multorum religio (Luc. XVIII, 8). Ergo.

Solv. obj. — Obj. 1. — Incarnationis opus ex immensitate divinæ caritatis processit. Atqui caritas non tardat subvenire indigenti amico. Ergo.

RESP. C. M. — D.m:...salva tamen negotiorum opportunitate et personarum conditione, C; inconsulte et secluso prudentiae consilio. N.—*Neg. conseq.*

Si medicus præcipitanter nec satis disposito infirmo medicinam ministraret, minus proficeret vel etiam magis eum laderet quam juvaret: ea de causa Deus remedium humano generi exhibendum distulit.

Obj. 2. — Christus venit ad salvandos homines. Atqui plures salvati fuissent, si a principio apparuisset. Ergo.

RESP. C. M. — D. m:...plures in antiquitate, *Trans*; plures simpliciter, N.—*Neg. conseq.*

Profecto 1^o nostrum non est judicare quosnam et quot homines salvare Deus in sua prædestinatione debuerit (cf. Aug. 1. de Don. persev. c. 11). — Verum 2^o falsum videtur, *simpliciter* loquendo, quod Incarnatio anterius facta magis humanæ saluti favisset. Nam a) ex una parte nou defuere ante Christum sufficientia gratiæ auxilia. b) Ex altera parte (præter rationes jam supra allatas) dilatio Incarnationis id ad salutem hominum perutile habuit ut Christus in clariori historiae lumine appareret ejusque missio prophetiarum antecedentium argumento comprobaretur: quod in hypothesi contraria defuisset.

Obj. 3. — Opus gratiæ, subindeque Incarnationis, non est minus ordinatum quam opus naturæ. Atqui natura initium sumit a perfectis. Ergo.

RESP. C. M.—D.m: ...in diversis subjectis, quatenus perfectum est illud quod alia ad perfectionem adducit, *C*; in uno eodemque subjecto, *N*.—*Neg. conseq.*

ARTICULUS VI.

Utrum Incarnatio differri debuerit usque ad finem mundi.

Remoto uno extremo circa opportunitatem temporis Incarnationis, removendum occurrit et aliud, ut *medietas* sæculorum velut accommodatior Christi ætas concludatur.

*Conclusio.—NON FUIT CONVENIENS VERBI INCARNATIO-
NEM DIFFERRI USQUE IN FINEM MUNDI.*

Prob. triplici ratione.

Primo, ex unione divinae et humanae naturæ.—Sicut enim superius indicavimus, in eo quod perficiendum est imperfectum tempore præcedit perfectum; at in eo quod est causa efficiens perfectionis, perfectum imperfecto antecedat necesse est. Atqui in opere Incarnationis utrumque concurrit: natura enim humana, vocata ad subsistentiam Verbi, summam perfectionem accepit, ideoque non decuit quod a mundi initio Deus incarnaretur; sed ipsum Verbum incarnatum causa est efficiens humanae perfectionis in eis qui ejus gratiæ participes flunt, ideoque non debuit Incarnationis opus usque in finem mundi differri. Verum perfectio gloriæ, ad quam ultimo natura nostra perducenda est, processum hunc progressivum absolvit.

Secundo, ex effectu humanae salutis.—Tunc fieri congruebat Incarnationem quando, jam exploratâ humana indigentia, et antequam totaliter religionis sensus extinguueretur, huminitas Liberatorem exposcebat. Atqui, post æstatem patriarchalem et mosaicam, planum erat quod homo non valeret peccati jugum excutere; si vero salutis remedium dilatum amplius fuisset, Dei notitia et reverentia morumque honestas penitus evanuissent. Ergo.

Tertio, ex manifestatione Christi Salvatoris.—Illud tempus Incarnationi maxime conveniebat quo virtus et excel-

Brunck
*causa efficiens
perfectum imperfecto antecedere
atque esse causa
et suervatio*

*ut Christum
appari vellent.*

lentia Christi majorem ederentur in lucem et clarius splen-descerent. Porro tempus istud non est finis mundi, sed ipsa ætas qua reapse Verbum incarnatum est: quippe Christus, sic de stirpe David in horizontem mundi emersus, appetet velut sæculorum vertex, centrum historiæ¹ in quod omnia antecedentia conspirant et cui omnia consequentia subordi-nantur; eminent velut supremus dominator una manu Syna-goga in regens alteraque Ecclesiam instituens, multiplicans media salutis et salvans homines modo per fidem futuri, modo per fidem præsentis et præteriti. Ergo.

Solv. obj.—OBJ. 1.—Secundum legem progressus, quod est maxime perfectum debet esse omnino ultimum in tem-pore. Atqui summa humanitatis perfectio est in unione cum Verbo. Ergo.

RESP. *D. M.*:...quoadusque perfectum illud consideretur ut terminus motū progressivi, *C.*; si consideretur etiam ut principium perfectionis in aliis, *N.*—*C.d.m.*—*Neg. consec.*

OBJ. 2.—Non est conveniens fieri per duo quod per unum fieri potest. Atqui unus Christi adventus sub fine mundi sufficere poterat ad salutem humanæ naturæ. Ergo.

RESP. *C. M.*—*D.m.*: adventus Christi *judicantis*, *N*; adventus Christi *miserentis*, *S.d.*: et hic misericordiæ adven-tus coincidere debebat cum adventu judicii, *N*; oportebat misericordiam præcedere, judicium vero subsequi, *C.*—*Neg. consec.*

1—Cf. Bossuet, *Disc. sur l'Hist. universelle*, ubi philosophiam historiæ peregregie evolvit.

B. 1^o unde est?
B. 2^o unde est?

Zuiden? Mijner constatant? Zuiden?

DISPUTATIO SECUNDA

DE MODO SEU NATURA UNIONIS HYPOSTATICÆ

Comperta jam Incarnationis convenientia, proximo gressu ducimur ad indagandum modum seu essentiam illius unionis tum in se (Q. I), tum ex parte personæ assumentis (Q. II), tum ex parte naturæ assumptæ (Q. III).—Etsi enim “quodam incomprehensibili et ineffabili modo¹” Deus se humanæ naturæ sociaverit, ita ut hæc “quo attolleretur altius non haberet, sicut pro nobis ipsa divinitas quoque se deponeret humilius non habuit²”; tamen ipso SS. Doctorum exemplo sollicitamur ad tantum mysterium modeste perscrutandum variisque rationibus illustrandum.

QUÆSTIO PRIMA

DE UNIONE HYPOSTATICA IN SE

Unionis hypostaticæ natura investigari potest vel secundum *substantiam* qua constet (art. 1-3), vel secundum *proprietas* quibus ornetur (art. 4), vel secundum *causandi rationes* a quibus pendeat (art. 5).—Substantia vero Unionis definiri debet excludendo quod facta fuerit in *natura* (art. 1), et concludendo quod facta sit in *persona* (art. 2), propterea que in *hypostasi* (art. 3). Ig' tur quæstio S. Thomæ ad quinque articulos, brevitatis gratia, congrue reduci poterit.

1—*S. Thom.* Opusc. III, c. 6.

2—*S. August.* l. de Præd. Sanct. c. 15.

ARTICULUS I.

*Natura prout de
Maur. & du nos.*

Utrio in natura

Efficiens unionis = unus

Deinde

*esse ad
occidentem*

Utrum unio Verbi Incarnati sit facta in natura.

1º Circa titulum adverte, naturæ nomen a nascendo derivatum esse ad significandum principium generationis viventium et, communius, quodlibet principium intrinsecum motus; item fuisse extensum ad designandum formalem terminum generationis qui est essentia speciei.—Nunc ergo de natura loquimur, quatenus significat essentiam vel quidditatem rei.

2º Perspecta res est unionem *in natura* eam esse qua plura inter se convenient et concurrunt ad constituendam unam novamque, ex componentibus resultantem, naturam seu essentiam.

3º *Eutyches*, auctor *Monophysismi*, ut salvaret contra Nestorium unitatem personæ *in Christo*, docuit duas naturas, divinam scil. et humanam, distinctas quidem ante unionem, post unionem in unam coaluisse: quod ille imperitus monachus explicuisse fertur (probabilius) secundum absorptionem quamdam humanæ naturæ a divina, *Dioscorus* vero, Patriarcha Alex. aliquie monophysitæ potius secundum quamdam naturarum mixtionem seu confusionem.

Conclusio.—**IMPOSSIBILE EST UNIONEM VERBI INCARNATI FACTAM ESSE IN NATURA.**—*Fides* hac in re firmata est contra Eutych. a *Cone. Chalced.* (œcum. IV, an. 451), in quo Patres solemniter adhæserunt celebri Epistolæ S. *Leonis I* ad Flavianum, et confessi sunt (act. 5) “Filiū Dei unigenitum in duabus naturis inconfuse, immutabiliter, indivise, inseparabiliter agnoscendum, nunquam sublata differentia naturarum propter unionem.”

1º Sic ex *Scriptura* S. Leo M. (*cit. ep. cap. IV*) dualitatem naturarum tuetur: “Unus idemque est vere Dei Filius, et vere hominis filius. Deus per id quod *in principio erat Verbum et Verbum erat apud Deum, et Deus erat Verbum*¹, homo per id quod *Verbum caro factum est et habitavit in nobis*; Deus per id quod *omnia per ipsum facta sunt et sine ipso factum est nihil, homo per id quod factus*

1—*Joan. c. I.*

Celui qui est à la même nature que sa mère -

8th p. 5f

est ex muliere, factus sub lege, Gal. IV, 4."—Accedit illud Ap. de Christo (Phil. II, 6-7): *Qui, cum in forma Dei esset... semetipsum exinanivit, formam servi accipiens; ex quo colligitur duplarem in Christo formam seu naturam inconfuse ponendam esse.*¹

2º Ratione S. Thomas tam potenter hæreticos premit ut nullum eis effugium relinquat.

Sane vero, tripliciter aliquid unum ex duobus vel pluribus constitui potest: *primo ex pluribus integris completis non transmutatis*, quo modo ex lapidibus congregatis lignisve dispositis fit acervus vel domus; *secundo ex completis seu perfectis, sed transmutatis*, sicut ex elementis chimicis fit compositum; *tertio ex aliquibus non permixtis vel permutatis, sed incompletis*, sicut ex anima et corpore fit homo. Atqui nullo ex his modis effici potuit unio Incarnationis. Ergo. *Prob. min. per partes.*

Non primo modo.—Nam *a)* conjunctio secundum meram juxtapositionem vel ordinem non est substantialis, sed *accidentalis*; quod de Incarnatione dici haud posse, mox contra Nestorium persuadetur. —*b)* Praeterea in tali coniunctione, componentibus actu remanentibus, *non fit unum simpliciter, sed secundum quid*; quod summae Christi unitati repugnat. —*c)* Amplius, forma rerum sic conjunctarum non est natura, sed magis *ars*, ut patet de forma domus, et sic non consti-tueretur una natura in Christo, ut Eutychiani volunt.

Non secundo modo.—*a)* Siquidem, quæ mixtione chimica uniuntur, corrumpuntur et *mutantur*. Porro natura divina est omnino immutabilis.—*b)* Item, in mixto *habetur species diversa* a quocumque componente; sic enim caro specie differt a substantiis nutritoriis. Ergo Christus non esset ejusdem naturæ cum matre Maria seu verus homo: quod falsum est. —*c)* Insuper, ex his quæ *nimum distant commixtio fieri* non potest, sed unius componentis *species solvitur*, puta si quis guttam aquæ amphoræ vini infundat. *Atqui natura divina humanam in infinitum excedit.* Ergo in Monophysitarum hypothesi sola natura divina, alteram absorbens, subsisteret.

*Ex corpore et anime
fit homo
Corpus in incompl.
Anima in comple
Opin. in deo
hinc unitate*

Non tertio modo.—*a)* Nam utraque natura, divina scil. et humana, secundum rationem suam completa et *perfecta* est.—*b)* Præterea, natura divina et humana non possunt aliquod tertium constituere: neque per modum *partium quantitativarum*, quoniam Deitas incorporea est; neque per modum *formæ et materie*, tum quia divina natura nequit esse forma alicujus presertim corporei¹, tum quia in illa hypothesi species resultans foret prædicabilis de pluribus actu vel potentia, seu, aliis verbis, esse possent plures Christi sub quadam specie communi.—*c)* Tandem Christus non esset neque humanæ neque divinæ naturæ; quandoquidem differentia addita *variat speciem*, sicut unitas numerum.

Solv. obj.—*Obj. 1.*—*S. Cyrillus. Alex.* in actis *Conc. Chalc.* inducitur dicens: “Non oportet intelligere duas naturas, sed *unam naturam Verbi Dei incarnatam.*” Et frequenter apud eum occurrit locutio: *unio naturalis vel secundum naturam.* Ergo.

RESP. *a)* *S. Cyrillum* negasse duas naturas hypostaticce separatas, sed intellexisse naturam divinam conjunctam esse carni in persona.—*b)* Hinc in ore ejus unio naturalis vel secundum naturam idem est ac *unio physica et substantialis*, quam opponebat unioni morali et accidentalí assertæ a Nestorio.—*c)* Non diffitemur hunc loquendi modum æquivocum fuisse, quam æquivationem usus ecclesiasticus postea sustulit; sed ipsem S. Doctor sese explicuit, v. g. in Ep. 2 ad Successum, necnon in Ep. ad Joan. Antioch., ubi ait: “Unus est Dominus I. C., quamvis *differentia naturarum non ignoretur*” etc.—*d)* Cæterum, uti refertur a *D. Thoma*, Synodus cœcum. V (Cptana II) auctoritative exposuit verba Cyrilli secundum unitatem *subsistentię*².

OBJ. 2.—Legitur in *Symb. Athan.*: “Sicut anima rationalis et caro unus est homo, ita Deus et homo unus est Christus.” Atqui anima rationalis et caro convenienter in constituta una natura. Ergo.

RESP. D. M. ... ex parte et analogice, *C*; sub omni respectu et univoce, *N.*—*C. r.*—*Neg. conseq.*

¹—Cf. *de Deo*, Disp. II, Q. I, a. 8; Disp. III, Q. II, a. 2.

²—Cf. Petavius, *de Incarn.* l. III, c. 4.

1^o Ex anima et corpore constituitur in unoquoque nostrum duplex unitas, naturæ et personæ: *naturæ* quidem, in quantum anima unitur corpori ut forma materiæ, unde resultat humanum compositum, et quantum ad hoc non attenditur similitudo; *personæ* vero, quatenus unus homo subsistit in carne et anima, et huic unitati comparatur Christus subsistens in natura divina et humana.—2^o Accedit aliud: quemadmodum enim anima, utpote forma subsistens et intelligens, communicat esse proprium corpori eoque tanquam *instrumento conjuncto* utitur, ita Persona Verbi utrumque sibi vindicat respectu humanitatis assumptæ; ideoque præsens comparatio, licet inadæquata et analogica, cæteris quibusque exemplis naturalibus præferenda est.

OBJ. 3.—Duarum naturarum una non denominatur ex altera, nisi aliquo modo in invicem transmutentur. Atqui divina natura dicitur incarnata (S. Cyr.), humana vero deificata (S. Greg. Naz.). Ergo.

RESP. *D. M.*:...una non denominatur ex altera *stricto sensu* nisi... *C.*; *latrio sensu*, *N.*—*D. m.*: quia Divinitas est unita carni, caro vero Divinitati, in esse personali, *C.*; ad significandam conversionem unius naturæ in aliam, *N.*—*Neg. conseq.*

ARTICULUS II.

Utrum unio Verbi incarnati sit facta in persona;—de Divinitate Christi.

Potissimum aggredimur totius tractatus quæstionem, quæ cardo seu nodus mysterii merito judicabitur.—Plura præloqui opus est.

1^o a) Compertus est error tum antiquorum tum recentiorum *Divinitatem Christi* negantium; cuius impietatis coriphæi nuper extiterunt Strauss et Renan.—Strauss quidem in suis operibus (*Vie de Jésus* et *Nouv. Vie de Jésus*) magno eruditioñis scientiæque criticæ molimine adstruere connisus est Christum ab Evangelistis descriptum magis mythicum quam historicum esse; eum autem sub adspectu mythico-

ideali habendum esse tanquam exemplar quoddam et symbolum typicæ perfectionis humanæ speciei in qua secundum progressum evolutionisticum coëunt Infinitum et finitum : hæc sane produnt Pantheismum Hegelianum. — *Renan* clarior est. Totum ejus studium in eo consistit ut supernatura naturaliter explicet ; idcirco, multiplicatis verborum artificiis atque sophismatibus, inferre non hésitat Christum fuisse hominem tantum, etsi præstantissimum.

b) Nestorius, licet Christum esse Deum ore profiteretur, duas tamen in eo distinguebat personas, divinam sc. et humanam, quas dicebat multipliciter sibi unitas, nempe per inhabitationem Verbi in homine quasi in templo, per unitatem affectuum et voluntatum, per officium instrumentale quod homo Verbo præstabat, per consortium honoris a Verbo in hominem redundantis, tandem per communicationem nominum qua homo Deus Deique Filius vocatur¹. Hanc ob unionem mere moralement, Christum Deiferum potius quam Deum appellabat Nestorius ; et B. Virginem dicebat Christiparam, Deiparam vero negabat. — In errorem Nestorianum manifeste concedit positio quorumdam² repetens identitatem personæ sive a conscientia sui (Günther) sive a libertate (Maine de Biran) ; siquidem, duplicata conscientia et libertate cum duabus naturis, persona et ipsa duplicitur oportet.

^{2º} Unanimis catholicorum sententia habet Christum esse verum Deum, quatenus unio duarum naturarum facta est in persona ; ast circa rationem explicandi hanc pers. ^{re}olem unionem variae prodierunt opinione pro diverso modo intelligendi habitudinem inter naturam et suppositum.

a) Præprimis recolenda est genuina notio suppositi ac personæ. — Alibi (*de Deo*, Disp. II, Q. I, a. 3) post Boëtium aliosque christianos philosophos definivimus suppositum : substantia completa, individua, per se subsistens incom-

1.—Ex *S. Thom.*, hic Q. II, a. 6.

2.—Huc spectat prop. 27^a *Rosminii*, damnata a S. Off: *In humilitate Christi humana voluntas fuit ita rapta a Sp. S. ad adhærendum Esse objectiveo, i. e. Verbo, ut illa Ipsi integre tradiderit regimen hominis, et Verbum illud personaliter assumpserit, ita sibi uniens naturam humanam. Hinc voluntas humana desit esse personalis in homine, et cum sit persona in aliis hominibus, in Christo remansit natura.*

municabiliter; quæ quidem substantia si sit naturæ rationalis, vocatur *persona*. Itaque ad rationem suppositi et personæ requiritur *præsuppositive* ut sit *substantia* (non accidens), *completa* (non pars), *singularis* (non communis); requiritur autem *formaliter* ut sit *per se subsistens incomunicabiliter*, nempe ut gaudeat per seitate independentiæ et incommunicabilitatis, quatenus nec ab alio tanquam a fulcro sustentari egeat, nec alteri tanquam termino communicari valeat.—Quænam vero habitudo sit atque distinctio naturam inter et suppositum, res est satis controversa.

b) Scotus, quem secuti sunt inter modernos *Franzelin*, *Hurter*, *C. Pesch*, etc, solam *distinctionem rationis* agnovit, docens ipsam naturam singularem vocari suppositum secundum quod suppositalitas addit naturæ *negationem communicationis* actualis vel *aptitudinalis* (naturaliter) ad aliud suppositum.—Alii, quibuscum recentius consentit *Billot*¹, reale quidem discrimen admittunt, sed eo sensu quod suppositum nihil aliud dicat præter naturam quam *eose existentiae* realiter ab illa discreturn.—Quidam theologi, duce *Squaregio*, concedunt subsistentiam esse modum quemdam substantialem quo natura singularis terminatur, verum, quia identificant in creatis existentiam cum natura, coguntur modum illum significare ut supervenientem rei jam in esse constitutæ.—Tandem *Thomistæ*, post *Cajetanum*, eamdem distinctionem realem inter naturam et suppositum explicant per modum seu terminum completivum naturæ, ita ut hæc, nondum existens, vi illius termini ultimæ capax fiat existendi et operandi.

c) Porro, quod in omnibus creatis realiter supporitum a natura distinguitur, signate tradit *S. Thomas* (*Quodl. II*, Q. II, a. 4) ubi docet *soli Deo* identitatem suppositi et naturæ convenire; hoc ipsum colligitur ex (*III, Q. IV, a. 1-2 ad 3*) ubi ab Auctore voces, *corrumpi*, *impediri*, de personalitate prædicantur, item ex (*III, Q. XVII, a. 1*) ubi affirmat in solo Deo non differre *quod est* et *quo est*: sub hac luce, dubia *S. Doctoris* loca declaranda sunt.—Ex eodem *D. Thoma* (heic et alibi) licet argumentum probabilius saltem confidere: si qua est res cuius natura claudat in sua ratione

1—*Comm. in Sum. theol., de Verbo. Inc. quæst. II* (1896).

essentiali quidquid est perfectionis et actualitatis ideoque ipsam existentiam, in illa, eaque tantum, locus dari nequit distinguendi realiter suppositum a natura. Atqui solus Deus tanta pollet actualitate et simplicitate; in reliquis vero, praeter rationem speciei accipere est vel principia individuantia quae non expresse includuntur in natura specifica materialium, vel saltem accidentia et esse existentiae quae superveniunt formae per se individuant immaterialium. Ergo in his, non obstante identitate naturae specificae cum numerica, subindeque in omnibus creaturis, realiter distinguere debeamus suppositum a natura etiam singulari; quatenus haec dicit subjectum quo tantum accidentium et existentiae, suppositum vero significat subjectum *quod* existit, agit et patitur.

realiter

d) Liquet igitur subsistentiam formaliter sumptam non esse meram *negationem*: quod nimis refragatur perfectioni contentae in ratione subsistendi.—Realis autem distinctio, quam modo propugnavimus, inter naturam et suppositum (quidquid in contrarium sentiat laudatus *Billa*) nobis videatur esse *modalis* eo sensu quo Thomistae, praeente *Cajetano*, D. Thomam interpretantur. Nam *Angelicus* in plerisque locis suppositum exhibet velut *totum* quoddam¹ vel quiddam *completum*² cuius natura est pars formalis, et cui existentia *accedere* censetur³. Recte ergo suppositalitas concipiatur tanquam *modus realis* seu *terminus naturam comprehens* in linea substantiae eamque ultimo coaptans ad existendum et operandum ut principium *quod*, absque possibili communicatione ad aliud suppositum⁴.—Quandocunque autem docet S. Thomas (puta Quodl. IX, a. 3 et hic Q. XIX, a. 1 ad 4) quod “esse est suppositi proprie” vel quod “esse pertinet ad ipsam constitutionem personae,” sensus non est personam constitui formaliter per solum esse existentiae, sed personalitatem in sua realitate respectum dicere ad existentiam veluti ad propriam actualitatem.

1—*Sic*, art. 2;—Quodl. II, Q. II, a. 4.

2—*C. Sent.* D. V, Q. III, a. 3;—III, Q. II, a. 3 ad 2.

3—III, Q. XVII, a. 2 ad 1.

4—Cf. Cajet. in III, Q. II, a. 2 et Q. IV, a. 2;—Satolli, *ibid.*, presser. tim in Appendix, pp. 63-70;—Lorenzelli, *Metaphys. Gen.*, P. II, Lect. VII.

Per modum 3º Antequam unionem *personalem* seu hypostaticam Verbi et naturæ humanæ directe introspiciamus, propositum est in prævia conclusione fundamentum catholici dogmati consituere demonstrando contra haereticos et incredulos *Divinitatem Christi*.—Verum summa tantum argumentorum capita indicabimus, lectores remittentes ad Apologetas.

Conclusio 1º.—JESUS CHRISTUS EST VERUS DEUS; prout solemniter in *Conc. Nicæo I* definitum est.

j. Prob. 1º adversus haereticos qui revelationem divinam admittunt.

a) Omissis cæteris *Scripturæ* libris et locis¹, appello *Ep. ad Hebreos*, in qua Apostolus, ut averteret Judæos ab observantiis legalibus, præcipuo studio excellentiam Christi, auctoris Novæ Legis, commendat, ejusque Divinitatem multiformi testimonio illustrat.—Sic non solum Christus vocatur *Filius Dei*, eique tribuuntur plerique *characteres Divinitatis*, uti immutabilitas, omnipotentia, vis creatrix et gubernatrix, sed et explicite nominatur *Deus* (I, 8): *Thronus tuus, Deus, in sæculum sæculi*.—Præstantia quoque sacerdotii Christi præ sacerdotio Mosaico extollitur, quia novus *Pontifex* purissimo sanguine emundat conscientiam a peccatis (IX, 14), efficaciam universalis et infinita: quæ certe propria Dei sunt.

b) Ex traditione accipiuntur vetustiora suffragia. Ait *Clemens Rom.* (*Ep. 1 ad Corinthios, cap. 2*): “*Dei... passiones vobis præ oculis erant.*” Et *Ignatius M.* (*ad Ephesios, n. 18*): “*Deus nôster J. C. in utero gestatus est a Maria juxta dispensationem Dei, ex semine quidem Davidis, Spiritu autem sancto; qui natus est et baptizatus est ut passione aquam purificaret.*” Succedit *Tertullianus* (*de Carne Christi, c. 5*): “*Nonne, inquit, vere crucifixus est Deus? Nonne vere mortuus, ut vere crucifixus?*”² —Abstinemus a referendis posteriorum Patrum sententiis, quæ certatim Divinitatem Christi resonant.

1.—Vide *De Deo trino*, Disp. VII, Q. I, a. 1-2.—Evangelium *Joannis* tam luouenta præbet argumenta pro Divinitate Christi, ut Rationaliste satius duxerint illud repudiare.

2.—Tres illos antiquitatis testes citavimus ex *Patrol. Migne*.—Cf. *Petavius, de Incarn.* I, III, c. 9; —*Mgr Ginoulhac, Hist. du Dogm. Cath.*; —*Zigliara, Propædeutica*, I, III, c. 17.

*Proba de divinitate
de Musum effigie
Naturalis honestate
sed regis communis
abilitatem*

c) Non solum mysteria *vitæ Christi*, scil. nativitas ex Virgine, Magorum adoratio, descensus Sp. S. in baptismo, transfiguratio, tempore mortis naturae commotio, etc, hominem-Deum revelant¹, sed tota Christianismi œconomia, Redemptionis adæquate ratio, Ecclesiae infallibilitas, sacramentorum, præsertim SS. Eucharistiae, institutio, cultus liturgicus idem dogma subaudiunt et demonstrant.

Prob. 2º contra Incredulos et Rationalistas.

a) Certum est ex historia—et id ipsi increduli fassi sunt—gentes ante Christum intima quadam præsensione *exspectasse* Liberatorem, Regem, Dominatorem, imo et *Deum*, qui colapsum mundum restauraret hominesque ab imperio mali eriperet². Porro adventus Christi (seu Salvatoris illius quem Deum confitemur) gentium exspectationi adamussim respondet tum quoad finem humanæ reparationis, tum quoad plerasque circumstantias divinae ejus missionis³. Ergo.

b) Item, Christus non modo implicite, sed et explicite stepius *affirmavit* se esse Deum tum coram discipulis, tum coram populo, tum coram judicibus suis, illaque affirmatio reperitur non solum in Evangelio Joannis quod adversarii (immerito sane) respouunt, verum etiam in aliis Evangelii minus eis suspectis. Atqui tam soleunis assertio, quam nullus homo de se unquam prouertire ausus est, nisi Christus esset verus Deus, aut amentiam aut imposturam insinuem demonstraret: quea tamen duo valde aliena sunt ab ingenio et charactere Christi, ut ipsi Strauss et Renan fatentur. Ergo.

c) Amplius, constat ex utraque historia tum ecclesiastica tum profana⁴ inde ab initio viguisse apud Christianos fidem in divinitatem Christi; quam quidem *fidem universalem et perpetuam*, omnibusque armorum, passionum ac superbientis rationis obstaculis superiorem, professi sunt docti simul et

1—Cf. Portmans, *La Divinité de Jésus-Christ vengée des attaques du Rationalisme contemporain* (1887).

2—Hinc illud *Sibilla Erythraea* in carmine relato ab August. (de Civ. Dei, l. XVIII, c. 23):

"E celo Rex adveniet per nubila futurus."

3—Aug. Nicolas, *Etudes phil. sur le Christian.* t. II, l. II, ch. 4-5.

4—Cf. celeberrimum testimonium Josephi Flavii, l. XVIII Antiq. ;—Origen. *contra Celsum*;—Plin. *ep. ad Trajanum*.

tas ex
tismo,
homini-
nomia,
sacra-
cultus

unt—
ctusse
i col-
o mali
quem
n res-
quoad

olice
, tum
matio
rsarii
geliis
quam
Chris-
insipi-
nt ab
faten-
astica
fidemi
m et
entis
ul et
ques
gust.
. 4-5.
Anti-

indocti, Apostoli, principes, martyres, etc. Porro talem tantumque totius mundi christiani attestacionem nemo rejoicere potest, quin simul Dei sapientiam et providentiam negare cogatur. Ergo.

d) Præterea, Christus, veluti *suam*, proposuit *doctrinam* cum speculativam tum practicam quæ longe vires humanae mentis cordiumque sensus excedit, quæque inter celebratoria philosophorum systemata religiosa ac moralia incomparabiliter præcellit. Atqui solus Deus poterat tam sublinnia de se rebusque divinis edocere, eamque mirabilem humanis facultatibus perfectionem afferre. Ergo.

e) Rursus, non solum Christus *miracula* patravit, sed ea operatus est quasi ex *propria potestate*, non orando tantum, sicut alii; unde dicitur quod *virtus de illo exibat et sanabat omnes* (Luc. VI, 19): idemque Patres testati sunt. Etiam opera illa ad inculcandam doctrinam, qua se Deum dicebat, perfecit. Atqui, velint nolint rationalistæ, vis faciendi operam mirabilia solius Dei est, quin ulli virtuti creatæ principaliter attribui queat; nec Deus potest falsum miraculis confirmare. Ergo¹.

f) Denique tanta fuit efficacia doctrinæ Christi ut mentes hominum, a pessimis erroribus revocans, per *omnia* tempora et in *omnibus* regionibus sibi fidelissimas subjecerit; tam late quoquo tamque profunde influxus ejus irrepsit ut individuorum mores, societatem, scientias, litteras, artes, vi quadam inaudita penitus *transformaverit*. Atqui effectus universalior ad causam universaliores reducendus est. Ergo non virtute creatæ ac finita, sed increata divinaque sibi pro-

1—Vid. III, Q. XLIII, a. 4; ubi sic arguit *Cajetanus*: “Aut conceditur Christum fecisse miracula relata in Evangelio, aut non. Si conceditur, habetur illius deitas, ut patet.. Si non conceditur, tunc habetur etiam illius deitas ex hoc *maximo miraculorum* quod pauperculus, juvenis, indoctus, ex gente exosa (Iudeus scil.), persecutionem cum tot ludibriis et mortem turpissimam passus, derelictus, dicens se Deum, habitus fatuus a suis, a Judæis, ab Herode, a Pilato, absque miraculis promittens mortem et mala omnia, post mortem suam per pauperes piscatores, indoctos, exosos omnibus, morti obnoxios, etc, absque miraculis contra totum mundum idola coletem pugnans superaverit. Vacate ergo et videte, quoniam ego sum Deus.”

*Nous confessons un seul + même Fils unique, N.S. J.C.
qui n'est ni partagé, ni divisé en 2 personnes*

pria, Christus ad unitatem doctrinalem, moralem ac socialem, plerasque gentes tempore indoleque diversas coegit¹.

Conclusio 2^a. — UNIO VERBI INCARNATI FACTA EST NON IN NATURA, SED IN PERSONA; QUO AUTEM MODO, SUBSEQUENTER DECLARATUR.

1^a *Pars* definita continetur in *CC. Ephes.* et *Chalced.* Patres enim Chalced. professi sunt Christum constantem ex dualitate naturae “in unam personam atque subsistentiam concurrente, non in duas personas partitum aut divisum.” Accedunt diversa *Symbola*.

1^b a) Haec veritas non est nisi consecutarium prae*conclusionis*: quippe quando duo supposita vel personae distinguuntur, unum proprio non dicitur alterum. Atqui Christus homo est verus Deus: ergo conjunctio naturae humanae et divinae in eo facta est secundum unitatem personae seu in persona.—b) Item omne quod factum est aliquid, est illud quod factum est secundum identitatem suppositi vel personae. Atqui *Verbum caro factum est* (*Joan. I, 14*): ergo.—c) Praeterea, pronomina demonstrativa ad personam vel suppositum referuntur. Atqui homo-Jesus dixit de se (*Joan. X, 30*): *Ego et Pater unus sumus*. Ergo².

l'unité de nature
En ratio ab Auctore proposita.—Secundum dogma catholicum (prout ostensum est) natura humana, distincta manens a natura divina, vere tamen Verbo Dei unita est; quod qui negaret, ipsam Incarnationem totamque fidem christianam subrueret. Atqui vera illa unio humanitatis cum Verbo alia esse non potest quam unio in persona: ergo. Min. constat, quia omne quod proprio inest alicui personae, sive pertineat ad naturam ejus, sive ad partes integrantes, ut manus, sive ad accidentia inherentia, ut color, unitur ei in persona; accidentia autem extrinseca, ut vestis, locus, etc., nec vere insunt personae, nec unionem personali constituant. Igitur, dum unio inhabitacionis, affectus vel honoris, quam fingebat Nestorius, Incarnationem tollit, sola unio in persona eam salvat.

*de 2 natures
distinctes*

1—De dogmate Divinitatis Christi cfr. inter alios Zigliara, *Pro-pædeutica*, I. III, c. 14-17;—Freppel, *Conf. sur la Divin. de J. C.*;—Monsabré, *Conf. 1878*;—Portmans, *op. cit.* Hic auctor speciatim contra Strauss et Renan congressus est.

2—Vid. plura ap. *S. Thom.*, C. G. IV, 34.

f. 2^o *Pars versatur circa modum quo explicanda sit (quantum fieri potest) unio hypostatica Verbi cum natura humana.*

1^o *Opinio Scoti* aliorumque superius recitata (quam philosophia suudet esse falsam) impar omnino est ad declarandum Incarnationis mysterium; ex quo novum falsitatis argumentum derivatur.—Nam a) *humanitas Christi Verbo conjungitur* ut, non jam propria personalitate, sed personalitate Verbi *subsistat*. Porro, cum Scotus doceat humanitatem Christi *actu* continere omnem realitatem substantiam pertinente ad cæteros homines, addita tantum adjectione ad Verbum, non appareat in tali hypothesi cur naturæ humanæ in Christo deesset ratio totius completi ideoque proprii suppositi: quippe nil, per solam additionem ad aliud nullaque amissa realitate, ex completo fit incompletum in eo in quo de se complementum habet. Gauderet igitur Christi humanitas perseitate, si non incomunicabilitatis, saltem subsistentiæ et independentiæ: quod sapit Nestorianismum.—b) Cum vero, juxta rei veritatem, persona Verbi *suppleat* personalitatem humanam, ultro consequitur hanc postremam constitutam per quidpiam positivum realiter a natura singulari distinctum; quod etsi non possit seorsum a natura consistere, certa tamen impediri potest.

Opinio Suarezii consentientis cum Scoto, pro quanto multiplicat in Christo substantiales existentias, rejici debet tum ex eis quæ mox dicenda sunt, tum ob ea quæ disputabuntur infra (Disp. IV, Q. II, a. 2).

B. 2^o Sententia de distinctione reali-modali naturam inter et suppositum ea est quæ aptius congruit explanandæ Incarnationi.—a) Siquidem per illam recte deprehendimus subsistentiam Verbi, *complendo* ac terminando naturam humanam, *supplere* vices humanæ personalitatis, scil. termini connaturalis qui sponte ex humanitate resultasset nisi (ut ait S. Thomas) a Verbo impeditus fuisset.—b) Eadem ex sententia planius intelligitur quomodo Verbum Dei sit subjectum, quod temporalis filiationis, quippe filatio, sicuti existentia, non subjectatur in natura nisi secundum quod haec suppositaliter terminatur¹. Terminum autem istum esse oportet realitatem quamdam aut creatam aut increatam, quæ natura

*Studie einer negativer
de natura est in 2
Opinio Scoti in N.S.
periret & restaret*

DISPUTATIO II.

Union de la nature humaine
Sut pācē la tērmē
Dōe sūl pōrsona tērmē
particul. dīvine

fiat ultimo idonea existentiae et efficientiae.—*c)* Perperam Billot (*de Verb. inc.* p. 121-22) Thomistas reprehendit, quasi in eorum sententia Verbum suppletus modum substantialis naturae humanae non haberet hanc naturam ratione univoca: siquidem speciei univocatio sumitur a natura, *qualis* est, non a natura *qua* personata per suum terminum.—*d)* Quia vero subsistentia Verbi divini non est nobis quidditative nota, nequimus reapse scrutari eminentiorem modum qua persona Filii Dei subrogatur humanae personalitati; et in hoc radicaliter consistit Incarnationis mysterium.

3º Concludimus in praesenti materia humanam philosophiam plurimum lucis ex fide mutuari, quatenus doctrina propugnans distinctionem realem inter essentiam et existentiam, ac naturam et suppositum, eo ipso quod dogma Incarnationis illustrat, ab eodem dogmate mire illustratur ac confirmatur.

Coroll.—*1º* Sequitur ex dictis Filium Dei non assumpsisse personam, sed naturam tantum: secus, vel persona humana corrupta fuisse in assumptione, quod repugnat; vel actu remaneret, quod Nestorianum est (*Q. IV, a. 2*).—*2º* Nec propriæ Verbum assumpsit *hominem*, prout determinatum est in *Conc. Ephes.*: siquidem nomen *homo* significat humanam naturam in supposito existentem; nullum autem suppositum assumptioni præintelligi potest. Idcirco locutiones hujusmodi, si quæ reperiantur apud Patres, *pie* sunt exponendæ, quatenus sumatur *homo* quoad naturam et assumptione quoad terminum in quo Filius Dei est homo (*ibid. a. 3*).

Solv. obj. (cont. 2nd concl.).—*OBJ. 1.*—Persona in Deo idem est ac natura. Atqui constat unionem non fuisse factam in natura: ergo neque in persona.

RESP. D. M. ... secundum rem, *C*; secundum rationem seu modum significandi, *N*.—*C. n.*—*Neg. conseq.*

Una eademque res, Deus, significari potest aut per modum quidditatis aut per modum subsistentiae, secundum quod eminenter duplum actum formam exercet. Quia vero natura humana unitur Verbo, non secundum rationem complendæ vel transmutandæ naturæ, sed ut Verbum in ea subsistendi actum exerat, ideo unio humanae naturæ ad Verbum Dei facta est in persona, non in natura.

1. **OBJ. 2.**—Natura humana habet in Christo quidquid ad sunt dignitatem pertinet. Atqui personalitas maxime ad dignitatem hominis pertinet. Ergo humana natura in Christo habuit propriam personalitatem.

RESP. C. M.—*D.m*: i. e. pertinet ad humanam dignitatem per se tantum existere, *N*; pertinet... existere vel per se vel melius in aliquo digniore, *C*.—*Neg. consecq.*

Subsistere, quod est personalitatis proprium, certe perfectionem dicit. At dignius est alicui *in alio superiore* existere seu subsistere quam existere *per se*. Quam ob rem humana natura, prouti personæ Verbi suppositaliter unitur, dignior est in Christo quam in nobis, ubi per se existens propriam personalitatem habet; sicuti v. g. nobilior est in homine sensitivum per nobiliorem formam completum quam in bruto animali, in quo ipsum est forma speciei completiva.

2. **OBJ. 3.**—*Persona (juxta Boëtium) est "rationalis naturæ individua substantia."* Atqui Verbum Dei assumpsit naturam humanam individuam. Ergo.

RESP. D. M.—*i. e. essentia singularis tantum, N; substantia per se separativum seu incomunicabiliter subsistens, C.—C.d.m.*—*Neg. consecq.*

Non quodlibet individuum substantiale etiam in rationali natura habet rationem personæ, sed solum illud quod per se existit, quin alicui perfectiori communicetur. Quia de causa manus Petri, etsi sit quoddam individuum seu singulare, non tamen persona est; quippe non est substantia completa, sed pars substantiæ subsistens, non per se, sed in aliquo perfectiori, scil. in suo toto. Licet ergo *hæc humana Christi natura sit quoddam individuum in genere substantiæ, quia tamen non per se separativum existit, sed in persona Dei Verbi, consequens est quod non habeat propriam personalitatem; ideoque facta est unio in persona*¹.

1.—Vid. plures objectiones ap. Billuart, de Incarn. Diss. IV, a. 1.

*Suppositus per se
personaliter unitus
personaliter unitus*

*Union dnas / la personne -digne aperçue de
ou l'hypostase -*

46

DISPUTATIO II.

ARTICULUS III.

*J'avant le mien, lire
que le tiers précédent.*

*Utrum unio Verbi incarnati facta sit in supposito
vel hypostasi.*

Quæstionem hanc, jam secundum rem in præcedenti articulo enucleatam, proponit D. Thomas gratiâ refutandæ falsoe cuiusdam *opinionis* majorisque lucis tanto mysterio affundendæ.—*Suppositum* non differt ab *hypostasi* nisi secundum modum significandi: utrumque enim nomen significat primam seu individuam ultimoque terminatam substantiam, at suppositum modo logico seu per modum nominum secundæ intentionis, hypostasis vero modo reali primaque intentione.—*Quidam* igitur ignorantes habitudinem hypostasis ad personam, licet concederent in Christo unam solam personam, posuerunt tamen aliam hypostasim Dei et aliam hominis, perinde ac unio esset facta in persona, non in hypostasi: certe decepti sunt.

*Conclusio. — UNIO VERBI INCARNATI FACTA EST IN SUP-
POSITO VEL HYPOSTASI; quod de fil: est, juxta id quod decre-
vit Conc. Ephes. (eccl. II, an. 431) can. 2: "Si quis non
confitetur carni secundum subsistentiam (*hypostasim*) unitum
ex Deo Patre Verbum, unumque esse Christum cum sua
carne... Deum et hominem, A. S."*

Sane 1º cum persona non addat super hypostasim nisi determinatam naturam, scil. rationalem, id: m est attribuire humanitati Christi propriam hypostasim et personam propriam; quod est Nestorianum aperteque reprobatum fuit in Conc. oecum. V (Upolitan. II, an. 553) can. 5: "Si quis introducere conetur in mysterio Christi duas subsistentias seu duas personas, A. S." ; subsistentia enim sumitur pro hypostasi.—2º Si quid persona super hypostasim adderet in quo unio fieri posset, hoc nihil aliud foret quam proprietas ad *dignitatem* pertinens. Atqui unionem factam esse tantum secundum quamdam dignitatis seu honoris communionem, contendebat quidem Nestorius; qui propterea dicit. natus est in Conc. Ephes. can. 3: "Si quis in uno Christo vividit subsistentias post adunationem, sola copulans eis conjunctio quæ secundum dignitatem quamdam vel auctoritatem

*la troisième personne n'a pas
de personae subiecti au contraire
que la deuxième et la première
qui sont interdictes à l'apôtre*

est... A. S." — 3^o Operationes et proprietates naturæ in concreto attribuuntur hypostasi, quæ idcirco vocatur suppositum, utpote prædicationem *attributorum* recipiens. Atqui operationes et proprietates humanitatis Christi de ipsa hypostasi Verbi verificantur, puta esse passum, crucifixum, etc, contrarium reprobante *Conc. Ephesino*, can. 4: "Si quis personis duabus vel subsistentiis eas, quæ sunt in evangelicis et apostolicis Scripturis, impartitur voces... A. S." Ergo.

Ex præcedentibus *tria colligere* fas erit (art. 4): — 1^o Persona sive hypostasis Christi, spectata secundum id quod est *in se*, est omnino simplex, sicut et natura Verbi. — Attamen 2^o si spectetur secundum rationem hypostasis, cuius est subsistere in aliqua natura, dici potest composita: siquidem omne illud, in quo duo convenient, potest dici ex eis compositum. Atqui in persona Christi divina humanaque natura conveniunt secundum duplarem subsistendi rationem. Ergo. — Verum 3^o compositio hec talis est quæ omnem imperfectionem abjicit. Etenim compositio aut est complexio *partium* ex qua efficitur esse totius; aut conjunctio extremorum in aliquo uno *communicante esse extremis* unitis. Primum quidem compositionis genus claudit imperfectionem incompossiblem cum perfectione divinae personæ, non vero aliud¹.

Solv. obj. — OBJ. 1. — Ut loquuntur Patres (*Aug. in Enchir.*; *Leo P. ad Flavian.*), de Christo dicitur aliud et aliud. Atqui aliud et aliud differunt supposito. Ergo.

RESP. D. M: Ipse Christus ratione *sui* dicitur aliud et aliud, *N*; in Christo ratione *naturarum* aliud et aliud agnoscentur, *C*. — D. m: in creaturis, *C*; absolute, *N*. — Neg. *conseq.*

Sicut accidentalis differentia facit *alterum*, ita differentia essentialis facit *aliud*. Porro manifestum est posse idem numero suppositum diversis accidentibus subesse, non autem diversis essentiis subsistere, excepto tamen Christo subsistente in duabus naturis. Unde quemadmodum alterum et alterum in creaturis non significant diversitatem suppositi, sed solum diversitatem accidentum, ita etiam aliud et aliud, (non in creaturis, sed in Christo) important cum identitate suppositi solam naturarum diversitatem, præsertim si verba

1—Cf. Cajetanus in Q. II, art. 4; — Billuart, Diss. IV, a. 2.

7m

illa in modo prædicandi non tam Christum quam Christi naturas appellant.

OBJ. 2.—Hypostasis nihil aliud est quam substantia particularis. Atqui in Christo viget praeter hypostasim Verbi substantia particularis, i. e. hæc humanitas. Ergo.

RESP. D. M:... prout est in suo *complemento*, C; secundum quod venit in unionem alicujus magis completi, N.—C.d.m:... substantia particularis seu humanitas per se ultimo terminata, N; terminata per suppositum Verbi, C.—*Neg. conseq.*

OBJ. 3.—Christus, secundum quod homo, continetur sub specie humana. Atqui nequit sub specie humana contineri nisi tanquam hypostasis quædam humanæ speciei. Ergo.

RESP. C. M.—D.m:...i. e. nisi subsistat *in humana natura*, cuius ratione individuum in humana specie collocatur, C; visi sit hypostasis resultans *ex humana natura*, N.—*Neg. conseq.*

ARTICULUS IV.

De proprietatibus Unionis hypostaticæ.

(Q. II, a. 5-9)

Præstitutis iis quæ ad constitutionem unionis Verbi incarnati pertinent, subjicienda sunt quæ unionem illam, qua unio est, *proprietatum* ad instar, subsequi intelliguntur.—Tria indaganda se præbent, nempe an unio Verbi Dei cum natura humana sit necne *substantialis*, an sit aliquid *creatum*, an quadamtenus saltem dici debeat *maxima* unionum.—Doctrinam D. Thomæ in tres conclusiones cogemus.

Conclusio 1°.—UNIO VERBI INCARNATI FACTA DICENDA EST NEQUE SECUNDUM ESSENTIAM, NEQUE SECUNDUM ACCIDENTIS, SED SECUNDUM SUBSISTENTIAM SEU HYPOSTASIM, ITA UT PROPRIE HYPOSTATICA NOMINETUR (art. 5-6).—Id *fide* sancitum est tum in *Conc. Ephes.* jam citato, tum in *Syn. oecum. V.* can. 4: “Sancta Dei Ecclesia, utriusque perfidiæ (Euty-

<u>Unio</u>	<u>logica</u>	<u>accidentalis</u> { <u>deum valorem conservat.</u> Nisi & acc. aut & accidentis } Non-
	<u>realis</u>	<u>substantialis</u> { <u>essentialis:</u> Non <u>hypostatica</u> = <u>Alijus in trinitate</u>

QUÆST. I. ART. IV.

49

chianæ et Nestorianæ) impietatem rejiciens, unionem Verbi Dei ad carnem confitetur secundum substantiam."

Revera 1º prædicta unio fieri non potuit nisi vel secundum essentiam, vel secundum accidentem, vel secundum substantiam seu hypostasim.—Porro a) primum ipse est error Eutychianorum qui confitebantur Christum esse ex duabus naturis, quasi ante unionem distinctis, non autem in duabus naturis, quasi post unionem cessante naturarum distinctione. Error vero ille superius (art. 1) profligatus est.—b) Secundum tueruntur Nestoriani, aliique quorum opinio fuit negandam esse in Christo unionem animæ et corporis (ne secus humana hypostasis ex ea resultet) conjungique hæc duo Verbo accidentaliter, sicut vestis unitur supposito vestito. At errorem Nestorianum satis superque jam refutavimus; nec ullum latere potest, ad rationem humanæ speciei ideoque ad veritatem humanitatis Christi, quam totus supponit Christianismus, requiri ut anima corpori uniatur tanquam forma materiæ. —c) Rejecta igitur unione tum essentiali tum accidentali, superest ut agnoscamus in Christo unionem substantialem seu hypostaticam.

2º Ad clariorem rei evidentiam notanda est distinctio quam Cajetanus (*Comm. in art. 6*) adducit inter uniri alicui in hypostasi et secundum hypostasim. Etenim uniri in hypostasi sibi vult inesse alicui quæmodocumque, unde accidentis, puta albedo, unitur homini in persona; uniri autem secundum hypostasim addit conjunctionis modum, scil. per modum subsistentis, unde quod non est aptum subsistere, ut accidentis, nequit tali modo uniri, bene tamen caput, quod pertinet saltem partialiter ad lineam substantiæ. Atqui unio Verbi incarnati ita perfecta est ut Verbum subsistat in natura humana et natura humana ex Verbo subsistentiam sortiatur. Ergo unio illa non solum facta est in hypostasi, quod etiam accidental conjunctioni convenire potest, sed amplius secundum hypostasim, unde habet esse substantiale.—*Conf. exemplo* (art. 6 ad 2). Sicut enim corpus in resurrectione animæ præexistenti conjungetur, ita quodammodo humanitas in Christo personæ Verbi copulata est. Atqui corpus, secundum quod ad esse substantiale animæ assumetur, eidem substantialiter, non accidentaliter, sociabi-

tur. Ergo et unio Verbi cum natura humana substantialis affirmari debet seu hypostatica.

*Die scilicet fuit
Conveniens a scriptis
ante manus d. 2. c.
Donec reale
formaliter
et fundam. est illud
fundam. humanitatis
af. multa in relatione
est realis
verb. in reali*

3^o In sermonibus et controversiis Christologicis, *Patres*, etsi unitatem Personæ in dualitate naturarum tenerent, non tamen statim et veluti primo gressu ad exactam dogmatis catholici formulam devenerunt, sed paulatim voces magis congruas tam singulari mysterio, veteribus philosophis impervio, significando adaptarunt. Id, preeunte *S. Basilio*¹ qui jam (*Epist. passim*) hypostasim ab essentia in Trinitate distinxerat, maxime effectum est operâ *S. Cyrilli Alex.*² qui præcipius exstitit Nestorianismi debellator; post quem, nomen *hypostasis* pro persona ac subsistentia usu theologorum et Ecclesiæ communiter fuit acceptum. Unum textum *S. Cyrill.* afferamus (l. I cont. Nestorium, c. 1): "Carnem, inquit, factum esse illud ex Deo Patre Verbum ait Scriptura divinitus inspirata, h. e. carni sine confusione et secundum hypostasim unitum." Ita etiam loquitur in Ep. 2 ad Nestorium, in Anathematismo, 2, etc.

Conclusio 2^a. — UNIO NATURÆ DIVINÆ ET HUMANÆ, FORMALITER SUMPTA, EST ALIQUID CREATUM, SCIL. REALIS RELATIO ASSUMPTIONEM CONSEQUENS (art. 7-8).

1^o *Prænotetur* unionem sumi posse dupliciter, nempe vel *formaliter* pro relatione inter duas naturas conjunctas in una persona Filii Dei, vel *fundamentaliter* pro illo esse personali in quo ambæ naturæ convenient. Ex dictis constat unionem, hoc postremo sensu acceptam, quiddam esse substantiale et in creatum, quod est esse Verbi subsistentis in utraque natura, licet ex tempore natura humana divinum illud subsistere sortita sit. — Nunc agitur de unione, ut *relatio* est.

2^o *Prob. concl.* — Omnis relatio vigens inter Deum et creaturam realiter est in creatura, non autem in Deo; siquidem innascitur per mutationem creaturæ, immutato Deo: ergo et relatio naturæ divinæ et humanæ, fundata in communi subsistentia Verbi, reale esse habet in humanitate Christi, correspondente ex parte Dei relatione rationis. Atqui quidquid realiter est in creatura, creatum est. Ergo. — Quamvis autem

1—Hurter, *Th. dogm. comp.*, Vol. II, Tract. VII, th. 142, in nota.
2—Cf. Petavius, *de Incarn.* l. III, c. 4, n. 10.

Verbum nullum in se mutationem passum fuerit qua realiter referatur ad humanitatem, veraciter homo est, in quantum vere habet naturam humanam reali vinculo sibi copulatam.

3º Ex notione unionis colligitur eam ab assumptione realiter discriminari.—a) Prima et principalis differentia est quod assumptio non significat relationem, ut unio, sed mutationem ex qua relatio illa resultat: quam quidem mutationem assumptio exprimit per respectum ad principium assumens, incarnatio autem et humanatio per respectum ad rem assumptam.—b) Secunda differentia est, quia assumptio dicitur sicut in fieri, unio autem sicut in facto esse; unde unitum praedicatur de uniente, i. e. Filius Dei est homo, non autem assumptum de assumente, nam Filius Dei non est natura humana.—c) Tertia differentia habetur, quia unio nullum extremorum determinat, dum assumptio dicitur quasi ab alio ad se sumptio; unde indifferenter dicitur natura divina unita humanæ et humana divinæ, non autem natura divina dicitur assumpta ab humana.

Conclusio 3^a.—UNIO DUARUM NATURARUM IN CHRISTO, EX PARTE EJUS IN QUO CONJUNGUNTUR, MAXIMA EST.

Unio modo sumitur, non jam pro relatione, quippe quæ gradus non admittit, sed pro relationis fundamento, scil. pro conjunctione aliquorum in aliquo uno. Quapropter potest unio Incarnationis dupliciter accipi: uno modo ex parte eorum quæ conjunguntur; alio modo ex parte ejus in quo conjunguntur. Atqui quamvis unio illa non sit maxima ex parte conjuncrorum quæ infinite distant; tamen simpliciter seu ex parte ipsius vinculi conjunctionis præminentiam sibi vindicat inter alias uniones: ratio est, quia unitas personæ divinæ, in quam coëunt duæ naturæ, maxima est, increata, per se subsistens, nec in aliquo participata vel ab alio completa. Unde omnem unitatem creatam excedit.— Imo sub aliquo respectu, i. e. sub respectu personali, magis est homo-Christus in Filio Dei quam Filius in Patre propter identitatem suppositi.

Solv. obj. (cont. 1st conc.).—OBJ. 1.—Dicit Ap. (Phil. II, 7) de Filio Dei: E' habitu inventus ut homo. Atqui habitus accidentaliter advenit ei cuius est. Ergo.

RESP. D. M:.... et hæc similitudo tenet in omnibus, N; quoad aliqua, C.—C.m.—Neg. conseq.

1º Ut *Damascenus* ait (de Fid. Orth. l. III, c. 26), "non necesse est exempla esse rebus prorsus similia ac hujusmodi ut nihil omnino desideretur... Nam quod omni ex parte simile est, ea ipsa res est, non exemplum, idque potissimum in Deo." — 2º Humanitas in Christo assimilatur habitui seu *vestimento*, non ob accidentalem unionem, sed praesertim quantum ad duo: a) *primo*, quantum ad hoc quod Verbum se nobis visible exhibet per humanam naturam, sicut homo per vestimentum; b) *secundo*, quatenus, sicuti vestis mutatur ac formatur secundum figuram induentis quin iste mutetur, ita humanitas meliorata accessit ad Verbum absque Verbi mutatione.

OBJ. 2.—Quod advenit alicui post esse completum, ei unitur accidentaliter. Atqui natura humana ex tempore advenit Verbo habent esse perfectum. Ergo.

RESP. D. M:... si non trahatur in communionem illius esse completi, C; si in illius esse consortium vocetur, N.—C.d.m:... advenit Verbo jam perfecto, quin ideo assumpta fuerit ad unum esse, prout est naturæ, C; nec assumpta est ad unum esse, prout est hypostasis vel personæ, N.—Neg. *conseq.*

OBJ. 3.—Quidquid non pertinet ad naturam seu essentiam alicujus rei, est accidens ejus. Atqui natura humana non pertinet ad essentiam seu naturam divinam Filii Dei. Ergo.

RESP. D. M: Quod non pertinet neque ad naturam neque ad suppositum... C; quod non pertinet ad naturam, pertinet tamen ad suppositum... N.—C.d.m.—Neg. *conseq.*

Accidens dividitur contra substantiam. Substantia autem dupliciter sumitur: uno modo pro *essentia* seu natura, quam logici vocant substantiam *secundam*; alio modo pro supposito vel *hypostasi*, quam vocant substantiam *primam*, scil. in quam primo mens convertitur. Quare unio accidentalis excluditur per conjunctionem hypostaticam, licet non sit facta secundum naturam.

OBJ. 4.—Instrumentum accidentaliter unitur causæ principali. Atqui humanitas in Christo fuit. Divinitatis organum seu instrumentum (Damasc., de Fid. orth. l. III, c. 15). Ergo.

RESP. D. M: Instrumentum separatum... C; instrumen-

" non
smodi
simile
am in
i seu
eritim
erbum
homo
muta-
muta-
bsque

um, ei
mpore

illius
N.—
umpta
ota est
—Neg.

essen-
umana
ii Dei.
neque
pertinet

utem
quam
uppo-
, scil.
ntalis
n sit

prin-
anum
15).

men-

tum conjunctum secundum unitatem hypostaticam, N.—
C.d.m.—*Neg. conseq.*

Non omne quod assumitur ut instrumentum pertinet ad hypostasim assumentis, ut patet de securi vel gladio; nihil tamen prohibet illud quod assumitur ad unitatem hypostasis consequenter se habere ut instrumentum, sicut corpus hominis vel membra ejus. Hujus generis fuit humanitas in Christo.

ARTICULUS V.

De causa unionis Verbi incarnati.

(Art. 10-12)

Ut conceptus genuinus Unionis hypostaticæ unde quaque illustretur, disserendum superest de *causalitate* propria atque effectiva illius unionis. Quia in re *tria* inquire poterunt, scil: *unum* de causa principali; *aliud* de dispositione meritoria ad unionem; *tertium* de modo quo haec unitio naturæ humanae cum Verbo a sua causa processerit.

Conclusio 1^o. *CAUSA INCARNATIONIS FUIT GRATUITA*
DEI VOLUNTAS, A QUA GRATIA UNIONIS QUARI POTISSIMUM
DONUM PRODIIT, NULLA MEDIANTE GRATIA HABITALI.

1^o *Pars 1^o* evinci potest ex *S. Aug.* (*I. de Pred. Sanct.* c. 15): "Ea gratia, inquit, fit ab initio fidei sue homo qui-
cumque christianus, qua gratia homo ille ab initio suo factus
est Christus; de ipso *Spiritu* et hic renatus, de quo est ille
natus." — 2^o Cum elevatio ad Deum, ut est in se, essentiali-
ter excedat naturæ facultatem, humana natura non potest
secundum hanc elevationem sublimari sine gratuita Dei
voluntate et actione. Porro elevatur natura humana in
Deum duplice modo: uno communiori modo per *operationem*,
qua scil. sancti Deum cognoscunt et amant; alio modo sin-
gularissimo per *esse personale*, quatenus natura humana
assumitur ad subsistentiam Filii Dei. Ergo tam excellens

*Habentur tres
modi Dei in nos.*

~~145~~
~~P. 1/3~~

assumptio propriissimus est effectus gratuitæ Dei voluntatis et actionis.

2^a Pars exhibit Incarnationem veluti gratiam potissimum, quæm theologi vocant gratiam unionis.—Etenim gratia, quæ est accidens, constat similitudine quadam Divinitatis participata in homine; per Incarnationem autem humana natura non dicitur participasse similitudinem aliquam naturæ divinæ, sed ipsi Divinitati in persona Filii conjuncta esse aguoscitur. Jamvero majus est ipsa res seu rei substantia quam similitudo ejus accidentaliter participata. Ergo gratia unionis quodcumque aliud donum supernaturale præcellit.—In id conferri potest sententia Ap. (Coloss. II, 9) quod in Christo *inhabitat omnis plenitudo Divinitatis corporaliter*: quippe gratia illa hypostatica attingit, non animam tantum, ut gratia habitualis, sed totum humanum ecompositum ex anima et corpore, et hoc secundum plenitudinem divinæ substantiae.

3^a Pars vix declaratione indiget.—Quamvis eniā ad perfectionem operationis requiratur habitus, tamen repugnat naturam supposito suo secundum esse substantiale copulari mediante aliquo accidente.

Conclusio 2^a.—NULLA MERITA CHRISTI PRÆCESSERUNT AUT PRÆIRE UTCUMQUE POTUERUNT INCARNATIONIS UNIONEM; HANC TAMEN, NON QUIDEM MERITO CONDIGNO, SED CONGRUITATE QUADAM PATRES V. T. ET MAXIME B. VIRGO IMPETRARUNT.

1^a PARS, intellecta de *lege ordinaria*, communiter conceditur; at nonnulli censem *absolute fieri* potuisse ut Christus mereretur suam incarnationem: quibus assentire renuimus.—Etenim nec tempore (ut posuit Photinus) nec natura purus homo præcessit Incarnationem, sed eodem instanti natura fuit Christus homo-Deus. Atqui operatio sequitur esse non solum naturæ, sed et suppositi, cui tanquam principio *quod* attribuitur. Ergo neque fuit neque esse potuit ullum Christi meritum respectu unionis hypostaticæ: quod *S. Augustinus* aperte confirmat (*I. de Præd. Sanct. c. 15*)¹.

1—Vid. plura ap. Billuart, Diss. V, a. 1-2.

*H. J. K. 1866
son an incarnationem
est nihil aliud nisi*

3^o doc

Le Christ n'a pas mérité son Incarnation,
car il n'était pas méritant.

2^e Pars negat quoque merita sanctorum saltem condigna seu importantia jus ad præmium.

Sane 1^o opera meritoria hominis proprie ordinantur ad beatitudinem, cui virtualiter æquantur, quæque in plena Dei fruitione consistit. Atqui unio Incarnationis secundum esse personale hunc beatificum actum absque proportione transcendit. Ergo non potest esse objectum meriti saltem digni. — 2^o Id quod universaliter antecedit omne meritum supernaturale, nequit proprie sub illo merito cadere. Atqui hujusmodi est non solum prima gratia, qua meremur, sed et Incarnatio a qua profuit gratia, juxta illud (Joan. I, 17): *Gratia et veritas per J. C. facta est.* Ergo. — 3^o Bonum et meritum singularis hominis nequit esse causa boni totius naturæ. Atqui Incarnatio Christi est reformativa totius humanae nature. Ergo.

3^e Pars additur, quatenus SS. Patres V. T. et B. V. Maria, desideriis ac petitionibus suis, de congruo¹ impetrarunt Incarnationem: "congruum enim erat, ait S. Thomas (art. 11), ut Deus exaudiret eos qui ei obediebant." — Sicubi vero ab Ecclesia cantatur de B. Virgine quod "meruerit portare "Dominum, hoc intelligendum est, non quasi proprie merita sit Dominum incarnari, sed quia ex gratia sibi data illum meruit puritatis et sanctitatis gradum quo congrue posset eligi in Matrem Dei.

Conclusio 3^o. — *GRATIA UNIONIS DICI POTEST HOMINI-CHRISTO NATURALIS, NON QUOD EX PRINCIPIIS HUMANÆ NATURÆ PROFLUXERIT, SED QUA VIRTUTE DIVINÆ NATURÆ, A NATIVI-TATE CHRISTI ET VI EJUS CONCEPTIONIS UNIO FACTA EST.*

1^o Cum natura dicatur aut essentia rei, aut etiam nativitas, aliquid potest naturale nominari, sive quia procedit a principiis *essentialibus* rei, sive quia a *nativitate* contingit. Jamvero gratia unionis in Christo, haud secus ac gratia habitualis, nequit dici naturalis, quasi causata a *principiis essentialibus humanæ naturæ*; propterea quod nulla naturæ nostræ progressio proprios ac specificos limites pretergredi valet. — Verum 2^o eadem gratia unionis poterit vocari naturalis triplici ex titulo: a) *primo*, quia provenit in naturam

1^o Cf. id., Diss. V, a. 3.

3^o que la St. Virgin a mérité de faire N.S. Non pas en ce sens qu'elle ait mérité que Dieu s'incarne, mais parce qu'en s'appuyant sur le gîte qui lui était donné, elle a mérité un degré de pureté et de sainteté tel qu'elle puisse dignement être la mère de Dieu. — S. Th. art. 1^o —

humanam Christi *virtute ejus naturae divine*, quatenus pertinet ad naturam divinam, ut est communis Trinitati, esse principium activum cuiuslibet operis *ad extra*; b) secundo, quia convenit Christo a *principio suæ nativitatis* seu conceptionis; c) tertio, quia singulari prædestinatione sic Christus conceptus est de Spiritu Sancto ut esset idem *naturalis Filius Dei* et hominis, secundum illud Angeli ad paritatem Virginem (Luc. I, 35): *Virtus Altissimi obumbrabit tibi. Ideoque* (quasi diceret, propter hanc conceptionis vim) *et quod nascetur ex te Sanctum, vocabitur Filius Dei.*

enus
esse
ndo,
con-
hris-
ralis
uram
tibi.
1) et

QUÆSTIO SECUNDA

DE MODO UNIONIS EX PARTE PERSONÆ ASSUMENTIS

Incarnationem exploravimus secundum formalem unionis rationem. At unio hæc spectari debet non solum in se, verum etiam ex parte eorum quæ illam ingrediuntur: modo sermo erit de unione *ex parte personæ assumentis*.—Quæstionem D. Thomæ sub hoc titulo propositam ad quatuor articulos reducemos sequenti ordine: quippe expedit investigare assumptionem naturæ creatæ vel respectu divinæ personæ in genere (art. 1), vel respectu divinæ naturæ cum persona identificate (art. 2), vel secundum varias hypotheses possibilis-tatis assumptionis ab una in specie vel pluribus personis unius vel plurium naturarum (art. 3), vel tandem secundum congruentiam assumptionis a determinata persona quæ est Filius Dei (art. 4).

ARTICULUS I.

*Utrum personæ divinæ conveniat assumere naturam
creatam.*

7. II. a. 1

Panca circa titulum.—^{1º} *Assumptio* intelligenda est non de quocunque dominii exercitio, neque de quacunque actione unitiva, sed de evectione naturæ creatæ ad divinam *personatatem*.—^{2º} *Persona* divina consideratur *in genere* et præcisione facta ab una vel altera e tribus personis; unde non formaliter hic intenditur persona Verbi.—^{3º} Quæritur de *convenientia*, non quæ sensum exigentis promit, sed quæ meram congruentiam involvit.

follio. 122

Proprie pertinet ad personam

Conclusio. — PROPRIISSIME COMPETIT PERSONÆ DIVINÆ ASSUMERE NATURAM CREATAM. — Thesis constat duabus partibus, quatenus munus assumendi convenit personæ divinæ, et in quantum *persona*, et in quantum *divina*.

1^o pars prob. — Ei propriissime competit assumere naturam creatam cuius maxime est exercere actionem unitivam et naturam assumptam terminare. Atqui haec duo maximè pertinent ad personam divinam: ergo. *Maj.* patet ex conceptu assumptionis quæ duo imponit, *principium actus* et *terminum*; dicitur enim assumere, quasi ad se sumere. *Min. ostend.*; videl. assumptionis persona est et principium et terminus. *a) Principium* quidem: nam personæ proprie competit agere, prout est suppositum *quod actionem ponit*. Atqui carnis sumptio in Incarnatione facta est per actionem divinam. Ergo. *b) Similiter persona est hujus sumptionis terminus*, eo quod unio facta est in persona, non in natura, et causa fuit ut natura humana in Verbo et per Verbum subsisteret. Ergo.

2^o Pars habet, munus assumendi naturam alienam soli personæ divinæ convenire ad exclusionem cujuslibet personæ creatæ.

Prob 1^o ex D. Thoma (resp. ad 2): "Hoc est proprium divinæ personæ propter ejus infinitatem ut fiat in ea concursus naturarum, non quidem accidentaliter, sed secundum subsistentiam."

2^o Ratione ab Angelico indigata. — Omnis subsistentia creata vel creabilis est necessario finita. Atqui ad terminandam alienam naturam requiritur subsistentia seu personalitas *infinita*: ergo. *Maj.* patet; *min. ostend.* *a)* Etenim subsistentia creata et finita limitatur et specificatur per naturam cuius est terminus. Atqui implicat ut terminus *adæquat* alicujus nature *specifice*, idem manens, ad aliam naturam specificam terminandam extendatur. Ergo. *b)* Præterea, non posset subsistentia vel personalitas creata personare duas naturas distinctas nisi *eminenter* præhaberet vim subsistendi propriam illarum naturarum: ergo et plures quam duas, imo et infinitas naturas saltem inferiores per illam eminentiorem subsistentiam personare posset. Id autem competere nequit nisi subsistentiae simpliciter infinitæ, quatenus precontineat in aliquo communiora, scil. in ratione trans-

persona in inconvenientib.

Proprie pertinet ad personam assumere.
Summum pertinet ad personam divinam assumere

cendentali et illimitata entis, innumeræ rationes subsistendi proprias¹.

Solv. obj. — OBJ. 1. — Personæ divinæ perfectio prohibet ne ei additio fiat. Atqui assumptio importat ut assumptum addatur assumenti. Ergo.

RESP. C. M. — D.m.:... i. e. ut proprie addatur assumenti, N; ut ei conjugatur tanquam perfectibile perfectivo principio, C. — Neg. conseq.

Cum persona divina, sicut et divina natura, sit infinite perfecta, non potest ei fieri *additio*. — Sed sicuti in unione filiorum adoptivorum per gratiam habitualē non additur aliquid Deo, sed quod divinum est ad perficerendum hominem extenditur, ita proportionaliter in unione secundum esse Filii naturalis nihil apponitur Deo, sed Deus *jungitur homini*, ut absque sui deterioratione hominem perficiat.

OBJ. 2. — Id ad quod aliquid assumitur, ei quodammodo communicatur. Atqui de ratione personæ est ut sit incomunicabilis. Ergo.

RESP. D. M.:... ei communicatur tanquam naturæ in qua subsistat, C; tanquam supposito per quod subsistat, N. — C.d.m.:... ut sit incomunicabilis pluribus suppositis, C; pluribus naturis sive substantialibus sive accidentalibus, N. — Neg. conseq.

Persona dicitur incomunicabilis, in quantum non potest de pluribus suppositis prædicari; nihil tamen prohibet plura prædicari de ipsa persona. Igitur minime rationi personæ repugnat sic communicari ut subsistat in pluribus naturis; siquidem etiam in personam creatam plures possunt naturæ accidentaliter concurrere, v.g. quantitas et qualitas.

OBJ. 3. — Persona constituitur per naturam. Atqui inconveniens est a re constituta assumi elementum constituens. Ergo.

RESP. D. M.:... per naturam ex qua resultat, C; quam ad se sumendo terminat, S.d: constituitur simpliciter, N; secundum quod denominatur a tali natura, C. — C.d.m. — Neg. conseq.

Natura humana non constituit personam divinam *simpli-*citer seu quatenus *persona* est, sed tantum secundum deno-

1 — Vid. ampliora ap. Cajetanum (in h. art.), Gonet, Billuart, etc.

minationem, utique substantialem, a tali natura, seu in quantum est *humana*: non enim ex natura humana habet Filius Dei quod sit, quandoquidem ab aeterno fuit, sed solum quod sit homo. Verum secundum naturam divinam simpliciter constituitur divina persona; unde humanam, non divinam, dicitur assumere naturam.

ARTICULUS II.

Utrum divinæ naturæ conveniat assumere.

(Q. III, a. 2-3).

Titulus declaratione indiget.—*1º a)* *Natura*, ut nota *Cajetanus* (in h. loc), sumenda est non in abstracto tantum pro Deitate, sed et in concreto, secundum quod significatur nomine Dei et distinguitur contra personam simpliciter. —*b)* Quæritur an, posito Incarnationis facto, vere dici possit quod natura divina assumpserit naturam huinanam, non solum ut id *quo facta* sit unio, sed etiam ut id *quod assumpserit*. —*c)* Hic sane *assumptio* accipitur univoce, scil. prout terminatur ad unionem personalem Verbi.

2º Memoranda est sententia *Durandi* qui, cum in Trinitate negaret subsistentias relatives personarum virtualiter distiuctas a subsistentia absolute Deitatis, ratus est personam Verbi subsistere in natura humana formaliter vi subsistentiae essentialis, ideoque assumptionem *primo* et *in immediate* convenire naturæ divinæ.

3º Cum natura divina dupliciter considerari possit, nempe vel secundum statum *realis* identitatis cum tribus personis, vel secundum hypothesim *logicam* in qua personalitas per intellectum ab ea abstractatur, pro hoc duplii quæstionis adspectu duas conclusiones constituemus.

Conclusio 1º.—CONVENIT SECUNDARIO NATURÆ DIVINÆ ASSUMERE, QUIN HOC PRÆJUDICET MUNERI ASSUMPTIVO QUOD VERBUM PRIMO ET PROPRIISSIME EXERCET.

1º Pars ostend.—Assumere duo importat, scil. esse principium et terminum assumptionis. Atqui esse assumptionis

principium convenit naturæ divinæ secundum seipsam, quia ejus virtute assumptio facta est; esse autem assumptionis terminum non competit divinæ naturæ secundum seipsam, sed ratione personæ in qua consideratur et veluti illabitur. Ergo primo et propriissime persona dicitur assumere; at *secundario* potest etiam dici quod natura assumpsit humanitatem ad sui personam.—Eo modo intelligi potest *SS. Athanasii et Cyrilli dictum, Verbi naturam incarnatam esse*, nimirum non quasi sit in carnem conversa, sed quia naturam carnis assumpsit.

2^a *Pars* subjicitur contra Durandum et ad doctrinam D. Thomæ clarius explanandam.

Etenim 1^o ideo Durandus sententiam superius relata invexit, quia putavit proprietates relatives, quibus personæ divinæ constituuntur, non esse ex se et formaliter subsistentias. Atqui, quamvis divinæ illæ hypostases suam propriam seu relativam subsistentiam a subsistentia Deitatis absoluta mutuentur tanquam a *radice*, constat tamen ex doctrina de *Trinitate*¹ inter utramque, relativam scil. et absolutam subsistentiam, distinctionem virtualem intercedere; siquidem subsistentia absolute est incompleta in ratione personæ, compleetur autem et veluti specificatur per relationes subsistentes, personarum constitutivas. Ergo subsistentia relativa Verbi, completa in ratione personalitatis, vim habet *proxime* et *propriissime* terminandi suppositaliter naturam humanam².

2^o Nisi hoc admitteremus, periculum foret impingendi in falsam consequentiam, quod Pater et Sp. Sanctus sint incarnati non minus quam Filius: subsistentia enim absolute communis est tribus personis.—Tam absona positio concordaret cum errore *Subellianorum* seu *Patripassianorum* qui dogmatizabant Filium non potuisse incarnari et pati sine Patre, quocum ejusdem est naturæ.

Conclusio 2^a. — ABSTRACTIS MENTE PERSONALITATIBUS QUAS FIDES PONIT, POSSUMUS INTELLIGERE NATURAM DIVINAM ASSUMENTEM; IMO NON REPUGNAT A PARTE REI QUOD DEUS PER SUBSISTENTIAM ABSOLUTAM IMMEDIATE ASSUMAT NATURAM ALIENAM, PERSONIS EAM SECUNDARIO TANTUM TERMINANTIBUS.

1—Cf. Tract. nost. *de Deo*, Disp. VIII, Q. II, a. 2.

2—Cf. Cajet in h. loc., Gonet, Billuart etc.

1^a *Pars*, ut patet, non versatur circa Deum ut est *in se*; siquidem tanta est Dei unitas et simplicitas ut nihil possit ab eo abstrahi, ceteris remanentibus; sea abstractio sumenda est tantum *ex parte intellectus* modo suo, seu multipliciter et divisim, accipientis quod in Deo est unum.—Itaque semotis per intellectum proprietatibus personalibus quibus tres personæ divinæ constituantur, remanebit in mente nostra subsistentia Dei absoluta secundum se terminata. Atqui subsistentia secundum se terminata, in natura intellectuali, est persona. Ergo sic habebitur una Dei personalitas, ut Iudei intelligant, ad quam poterit assumptio terminari.

2^a *Pars communis* est inter *Thomistas* atque consequitur ex admissa in Deo subsistentia absoluta distincta a subsistentiis relativis.—Nam (ait Billuart) quod est Deo ratio subsistendi in natura propria, potest esse illi ratio subsistendi in natura aliena. Atqui ex subsistentia absoluta habet Deus ut subsistat in propria natura secundum perseitatem independentiae. Ergo per illam subsistentiam potest sibi immediate unire naturam creatam, quæ tunc secundario et mediate incomunicabilitatem suppositi a subsistentiis relativis sortietur.

Solv. obj. (cont. 1^{am} concl.).—OBJ. 1.—Assumere dicitur quasi ad se sumere. Atqui natura divina non sumpsit ad se naturam humanam. Ergo.

RESP. C. M.—D.m:... non sumpsit *ad e* ut est natura... C; ut est identica cum persona Verbi, N.—Neg. conseq.

OBJ. 2.—Quod convenit naturæ divinæ convenit tribus personis quibus natura *communis* est. Atqui falsum est quod Pater vel Sp. Sanctus assumpserit naturam humanam. Ergo.

RESP. D. M: Quod convenit naturæ divinæ secundum se... C; quod convenit ei *ratione personæ* Verbi... N.—C.m.—Neg. conseq.

OBJ. 3.—Assumere est agere. Atqui agere convenit personæ, non naturæ. Ergo.

RESP. C. M.—D.m:...non convenit naturæ ut principio *quo*, N; ut principio *quod*, S.d: non convenit naturæ in abstracto, C; non convenit naturæ in concreto, secundum quod est subsistens, N.—Neg. conseq.

ARTICULUS III.

Utrum una quelibet persona possit sine alia unam vel plures naturas, et plures personæ unum numero naturam, assumere.

roba formalis uniuscunq; (Art. 4-7)

Plura sub hoc generali titulo componuntur quæ S. Thomas per varios articulos edisserit, quæque, quanquam ad *possibilitatis* campum pleraque pertinent, scitu tamen utilia videntur, ut inde eorum quæ facta sunt in Incarnatione notitia illustrior capiatur.—Propositam materiam sequentium conclusionum limitibus comprehendemus.


Conclusio 1^a.—UNA PERSONA POTEST SINE ALIA NATURAM CREATAM ASSUMERE.

Same assumptionis importat non solum actum assumentis, sed et assumptionis terminum. Jamvero actus quidem assumentis procedit ex divina virtute, communi tribus personis, sed terminus unionis esse non potest nisi persona. Igitur, licet id quod est *actionis* in assumptione commune sit tribus personis, tamen id quod pertinet ad rationem termini unius personæ exclusive competit. Unde *simpliciter*, agentibus tribus personis, sola persona Filii assumpsit naturam humana.—Patet ex hoc *differentia* vigens inter assumptionem Incarnationis et assumptionem justorum per gratiam adoptionis: quippe haec, ad participationem divinæ naturæ et bonitatis terminata, communis est tribus personis tum ex parte *principii*, tum ex parte *termini*.

Conclusio 2^a.—QUELIBET PERSONA DIVINA POTUIT HUMANAM NATURAM ASSUMERE.

Etenim duo ad assumptionem requiruntur, actio unitiva et terminus. Porro utrumque competit singulis personis divinis: ergo. *In deel. Primo*, virtus divina, qua assumendi actus exercit, communiter se habet ad omnes personas; siquidem est tributum essentiae necessarium. *Secundo*, licet proprietates personales sint differentes, communis est tamen in tribus personis ratio personalitatis, qua persona terminativa est nature assumpta. Igitur Pater vel Sp. Sanctus potuit carnem assumere, sicut et Filius.—Quod si

*Actio unitiva
Tunc gratia
In deel. Primo
Secundo
Personalis ratio
Nature assumpta*




Pater incarnatus fuisse, a) filius simul dici posset secundum nativitatem temporalem absque naturarum confusione; b) non autem ejus incarnatio nuncupari posset missio, quia non esset Deus a Deo procedens.

Conclusio 3^a. — NON EST IMPOSSIBILE DIVINIS PERSONIS UT DUAE VEL TRES UNAM NUMERO NATURAM ASSUMANT. — Agitur de personis divinis secundum quod propriis personalitatibus distinguuntur ab invicem; et thesis militat contra Scotistas.

Prob. — 1^o *A pari.* Persona incarnata subsistit in duabus naturis, divina scil. et humana. Atqui tres personæ divinæ consubsistunt in una eademque natura divina. Ergo etiam possunt subsistere in una natura humana, quam singulæ per se primo terminent.

2^o *Ex intimiori ratione.* — Si quid propositæ conclusioni adversaretur, hoc esset vel ex parte personæ assumentis, vel ex parte naturæ assumptæ. Atqui neutro ex capite repugnantia datur: ergo. *Min. decl.* — Non ex parte personæ assumentis; siquidem talis est divinarum personarum conditio quod una non excludit aliam a communione ejusdem naturæ, sed solum a communione ejusdem personæ. — Non ex parte naturæ assumptæ: a) nam in hac materia judicium ferendum est non secundum potentiam naturalem creaturæ, sed secundum ejus potentiam obedientiam, quæ tam late patet quantum ipsa Dei omnipotentia. b) Verum equidem est unam personam totaliter terminare suâ subsistentiâ naturam assumptam; sed quia totalitas seu perfectio duplex est, intensiva et extensiva, una quælibet persona non nisi totalitate intensiva actum terminandi alienam naturam exercet, adeo ut extensive locus detur alteri terminationi, eo ferme modo quo paternitas in creatis totaliter intensive ad unum filium refertur, extensive vero etiam plures alios, si nascantur, attingit. c) Eo magis id conceditur, quod ex variis proprietatis relatis, quibus tres divinæ personæ constituuntur, triplex oritur ratio diversa per se primo terminandi unam naturam assumptam. d) Tandem advertenda est diversa habitudo naturæ creatæ ad propriam et ad alienam personalitatem. Cum enim propria personalitas ex ipsa natura constituatur, illa omnino istam adaequat et veluti exhaustit, nec posset sine contradictione natura in se terminata termi-



*Ne repugne fac
per unam naturam fuisse.
dicitur terminandi pars.
trinus fess. div.*

*qui facit
autem naturam
fess. et
cetera pars.*

nari simul *in alio* supposito; at non repugnat ut eadem natura terminetur simul in pluribus suppositis alienis diversarum rationum¹.

3º Hac positione facta, scil. quod tres personæ assumerent unam naturam humanam, verum esset dicere personas illas esse *unum hominem*, propter unam humanitatis formam, non secus ac sunt unus Deus propter unam Deitatem, quin tamen sint *unus* simpliciter.

Conclusio 4º.—UNA PERSONA DIVINA POTEST ASSUMERE DUAS NATURAS HUMANAS.

1º *Prob.*—Assumptio hujusmodi possibilis est tum quoad principium, tum quoad terminum: ergo. a) Quoad *principium*: illud quod potest in unum et non in amplius habet potentiam limitatam. Atqui potentia divine personæ infinita est, nec potest ad aliquid creatum limitari. Ergo. b) Quoad *terminum*: nam si non posset persona divina, praeter unam naturam assumptam, aliam terminare, sequeretur divinam personalitatem creata natura includi et comprehendendi. Atqui hoc est impossibile, tum quia generatim increatum a creato comprehendendi non potest, tum quia Deus infinitus est non solum natura et causalitate, sed etiam secundum vim subsistentiam et terminativam personæ. Ergo. Post unionem unius naturæ manet infinita persona.

2º *Observandum* est quod in tali hypothesi, nempe si persona divina assumeret duas naturas humanas, propter unitatem suppositi diceretur *unus homo* habens duas naturas humanas. Ratio est, quia nominibus utendum est secundum quod sunt ad significandum imposita. Atqui usu communis nunquam nomen concretum ab aliqua forma impositum, sive in substantialibus, sive in accidentalibus, pluraliter dicitur nisi propter *pluralitatem suppositorum*, dum insuper exigitur ad multiplicationem nominis concreti substantivi *pluralitas formæ* significare. Hinc, quemadmodum ob defectum hujus postremæ conditionis tres personæ assumentes eamdem naturam humanam dicerentur *unus homo*; ita, propter defectum primæ conditionis, una persona assumens duas naturas humanas *unus homo* quoque denominaretur².

1—Cf. Cajetanus, Billuart, Satolli, etc.
2—Cf. Billuart, Diss. VI, a. 4.

ARTICULUS IV.

*(Convenientia fuit ut persona Filius
aut filio p'iu' auct' personae?
de p' incarne?)*

*Utrum fuerit magis conveniens quod persona Filii
assumeret humanam naturam quam alia
persona divina.*

1^o Fide constat ex Scriptura, Symbolis aliisque ecclesiasticis fontibus solum *Filium de facto incarnatum esse*; nunc autem quæritur de *convenientia* hujus facti.—2^o Jam ostensum est *absolute* seu de potentia absoluta fieri potuisse ut Pater vel Sp. Sanctus humanam carnem assumeret, propterea in quæstione mox pertractanda id unum dubitationi subest, utrum ordini rerum a Deo constituto *conformius* fuerit *Filium p'æ cæteris personis divinis incarnari*; quod ad *ordinatam potentiam* pertinet.

Conclusio. — CONVENIENTIUS FUIT UT PERSONA FILII ASSUMERET NATURAM HUMANAM.

Prob. — Id in mysterio Incarnationis convenientius dici debet quod magis coaptatu' tum Unioni ipsi, tum fini Unionis, tum reparationi peccati qua finis ille attingitur. Atqui incarnationis personæ Filii, p'æ cæteris personis divinis, ex tripli capite p'rædicto potiorem congruentiam desumit. Ergo. — *Min. decl.* per partes.

1^o pars: *Incarnatio Filii magis congruit Unioni.* — Sane convenienter ea quæ sunt similia uniuntur. Atqui Filius, secundum nomina propria propriasque rationes Verbi et *Imaginis*, præcipuam quamdam p'æ se fert similitudinem cum natura humana: ergo. — 1^o *Verbi* Dei duplex attenditur convenientia, una quidem communis ad *totam creaturam*, alia specialis ad *hominem*, prout rationalis est. a) Cum enim verbum seu conceptus artificis sit similitudo exemplaris artificiorum, Verbum Dei, quod est *æternus divinæ mentis conceptus*, totam creaturam exemplariter p'ebet. Porro, in ordine naturæ, per participationem hujus exemplaritatis creaturæ sunt in propriis speciebus institutæ juxta mutabilem, qua constant, conditionem. Ergo, cum gratia naturam elevet secundum quamdam proportionis legem, convenientis fuit ut creatura per Verbi unionem, non partici-

*Ch. d' un' entité divine
esté univ. —
Ch. d' un' individualité
entité p' le filos il
la nature humaine
Ex tant que Verbi
Anomie de l'ac. être &
creation, mais aussi
Bee l'homme —
A exemplaire —
Hennies que ce n'est pas
exemplaire sera
la reparation*

*Udilettor in
divinitate dicit
me meditor
in Natura*

*Probabilitate misericordia trinitatis habet deus
in aliis virtutibus perfectione deus autem
meritis*

patam tantum, sed personalem, repararetur in ordine ad
æternam et immobilem perfectionem. Eo magis, quia per
eandem artis formam, qua artifex artificiatum condidit, opus
suum, si collapsum fuerit, restaurat. Itaque divinum opus,
formatum per Verbum, erat Verbo reformatum. b) Præ-
terea, specialis Verbo inest affinitatis necessitudo cum
humana natura, quatenus est conceptus æternæ sapientiæ,
a qua omnis sapientia hominum derivatur. Ergo, sicut dis-
cipulus instruitur per hoc quod recipit verbum magistri, sic
optime homo in sapientia perficitur per arctiorem cum Verbo
Dei conjunctionem, juxta illud (Eccli. I, 5): Fons sapientiæ
Verbum Dei in excelsis. Unde ad consummatam hominis
perfectionem conveniens fuit ut ipsum Verbum Dei humanae
naturæ personaliter uniretur.—2º Accedit ratio Imaginis,
propria Filii Dei, secundum quam peculiariter convenit cum
creatura reparanda, scil. cum homine, qui ad imaginem Dei
factus est (Gen. I); quo sub respectu maxime "decuit ut
Imago imaginem assumeret, increata creatam" (3 S. D. I,
Q. II, a. 2).

2º pare: Incarnatio Verbi magis convenit fini Unionis;
quod evincitur ex reliquis quæ Verbi propria sunt,
scil. ex rationibus Filii et media Personæ.

1º a) Supremus finis Incarnationis est gloria Dei, specia-
tim secundum ostensionem relationum quibus divinae per-
sonæ inter se devincuntur, et clariorem Trinitatis agnitionem.
Jamvero in id certe confert incarnatio Filii: siquidem "con-
venit sibi ad Patrem et deprecatio et satisfactio, et alia
hujusmodi, quæ in Patre auctoritatem demonstrant" (3 Sent.
loc. cit.) ; præterea inde fit quod "qui in Divinitate est Dei
Filius in humanitate sit Virginis filius, ut non sint plures
fili i in Trinitate" (ibid.). b) Finis proximior Unionis est
impletio predestinationis eorum qui preordinati sunt ad
haereditatem celestem. Porro hæc haereditas non debetur
nisi filii, secundum illud (Rom. VIII, 17): Si filii, et
haeredes. Itaque congruum fuit ut per eum, qui est filius
naturalis, homines consequerentur hujus filiationis similitu-
dinem seu adoptionem, juxta verba Ap. (ibid. v. 29): Quos
præscivit et predestinavit conformes fieri imaginis Filii
sui.—2º Si spectetur Verbum ut media in Trinitate persona,
congruit ejus incarnationis potissimum effectui et fini qui in

*Reductio in
Trinitate ab
eo medietate
in Humanitate*

*Personæ in media
convenit esse
medietatem eam*

*de filio de deo ut dicitur
de Rom papa —
convenit esse lumen
matricis. ut dicitur, ergo
hunc et lumen crucifixum*

*lumen in deo
regere anima
de lo pague sis*

*lumen in deo
regere anima
de lo pague sis*

reconciliatione hominis ad Deum consistit: quippe "debet ut qui est medius sit et mediator" (3 Sent. l. cit.).

3^a pars: Incarnatio Verbi magis convenit reparationi peccati, qua finis Unionis obtinetur.

Etenim quatuor inveniuntur Filio *appropriata*: sapientia, virtus, aequalitas, et species seu pulchritudo¹. Jamvero haec quatuor, in incarnatione Filii, apprime congruant homini restaurando.—*a)* Congruit *sapientia*, quatenus homo, appetitu scientiae daemonisque astutia seductus, cœlestis scientiae artibus a peccato liberatur.—*b)* Congruit *virtus*, quasi brachium Patris, ad victoriam de hoste maligno capiendam; (Luc. I, 51): *Fecit potentiam in brachio suo.*—*c)* Pariter *aequalitas*, attributa Filio secundum unitatem cum Patre, consonat tum aequalitati justitiae Deum inter et hominem restituendæ, tum naturæ morbi spiritualis seu peccati sanandi; uterque enim, diabolus et homo, instigator et auctor humanæ ruinæ, peccaverat appetendo ille potentiae, iste scientiae Dei aequalitatem.—*d)* Tandem *species* et *pulchritudo* congruit reparationi, in qua deformata per peccatum imago et pulchritudo Dei erat in homine per divinam artem reintegranda.

Solv. obj.—OBJ. 1.—Per mysterium Incarnationis homines ad veram Dei cognitionem perducendi erant. Atqui ex hoc quod Filius est incarnatus præ Patre, multi inducti sunt in errorem, v. g. Ariani ponentes inæqualitatem personarum divinarum. Ergo.

RESP. C. M.—D.m:... occasionaliter et libero hominum defectu, C; quasi ex incarnatione alterius personæ homo non potuisset occasionem erroris sumere, N.—*Neg. conseq.*

Nihil est quo humana malitia aut cœca perversitas non possit abuti, quando et ipsa Dei bonitate abutitur, juxta illud (Rom. II, 4): *An divitias bonitatis ejus... contemnis?* Unde etiamsi persona Patris fuissest incarnata, forte ex hoc homo alicujus erroris occasionem sumpsisset, testimans Filium non potuisse ad humanam naturam reparandam sufficere.—Qui autem errores post incarnationem Filii suborti sunt, fidelium ingenia ad divinorum veritatem diligentius exquirendam et intelligendam exercuerunt, sicut et mala

1—*De Deo trino*, Disp. X, Q. I, a. 2.

quæ in creaturis accidunt ad bonum a Deo ordinantur (C. G. IV, 55).

OBJ. 2.—Incarnationis effectus videtur esse recreatio quædam humanæ naturæ. Atqui potentia creandi appropriatur Patri. Ergo.

RESP. C. M.—D.m :... Patri agenti per Verbum, C; independenter a Verbo, N.—*Neg. conseq.*

Prima rerum creatio facta est a potentia Dei Patris *per Verbum*; nam *omnia per ipsum facta sunt* (Joan. I, 3). Itaque et recreatio, auctore Patre, per Verbum fieri debuit, ut sic restauratio creationi responderet; quod insinuatur (2 Cor. V, 19): *Deus erat in Christo mundum reconcilians sibi.*

OBJ. 3.—Incarnatio ordinatur ad remittenda peccata. Atqui peccatorum remissio attribuitur Spiritui Sancto, ut patet ex (Joan. XX, 22-23). Ergo.

RESP. C. M.—D.m :...tanquam ei qui donum est Patris et Filii, sibique idcirco *dona gratiæ et caritatis appropriatione* veluti formaliter adsciscit, C; tanquam *auctori et mediatori* per quem dona illa potestative in mundum effunduntur, N.—*Neg. conseq.*

Sententia
Dei

Nature humaine était-elle
plus apte que la autre nature
à être assumée?

QUÆSTIO TERTIA

DE MODO UNIONIS EX PARTE NATURÆ ASSUMPTÆ

Perspecta unione hypostatica ex parte personæ assumentis, theologi mens in eamdem unionem pervestigandam *ex parte naturæ assumptæ* convertatur oportet.—Circa quod triplex consideratio occurrit. *Prima* est quantum ad *ipsam naturam*, sive secundum speciem (art. 1), sive secundum statum seu conditionem (art. 2) inspectam. *Secunda* est quantum *ad partes naturæ assumptæ*, quæ essentialiter sunt corpus (art. 3) et anima (art. 4). *Tertia* est quantum ad assumptionis *ordinem* (art. 5). Tres igitur D. Thomæ quæstiones in unam, præfato articulorum nexus dispositam, haud inconvenienter colligentur.

ARTICULUS I.

*Utrum natura humana fuerit magis assumptibilis
a Filio Dei quam aliqua alia natura.*

Nonnulla præmittantur.—^{1º} Aliquid *assumptibile* dicitur, quasi aptum a divina persona assumi. Hic autem aptitudo non potest intelligi secundum potentiam *naturalem*, *activam* vel *passivam*; neutra enim valet se extendere ad id quod transcendit naturalem ordinem, cuius modi est personalis unio creature ad Deum. — Relinquitur ergo quod *assumptibilitas* dicatur secundum potentiam *obedientialem* et *divinam*¹.

Verum ^{2º} potentia divina dupliciter accipitur, vel ut *absoluta*, vel ut *ordinata*.—*a)* Potentiae *absolutæ* attribuendum est quidquid non involvat in se contradictionem, neque in

1.—Cf. 3 Sent. D. II, Q. I, a. 1, sol. 1.

Potentia Absoluta
Assumptum ad omnium
Assumptibilis

1) Sec

2) A

Hierius
Tri-

{ 1/ Absolute { 1) Conditionata :
2/ Simpliciter : Tous les attributs divins
2/ Ordinata = { Regarde un ordre donné -
QUEST. III. ART. I. QUEST. III. ART. I.

71

*Primitus et intentionis
ordinatum est per se
per deum et naturam
velut per aries*

defectum potentiae vergat. Quod quidem dupli modo habetur: aut conditionata tantum, si objectum potentiae, etsi secundum se non repugnans, sapientiae tamen ac sanctitati divinae contrariatur; aut simpliciter, si nulla contrarietas hujusmodi, antecedenter ad statutum ordinem presentis providentiae, inveniatur.—b) Supposito autem speciali ordine divinitus in rebus instituto, plura quae absolute fieri poterant amplius possibilia non sunt, utpote ab ordine illo dissona; sed id dicitur possibile de potentia ordinata quod praedicto ordini congruit¹.

3º Jam sub lumine præfixorum principiorum gressum faciamus ad solvendam quæstionem ab Angelico propositam, quam (ut comperiet lector) et rei utilitas et argumenti jucunditas summopere commendant.

Conclusio.—SOLA NATURA HUMANA UNDEQUAQUE ASSUMP-TIBILIS DICENDA EST.

1º Veritatis hujus indicium colligi potest ex verbis Sapientiae genitae (Prov. VII, 31): Delicia meæ esse cum filiis hominum; que merito congruentiam assumptionis humanæ naturæ designare censentur. Idem videtur innuere Apostolus (Hebr. II, 16): Nusquam enim Angelos apprehendit, sed semen Abrahæ apprehendit.

2º Assumptibilitas humanæ naturæ spectari potest vel per habitudinem ad naturam irrationalem, vel per respectum ad naturam angelicam. Atqui utraque comparatio demonstrat in sola natura humana coire duo illa, vid. dignitatem et necessitatem, ex quibus congruentia Unionis secundum ordinem divinæ sapientiae exsurgit. Ergo.—Min. decl. sequenti processu.

Primo, non fuit conveniens creaturam irrationalē assumiri: ubi negamus non solum assumptibilitatem de potentia ordinata, sed etiam de potentia absoluta simpliciter (licet non conditionata).—Sane creatura irrationalis est expers intellectus atque voluntatis. Porro dignitas intellectiva et volitiva videtur omnino requiri ad congruam unionem hypostaticam cum divina persona. Nam a) imprimis congruit ut natura, ad divinæ subsistentiæ consortium erecta, sit capax attingendi Deum propria operatione cognitionis et amoris.

1—*Ibid.*, D. I, Q. II, a. 3.

- 1) Secundum potentiam divinam = tout est possible à dire
{ toutes les natures complètes sont assumptibles
Homo Angelus — Homo — Irrationnelles créature sont assumptibles.
2) Secundum principia propria = (congruentia)
qui rendent une nature plus apte à être assumée —
a) dignitas = Angelus + Homo
b) voluntas + Homo — Ergo Homo — Terrene

b) Præterea, quod deficit a minori non habet congruitatem ad id quod majus est; v.g. corpus quod non est aptum perfici animâ sensitivâ, multo minus potest animâ intellectivâ ornari. Jamvero longe major et perfectior est unio ad Deum secundum esse personale quam secundum operationem. Quocirca, creatura irrationalis, quæ nequit Deo operatione conjungi, certe caret congruitate qua ei personaliter uniatur. c) Suppetit tertia ratio ex (C. G. IV, 55). Solius rationalis naturæ est per se agere; creaturæ autem irrationales magis aguntur naturali impetu quam agant per seipsas. Atqui oportuit a Deo assumi naturam quæ per se agere posset, secundum quod convenit naturæ elevatæ ad dignitatem personæ. Ergo.

Secundo, nec congruebat ut natura angelica assumetur; quod accipias velim non absolute, sed secundum potentiam Dei ordinatam.—1º Namque (contra quosdam) tenemus naturam angelicam *absolutâ* Dei potentia esse assumptibilem, et objicientibus eam non posse in unitatem divinae personæ assumi, nisi ejus personalitas destrueretur (quod neque ejus incorruptibilitati neque assumentis bonitati convenit), respondemus posse Deum, creando novam angelicam naturam, eam sibi in unitate personali copulare.—At 2º deest congruitas *necessitatibus*, ex qua naturæ angelicæ assumptio cadat sub potentia Dei ordinata. Etenim a) ut Scripturæ divinæ satis insinuant, præcipua Incarnationis causa non alia assignanda videtur quam peccatorum expiatio. Atqui Angelus, sicut cognoscendo simplici intellectu immobilem habet apprehensionem, ita volendo uno libero actu immobilem exercet electionem¹; unde vel in malum omnino non fertur (quo in casu nulla reparacionis necessitas), vel, si in malum feratur, immobiliter labitur casu irremediabili quo, statu vice egressus, in termino constituitur. Ergo. b) Cæterum Angeli malii peccarunt, non *extraeas suggestionis* voce decepti, sed propriâ inducti voluntatis malitiâ quæ in singulis actualis fuit, quin tamen tota spirituum cœlestium universitas ruinam illam subiret; e contrario vero cuncta ista hominibus contigerunt. Igitur minus Angelos decebat peccati reparatio²; quam, contra, levior in homine primæ culpæ per-

1—Cf. Tract. nost. *de Creatione*, Disp. III.

2—Cf. 2 S. D. VII, Q. I, a. 2.

- { 1) Non erat peccatum in natura irrationali -
- 2) Erat peccatum, sed irremediabiliter in angelis -
- 3) Erat peccatum remediabile in homine

versitas majorque necessitas convenientissimam nobis fuisse suadent. c) Demum, cum Angelus naturâ sit Deo propinquior, poterat ab Eo intelligibiliter instrui de veritate divina; sed conditio hominis, cognitiones suas a sensu colligentis, requirebat ut Deus sensibiliter hominem de seipso instrueret: quod per Incarnationem factum est (C. G. l. cit.).

Tertio itaque inferendum superest solam naturam humnam fuisse congrue assumptibilem. — Nam 1^o in ea attenditur congruentia et secundum dignitatem et secundum necessitatem. a) Secundum dignitatem: quippe in quantum rationalis est, nata est ipsum Verbum cognitionis amorisque actu quadamtenus attingere. b) Secundum necessitatem: nam in natura irrationali peccatum non erat; in angelica erat, sed irremediabiliter; in sola natura humana reperitur peccatum remediabile. — 2^o Cum homo sit ex corpore animaque compositus, confinium, ut ita dicam, tenet utriusque naturae, corporalis et spiritualis, adeo ut in eo omnes creaturæ veluti confluant. Quare naturâ humana unitâ Verbo et per Verbum restauratâ, reliquæ naturæ quodammodo unitæ sunt, et ipsa creatura irrationalis ex peccato Adæ quasi deteriorata, secundum quod in usum hominis cedit, restaurata est.

Solv. obj. — Obj. 1. — In rebus mirabiliter factis “ tota ratio facti est potentia facientis ” (Aug. ad Volus., ep. 137, cap. II, n. 8). Atqui potentia Dei, utpote infinita, nequit limitari ad assumptionem unius naturæ. Ergo.

RESP. D. M. ... secundum possibilitatem absolutam, C; secundum possibilitatem ordinatam, N. — C.d.m. — Neg. conseq.

Creaturæ denominantur aliquales ex eo quod competit eis secundum proximas et proprias causas, non ex eo quod eis convenit secundum causas primas et universales; v. g. morbus dicitur incurabilis, non quasi a Deo curari non possit, sed quia propria principia subjecti et ars medica non habent unde illum sanent. Sic ergo dicitur aliqua natura non esse assumptibilis, non ad subtrahendum aliquid potentie Dei *absolu*re, sed ad ostendendum conditionem creature que ad hoc aptitudinem non habet.

OBJ. 2. — Similitudo est congruitatis ratio in Incarnatione. Atqui datur in ipsa creatura irrationali similitudo ad Deum. Ergo.

RESP. *D. M.*: Similitudo nobilior... *C*; sola similitudo inferioris ordinis, *N*.—*D.m.*... similitudo inferior seu *vestigii* tantum, qua indigitatur Dei causalitas, *C*; similitudo nobilior et *imaginis* per participationem divinæ intellectualitatis, *N*.—*Neg. conseq.*

OBJ. 3.—Admittitur quod similitudo imaginis fundat congruitatem assumptibilitatis. Atqui in natura angelica reputatur expressior Dei similitudo secundum imaginem quam in natura humana. Ergo.

RESP. *D. M.*...i. e. non repugnantiam ex parte divinæ sapientiae antecedenter sumptæ, *C*; quasi per se sola et absque motivo necessitatis etiam consequenter assumptibilitatem efficiat, *N*.—*C.m.*—*Neg. conseq.*

OBJ. 4.—Tanto aliquid est assumptibilius, quanto perfectius. Atqui totum universum est perfectius quam pars, ut natura humana. Ergo.

RESP. *D. M.*...quanto perfectius perfectione unitatis substantialis, *Trans*; perfectione compositionis et ordinis substantiarum diversissimarum, quarum plures ratione et voluntate carent, *N*.—*C.d.m.*—*Neg. conseq.*

Pf. 8. Th. aa² 2
ARTICULUS II.

*Utrum conveniens fuerit ut Filius Dei assumeret
naturam humanam singularem et numero
unam ex stirpe Adæ.*

(Q. IV, a. 4-6)

Natura humana, secundum statum et conditionem suam, tripliciter considerari potest, nempe: vel ut *singularis* est, et dividitur contra communem seu abstractam a principiis individuantibus; vel ut est *una numero*, et dividitur contra naturam plurium vel omnium humanorum individuorum; vel ut descendit ex stirpe *Adæ* secundum carnalem generationem, et dividitur contra naturam immediate a Deo creatam.—

Tria hæc trium conclusionum materiam suppeditant, quas brevi discursu expediemus.

Conclusio 1^a. — **FILIUS DEI NEC ASSUMPSIT NEC ASSUMERE DEBUIT NATURAM HUMANAM AB INDIVIDUIS ABSTRACTAM.** — *Hoc militare intelligitur contra Pantheistas et Progressistas modernos somniantes Christum quemdam idealistico-realem, seu Divinitatis incarnationem evolutivam in humana specie cujus potior typus fuit Christus*¹.

Prob : — 1^o ex *auctoritate* Evangeliorum, in quibus Christus *ceu individuum humanæ speciei ubique exhibetur*. Jam propheta id vaticinatus erat (Baruch, III, 38) : *Post hæc in terris visus est, et cum hominibus conversatus est.* — Ad rem *Damascenus* (III Fid. orth. c. 11) : “Deus Verbum incarnatum non eam, quæ nuda contemplatione consideratur, naturam assumpsit: non enim incarnatio hoc, sed deceptio et fictio Incarnationis esset.”

2^o *Ratione*. Natura hominis, præter esse quod in singulibus habet, duplice potest accipi: *uno modo*, quasi per seipsum consistat extra materiam (ut Platonici posuerunt); *alio modo*, quasi existens in intellectu sive humano sive divino. Atqui in neutro ex hisce statibus natura humana assumptibilis erat: ergo. *Min. prob.* per partes. — 1^a *pars* ostend. 1^o ex *falsitate suppositi*; falsum quippe est naturam humanam existere posse absque materia sensibili, quæ ad rationem talis nature pertinet. 2^o Etiamsi valeret hypothesis platonica, plura adhuc assumptioni humanitatis in illo statu obstant: *a)* nam assumptio terminatur ad personam; repugnat autem formæ communi, qua talis, ut in persona *individuetur*. *b)* Naturæ communii non possunt attribui nisi operationes communes et universales; porro vis *merendi*, ad quam pro nobis exercendam Filius Dei humanitatem assumpsit, requirit actiones individuas ac liberas merenti cuique proprias. *c)* Amplius natura, ab individuis abstracta, non est sensibilis, sed intelligibilis; Filius autem Dei assumpsit naturam humanam, ut in ea *visibilis* hominius appareret. Ergo. — 2^a *pars* evincitur. Et 1^o non potuit assumi humana natura, secundum esse quod habet in *intellectu divino*: *a)* tum quia sic non distinguitur realiter a natura divina;

1—Cf. Monsabré, Conf. de 1878, *Index des erreurs*, I et V.

b) tum quia consequeretur humanitatem ab æterno fuisse Filio Dei conjunctam. Neque 2º humana natura assumptibilis erat, secundum quod est in *intellectu humano*; hoc enim nihil aliud esset quam intelligi assumptionem humanæ naturæ: qua reipse non assumpta, notio illa falsa foret meraque Incarnationis fictio.

Conclusio 2º. — NON FUIT CONVENIENS HUMANAM NATURAM IN OMNIBUS SUIS INDIVIDUIS A VERBO ASSUMI; — ubi non negatur *absoluta possiblitas*, sed solum *convenientia*, quod Verbum Dei assumpserit et per se terminaverit singulas humanitates.

1º Quid *de facto* fides habeat, liquido patescit ex *vita Christi* qui velut singularis homo, a cæteris humanis suppositis realiter distinctus, versatus est et passus ac mortuus est pro eis, juxta illud (*Rom. V, 8-9*): *Commendat charitatem suam Deus in nobis, quoniam cum adhuc peccatores essemus, secundum tempus, Christus pro nobis mortuus est*; quod locum non haberet, si in omnibus hominibus humanitatem assumpsisset. — *Diserte Damascenus* (*Orth. Fid. l. cit.*) : “Neque enim omnes hypostases a-sunpsit, sed eam (naturam) quæ in individuo est.”

2º Prob. *convenientia facti* multipliciter: — a) nam in hypothesi contraria tolleretur *multitudo suppositorum* humanæ naturæ, manente sola persona assumente. At *connaturalis* est naturæ nostræ suppositorum numerus, nec ulla ratio suadebat ut huic naturali conditioni derogaretur. Ergo. — b) Praeterea, tunc essent omnes homines *æqualis dignitatis*, ideoque non posset Christus dici primogenitus in multis fratribus secundum humanam naturam: quod contrarium est *dignitati Filii Dei* incarnati. — c) Amplius, sicut unum suppositum divinum est incarnatum, ita congruebat unam singularem naturam assumi ut *ex utraque parte unitas servaretur*. — d) Demum *dilectio Dei* ad homines manifestatur non solum in ipsa humanitatis assumptione, sed præcipue per ea quæ passus est in carne *pro aliis* hominibus; hic autem Incarnationis finis requirebat realem suppositorum distinctionem (resp. ad 2).

Conclusio 3º. — FILIUS DEI CONVENIENTER ASSUMPSIT NATURAM HUMANAM EX STIRPE ADÆ, PER ABRAHAM ET DAVID.

— “Poterat Deus creare unam naturam humanam in suppo-

*Conveniens facti
file de stirpe de puncto
natura humanæ
terie de la race
d'Adam
Die*

U. p. 186

sito Verbi, sicut creavit Adam non per propagationem; poterat etiam aliquem alium hominem cum sua uxore creare innocentes et in innocentia perseverantes, sicut creavit Adam et Eam, et ex illa innocentie stirpe humanam naturam assumere, et non ex stirpe Adæ; poterat et unam solam Virginem creare innocentem ex qua nasceretur, sicut natus est de M. Virgine filia Adæ. Cum igitur multis aliis modis Incarnatio fieri potuissest, quæsitum est an *convenienter* sit facta ex stirpe Adæ" (Cajet. in art. 6) per Abraham et David, ut V. et N. T. oracula evenisse demonstrant.

Prob. concl. per partes.

1^a *Pars est de conveuientia assumptæ naturæ ex stirpe Adæ.* — Sane a) hoc videtur ad *justitiam* pertinere, ut, quantum fieri possit, ille satisfaciat qui peccavit. Atqui novimus Adæ progeniem peccato originali fuisse infectam. Ergo de corrupta hac natura assumi congruebat id per quod satisfactio pro tota humanitate implenda erat; adeo ut Christus esset *segregatus a peccatoribus* (Heb. VII, 26) non quantum ad *naturam* quam salvare venerat, sed quantum ad *culpam* quam venerat destruere.—b) Secundo hoc etiam majorem *hominis dignitatem* demonstrat, quod *victor* diaboli ex illo nascatur genere cuius diabolus *victor* exstiterat. Atqui genus Adamicum fuerat diabolica fraude deceptum. Ergo conveniebat ut Filius Dei, ex stirpe Adæ prodiens, hominis *victorem* et *deceptorem* profligaret. Hanc rationem tradit *Augustinus* (de Trin. XIII, 18).—c) Demum per hoc quod de stirpe corrupta et infirma tanta perfectio tantaque virtus efflueret, mire ostenditur tum Christi *puritas*, tum Dei *omnipotencia*.

2^a *Pars jure addit "ex stirpe Adæ per Abraham et David."* — Quia enim sanctissimus Dei Filius in sua Incarnatione erat velut innocentiae summam adepturus, conveniens fuit ut a primo peccatore Adam usque ad Christum perveniret mediantibus quibusdam justis, in quibus quædam insignia future sanctitatis preefulgerent. Jamvero id contigit in populo hebraico per *Abraham* qui, promissione de Christo accepta (Gen. XII, XVIII, XXII), divinum fœdus circumcisio signavit (*ibid.* XVI), et per *David*, Christi figuram, ex quo Messias erat nasciturus (Luc III).¹

1—Vid. infra, Disp. VII, Q. I, a. 1.

ARTICULUS III.

Utrum Dei Filius verum et terrenum corpus assumpserit.

(Q. V, a. 1-2)

1º Humana natura duabus constat *partibus essentialibus*, scil. corpore et anima; unde, cum in præc. articulis de modo unionis quoad naturam generatiū egerimus, nunc eadem unio investiganda subit in specie seu secundum partes naturæ constitutivas.

2º Quod ad corpus attinet, a) *Docetæ* et speciatim *Manichæi*, estimantes terrena hæc omnia fuisse a diabolo seu malo principio condita¹, posuerunt Filiū Dei non verū corpus, sed phantasticum assumpsisse (C. G. IV, 29); quibus consenserunt *Priscillianistæ*.—b) His propinque adhærentes, alii (*ibid. c. 30*) docuerunt Christi corpus non e terra matreque Virgine exortum esse, sed de cœlo a Filio Dei asportatum (*Valentinus*) aut ex aëre confectum (*Apelles*). Valentini errorem renovarunt *Anabaptistæ*.—c) Non longe a Manichæis abeunt moderni defensores systematis *dynamici* qui, cum *Boscovichio*, negant realem corporum extensionem et perceptionem; nam (scite observat *Emus Satolli* in art. I) “fere nullum discrimen est, aut in *Philosophia* docere non percipi a nobis nisi impressiones et corporum extensionem phænomenicam esse, aut in *Theologia* asserere quod Christus phænomenicum corpus assumpserit.”

3º Duas conclusiones pro dupli errori, Docetarum scil. et Valentini, proponemus.

Conclusio 1º. — FILIUS DEI NON PHANTASTICUM, SED VERUM CORPUS ASSUMPSIT. — Huc spectat, præter alia, decretum *Eugenii IV* pro Jacobitis: “Sacrosancta R. Ecclesia... anathematizat Manichæum cum sectatoribus suis, qui Dei Filiū non verū corpus, sed phantasticum sumpsisse som-

1.—Hæc Manichæorum doctrina (ut advertit Billot, *de Verbo inc.*, p. 173) quoad *substantiam* hodiendum viget et nova incrementa accipit in antris *massonicis*: quod ipse probat ex verbis Alb. Pike, in quibus Lucifer, velut principium bonum, Adonai quasi principio malo opponitur.

niantes, humanitatis in Christo veritatem penitus sustulerunt."

1º Suppetit ipsum Christi testimonium, ubi, post resurrectionem, phantastici corporis suspicionem expresse a mente discipulorum arcet dicens (Luc. XXIV, 39) : Palpate et videte, quia spiritus carnem et ossa non habet, sicut me videvis habere. — Ex Patribus audiatur S. Augustinus (l. 83 Qq., q. 14) : "Si phantasma fuit corpus Christi, fefellit Christus; et si fefellit, veritas non est. Est autem veritas Christus. Non igitur phantasma fuit corpus ejus."

2º Triple ratio contra Phantasiastas assignari potest.—
a) Primo, Filius Dei vere, ut ex precedentibus liquet, naturam humanam assumpsit. Atqui essentiale est humanæ naturæ ut verum corpus habeat. Ergo.—b) Secundo, nisi verum esset Christi corpus, non vere, sed specie tenus Christus diceretur conceptus, natus, passus, mortuus et sepultus, nec vera hominis salus subsecuta fuisset. Atqui consecataria ista Scripturae auctoritatem evacuant; imo finem Incarnationis penitus submovent. Ergo.—c) Tertio, in hypothesi Manichæorum assumptio humani corporis reduceretur ad fictionem et mendacium. Atqui summa personæ assumentis dignitas ac veracitas omnem fictionem ab opere humanæ Redemptionis excludit. Ergo.

Conclusio 2º. — ASSUMPSIT FILIUS DEI NON SIDEREUM CORPUS, SED TERRENUM ET HUMANUM. — Id fide constat ex Symbolo Athanas. et Conciliis, maxime ex Eugenio IV in Cone. Florent. damnante "Valentinum asserentem Dei Filium nihil de Virgine matre cepisse, atque ita transiisse per uterus Virginis sicut per aqueductum defluens aqua transcurrit."

Enim vero 1º Valentinianorum, non secus ac Manichæorum, positio processit ex ca radice, quia arbitrabantur corpora hujus terræ mala esse et a malo principio oriri. Atqui quam falsa sit opinatio ista, nemo est qui non perspiciat, nosque alibi eam explosimus (*de Creatione*, Disp. I, Q. I, a. 1). Ergo.

2º Scriptura explicita est. — Nam in V. T. promissus Christus vocatur (Gen. III, 15) semen mulieris, de quo Deus ad Abraham (Gen. XXII, 18) : Benedicentur in semine tuo omnes gentes terræ, et similiter ad David (Ps. CXXXI, 11) :

Est ce que N.S. a tout de suite assumé tout son sang?
Cogitare d'abord que le sanguis nutrimentalis (vile & dénué de tout sang) et le sanguis naturalis est mixtus que a été assumé

De fructu ventris tui ponam super sedem tuam; idem Christus nominatur (Is. XI, 1) flos de radice Jesse (patris David), et (ibid. LIII, 2) virgultum ascendens de terra sitiensi. In N. T. saepè se Dominus appellat filium hominis (Matth. VIII, 20; IX, 6; X, 23); et Ap. (Gal. IV, 4) eum dicit factum ex muliere.—Perperam vero hæretici objiciebant verba B. Pauli (1 Cor. XV, 47): Primus homo de terra, terrenus; secundus nomen de caelo, celestis. Quippe Christus taliter describitur, non sensu a Valentinianis accepto, sed triplici alia ratione, nempe: a) ratione divinæ naturæ secundum quam īternaliter in cœlo natus est; b) ratione corporis cœlesti virtute, i. e. Sp. Sancto miraculose agente, formati; c) ratione demum qualitat̄is qua corpus illud prope jure suo cœlestem gloriaū consecuturum erat¹.

*3º a) Contra Valentiniū militant rationes quibus supra demonstravimus convenientiam assumptionis naturae humanæ ex stirpe Adæ.—b) Etsi vero, ad formandum Christi corpus, materia siderea vel aërea, ut aiunt, transiisset per B. M. Virginem quasi aqua per aquæductum, non ideo verificantur effata biblica superius adducta, utpote quæ omnino supponunt corpus ex semine veterum Patrum derivatum et in utero mulieris conceptum.—c) Nec corpus ita assumptum, extra omnes physiologię humanæ leges, *humanum* fore: quod erroneum est (cf. Conc. Vienn. in art. seq.) et veritati huminitatis in Christo plane oppositum.*

Corollaria sequuntur.—Et 1º Filius Dei assumpsit, sive secundum hypostasim, sive in hypostasi, omnes et singulas partes quæ pertinent ad corporis humani constitutionem, integritatem et perfectionem.—2º Idecirco et in specie assumpsit hypostaticē sanguinem, quia sanguis omnino requiritur ad rationem veri corporis humani. Hinc declaravit Clemens VI (Extrav. Unigenitus, t. de pœn. et rem.) “unam guttam etiam modicam sanguinis Christi Domini fuisse sufficientem pro redemptione totius humani generis, idque propter unionem ad Verbum”².—3º Tamen Verbum non assumpsit hypostaticē lacrymas, sudorem, salivam enaque alia quæ proprie nec partes corporis sunt nec ad ejus perfectionem pertinent.

1—Cf. Cornely, Curs. Scrip. Sac., Comm. in h. loc.

2—Vid. plura ap. Gonet, Billuart, etc.

Solv. obj. (cont. 1^{am} concl.).—OBJ. 1.—In Scriptura dicitur Filius Dei *in similitudinem hominum factus* (Phil. II, 7). Atqui quod est secundum veritatem non dicitur esse secundum similitudinem. Ergo.

RESP. *D. M* :... i. e. in similitudinem seu convenientiam *specificam*, *C*; in similitudinem phantasticam, *N*.—*C.d.m.* —*Neg. conseq.*

OBJ. 2.—Ita corpus a Verbo assumptum est ut in nullo ejus dignitati derogaret. Atqui ad dignitatem Dei pertinet ut sit ab omni reali corpore separatus. Ergo.

RESP. *C. M*.—*D.m* :... scil. ut nullius sit corporis *forma*, *C*; ut nullum corpus, salva distinctione naturarum, in unitatem personæ assumat, *N*.—*Neg. conseq.*

OBJ. 3.—Signa debent respondere signatis. Atqui apparitiones V. T., quibus futurus Christus præfigurabatur, secundum imaginariam visionem contigerunt. Ergo.

RESP. *D. M* :... quantum ad similitudinem, *C*; quantum ad rei veritatem, *N*.—*D.m* :... et hæ apparitiones repreäsentabant apparitionem Christi secundum *speciem* rei figuratae, *C*; etiam secundum *essendi modum*, *N*.—*Neg. conseq.*

ARTICULUS IV.

Utrum Filius Dei assumpserit animam eamque rationalem.

(Art. 3-4)

1^o Corpori *anima* sociatur ad efformandam naturam humanam; et quamvis potentia intellectiva non sit alicujus corporis actus, ipsa tamen *essentia* animæ, virtualiter continens gradum vegetativum, sensitivum et intellectivum, humanum corpus informat.—Inde patet quæstionis ratio.

2^o a) Opinio fuit primo quidem *Arii* et postea *Apollinaris* quod Verbum solam carnem assumpsisset sine anima, quasi ipsum animæ vices suppleret: quod Eutychianum est. Mox vero evangelicis testimoniis convicti *Apollinaristæ*

confessi sunt in Christo animam sensitivam fuisse, ast sine mente et intellectu, in enjus locum Verbum divinum subrogabant.

hinc
De fide fidei fund. Rosminiana
Secundum naturam in
Apollinarium
hinc

b) Theoria *Rosminiana* de constitutione humanæ intellectualitatis per esse ideale¹ (quod est aliquid Dei et reapse Deus) velut per lucem generatricem universarum inentium ad doctrinam ducit Apollinaris, ut Em^{us} *Satolli* argute demonstrat (Q. V, Append. p. 125): "Cum, ait, esse ideale secundum se sit ipsum Verbum Dei et, quoad humanam naturam, sua præsentia objectiva sit constitutiva intellectualitatis ejusdem nature, inevitabilis prorsus conclusio est: aut quod Verbum seipsum assumpserit, aut quod non assumpserit intellectum; quod sibi Verbum Dei mentem humanam non univerit perficiendo, sed perfecerit naturam humanam seipsum pro intellectu exhibendo, sicut sol in horizontem accedens ita perficit aëris illuminationem ut non nisi seipsum aëri communicet."

3º Fides de præsenti argumento sancita est in CC. Cptano I et II, quibus accessit Conc. Vienn. (in Clementina de Sum. Trin. et cath. fid.): "Confitemur unigenitum Dei Filium...partes nostræ naturæ simul unitas, ex quibus in se verus Deus existens fieret verus homo, humanum scil. corpus passibile et animam intellectualem seu rationalem ipsum corpus vere, per se et essentialiter informantem, assumpsisse in tempore ex virginali thalamo ad unitatem suæ hypostasis et personæ."

Conclusio.—FILIUS DEI CUM CORPORE ANIMAM ASSUMPSIT EAMQUE RATIONALEM.

Prob. quadrupliciter.

1º Ex *Scriptura*.—Ipse Dominus de sua anima loquitur (Matth. XXVI, 38): *Tristis est anima mea usque ad mortem*; et (Joau. X, 17): *Ego pono animam meam, ut iterum sumam eam*. Atqui falso prorsus respondebatur ab hereticis, animam his in locis metaphorice sumi: nam Evangeliste de Christo narrant quod iratus et contristatus

1 — Esse indeterminatum intuitionis, esse initiale, est aliquid Verbi (ex damnata prop. 7); — primum lumen reddens animam intelligentem est esse ideale (ex prop. 37). — Rosminius modo Nestorio, modo Eutycheti favet.

est, et quod esurit. Porro hæc procul dubio evincunt eum veram animam habuisse, sicut ex eo quod comedit, dormivit, fatigatus est, verum ei fuisse corpus sponte infertur (nisi velimus omnem fidem Evangelii subtrahere). *Propheticus* enim sermo V. T. similes metaphoras seu figuræ admittebat; eas vero sermo historicus N. T. excludit.—Quod autem anima Christi fuerit non solum sensitiva, sed et intellectiva, satis indicat narratio evangelica commemorans eum fuisse *miratum* (Matth. VIII, 10): quippe admiratio, qua conferatur effectus ad ignotam causam, absque ratione esse non potest.

✓ 2^o Ex Patribus.—Recentiores quidam protestantes, ut *Münscher, Neander, de Wette*, erroris Apollinaristarum incusant plures antiquos Patres et scriptores, puta *Clementem Rom., Ignatium M., Tertullianum, etc.*, sed voce omnino inani et calumniosa, ut videre est apud Franzelin (th. 13), etc.—Sat esto referre verba *Tertulliani* (de Carne Christi, c. 10), quibus demonstrat adversus Marcionitas animam Christi fuisse nostræ similem: “Si, inquit, animas nostras per illam, quam gestavit, liberare suscepserat, illam quoque, quam gestavit, nostram gestasse debuerat, id est, nostræ forme”

3^o Ex utilitate Incarnationis.—Incarnatio enim in id tendit ut homo a peccato liberetur et justificetur, suâ pro se naturâ satisfaciens. Atqui anima humana non est capax peccati nec gratie justificantis et meriti, nisi per mentem. Ergo præcipue oportuit mentem humanam assumi.—Hanc animæ assumptibilitatem perbelle evolvit *auctor libri* (cont. Felicianum, c. 13),¹ ubi demonstrat eam non debuisse in Incarnatione omitti, tum quia *creatura Dei* est et carne preciosior, tum quia sudabilis est et carne indigentior.

4^o Ex veritate Incarnationis.—Nisi Christus habuisset animam sensitivam, proprie caruisset carne et ossibus, quæ reperiuntur tantum in corpore animali; nisi autem anima illa fuisse etiam intellectiva, non potuisset Christus dici verus homo, nec corpus humanum assumpsisset, secus ac videretur. Atqui hæc falsa sunt: ergo.—*Maj.* constat ex eo quod corpus

*1—Opusculum hoc, vulgatum sub nomine S. Augustini, Vigilio tribuitur (Patr. lat. *Migne*, tom. 42).*

proportionatur animæ, sicut materia propriæ formæ; unde quemadmodum corpus sortitur esse animale ex anima sensitiva, ita et esse humanum recipit ex anima intellectiva: natura autem humana ex utroque, scil. ex corpore et anima, conflatur.—*Min. decl.* Nam a) Christum verum hominem fuisse non solum hactenus dicta comprobant, sed et universus Christianismus, Scripturæ traditionis, Conciliorum voce, solemniter testatur; ait Ap. (1 Tim. II, 5): *Unus mediator Dei et hominum, homo Christus Jesus.* b) Neque dicatur Christum aut non habuisse veram carnem, aut carnem bestiale tantum cum figura humani corporis assumpsisse: id enim nequaquam indoles evangelicæ narrationis credere sinit; nec etiam Verbi divini dignitas, ac veracitas omni suspicione major, admittit.

Solv. obj.—OBJ. 1.—Legimus (Joan. I, 14): *Verbum caro factum est, nulla facta mentione de anima.* Atqui verba illa designant unionem hypostaticam. Ergo.

RESP. D. M:...et caro, usu loquendi biblico, ponitur pro toto homine, C; præcise accipienda est ad exclusionem animæ, N.—C.m.—*Neg. conseq.*

OBJ. 2.—Anima non requiritur nisi ad vivificandum corpus. Atqui Verbum aderat quo corpus assumptum vivificaretur. Ergo.

RESP. D. M:...tanquam causa vitae efficiens, N: tanquam causa formalis, C.—C.d.m:...quo vivificaretur efficienter, C; formaliter, N.—*Neg. conseq.*

OBJ. 3.—Ubi est præsentia rei, non requiritur ejus imago. Atqui homo secundum mentem est ad imaginem Verbi divini. Ergo præsente Verbo etc.

RESP. D. M:...non requiritur imago quæ suppletat locum rei, C; non requiritur imago tanquam effectus a causa præsente perficiendus, sicut imago hominis ex hujus præsentia in speculo resultat, N.—C.m.—*Neg. conseq.*

OBJ. 4.—Major lux offuscat minorem. Atqui Verbum Dei comparatur ad mentem, quasi lux major ad minorem. Ergo.

RESP. D. M:...i. e. evacuat lucem minorem alterius corporis illuminantis, C; evacuat lucem corporis illuminati, N.—C.d.m:...eo sensu quod mens illuminatur a luce divini Verbi, C; quasi sit independens a Verbo illustrante, N.—*Neg. conseq.*

Ver. dei

↓
intellectus hum
↓
Anima
Cor

ordre de nature, ch dignit
partie intellectuelle fde la & l'âme → la Chair -
P - J

QUÆST. III. ART. V.

85

Ad præsentiam solis lux quidem candelæ obscuratur, sed aëris lumen, a sole dependens, perficitur. Ita, cum humana mens a Verbo influente lumen collustretur, nedum per præsentiam Verbi evacuetur, majorem ab eo perfectionem consequitur.

ARTICULUS V.

Rosé

(Q. VI)

Quæ a Deo sunt, ordinata sunt: ergo in assumptis a Verbo Dei vigere ordo debet.—Atque haec quæstio considerari potest vel circa partes ipsas assumptas, tum secundum ordinem naturæ, tum secundum ordinem temporis, vel circa naturam ex partibus compositam. Quam ob rem tres habebuntur conclusiones.

Conclusio 1^a. — FIL:US DEI CARNEM ASSUMPSIT MEDIANTE ANIMA; ANIMAM VERO, MEDIANTE MENTE SEU INTELLECTU (art. 1-2).—Agitur, non jam de ordine temporis, secundum quem Verbum Dei totam naturam humanam simul sibi animavit, sed de ordine naturæ.

Prob. 1^a pars. — a) Ordo naturæ inter aliqua potest attendi dupliciter: uno modo secundum gradum dignitatis, sicut dicimus Angelos medios esse inter homines et Deum; alio modo secundum rationem causalitatis, prout iidem Angeli influxu mediant inter causam primam et causas inferiores. Atqui non solum anima præstantiæ dignitatis media invenitur inter Deum et carnem; verum etiam ordine causalitatis carnem præcelit, quatenus ex ea caro habet ut sit humana ideoque assumptibilis secundum congruitatem finis. Ergo utroque modo, scil. tum dignitate, tum causalitate, mediatio animæ in assumptione exercita est.—b) Nec objiciatur unio Verbi ad carnem quæ, separatæ per mortem animæ, nihilo minus remansit (vid. infra). Nihil namque prohibet aliquid esse causam aliquius quantum ad aptitudinem congruitatis et secundum fieri; quo remoto, res effecta ab eoque independens

Medium inter principium et finem

Anima est Medium intermédiaire entre l'âme et l'âme externe.

Verbe est uni à la chair par l'âme.

in *facto esse* subsistat, eo modo quo amicitia mediante aliquo excitata, eo recedente, adhuc tamen amicos suis tenet vinculis (art. 1 ad 3).

Prob. 2^a pars. — Filius Dei dicitur assumpsisse carnem, anima mediante, tum propter ordinem dignitatis, tum etiam propter congruitatem assumptionis. Atqui comperimus utrumque verificari de mente seu intellectu, respectu cæterarum partium animæ: siquidem vis intellectiva vires alias non parum *dignitate* excedit, neque anima assumptibilis est secundum *congruitatem* ad Verbum Dei nisi per hoc quod mente seu spiritu est Dei capax, ad imaginem ejus existens. Ergo.

Conclusio 2^a. — SICUTI ANIMA NON PRIUS TEMPORE ASSUMPTA EST QUAM CARO; ITA NEC CARO PRIUS 'A VERBO ASSUMPTA EST QUAM ANIMA (art. 3-4).

1^a Pars percillit opinionem *Origenis* qui posuit omnes animas, non excepta anima Christi, fuisse a principio creatas, antequam corporibus jungerentur: quam de Christo opinionem proscriptis *Conc. oecum. V* (can. 2) aiens: "Si quis dicit aut sentit animam Domino *præexistisse* unitamque esse Deo Verbo, ante Incarnationem et nativitatem ex Virgine, A. S."

Sane 1^o aut anima illa fuissest initio creata, sed non statim Verbo unita, aut a principio Verbo fuissest hypostatice juncta, et postmodum iu utero Virginis incarnata. Atqui utramque inconveniens est. — a) Nam secundum *primam* hypothesim anima illa propriam aliquando subsistentiam sine Verbo habuisset; unde adveniente assumptione, vel non esset facta unio secundum subsistentiam, vel corrupta fuissest subsistentia animæ *præexistens*: quorum unum Nestorianum est, aliud sapientiae divinae contrarium. — b) Juxta *secundam* hypothesim, anima Christi videretur non esse ejusdem naturæ cum nostris: quippe anima humana, cum sit corporis forma, ex hoc habet ut *eretur simul* dum corpori infunditur et unitur. Atqui, teste *Leone M.* (Ep. 35 ad Julianum, c. 3), anima Christi nostris animabus excellit "non diversitate generis, sed sublimitate virtutis." Ergo.

2^o *Adnotandum* est (cavendæ objectionis causâ) de plenitudine Christi orationes homines accipere secundum *fidem* quam habent in ipsum, sive jam natum, sive nasciturum: haec enim temporis circumstantia accidentalis est. Porro fides

3

<u>Prisitas</u>	{	<u>Naturæ</u>	{	c. et p. ; ex intentione agentis
		c. finale :		c. triviale
		c. malitiae		
			temporis	

31 octobre

in Christum (formata caritate cæterisque virtutibus) vim justificandi consequitur ex *proposito gratia Dei*, ut docet Ap. (Rom. IV, 5); quod propositum quia æternum est omnibus temporum differentiis superius, nihil prohibet per fidem J. C. aliquos justificatos esse etiam antequam sancta Christi anima et humanitas existeret (art. 3 ad 3).

2^a *Pars consonat verbis Damasceni* (de Fid. orth. l. III, c. 2): "Simul atque caro exstitit, simul quoque Dei Verbi exstitit caro, simul caro animata, rationis particeps et intelligentiae." — *Ratio* est, quia caro humana est assumptibilis a Verbo secundum ordinem quem babet ad animam rationalem, sicut ad propriam formam. Atqui materia non potest dici *simpliciter propria* alicujus formæ, nisi eo instanti quo forma adveniens alterationem dispositivam terminat. Ergo caro Christi non potuit esse simpliciter humana antequam anima rationali informaretur, nec proinde debuit prius assumi quam anima. — Ino in conceptione Christi, S. Sanctus, qui est agens infinitæ virtutis, simul materiam disposuit et ad definitivum statum perduxit. (Cf. infra de *Conceptione Christi*).

Conclusio 3^a. — SIMPLICITER LOQUENDO, VERBUM DEI ASSUMPSIT PARTES HUMANÆ NATURE, MEDIANTE TOTO; ITA TAMEN UT HÆC UNICA ASSUMPTIO, PER SE PRIMO AD NATURAM PERSONANDAM TERMINATA, PRIUS EXECUTIVE AD IPSAS PARTES IN SEIPSIS TERMINATA SIT (art. 5).

1^a *Pars prob.* — Per id quod est prius in natura assumitur id quod est posterius. Aliquid autem prius est in natura dupliciter: vel secundum ordinem intentionis, perfective et *simpliciter*, vel secundum ordinem executionis et materialiter. Atqui secundum intentionem agentis prius est completum quam incompletum, et totum quam partes. Ergo, simpliciter loquendo, Verbum Dei assumpsit partes humanæ naturæ, mediante ipsa natura.

2^a *Pars additur ad ulteriorem rei declarationem.* — Quod spectat ad propositum, assumptio naturæ humanæ comparari potest ædificationi domus, quæ solet fieri successive, sed quam posset Deus in instanti completere. Jamvero, licet prius intendatur in domo constructio totius quam constitutio partium; tamen secundum ordinem executionis prius saltem naturæ (supposita ædificatione instantanea) operatio construen-

*In intentione
Vel prius tunc
completum
In executione
Nature datum
per partes*

tium attingit partes, puta fundamentum, parietes, in seipsis et tanquam terminos partiales, quam constituant terminum totalem. Ita etiam, in Incarnatione, prius naturā secundum executionis ordinem actio assumptiva attigisse censetur animam et corpus veluti *ea quae* assumebantur seu *terminos partiales* assumptionis, posterius vero totam natūram assumptam.—Ex quo venit quod *in triduo mortis* (cfr. infra, Lib. IX, Q. IV, a. 2) non fuit opus nova assumptione ut Divinitas Christi unita hypostatice maneret carni et animæ; sed assumptio totalis naturæ, virtualiter multiplex, morte resoluta est in uniones partiales¹.

1—De tota materia hujus art. vide, si libet, *Cajetanum* et *Em^{um}. Satolli* (Comm. in h. l.).

DISPUTATIO TERTIA

DE COASSUMPTIS A FILIO DEI IN HUMANA NATURA

Coassumpta ea vocantur quæ assumptam a Filio Dei naturam humanam, velut qualitates et affectiones quædam, comitata sunt tum ratione ipsius naturæ, tum maxime ratione finis.—Hæc sunt vel *perfectiones*, vel *defectus*; de quibus nunc, ad ampliandum atque evolvendum Unionis hypostaticæ conceptum, synthetici ordinis processu disputandum est.

Perfectiones respiciunt *velle, scire et agere*; *defectus vero corpus et animam*.—Quocirca imprimis dicemus de *gratia* qua essentia animæ et voluntas seu morales vires perficiuntur, quæque in ordine salutis certe præeminet. *Triplex* autem *gratia* consuevit in Christo assignari: *gratia unionis*, secundum quod humana natura nullis meritis præcedentibus hoc donum accepit ut uniretur Filio Dei in persona; *gratia singularis*, qua anima Christi, præ cætoris animabus, ornata fuit; *gratia capitinis*, secundum quod cœleste donum a Christo in alios redundat. De *gratia unionis* superius dictum est; modo tractabimus de *gratia singulari* (Q. I) et de *gratia capitali* (Q. II).—*Scientia* vero, qua sciendi actus perficitur, poterit in Christo considerari vel *in genere* (Q. III), vel *in specie* (Q. IV).—Succedit sermo de *potentia animæ Christi* (Q. V).—Quibus perspectis perfectionibus, tandem loquendum erit de *defectibus corporis* (Q. VI), necnon *animæ* (Q. VII) a Verbo coassumptis. Patet quæstionum planus ac lucidus ordo.

Sanctitas personalis = sanctus ex conjugione ad Deum
Sanctitas est Conjugio ad Deum -
Incarnationis est Maxima Conjugio ad Deum .
Maxima conjugio est maxima Sanctitas
Ergo Gratia est excellens in Sanctitas

QUÆSTIO PRIMA

DE GRATIA CHRISTI UT EST SINGULARIS HOMO

sec. modum gratiae
sec. naturae gratiae

Gratia, qua anima Christi ditata fuit, nobis consideranda objicitur et secundum esse et secundum modum.—Primo modo spectata, alia est gratia gratum faciens quæ trifariam dispergit secundum rationem gratiae habitualis (art. 1), virtutum (art. 2), et donorum Sp. Sancti (art. 3); alia est gratia gratis data (art. 4).—Modus gratiae Christi aut est quantitatis secundum rationem plenitudinis (art. 5) et cujusdam in infinitatis (art. 6), aut est dependentiae a personali unione (art. 7). En habes tredecim D. Thomæ articulos ad septem ordinate reductos.

*Anima Christi redditus sanctificata per ipsam
unionem Verbi / formatum
humanae et forensis*

ARTICULUS I.

Utrum in anima Christi fuerit aliqua gratia habitualis.

1º Nomine gratiae habitualis¹ intelligimus formam quamdam supernaturalem animæ perfectivam et virtutum altricem, qua homo sublimatus e nativa sua conditione fit particeps divinae naturæ, justus, sanctus, Deo gratus et acceptus.—Quæ circa hanc gratiam, in anima Christi ponendam, theologi disputant ac demonstrant, proportionaliter accipi debent de gratia actuali qua potentiae creatæ indigent ad supernaturaliter et meritorie agendum.

2º Occasione hujus articuli controversia in scholis orta est, num scil. per ipsam gratiæ unionis et præcisione facta a gratia habituali Christi humanitas vere et formaliter sanctificetur.—Sunt qui tenent cum Suarez, Billuart,

1—Vid. Tract. nostrum *de Gratia*, Disp. III, Q. I.

Denum
formalitas et intermediate et proxime
l'ame du Christ est sanctifiee par l'union du Verbe.

QUÆST. I. ART. I. *s. Thomas
q. d. s. Th.
Gargano d.* 91

hoc affirmandum esse; alii plures (quos citat Suarez, Disp. XVIII, sect. 1) omnino negant. Satolli (in h. art.) falsum reputat et a D. Thomæ mente dissonum, quod gratia habitualis non fuerit simpliciter necessaria ad hoc ut humanitas Christi esset Deo grata et meritorie operaretur. — Hanc sententiam veriorem aestimantes suadere admitemur, antequam veritatem de gratia habituali principaliter intentam constitutamus.

*Conclusio 1^a. — ~~Fest~~ HUMANITAS CHRISTI EX CONJUNCTIONE CUM VERBO CONSECRATIONEM QUAMDIAM ACCEPERIT, *fac mui
Op. d. Scot.**

~~NON~~ SIMPLICITER SANCTA ET DEO GRATA, INDEPENDENTER A GRATIA HABITUALI, PRONUNTIANDA EST. *Sufficit gratia unionis*

*Ita ut
formaliter
et* 1^a Pars a) fundari videtur in iis Scripturæ locis, ubi Christus dicitur *unctus* celesti oleo; quæ (teste Suarezio, l. cit.) plures Patres explicant, quatenus Divinitas secundum hypostaticam unionem *unctio* est humanitatis quam sibi veluti dicat et consecrat. — b) Certe, quemadmodum sacra habentur *vasa* munda quæ, divino cultui deputata, Deum in esse sacramentali continent; ita et multo magis humana natura, por hoc quod Verbo secundum esse personale adhaerescit ejusque propria evadit, nobili quadam sui ipsius consecratione insignitur et veluti regio ac divino sigillo decoratur.

2^a Pars tamen negat hanc Christi humanitatem ex sola unione hypostatica vocandam esse *simpliciter* sanctam et Deo grata. — a) Ratio est, quia sanctitas *simpliciter* naturæ intellectualis non consistit tantum in nobilitate dedicationis seu applicationis sacræ ad Deum cuius etiam entia irrationalia sunt capacia, sed in excellentia et justitia morali quæ propria est entium intellectualium. Haec autem perfectio moralis, in humanitate Christi, *radicaliter* quidem seu exigitive est ab Unione hypostatica, sed *formaliter* habetur per gratiam sanctificantem et virtutes ei annexas. Ergo. — b) Nec valet respondere, in Divinitate *eminenter* contineri perfectionem gratiæ habitualis quæ idcirco per eam suppleri potest. Gratia enim est principium *vitæ* supernaturalis inhærens et *informativum* animæ, et quamvis hec forma a divina efficientia dependeat, non tamen Deus proprium et formalem gratiæ effectum producit nisi mediante ipsa gratia. — c) Reliquæ adversariorum rationes nihil aliud probant nisi

*Sancte. dicit
Fidelitate vero sol
Fidelitatem
formaliter
Reuelatione
proxime*










IMAGE EVALUATION TEST TARGET (MT-3)



6"



Photographic
Sciences
Corporation

23 WEST MAIN STREET
WEBSTER, N.Y. 14580
(716) 872-4503

O
11
10
9
8
7
6
5
4
3
2
1
0

11
10
9
8
7
6
5
4
3
2
1
0

necessitatem *nexus* inter Unionem hypostaticam et gratiam habitualēm qua complete et simpliciter humanitas Christi sanctificatur.

Uphr.

Conclusio 2^o. — NECESSSE EST PONERE IN CHRISTO GRATIAM HABITUALEM; — quod firmum certumque secundum fidem affirmat Suarez (Disp. XVIII, sect. 2, n. 5). *Proximum fidei*

Sane 1^o SS. Litterae indubia testimonia præbent. — Legimus (Is. XI, 2): *Requiescat super eum spiritus Domini*, etc. Atqui spiritus Dei dicitur esse in homine per gratiam habitualēm aliaque charismata ei conjuncta. Ergo. — Præterea nuntium angelicum id habet (Luc. I, 35): *Ideoque et quod nascetur ex te Sanctum, vocabitur Filius Dei*. Sed cum Christus, secundum quod Deus, sanctus ab æterno extiterit, nativitas temporalis non potuit ei esse sanctitatis causa nisi secundum humanitatēm. Igitur etc.

2^o *Rationes* triplici ex capite duci possunt: a) *primo ex unione ad Verbum*. — Quanto aliquod receptivum est propinquius causæ influenti, tanto magis de ejus influentia participat; id experientia ostendit. Atqui ex una parte influxus gratiæ est a Deo, juxta illud (Ps. LXXXIII, 12): *Gratiā et gloriā dabit Dominus*; ex altera parte, major conjunctio inter Deum et animam esse non potest quam unitas subsistentiæ. Ergo oportuit ut anima Christi gratiæ divinæ influxum abunde reciperet.

b) *Secundo ex nobilitate illius animæ*. — Animæ Christi, pro dignitate unionis personalis cum Verbo, debetur quædam deiformitas, qua nempe *divina fiat per participationem* et capax reddatur immediate pertingendi ad Deum, cognitione et amore, exercendo actum *beatificæ fruitionis*. Atqui ad utrumque requiritur gratia habitualis; per hanc enim gratiam homo accidentaliter participat divinam naturam, et ejus vi. accidente gratia actuali, potest elicere operationes essentia-liter supernaturales quibus beatitudo formalis constituitur. Ergo.

c) *Tertio ex fine Incarnationis*. — Cum Christus, in quantum homo, sit *mediator Dei et hominum* (1 Tim II, 5), oportebat ejus animam taliter perfici ut in salutem humani generis, exemplo et opere, efficaciter influeret. Atqui haec exemplaritas et efficientia Christi mediatoris vim suam ducit ex gratia habituali quæ est forma justitiae et principium quo

Uphr.
Le bruns, filii m.
Institutio de
Sonneveld

operum salutarium et meritorum supernaturalium. Ergo jure scripsit Evangelista (Joan. I, 16): *De plenitudine ejus nos omnes accepimus, et gratiam pro gratia.*

Coroll. — Quoniam abundantia gratiae sanctificantis in Christo maxime derivatur ex ipsa Verbi Unione, consequens est quod Christus cœleste illud donum *ab ipso Incarnationis instanti acceperit, juxta verba (Joan. X, 36): Quem Pater sanctificavit et misit in mundum* (cf. III, Q. XXXIV, a. 1).

Solv. obj. (cont. 2^{am} concl.). — **OBJ. 1.** — Gratia est quædam participatio Divinitatis in creatura rationali. Atqui Christus non participative, sed essentialiter Deus est. Ergo.

RESP. C. M.—D.m : Christus est verus Deus secundum personam et naturam divinam, *C*; etiam secundum naturam humanam, quin in ea locus sit participandæ Divinitatis per gratiam, *N*. — *Neg. conseq.*

OBJ. 2. — Gratia homini necessaria est ut per eam bene operetur et consequatur vitam æternam. Atqui Christo per Verbum seu Filium Dei aderat facultas bene operandi et jus ad hæreditatem cœlestem. Ergo.

RESP. C. M.—D.m : ... facultas bene operandi operatione *divina* et jus ad hæreditatem cœlestem actu *increato cognitionis et amoris comparandam, C*; ... facultas perfecte operandi operatione *humana* et fruendi Deo actu *creato*, quin anima perficeretur per gratiam habitualem, *N*. — *Neg. conseq.*

OBJ. 3. — Id quod operatur per modum instrumenti non indiget habitu ad proprias operationes. Atqui anima humana in Christo fuit sicut instrumentum Divinitatis. Ergo.

RESP. D. M : Id quod operatur per modum instrumenti inanimati... *C*; per modum instrumenti animati, *N*. — *C.d.m.—Neg. conseq.*

Instrumentum duplex est: quoddam quidem *inanimum*, quod agitur et non agit, ut securis, et hoc non indiget habitu; aliud vero *animatum*, ut servus, quod agit et agitur, et in eo necessarius est habitus quo propria activitas perficiatur: hujusmodi est humanitas Christi¹.

1—Vid. alias objectiones in Q. XXIX de Verit., a. 1.

ARTICULUS II.

Utrum in Christo fuerint virtutes.

(Q. VII, a. 2-4)

1^o Una est Ecclesiae, Patrum, ipsorumque fidelium consona vox, Christum Jesum fuisse perfectissimum omnium *virtutum* exemplar; adeo ut nihil in re spirituali fundatius habeatur quam monitum lib. de *Imitatione Christi* (l. I, c. I, n. 1): "Summum igitur studium nostrum sit, in vita Jesu Christi meditari."—At theologi est theologica ratione, quæ creduntur, adstruere.

2^o Notat *Cajetanus* (in art. 2), quæstionem hic esse de virtutibus quæ *simpliciter* bonum hominem faciunt, quales sunt *virtutes theologicæ* et *m Morales*, non autem intellectuales; de his siquidem satis constabit, dum tractabitur *scientia Christi*.—Virtutum, moralium aliae sunt supernaturales et per se *infusæ*, aliae naturales et de se *acquisibiles*; de utrisque agetur.

3^o Amplius advertere est virtutes considerari posse tripli-citer: scil. *causaliter* seu ex parte principii; *materialiter* seu ex parte materiæ circa quam sunt; *formaliter* seu secundum formalem suum conceptum.—Quæ si attendantur, variae de Christo concludenda apparebunt.

Conclusio 1^a.—CHRISTUS HABUIT OMNES VIRTUTES PER SE INFUSAS, QUÆ NON IMPORTANT FORMALITER DEFECTUM.—Dicitur: quæ non important formaliter defectum; nam de aliis defectum importantibus dicemus in seq. conclusione.

1^o Legimus (Ps. I, 2): *In lege Domini voluntas ejus, et in lege ejus meditabitur die ac nocte.* Hæc autem verba, sicut totus iste psalmus, non immerito exponuntur per antonomasiam de *Christo* qui virtutum praxi perfectissime Dei legem implevit.—Sane *historia evangelica* testatur totam Christi vitam continuo altissimarum virtutum exercitio, vid. caritate, prudentia, humilitate, fortitudine, etc, refusisse, adeo ut ipsi increduli id confiteri adacti sint.

2^o *Ratio D. Thomæ* duplice procedit:—a) Primum ex parte principii. Gratia respicit essentiam animæ, virtus vero potentiam: quocirca, sicuti potentia animæ ab. ejus.

essentia derivantur, ita et virtutes se habent velut totidem gratiæ derivationes. Atqui quanto aliquod principium est perfectius, tanto efficacius effectus suos imprimit. Ergo cum gratia Christi fuerit perfectissima (quod mox probabitur), consequens est omnes virtutes in anima Christi, tum intensive, tum extensive, excellenter effloruisse.—*b*) Secundo ex munere proprio virtutis. Gratia immediate quidem perficit animam secundum esse, mediantibus autem virtutibus potentias ad actum disponit. Atqui necesse erat ut singulæ potentiae animæ Christi quoad omnes actus debite perfecte que disponerentur. Ergo.

3º Ad præveniendas objectiones, notabimus (ex art. 2, resp. ad 3) Christo non defuisse virtutes passionum modera-tivas, *a*) saltem quod internam appetitus dispositionem et simpliciter; v. g. *liberalitas, magnificentia, temperantia* summe in eo commendantur, quod animum circa divitias et venerea ita dispositum habuerit ut penitus illa a se abjecerit secundum rectam rationem.—*b*) Quantum vero ad *actuum exercitium*, non oportuit Christum omnis virtutis actu exteriōri uti, sed iis tantum actibus qui suo statui convenienter; sic non potuit exercere *magnificantiam*, deficiente materia quæ est in magnis sumptibus; aliquem tamen *liberalitatis* actum exercit faciendo pauperibus erogari quæ sibi dabantur; nunquam vero pravas sensit concupiscentias quas *temperantia* domeret.

Conclusio 2a. — VIRTUTES IMPORTANTES EX PARTE SUI DEFECTUM, UT FIDES, SPES, PENITENTIA, NEQUEUNT IN CHRISTO ADMITTI.— Prob:

1º Quoad fidem.—*a*) Fides theologica, secundum essentiam suam rationem, est de re divina *non visa*, sed per *auctoritatem* Dei revelantis credita, ideoque necessario defectum in anima ponit. Atqui Christus a primo suæ conceptionis instanti plene vidit Deum per essentiam omniaque in eo; nec insuper ullum decet in ejus intellectu defectum admittere. Ergo.—*b*) Quamvis autem Christus extiterit sine fide, non tamen fidei *merito* omnino caruit; quippe hoc meritum perfective dependet ex *obedientia* ad Deum quæ in Christo excellentissima fuit.

2º Quoad spem.—*a*) De ratione spei theologicæ est ut aliquis exspectet id quod nondum habet, scil. Dei fruitionem

cujuſ adēptio, quantumvis ardua, possibilis tamen est ex divino auxilio; unde illud Dei bonum a Deo speratum principaliter sub spe cadit eamque constituit. Atqui Christus a principio ſuæ conceptionis, ſicuti immediate Deum vidit, ita et plene eo fruitus est. Ergo *virtutem* ſpei non habuit.—*a)* Attamen, licet Christus videndo Deum omnia a ſe cognoscibilia perspicere, non statim ex Dei possessione omnia consecutus est ad ſuę perfectionem ſpectantia; carebat enim immortalitate et gloria corporis. Hæc autem bona non ſunt arduæ adēptionis in eo qui jam gloria animæ gaudet propterea habet in ſe unde illa ſibi comparet¹. Quocirca gloria corporis non proprie ſperabatur a Christo, ſed magis erat objectum *desiderii*, vel ex ſe perfecti nec ab ullo habitu procedentis (ut ſentit *Cajetanus*), vel ſecundario elicitu a *cari- tate* qua Christus ſeipſum diligens proprium bonum in ordine ad Deum desiderabat: quo etiam modo Christus cenſetur *mystico ſuo corpori*, quod eſt Ecclesia, profectum et gloriam optare².

3º Quoad pœnitentiam.—Res evidens eſt: ſiquidem nec fuit nec eſſe in Christo potuit peccatum *proviuum* circa quod expiadum vel emendandum virtus pœnitentiæ, ad objectum hujusmodi essentialiter ordinata, exerceretur. Ita *Gonet* et *Billuart*.

Conclusio 3^a.—IN CHRISTO ETIAM PONENDÆ SUNT VIR- TUTES MORALES PER SE NATURALITER ACQUISIBILES, DE FACTO TAMEN DIVINITUS AB INITIO INFUSÆ. Ita theologi communiter cum *Suarez*, *Gonet*, etc. —Id autem intelligendum eſt, *seclusa omni imperfectione* perfectioni Christi contraria.

1^a Pars ostend.—In Christo ponendum eſt quidquid ad perfectionem humanae naturæ pertinet (ſalva exigentia Redemptionis). Atqui ad perfectionem humanae naturæ pertinent virtutes naturaliter de ſe acquisibiles, utpote principia propria et immediata quibus ſingulæ potentiae inclinanur ad actus connaturaliter et expedite elicendos, nec iſti habitus poſſunt per virtutes infuſas adæquate ſuppleri. Ergo.

2^a Pars, de ortu virtutum naturalium in Christo, quam facile ſuadetur.—Quippe perfectio illarum virtutum in anima

1—Cf. II-II^m, Q. XVIII, a. 2.

2—Cf. *ibid.* ad 3.

Christi "debita erat illi naturæ ratione *Unionis*, et quod aliquo tempore illa careret, neque ad finem Redemptionis neque ad aliquem alium erat necessarium. Christus autem a principio habuit omnem perfectionem unioni debitam, cuius earentia Redemptioni necessaria non erat" (*Suarez*, Disp. XIX, sect. 2). Ergo, licet Christus eadem virtutes progressive exercevit et demonstraverit, statim tamen ab initio, infundente Deo, eas consecutus est.—Nec paritas est inter scientiam acquisitam Christo concessam, ne intellectus ejus agens otiosus maneret, et virtutes morales, quarum eadem est facultas acquisitiva et elicativa.

ARTICULUS III.

Utrum in Christo fuerint dona Sp. Sancti.

(Art. 5-6)

Alibi¹ jam differentiam propriam assignavimus inter virtutes et dona; non est ergo cur diutius in limine quæstionis immoremur.

Conclusio.—IN CHRISTO EXCELLENTISSIME FUERUNT OMNIA DONA SP. SANCTI, NON EXCEPTO DONO TIMORIS.

Id 1º communiter evincitur ex (Is. XI, 2-3): *Requiescat super eum spiritus Domini; spiritus sapientiae et intellectus, spiritus consilii et fortitudinis, spiritus scientiae et pietatis, et replebit eum spiritus timoris Domini.* Ubi sermonem esse de Christo secundum humanitatem communis est Patrum et Doctorum consensio.

2º *Prob. concl.* per partes.

1º *Pars ostend.*—a) Dona proprie sunt perfectiones quædam potentiarum animæ, secundum quod natæ sunt a Sp. Sancto præter humanum modum moveri. Atqui manifestum est quod anima Christi perfectissime a Sp. Sancto movebatur, ei in omnibus obsequens, juxta illud (Luc. IV, 1):

1—Tract. de Virtutibus, Disp. IX.

Jesus autem plenus Sp. Sancto regressus est a Jordane, et agebatur a Spiritu in desertum. Ergo.—b) Conf. (ex resp. ad 1, art. 5) : illud enim quod est perfectum secundum ordinem suæ naturæ, indiget adjuvari ab eo quod altioris naturæ est, sicut homo, quantumcumque perfectus, indiget auxilio Dei. Propterea, etsi virtutes animæ Christi perfectissimæ forent, quia tamen non perficiebant ejus potentias nisi secundum quod istæ natæ sunt rationis lege regulari, indigebant adjuvari per dona perfectiva potentiarum, secundum quod hæ potentiae moventur et veluti afflantur instinctu Sp. Sancti.—c) Itaque admittenda sunt in Christo septem dona, nempe : donum *intellectus*, quo statim penetraret quæ divinitus proponebantur; donum *sapientie*, quo posset facile judicare de rebus æternis per altissimas causas; donum *scientiae*, quo vera judicaret secundum rationes inferiores; donum *consilii*, quo statim rectam agendorum rationem attingeret; donum *pietatis*, quo Deum Patrem convenienter celeret; donum *fortitudinis*, quo contra adversa roboraretur; dicitur in *timoris*, de quo specialis difficultas speciale sermone exposcit.

2^a Pars ergo (contra Durandum) etiam *timoris* donum in Christo fuisse affirmat, ut locus Is. XI manifeste suadet.—Etenim timor duo objecta respicit: unum *secundarium*, quod est malum terribile; aliud *primarium*, quod est ille cuius potestas et eminentia talis est ut malum inferre valeat. Atqui in Christo non fuit quidem nec esse potuit timor Dei secundum quod respicit malum separationis a Deo per culpam aut malum punitionis pro culpa, at bene admittitur, secundum quod respicit divinam eminentiam reverentia dignam. Ergo, cum Christus hunc reverentiae affectum ad Deum pleniorum habuerit, ex quo *exauditus est pro sua reverentia* (Heb. V, 7), recte ei Scriptura plenitudinem timoris Domini attribuit. Circa *minorem* notetur (ex Cajetano in art. 6) quod eminentia Dei, ut potentis inferre malum, dupliciter potest ad donum timoris referri: vel *absolute*, vel *executive*. Hoc quidem secundo modo nequit esse causa timoris ei cui impossibile sit malum culpare aut posse; at priori modo potest sub hujus timore reverentiali cadere, quatenus consideretur eadem eminentia ut potens *de se* infligere malum et determinata simul ad non causandum illud.

ARTICULUS IV.

Utrum in Christo fuerint gratiæ gratis datae.

(Art. 7-8)

Ex Tract. de *Gratia* revocare juverit gratiam dici *gratum facientem*, prout proxime ordinatur ad justificationem habentis, *gratis datam* vero, quæ immediate confertur alicui in utilitatem aliorum.—Exploratis variis gratiæ munieribus et donis primi generis quibus anima Christi locupletata erat, pauca dicenda subeunt de altero genere gratiæ quæ novem species sub se continet (1 Cor. XII, 7-10).—Duas conclusiones instituemus, generalem unam, aliam specialem de *prophetia*.

Conclusio 1^a.—CHRISTUS HABUIT OMNES GRATIAS GRATIS DATAS MODO EXCELLENTISSIMO.

1^a *Pars*: Christus *habuit* illas *gratias*.—Etenim gratiæ gratis datae ordinantur ad fidei et spiritualis doctrinæ manifestatiouem, quatenus *cognitioni*, *confirmationi* et *enunciationi* veritatis deserviunt. Atqui spiritualis doctrinæ et fidei primus et principalis doctor est Christus, non solum ut Deus, sed etiam ut homo, juxta illud (Heb. II, 3-4): *Quæ (salus) cum initium accepisset enarrari per Dominum, ab eis qui audierunt in nos confirmata est, contestante Deo signis et portentis.* Ergo.

2^a *Pars*: *omnes gratiæ gratis datae fuerant in Christo*.—Id patet discurrendo per siugulas *gratias*. a) *Fides*, non ut virtus, sed quatenus significat excellentiam cognitionis de principiis divinæ veritatis, certe mentem Christi adornabat; nec aliud sentiendum est de *sapientia* et *scientia*, teste Scriptura (Luc. IV, 22): *Mirabantur in verbis gratiæ quæ procedebant de ore ejus.* b) In Christo fuisse gratiam *santatum* et *virtutum* innumera miracula ab Evangelistis enarrata demonstrant; quibus adjungenda est *discretio spirituum*, juxta illud (Matth. IX, 4): *Cum vidisset Jesus cogitationes eorum, dixit etc;* item *prophetia*, de qua mox infra. c) *Interpretationem sermonum Christo tribuendam esse ostendit historia evangelica*, ubi tam sœpe Jesus exhibetur aperiens sensum Scripturarum; nec etiam ei defuit

donum linguarum, quamvis non videatur eo usus fuisse in prædicatione publica, sed tantum (ut nonnulli putant) in quibusdam privatis colloquiis¹.

3^a Pars : præfatæ gratiæ fuerunt in Christo *excellentissime*.—Id patet ex duobus. *a)* Nam *primo* in aliis sanctis, qui tanquam instrumenta separata a Deo moventur, gratiæ illæ divisim et particulariter inveniuntur; in Christo vero, cuius anima unita erat Divinitati, *conjunctionem* et universaliter. *b)* *Secundo* (ut notat Suarez) haec gratiæ fuerunt in Christo *permanenter*, permanente unione humanitatis cum Verbo, ita ut illis uti posset pro suo arbitrio; in quo etiam alios homines plane superavit (cf. S. Th. *Comm.* in *Coloss.* I, 19).

Conclusio 2^a.—ETIAM PROPHETIA VERE ET PROPRIÆ FUIT IN CHRISTO.—Ita plerique theologi contra quosdam.

Nam 1^o id de Christo prædictum est (*Deut. XVIII, 15*) : *Prophetam de gente tua et de fratribus tuis, sicut me, suscitabit tibi Dominus Deus tuus.* Et ipse loquens de se ipso (*Matth. XIII, 57*) : *Non est, inquit, propheta sine honore, nisi in patria sua.*

2^o Propheta dicitur quasi *procul fans, vel procul videns*. Igitur ille vere propheta censendus est qui cognoscit et annuntiat ea quæ procul sunt tam ab ipso secundum suum statum quam ab illis quibuscum conversatur; ideo autem Deus vel beatus, annuntians quæ a nostra notitia distant, nequit dici propheta, quia haec notitiæ divinæ vel beatæ nata sunt subjici. Atqui Christus ante passionem, quamvis foret comprehensor², de nostro tamen erat statu, in quantum viator; et plurima cognovit et annuntiavit quæ ab ipso procul erant secundum hunc viatoris statum, v.g. suam mortem et resurrectionem (*Matth. XVI, 21*; *XX, 18-19*), eversionem Jerusalem et signa extremi judicii (*ibid. XXIV*), etc. Ergo.

1.—Genuinitas epistolæ, quam ferunt Christum ad Abgarum, regem Edessæ, misisse, a plerisque negatur (*Kraus, Hist. de l'Egl.*, I Ep., I Pér. c. 1).

2.—III. Q. XV, a. 10; ubi de Christo dicitur : “Simul erat comprehensor, in quantum habebat beatitudinem propriam animæ, et simul viator, in quantum tendebat in beatitudinem secundum id quod ei de beatitudine deerat,” videl. quantum ad partem inferiorem.

ARTICULUS V.

Utrum et quænam fuerit in Christo plenitudo gratiæ.

(Art. 9-10)

Ad secundam quæstionis partem progredimur, quæ est de modo gratiæ Christi, secundum rationem *quantitatis* et *dependentiae* ab Unione hypostatica.— Quantitas autem determinari potest tum sub respectu *plenitudinis*, tum sub respectu *infinitatis*.— Plenitudo et ipsa vel secundum se, vel quatenus *propria* Christi, sub considerationem venit: quæ duo in præs. articulo discutiemus.

Conclusio 1^a.—**OMNIMODA GRATIÆ PLENITUDO IN CHRISTO ADMITTENDA EST.**— Plenitudo hic accipitur non solum in genere aliquo et secundum exigentiam subjecti, sed *simpli-citer* et secundum ipsam *reī naturam*.

1^o *Conclusio* disertis *Scripturæ* verbis continetur, scil. (Joan. I, 14): *Vidimus gloriam ejus, gloriam quasi unigeniti a Patre, plenum gratiæ et veritatis.* Et (Coloss. I, 19): *In ipso complacuit omnem plenitudinem inhabitare.*— Eloquia *Putrum* vid. apud Knoll (*De Deo Redempt.* Sect. I, c. IV, a. 2).

2^o Discursum *S. Thomæ* attendamus.— Id plene dicitur haberi quod perfecte et totaliter habetur. Totalitas autem et perfectio duplex esse potest: una quidem *intensiva*, putasi paries tantum albedinis haberet quantum inesse potest; alia *extensiva*, secundum quam virtus aliqua ad omnes effectus vel opera protenditur: quo modo plene homo vitâ gaudet, non autem brutum animal vel planta. Atqui utraque sub ratione plenitudo gratiae Christo convenit: ergo. *Min. prob.* per partes.— 1^a *paris*, quoad plenitudinem *intensivam*, evincitur ex eo quod Christus gratiam habuit *in summo*, secundum perfectissimum modum quo haberi potest. a) Sane (ut dictum est art. 1) quanto aliquod receptivum propinquius est causæ influenti, tanto abundantius de influxu recipit. Atqui anima Christi, præ cæteris creaturis rationalibus, *propinquissime* Deo conjungitur, adeo ut intimior unio cogitari nequeat. Ergo. b) *Præterea*, *fons gratiæ* aliis com-

municandæ summam gratiæ mensuram contineat oportet, sicut fons caloris ex quo corpora calefiunt maxime calidus est. Atqui sic anima Christi gratiam recipiebat ut ex ea quodammodo transfunderetur in alios. Ergo.—*2^a pars*, de plenitudine *extensiva*, sibi vult Christi gratiam talem fuisse quæ ad omnes gratiæ operationes vel effectus vim suam proferret. Etenim gratia Christo collata est tanquam cuidam *universalis principio* in genere habentium gratiam. Atqui virtus primi principii alicujus generis universaliter se extendit ad omnes effectus illius generis, ut patet de sole respectu generabilium. Ergo censenda est gratia Christi tam plena fuisse ut se extenderet ad omnes gratiæ effectus, virtutes, dona, aliaque charismata divina.

Conclusio 2^a.—*PLENITUDO GRATIAE, ABSOLUTE ET SIMPLICITER SUMPTA, PROPRIA EST CHRISTI, LICET RESPECTIVE SEU EX PARTE SUBJECTI ALIIS ETIAM CONVENIAT.*—Propositio hæc fundatur in distinctione superius facta, quia plenitudo gratiæ potest attendi dupliciter, nempe ex parte *ipsius gratiae et ex parte habentis gratiam*.

1^a Pars prob:—*1^o ex Scriptura.* Nam, ut constat ex textu cit. Joan. I, 14, plenitudo gratiæ attribuitur Christo, in quantum est *unigenitus* a Patre. Atqui esse unigenitum a Patre est proprium Christo. Ergo.—*2^o Ex natura rei.* Simpliciter et *absolute* seu ex parte *ipsius gratiae*, gratiam plene haberi dicitur ex eo quod aliquis pertingit ad sumnum gratiæ et quantum ad essentiam et quantum ad virtutem, quia scilicet habet gratiam et in maxima excellentia qua potest haberi (*plenitudo intensiva*), et in maxima extensione ad omnes gratiæ effectus (*plenitudo extensiva*). Atqui rationes, quibus in præced. concl. utramque plenitudinem adstruximus, soli Christo competunt. Ergo.

2^a Pars ostend.—Ex parte subjecti seu *respectiva* ea plena dicitur gratia quam aliquis habet pro exigentia suæ conditionis, sive *intensive*, prout in eo gratiæ intensitas attingit terminum ei a Deo præfixum, sive *extensive*, quatenus gratiæ facultas se extendit ad omnia quæ ejus officii seu status sunt. Atqui talis plenitudo respectiva aliis, præter Christum, procul dubio convenit: *intensive* quidem, juxta illud (Eph. IV, 7): *Unicuique nostrum data est gratia secundum mensuram donationis Christi*; *extensive* autem, prout de se testabatur

Ap. (*ibid.* III, 8) : *Mihi omnium sanctorum minimo data est gratia hæc, in gentibus evangelizare investigabiles divitias Christi, etc.* Ergo. Arg. evolv. Sub genere respectivæ plenitudinis gratiæ merito distinguitur *communis* una et *specialis* altera.—*a)* Plenitudo *communis* est illa quæ reputatur in omnibus sanctis in ordine ad consequendum debitum meritis communem finem vitæ æternæ ad quem sancti illi præordinantur et qui in plena Dei fruitione consistit; hæc est plenitudo *sufficientiæ*, quam fidelibus optat Ap. (Eph. III, 19) : *Ut impleamini in omnem plenitudinem Dei.*—*b)* Plenitudo *specialis* convenit excellentioribus sanctis secundum altiorem suum statum, et hæc est plenitudo *excellentiæ*. Èâ præprimis, teste *salutationis angelicæ* nuntio (Luc. I, 28), honestata est *B. Virgo Maria*, non quod gratiam absolute plenam habuerit, sed quia eam recepit secundum congruentiam ad singularissimam dignitatem Matris Dei. Similiter *Stephanus* dictus est *plenus gratia et fortitudine* (Act. VI, 8), quatenus gratiam habuit qua idoneus Dei minister et testis, secundum suam electionem, existeret: id ipsum de aliis teneatur.—*c)* Harum, ut patet, relativarum plenitudinum *una* est *major altera*, secundum quod aliquis divinitus præordinatus est ad altiorem vel inferiorem statum.

Coroll.—*1º* Consequitur ex dictis gratiam Christi, utpote fontalem, ex cuius plenitudine omnes accipiunt, vi et copia superare totam gratiam Angelorum et hominum etiam collective sumptam; quod certe docet *S. Thomas* (Q. XXXIV, a. 4), ubi ait: “Christus in primo instanti suæ conceptionis accepit non solum tantam gratiam quantam comprehensores habent, sed etiam *omnibus comprehensoribus majorem.*”

2º Apparet quam vera sit concinna illa *S. Bernardi* sententia (in Nativ. B. V. M. serm. *de aqueductu*, n. 3), ubi Christum exhibit gratia plenum ut *fontem*, Mariam ut *aqueductum*, per quem “descendit...vena illa cœlestis... stillicidia gratiæ arentibus cordibus nostris infundens, aliis quidem plus, aliis minus.”

 **Solv. obj.** (cont. 1^{am} concl.).—OBJ. 1.—A gratia derivantur virtutes. Atqui in Christo non fuerunt omnes virtutes; non enim in eo fuit fides neque spes. Ergo.

RESP. C. M.—*D.m* :...non fuerunt omnes virtutes formaliter, *C*; nec saltem virtualiter, *N.*—*Neg. conseq.*

Fides et spes nominant effectus gratiæ cum quodam defectu ex parte recipientis gratiam, in quantum fides est de non visis et spes de non habitis : idem dic de poenitentia, quæ est de peccato proprio¹. Itaque in Christo, qui est gratiæ auctor, non fuerunt illæ virtutes *formaliter*, propter defectus quos secum trahunt ; at fuerunt in eo *virtualiter*, ita ut quidquid est perfectionis et meriti in illis multo perfectius Christi animam ornaverit.

OBJ. 2.—Gratia dividitur in operantem et cooperantem ; gratiæ autem operantis est justificare impium. Atqui justificatio hujusmodi locum non habuit in Christo. Ergo.

RESP. D. M.:...gratiæ operantis est justificare impium per accidens, C; per se, N.—C.m.—Neg. conseq.

Ad gratiam operantem *per se* pertinet facere justum ; sed quod justum faciat ex impiò, id ei *accidit* ratione subjecti in quo peccatum invenitur. Anima Christi igitur justificata est per gratiam operantem, quatenus per eam justa et sancta a principio conceptionis fuit effecta, non quod ante peccatrix existiterit.

OBJ. 3.—*Omne datum optimum et omne donum perfectum deorsum est, descendens a Patre lumen* (Jac. I, 17). Atqui quod descendit, habetur particulariter et non plene. Ergo.

RESP. C. M.—D.m.:...non habetur secundum plenitudinem ipsius principii, C; nec secundum plenitudinem cuius capax est subjectum receptivum, N.—Neg. conseq.

Dona gratiæ in Deo præexistunt secundum plenitudinem *infinitam* divinæ bonitatis, a qua procedunt ; eorum autem plenitudo attribuitur animæ Christi, non quomodocumque, sed secundum quod *creatura*, in qua dona illa creatum ostendendi modum induunt, plenitudinis ejusmodi *capax* est.

ARTICULUS VI.

Utrum Christi gratia sit infinita neque augeri valeat.

(Art. 11-12)

Agitur nunc de modo gratiæ sub ratione *infinitatis et augmenti*.—Profecto quæstio non est de *gratia unionis*, quam nemo dubitat infinitam esse, sicuti infinita est persona Verbi, cui humana natura gratis sociata est; at dubium merito oritur circa habitualem Christi gratiam, an infinitate quadam gaudet, quæ et possibilitatem augmenti excludat: utrumque determinabitur.

Conclusio 1^o.—GRATIA CHRISTI DICENDA EST INFINITA, NON QUIDEM IN RATIONE ENTIS, SED SECUNDUM RATIONEM PROPRIAM GRATIÆ.

1^o *Pars* sibi vult gratiam, spectatum ut est *ens* quoddam, esse finitam; quod indubium prorsus est.—1^o Huc pertinent verba (Sap. XI, 21): *Omnia in mensura, et numero, et pondere disposuisti*.—2^o Gratia Christi est *qualitas* quædam, insita in anima sicut in subjecto; Christi autem anima *finita* est, finitam habens capacitatem. Atqui id quod clauditur intra genus qualitatis seu accidentis, et cuius esse secundum finitionem subjecti limitatur, nequit dici entitative infinitum. Ergo.—3^o Nec inferre licet gratiam alterius hominis eo usque posse progredi ut *gradum gratiæ Christi attingat*. Quamvis eum, in his quorum quantitas est unius rationis, quod est minus valeat augmento ad gradum majoris pervenire, hoc fieri nequit in iis quæ specie vel *essendi modo proprio* differunt. Porro gratia alterius hominis comparatur ad gratiam Christi, sicut quædam virtus *particularis* ad *universalem*. Ergo, quemadmodum lux planetarum, quantumcumque crescat, non potest adæquare lucem solis, ita nec gratia privati hominis altiorem Christi gratiam.

2^o *Pars* admittit *infinitatem* secundum *propriam gratiæ rationem*.—Enim vero ea gratia dici potest infinita quæ habet quidquid potest ad rationem gratiæ pertinere, quin ulla ei mensura præfigatur; sicut si dicamus lucem solis infinitam, non quidem secundum suum esse, sed secundum incommensuratam lucis rationem. Atqui gratia Christi sic illimitata.

est : a) quippe gratia est *infinitæ Personæ*, quæ sibi animam Christi adscivit ; b) collata est huic animæ, non ad mensuram, sed secundum plenitudinem, et pro dignitate *universalis* principii gratificationis, de quo Ap. (Eph. I, 6) : *Gratificavit nos in dilecto Filio suo* ; c) ad *infinitum* quoque effectum se extendit, attingens totam humanam naturam ipsosque Angelos.

Conclusio 2^a. — **GRATIA CHRISTI AUGERI NON POTEST, NEC DE POTENTIA ABSOLUTA, SIMPLICITER LOQUENDO.**

1^a *Par*, intellecta saltem de potentia *ordinata*, communiter conceditur. *Pos discute*

Sane 1^o perfectio seu plenitudo gratiæ Christi consequitur perfectionem *unigeniti a Patre* (Joan. I, 14). Atqui nihil potest esse aut intelligi majus quam Verbi Dei generatio. Ergo nec potest esse vel cogitari major gratia quam illa qua Christus repletus est.

2^o Aliquam formam non posse augeri contingit duplice : *uno modo ex parte subjecti*, quando pervenitur ad ultimum gradum quæ forma illa in *tali* sujepto participabilis est, puta si dicatur calorem aquæ super centum gradus augeri non posse, aqua jam in vaporem vertente; *alio modo ex parte formæ*, quando attingitur ultima perfectio quam talis forma absolute possit in natura consequi, puta si luce solis lux excellentior negetur. Atqui neutro modo gratia Christi augmentabilis est : ergo. *Prob. min.* — a) *Non ex parte subjecti*. Nam, hoc modo, nequit gratia augmentum suscipere in eis qui comprehensores sunt, ut beati, seu ultimum vitæ *terminum* assecuti sunt. Atqui Christus, secundum quod homo, a primo instanti suæ conceptionis verus fuit ac plenus comprehensor. Ergo. — b) *Non ex parte gratiæ*. Siquidem, quemadmodum ex divina sapientia reliquæ formæ speciem ac mensuram determinatam sortiuntur per comparisonem ad suum finem, ita et gratia propriam mensuram ex com mensuratione sui finis sumere aestimanda est. Atqui finis gratiæ est unio creature rationalis ad Deum, tum quæ mentis actu accidentaliter perficitur, tum quæ substantialiter seu in esse personali Verbi consistit; qua quidem personali unione nec intelligi major potest, et cui unio accidentalis subordinatur et consonat. Ergo gratia Christi pertingit ad summam mensuram gratiæ.

deonté
cojetor
de potentia
dei absolu
factus augeni
omnino probabile

*opereatus
de S.M.
Salmonianorum*

QUEST. I. ART. VI.

107

*Ici est le
discours*

2^a Pars dirigitur contra plures theologos, uti Suarez, Billuart, etc; eam vero Cajetanus, Satolli, etc, jure merito tueruntur.—Nam 1^o perspicua est mens S. Thomae ex sequentibus verbis (*de Ver. Q. XXIX, a. 3 ad 2*): “Potest Deus facere meliorem essentiam quam sit essentia gratiae, non tamen aliquid melius in genere gratiae; cum gratia Christi omnia includat ad quae ratio gratiae se potest extendere.”—2^o In toto demonstrationis decursu (*hic III, Q. VII, a. 12*) et infra (*Q. X, a. 4 ad 3*) S. Doctor repetit impossibilitatem augmenti gratiae Christi ex unione personali cum Verbo: hac autem unione, nec de potentia *absoluta*, major compleri posset.—3^o Recolendum est aliquid dici possibile de potentia *absoluta*, vel *simpliciter*, si non repugnet neque potentiae neque sapientiae divinae, vel *secundum quid* et conditionaler tantum, si, quamvis sub potentia cadat, sapientiae tamen aut justitiae adversetur. Augmentum gratiae Christi possibile nobis videtur possibiliitate *absoluta secundum quid*, scil. quae a sapientia divina praescindat, non vero possibiliitate *absoluta simpliciter*, quia nunquam posset Dei sapientia gratiam ordinare ad præstantiorem finem quam sit Unio hypostatica: hæc ipsissima est Angelici sententia.

Solv. obj. (cont. 2^{am} concl.).—OBJ. 1.—Omni finito potest fieri additio. Atqui gratia Christi erat, saltem entitative, finita. Ergo.

RESP. D. M.:...in quantitatibus mathematicis et abstractis, C; in quantitate physica et concreta, N.—C.m.—Neg. conseq.

1^o Si loquamur de quantitatibus *abstractis*, quales mathematici accipiunt, cuilibet finitæ quantitati potest fieri additio, quippe nihil inibi est quod additioni repugnet.—At 2^o si sermo sit de quantitate *physica* et naturali, additio repugnare potest ex parte formæ, cui debetur determinata quantitas, sicut et alia certa accidentia; non enim eadem dimensiones debentur cani et elephanto.—3^o Multo magis in ipsis formis consideratur aliquis terminus ultra quem, pro sua indole suoque fine, progredi nequeant: hoc ipsum circa gratiam Christi teneatur.

OBJ. 2.—Augmentum gratiae fit per virtutem divinam (2 Cor. IX, 8). Atqui divina virtus nullo coarctatur termino. Ergo.

RESP. D. M.:...per virtutem divinam sapientie conjunctam,

C; independenter a Dei sapientia, *N*.—*D.m*: in iis quæ simpliciter factibilia sunt, *C*; quasi nulla dentur quæ operationi divinæ repugnant, *N*.—*Neg. conseq.*

“Virtus divina, licet possit facere aliquid majus et melius quam sit habitualis gratia Christi, non tamen posset facere quod ordinaretur ad aliquid majus quam sit unio personalis ad Filium unigenitum a Patre: cui unioni sufficienter correspondet talis mensura gratiæ, secundum definitionem *divinæ sapientiæ*” (S. Th., heic art. 12 ad 2).

OBJ. 3.—Dicitur (Luc. II, 52): *Iesus proficiebat sapientia et ætate, et gratia apud Deum et homines*. Ergo.

RESP. *D. antec*:...proficiebat secundum ipsum habitum gratiæ, *N*; secundum gratiæ effectus, *C*.—*Neg. conseq.*

Limpida est *S. Thomæ* doctrina (ad quam recentes quidam scriptores non satis attenderunt): “In sapientia et gratia aliquis potest proficere dupliciter. Uno modo secundum ipsos *habitus sapientiæ*¹ et gratiæ augmentatos, et sic Christus in eis non proficiebat. Alio modo secundum *effectus*, in quantum scil. aliquis sapientiora et virtuosiora opera facit; et sic Christus proficiebat sapientia et gratia, sicut et ætate, quia secundum processum ætatis perfectiora opera faciebat, ut se verum hominem demonstraret et in his quæ sunt ad Deum, et in his quæ sunt ad homines” (*ibid. ad 3*).

ARTICULUS VII.

Vnde, Qualiter gratia habitualis Christi se habeat ad Unionem.

(Art. 13)

Postremus hic articulus proponitur ad determinandum *nexus* qui inter Unionem hypostaticam et gratiam habitualis Christi vigeat; hujus namque connexionis ratio non inutiliter in illustrandam gratiæ Salvatoris notionem collata videbitur.

1—Intellige sapientiam beatam et infusam, juxta ea quæ dicentur infra (*de Scientia Christi*).

Conclusio.—**UNIO HYPOSTATICA IN CHRISTO PRÆCEDIT, NON TEMPORE, SED NATURA GRATIAM HABITUalem.**

1º *Eo referri possunt duo loca prophetica.—Legitur enim (Is. XLII, 1): Ecce servus meus, suscipiam eum... dedi spiritum meum super eum.* Atqui hæc verba exponuntur de Christo ¹, prouti Deus humanam naturam sustinendam suscepit (gr. unionis), susceptam vero spiritu suo replevit (gr. habitualis). Ergo.—Aliud quoque vaticinium, ex mente D. Thomæ (III, Q. XXVII, a. 3), mystice Christo applicari potest secundum eamdem habitudinem utriusque gratiæ; scil. (Ezech. XLIII, 2): *Ecce gloria Dei Israël ingrediebatur per viam orientalem* (Incarnatio per B. Virginem)...et terra splendebat a majestate ejus, i. e. caro Virginis et Christi splendore gratiæ illustrabatur.

2º *Triplici ratione intenta veritas confirmabitur.*

a) *Primo ex ordine principiorum Unionis et gratiæ.*—Principium Unionis hypostaticæ est persona Filii assumens humanam naturam, quam ob assumptionem missa in mundum dicitur; principium autem gratiæ habitualis, cum caritate datæ, est Sp. Sanctus qui secundum hoc mitti intelligitur quod per caritatem mentem inhabitat ². Atqui missio Filii secundum ordinem naturæ prior est missione Sp. Sancti, sicut ordine naturæ Sp. Sanctus procedit a Filio et a sapientia dilectio. Ergo unio personalis, secundum quam intelligitur missio Filii, naturæ præcedit habitualem gratiam, secundum quam accipitur missio Sp. Sancti.

b) *Secundo, ex habitudine gratiæ ad suam causam.*—Gratia in homine gignitur ex præsentia Divinitatis, sicut lumen in aëre ex præsentia solis. Atqui præsentia Dei in Christo maxime intelligitur secundum unionem humanæ naturæ ad divinam personam. Ergo gratia habitualis Christi consequi censenda est hanc unionem, ut splendor solem; ita ut recte accipiatur velut *proprietas quædam* (non physica, sed moralis) ejusdem unionis, et perfectio “quodam modo illi homini *naturalis*” (Aug. Euchir. c. 40).

c) *Tertio ex fine gratiæ.*—Hæc enim quum ordinetur ad bene agendum, actus salutaris et per consequens gratia ad

1—Cf. Knabenbauer, *Curs. Scrip. Sac.*, *Comm. in Is. proph.*

2—Cf. *de Deo trino*, Disp. X, Q. III.

actum illum inclinans presupponit hypostasim operantem. Atqui hypostasis in humanitate Christi non presupponitur ante Unionem, sed est ipsa persona Verbi in eadem humanitate subsistens. Ergo gratia unionis naturâ et intellectu praeceedit gratiam habitualis.

Solv. obj.—**OBJ.** 1.—Idem non est posterius se ipso. Atqui, docente *Aug.* (l. de Præd. Sanct. c. 15), “eâ gratia fit ab initio fidei suæ homo quicumque Christianus, quâ gratia homo ille ab initio suo factus est Christus.” Ergo.

RESP. C. M.—*D.m* :... et ibi Augustinus gratiam sumit *active*, scil. pro *gratuita* Dei voluntate quæ tum in Incarnatione tum in justificatione se promit, *C*; gratiam sumit *objective*, *N*.—*Neg. conseq.*

OBJ. 2.—Dispositio praeceedit perfectionem tempore vel natura. Atqui gratia habitualis Christi videtur dispositio ad unionem humanitatis cum Verbo. Ergo.

RESP. D. M :... in iis quæ generationis via successive perficiuntur, *C*; quasi prævia dispositio requiratur ad unionem alieni suppositi cura natura assumpta, *N*.—*D. m* :... proprie est *dispositio* ad unionem, *N*; unionem consequitur quasi *proprietas* naturam assumptam dignificans, *C*.—*Neg. conseq.*

OBJ. 3.—Commune est prius proprio. Atqui gratia habitualis communis est Christo aliisque hominibus, gratia autem unionis Christo propria. Ergo.

RESP. D. M :... in *eodem genere*, *C*; in his quæ sunt *diversorum* generum, *N*.—*C.d.m* :... et gratia unionis pertinet ad genus gratiæ habitualis, *N*; præeminet, sicut et ipsa divina Persona, omne genus, ex quo habet ut sit principium et origo perfectionum pluribus convenientium, *C*.—*Neg. conseq.*

QUÆSTIO SECUNDA

DE GRATIA CHRISTI CAPITIS

Modo considerandum subit de gratia Christi, secundum quod est *caput Ecclesiae*.—Quinque discutienda se præbent: *an sit Christus Ecclesiae caput* (art. 1); *quorum caput dicendus sit, num omnium hominum* (art. 2) vel etiam *Angelorum* (art. 3); *quid proprie* (art. 4), *qualisve sit* (art. 5) gratia Christi-capitis.

ARTICULUS I.

Utrum Christus sit Ecclesiae caput et rex.

1º *Christus* heic sumendum est, secundum quod *homo*, scil. ut Filius Dei subsistens in natura humana spiritu carneque confiata; etsi enim *primario* Deo competit esse caput et regem universorum, haec tamen dignitas *propriori* sensu requirit conformitatem quamdam naturæ quæ homini-Christo optime congruit respectu creaturarum rationalium.—
2º *Ecclesia* accipitur latissimo sensu pro *omni tempore* et secundum *triplicem statum* militiæ, probationis et triumphi.—
3º Non eadem omnino est *capitis ac regis* significatio, cum regia potestas (legislativa, executiva, judiciaria) magis externam gubernationem respiciat, caput vero externum simul et internum influxum exserat: utrumque Christo vindicabimus.

Conclusio.—CONVENIENTER CHRISTUS NOMINATUR ECCLESIAE CAPUT ET REX.—Huc spectant verba *Leonis XIII* (Encycl. *Satis cognitum*): “Ecclesiam Filius Dei *mysticum corpus suum decrevit fore, quocum ipse velut caput conjungeretur, ad similitudinem corporis humani quod suscepit.*” Et *Conc. Trid.* (Sess. VI, c. 21): “Si quis dixerit, Christum

Jesum a Deo hominibus datum fuisse ut redemptorem cui fidant, non etiam ut legislatorem cui obediant, A. S."

1º In *Scriptura* modo Christus vocatur Ecclesiæ caput, modo rex.—Nam legitur (Eph. I, 22): *Ipsum dedit caput supra omnem Ecclesiam*; et (Coloss. I, 18): *Ipse est caput corporis Ecclesie, qui est principium, primogenitus ex mortuis, ut sit in omnibus ipse primatum tenens.*—(Math. XXI, 4-5) Christo applicatur quod dictum est per prophetam: ¹ *Ecce Rex tuus venit tibi mansuetus*; et ipse Christus interroganti Pilato (Joan. XVIII, 37) respondit: *Tu dicis, quia rex sum ego*².

2º Ratione sic proceditur.—Christus dicitur Ecclesiæ *caput* secundum similitudinem humani capitii, in quo tria considerare est: ordinem, perfectionem, et virtutem internam et externam. Atqui hæc tria competit Christo spiritualiter: ergo.

Maj. decl. a) *Ordinis primatus* convenit capiti, in quantum est pars prima et superior humani corporis; unde omne principium, puta viæ vel exercitus, consuevit vocari caput.—b) Præter hanc situs eminentiam, summa aguoscitur *perfectionis* capitii, quaterus in eo vigent omnes sensus tum interiores, tum exteriores, in cœteris autem membris solus reperitur tactus.—c) Virtus quoque capiti convenit dupli ratione. *Efficienter* quidem: “nam caput influit omnibus membris sensum et motum; unde et medici dicunt nervos a capite originem ducere, et quidquid pertinet ad vires animales apprehensivas et motivas” (*de Ver. Q. XXIX, a. 4*). *Gubernative* vero: “quia caput omnia alia membra in suis actibus gubernat et regulat tam per sensus exteriores quam per interiores, qui in capite sedem habent” (*ibid.*); unde rector seu rex caput populi nuncupatur.

Min. ostend. a) *Primo* enim Christus, ut homo, propinquissimus Deo est et quolibet homine superior et prior, non tempore, sed altitudine gratiae, ex cuius influxu veluti anticipato omnes sancti V. T. gratiam acceperunt.—b) *Secundo*

1—*Zach. IX, 9.*

2—*Vid. plura ap. Knoll, P. III, S. II, cap. 3.*

3—*Hæc certe consonant hodiernis physiologis assertis.*—*Cf. Vallet, La tête et le cœur.*

perfectione dignitateque Christus omnes præcellit ob abundantiam gratiarum, sapientiae scientiaeque amplitudinem et nobilitatem, siquidem *in ipso complacuit omnem plenitudinem inhabitare* (Coloss. I, 19).—c) *Tertio* virtus Christi, de cuius plenitudine omnes accipiunt (Joan. I, 16), summi pere commendatur: *efficiens* quidem, quia Christus homo non solum *merito*, sed et *eficacia* quadam instrumentali (cf. Cajet. in h. art.) vim habet influendi vitam gratiae in omnia membra Ecclesiae; *gubernativa* vero, quia Christus legibus et consiliis suis totam regit societatem religiosam, juxta illud (Is. II, 3): *De Sion exibit lex, et verbum Domini de Jerusalen.* Ex quo concluditur utramque in Christo fuisse, *capitalem* scil. et *regiam* dignitatem.

Solv. obj.—OBJ. 1.—Caput influit sensum et motum in membra. Atqui sensus motusque spiritualis, qui est per gratiam, nequit ab homine-Christo produci. Ergo.

RESP. C. M.—D.m:...auctoritative, C; instrumentaliter et meritorie, N.—Neg. *conseq.*

Dare gratiam habituali et actualem convenit Christo, secundum quod est Deus, *aucteritative*¹; at *instrumentaliter* et *meritorie* ei etiam attribuitur, quatenus est homo: siquidem et meriti conditiones in actionibus Christi-hominis inveniuntur, et ejus humanitas instrumentum erat Divinitati coniunctum quo reali efficientia, non secus ac per Sacra menta, gratia produceretur.—Hæc inferius illustrabuntur.

OBJ. 2.—Capitis non videtur esse aliud caput. Atqui Christi, secundum quod est homo, est caput Deus (1 Cor. XI, 3). Ergo.

RESP. D. M: Capitis naturalis...C; capitis similitudinarie sumpti, N.—C.m. — Neg. *conseq.*

1^o In metaphoricis locutionibus similitudo *aliqua*, non omnimoda, attenditur.—2^o Capitis quidem *naturalis* non datur aliud caput, quia corpus humanum non est pars alterius corporis; at caput *similitudinarium*, pertinens ad corpus morale superiori potestati subjectum, habet supra se aliud caput, v. g. caput familie capiti civitatis subditum.—Ita 3^o nihil prohibet caput Christi esse Deum, cum tamen ipse Christus sit Ecclesiae caput.

1—Cf. Tract. de *Gratia*, Disp. IV, Q. I, a. 1.

1. b. OBJ. 3.—Caput in homine est quoddam particulare mem-
brum, influentiam recipiens a corde. Atqui Christus est
universale principium totius Ecclesiae. Ergo.

S. h. ad 3 RESP. *D. M*:... particulare membrum secundum situm
et vegetative dependens a corde, *C*; nec gaudet universalitate
quadam virtutis quæ et ipsi cordi sensitive dominetur, *N*.—
D.m:... principium actioni Sp. Sancti associatum, *C*; inde-
pendens ab illa, *N*.—*Neg. conseq.*

Caput in homine principalitate gaudet et secundum mani-
festam, quam habet, eminentiam respectu cæterorum mem-
brorum, et secundum suam virtutein sensitivam et motricem;
at, in ordine *vegetativo*, primum principium, ex quo totus
organismus occultum influxum vitamque cum sanguine
recipit, est cor.—Itaque (et pulchrâ sane analogiâ) *cordi* com-
paratur Sp. Sanctus, qui invisibiliter Ecclesiam vivificat et
unit; *capiti* autem assimilatur Christus secundum visibilem
naturam, qua hominibus præfertur et dominatur¹.

ARTICULUS II.

*Utrum Christus sit rex universorum omniumque
hominum caput.*

(Q. VIII, a. 2-3)

Cum Christus dignitate capitali polleat ut homo, humana
vero natura coalescat ex anima et corpore, patet influxum
Christi in homines *ex tota* ejus humanitate esse repeten-
dum.—Quo admissio, duo nunc circa extensionem hujus
influxus investiganda veniunt: *unum* respectu rerum quæ
Christo subsint; *aliud* respectu hominum quibus præfici-
tur.—Plura tamen in hac disceptatione prætermitemus, quæ
solent a theologis in Tract. de *Ecclesia* ventilari.

Conclusio 1^a.—CAPITALIS SEU REGIA CHRISTI POTESTAS
SE EXTENDIT NON SOLUM AD ANIMAS, SED ET AD CORPORA
HOMINUM, IMO EMINENTI MODO AD OMNIA CREATA.

1^a Pars apparet:—Nam Christus dicitur Ecclesiæ caput, in

1—Vid. alias objectiones ap. D. Thomam, *de Ver. Q. XXIX*, a. 4.

quantum influit in ea spiritualem sensum et motum gratiæ. Atqui anima quidem *principaliter* est gratiæ susceptiva, sed *secundario* et instrumentaliter etiam corpus participare potest de vivifico illo influxu: *a) primo*, in quantum membra corporis exhibentur *arma justitiae* in anima existenti per Christum, juxta monitum Ap. (Rom. VI, 13 et 19); *b) secundo*, quatenus vita gloriæ ab anima in corpus derivatur, secundum illud (Rom. VIII, 11): *Qui suscitavit J. C. a mortuis, vivificabit et mortalia corpora vestra, propter inhabitantem Spiritum ejus in vobis.* Ergo.

2^a Pars fert Christum potestatem accepisse super *omnia temporalia* et *regna mundi*: quod et declarandum et demonstrandum est.

1^o Decl.—*a)* Certo certius Christus, ut *Deus*, rex dominus que existit omnium creaturarum, eo modo quo. Pater.—*b)* Præterea, ut *homo*, dubitandum non est quin plena instrutus fuerit potestate regia in homines et in res temporales saltem *indirecte*, seu prout expedire judicaret ad finem spiritualem: id ab omnibus conceditur, et plane requirebatur ad hoc ut Ecclesiæ rex et caput posset bonum regni spiritualis efficaciter promovere.—*c)* Sed quæstio, inter theologos agitata, est, num Christus, etiam ut homo, jus *alti* et *directi* dominii in regna mundi cunctaque temporalia habuerit ex singulari *potestate excellentiæ* sibi divinitus communicata.—*d)* Sunt qui cum *Bellarmino* (de R. Pont. l. V, c. 4) negant; at alii plures cum *Suarez* (Disp. XLVIII), *Gonet* (Disp. XXII, a. 4) etc, affirmant: quorum sententia verior ex dicendis censebitur.

2^o Prob.—*a)* Sane vero *biblici textus*, quibus regia Christi potestas effertur, vim prorsus generalem habent; ex. gr. (Ps. VIII, 7-8): *Constituisti eum super opera manuum tuarum. Omnia subjecisti sub pedibus ejus, oves et boves universas etc*; quæ de Christo exponit Ap. (1 Cor. XV, 27). *Omnia subjecta sunt ei; sine dubio præter eum qui subjecit ei omnia.* Explicat autem S. Thomas “sub pedibus ejus” in hunc sensum: sub *humanitate Christi* (*Comm. in Heb. II, l. 2*).—(Apoc. I, 5) Christus vocatur: *Princeps regum terræ*; et (XIX, 16): *Rex regum et Dominus dominantium.*

b) Eam fuisse *D. Thomæ* sententiam, luculenta ipsius

verba suadent (III, Q. LIX, a. 4 ad 1): "Judiciaria potestas, inquit, consequitur regiam dignitatem. Christus autem, quamvis esset *rex constitutus* a Deo, non tanien in terris vivens terrenum regnum *temporaliter administrare* voluit; unde ipse dicit Joan. XVIII, 36: *Regnum meum non est de hoc mundo*; " et (*ibid.* ad 2): "Christo sunt omnia subiecta quantum ad *potestatem* quam a Patre *super omnia* accepit, secundum illud Matth. ult. 18: *Data est mihi omnis potestas in cœlo et in terra*¹."—Quando autem S. Doctor docet Christum non fuisse regem "eo modo quo Pilatus intellegebat" (in Joan. XVIII, 8), per hoc non excluditur directum dominium *excellente* in regna temporalia, sed solum dominium *inferius* principum hujus mundi quibus Christus eminentiori modo dominabatur.

c) Revera altior haec potestas, origine, amplitudine et stabilitate præcellens, maxime conveniebat dignitati Christi, quin aliunde juri particulari regum temporalium præjudicaret; nam "non eripit mortalia, qui regna dat cœlestia" (*Hymn.* in Epiph. Dom.).—Itaque Christus ab exercenda illa potestate in administratione regni terrestris libere abstinuit, nec aliam nisi spineam in regio suo fronte coronam admisit, humilitate, paupertate, mundanarum rerum contemptu mundum salvaturus.—Nullatenus vero ex hoc inferre licet R. Pontificem, Christi vicarium, *directo* dominio in regna temporalia investitum esse: non enim Christus omnem suam potestatem Pape contulit, ut patet de potestate instituendi Sacra menta².

Conclusio 2^a.—CHRISTUS EST CAPUT OMNIUM HOMINUM SIBI UTCUMQUE CONJUNCTORUM, SED DIVERSIMODE.

Id 1^o generaliter suadetur; quia legimus (1 Tim. IV, 10): *Est Salvator omnium hominum, maxime fidelium*; et (1 Joan. II, 2): *Ipse est propitiatio pro peccatis...totius mundi*. Atqui salvare homines eorumque peccatis propitiatione mederi competit Christo, quatenus est caput. Ergo.

2^o Hoc ipsum *specialiter* ostend.—Christus dicendus est caput omnium eorum qui quomodocumque, vel actu, vel

1—Cf. *ibid.* a. 6 ad 3; *Comm.* in Heb. I, 2 et II, 7-8; in Joan. VI, 2.

2—Cf. *de Regim. princ.* (Opusc. 20 inter Op. D. Thomæ), l. III, c. 13 sqq.

saltem in potentia, ei uniuntur. Atqui unio hæc secundum *quinque gradus* intelligi potest: ergo.—*Min. decl.*

a) Hæc est differentia inter corpus hominis naturale et corpus Ecclesiæ *mysticum* quod membra primi sunt *omnia simul*, non autem membra secundi: neque quantum ad *esse naturæ*, quia corpus Ecclesiæ constitutur ex hominibus omnium sibi succedentium ætatum; neque quantum ad *esse gratiæ*, quia eorum etiam qui sunt in uno tempore, quidam gratia parent, postmodum habituri, aliis iam eam habentibus.

b) Ex hoc quinque gradus membrorum Christi distinguuntur.—*1^{us} gradus* est eorum qui, non omissis sanctis Patribus olim in lymbo morantibus, *actu Christo per gloriam* uniuntur: quorum Christus primo et principaliter est caput.—*2^{us} gradus* eorum est qui ei *actu uniuntur per caritatem viae* aut *purgatorii*; ad quem gradum manifeste pertinent justi V. T. futuro Messiae per fidem et dilectionem a longe inhærentes: horum Christus perfecte etiam dicitur caput.—*3^{us} gradus* eos complectitur qui caritate quidem parent, at per fidem informem *imperfecto* quodam *actu Christo coniuncti* sunt, veluti membra arida et mortua, secundum illud *Trid. (Sess. VI, cap. VII)*: “Fides (sine caritate) neque unit perfecte cum Christo, neque corporis ejus vivum membrum efficit.”—*4^{us} gradus* est eorum qui Christo uniuntur solum *in potentia* nondum reducta ad actum, quandoque tamen *reducenda* secundum divinam prædestinationem: hujusmodi sunt infideles ad fidem convertendi, quorum conversionis spes fundatur tum præcipue in virtute sufficientissima meritorum Christi, tum quoque in arbitrii libertate.—*5^{us} gradus* tandem eos continet qui sunt in *mera potentia ingrediendi* corpus Christi *mysticum*, quin unquam de facto sint fidei et caritatis divinæ munera consecuturi.

Duo subnotabo.—*1^o* Controveritur inter theologos¹ num Christus dici possit caput *primorum parentum* pro statu *innocentiae* qui lapsum præcessit. Nobis arridet sententia *affirmans*, utpote conformior verbis *D. Thomæ (Comm. in Joan. I, lect. 9)*: “Plenitudo gratiæ, quæ est in Christo, est causa omnium gratiarum in intellectualibus creaturis.” Hoc vero admittendum censemus, non eo sensu quod gratia inno-

1—Cf. Billuart, Diss. IX, a. 2.

centiæ fuerit *efficienter* vel etiam meritorie a Christo-homine, sed quia ex voluntate Dei *consequente* prævisionem peccati et futurae Redemptionis conferri potuerit secundum habitudinem *exemplarem* et *finaliem* ad Christum, capitali gratia datum, quem Adam innocens fide apprehendit ut consummatorem divinæ gloriæ.—²⁰ Christus nequit haberi, nec actu, nec potentia, ut caput *damnatorum*, nisi forte eo modo quo gubernator ex dominatione *regiæ* potestatis vocatur caput civium r̄bellium, quos ad mortem destinaverit.

ARTICULUS III.

Utrum Christus sit caput Angelorum.

Vox est et frequens Patrum Doctorumque sententia quod una sub uno Rege Sanctorum civitas consistit, cœlestis Jerusalem, coalescens non solum ex beatis Adæ filiis, verum etiam ex Angelorum legionibus.—Id modo theologicæ ponderandum est, ita ut duo determinentur, *an* et *quo pacto* Christus habeatur Angelorum caput.

Conclusio.—CHRISTUS VERE EST CAPUT ANGELORUM; HOC AUTEM QUOMODO FIAT, ULTERIUS DECLARATUR.

1^a *Pars communiter* conceditur.

Nam 1^o legimus (Coloss. II, 10): *Estis in illo repleti, qui est caput omnis principatus et potestatis;* et eadem ratio est de reliquis Argelis. Praeterea (Eph. I, 20-22): *Suscilans illum a mortuis, et constituens ad dexteram suam in caelis tibus, supra omnem principatum et potestatem et virtutem et dominationem... omnia subjecit sub pedibus ejus.*

2^o *Ratione* id confirmat ".—*a)* Ex unitate finis. Ubi est unum corpus, necesse est et unum caput ponere; unum autem corpus similitudinarie dicitur multitudo in unum ordinata secundum distinctos actus, sive officia. Atqui manifestum est ad unum eumdemque finem, qui est gloria divinæ frutionis, conspirare et homines et Angelos. Ergo corpus Ecclesiæ mysticum, latius sumptum, homines Angelosque sub capite Christo comprehendit.—*b)* Ex conditionibus capi-

tis; tres quippe sunt conditiones hujusmodi, ordo, perfectio, influxus. Atqui Christus-homo propinquius se habet ad Deum quam ipsi Angeli; dona gratiae Dei perfectius participat; snum quoque influxum et imperium ad eos usqne extendit, juxta illud (Math. IV, 11): *Ecce Angeli accesserunt, et ministrabant ei.* Ergo.

2^a Pars, de modo seu natura influxus Christi in Angelos, diverse a diversis exponitur. Duea extremæ referuntur sententiae: *una*, quod Christus Angelis meruerit omnia dona gratiae et gloriæ (ita Suarez Disp. XLII, cum aliis); *altera*, quod meruerit quidem eis gratias accidentiales, non tamen gratiam et gloriam *essentialiem* (ita Sylvius, Billuart, etc.). Utique D. Thomam pro se stare contendunt.—Ingenue dicam quid mihi verius videatur.

1^o Certum est, fatentibus omni ius (et hoc *Angelicus* aperte docet vel insinuat)¹ ex Christi merito obvenisse Angelis saltem gratias quasdam *ministeriales* et gaudia *accidentalia* de hominum salute.—2^o Christi dignitas, et ordo divinae prædestinationis omnia complectens a summo ad imum (ut observat Em^{us} Satolli in h. l.), probabilius exigunt ut tota Angelorum gratia et gloria *quadamtenus* ad Christum referatur; item nonnulli textus D. Thomæ de universalis Christi influentia (puta in Joan. I, lect. 9) deque perfectione gratiæ dominicæ eo spectare videntur: siquidem primum in aliquo genere, causa est aliqualiter cæterorum ejusdem generis.—At 3^o idem D. Thomas diserte scripsit (de Ver. l. cit.): “Angeli non sunt viatores quantum ad præmium *essentiale*, et ideo quantum ad hoc *nihil eis meruit Christus*” (cf. 3 S. D. XIII, Q. II, a. 2, sol. 1). Præterea, plura loca scripturalia (ut videre est ap. Sylvium, Gonet, etc) suadent meritum Christi fuisse *redemptivum*: quo merito Angeli non indigebant.—Igitur 4^o superest ut explicemus influxum Christi in *essentialiem* Angelorum gratiam et gloriam (sicuti in gratiam innocentiae adamicæ) per causalitatem *exemplarem* et *finallem*, quatenus scil. non ex voluntate Dei *antecedente*, sed ex voluntate *consequente* previsionem lapsus Adæ futuræque Incarnationis gratia Angelis data intelligatur ad exemplar

1.—Hic Q. VIII, a. 4; Q. LIX, a. 6; de Ver. Q. XXIX, a. 7 ad 5.

justitiae Christi (in quem credidisse aliqualiter putantur) et in finem exaltandæ ejus gloriæ.

Solv. obj.—**OBJ. 1.**—Caput et membra sunt unius naturæ. Atqui Christus-homo non convenit in natura cum Angelis. Ergo.

RESP. Trans. M.—*D.m* :...in natura speciei, *C*; neque in natura generis, *N*.—**Neg. conseq.**

Caput dicitur de Christo *metaphorice*; in metaphoris vero non absoluta et rigorosa similitudo requiritur.—Cæterum influentia Christi super homines principaliter attingit animas; secundum quas convenimus cum Angelis in natura *generis*, quamvis non in natura speciei.—Qua de causa Christus nominari potest caput Angelorum, licet non tam proprie quam hominum.

OBJ. 2.—Illorum Christus est caput qui pertinent ad congregationem fidelium. Atqui Angeli non sunt fideles, sed comprehensores. Ergo.

RESP. D. M :...pro statu viæ, *C*; pro statu patriæ, *N*.—*C.m*.—**Neg. conseq.**

Ecclesia, secundum statum *viæ*, est congregatio fidelium, sed, secundum statum *patriæ*, ex comprehendentibus constituitur. Christus autem non solum fuit viator, sed etiam comprehensor. Idecirco non solum fidelium, sed et comprehendentium, pro plenitudine gratiæ omniigenæ, caput existit.

OBJ. 3.—Christus homo agere non potest nisi in naturas corporeas. Atqui Angeli corporibus carent. Ergo.

RESP. D. M :...ad modum cause principalis, *Trans*; ex virtute divinitus accepta, *N*.—*C.m*.—**Neg. conseq.**

Non repugnat ut humanitas Christi ex virtute naturæ omnino spiritualis et efficacissimæ, scil. divinæ, influere valeat non solum in spiritum humanum, corpori conjunctum, sed etiam in spiritum angelicum; præsertim si attendatur maxima seu personalis ejusdem humanitatis copulatio cum Deo: effectus enim pensandus est potissime ex principali agente.

ARTICULUS IV.

*Utrum gratia capitalis Christi sit in ipso eadem
cum gratia habituali.*

Quæstio est de identitate *reali*.—Refert Gonet (Disp. XIV, a. 5) opinionem *Vasquezii* aliorumque tenentium solam gratiam unionis Christum in ratione capitis constituere, ita ut ipsa Unio sit gratia capitalis; plerique vero huic assertioni contradicunt.—Mens D. Thomæ jamjam lectori comperta fiet.

Conclusio.—GRATIA CAPITALIS CHRISTI ALIA NON EST SECUNDUM REM QUAM GRATIA HABITUALIS, SOLA RATIONE DIFFERENS, ET GRATIAM UNIONIS CONNOTANS.

1^a *Pars prob.*—1^o Christus est caput nostrum, secundum quod gratia repletus est, juxta illud (Joan. I, 16): *De plenitudine ejus nos omnes accepimus*. Atqui constat ex præced. plenitudinem gratiae in Christo nihil aliud esse quam summum gradum gratiae habitualis. Ergo.

2^o In anima Christi recepta est gratia habitualis secundum maximam eminentiam. Atqui ex illa eminentia celestium munerum competit Christo virtus gratiam diffundendi in alios: quod pertinet ad rationem Capitis. Ergo eadem est secundum essentiam gratia personalis, qua anima Christi justificata est, et gratia capitalis qua justificantur alii. *Maj.* constat; *ostend. min.* a) Unumquodque agit, in quantum est ens actu: ergo necesse est ut eadem sit actualitas qua aliquid est actu et qua agit, sicut idem est calor quo ignis calidus est et quo calefacit. b) Non tamen omnis actualitas sufficit ad hoc ut aliquid sit principium agendi in alia; sed, quia agens præstantius est paciente, vis illa activa siisque diffusiva eminentiam quamdam ex parte agentis subaudit. Id reperitur in Christo: ex quo patet minoris totiusque argumenti soliditas.

2^a *Pars uno verbo expeditur: siquidem aliud est formaliter quod gratia faciat animam Deo gratam et quod eam aptam efficiat ad agendum in alios: primum est gratiae singularis, alterum gratiae capitalis.*

1^o-1^o cond.
de la tête

3^e cond. de la
Tête

actualité de
la même
forme
la
Eminence
négative de cette
forme.

*(est le fruit
quod qui
per sonus)*

3^a Pars quoque nullo negotio manifestatur.—Quamvis enim gratia habitualis, ut est gratia Capitis, sit principium quo actionum, meritorum et satisfactionum Christi, haec tamem salutifera opera plenam suam efficaciam suique valoris infinitatibus sortiuntur ex Unione hypostatica, qua Persona Verbi fit principium *quod* illorum operum.

Solv. obj.—OBJ. 1.—Juxta Ap. (Rom. V, 15) gratia Christi in ordine reparationis comparari potest ad peccatum Adæ in ordine corruptiōis. Atqui aliud est peccatum actuale Adæ, aliud peccatum originale. Ergo.

RESP. D. M:... secundum aliquam proportionem, C; quasi duo illa perfecte sibi invicem corraspondeant, N.—C.m.—*Neg. conseq.*

Comparatio tenet sub respectu singularitatis causæ et communis effectus, non tamen omni ex parte.—Nam peccatum originale in Adam derivatum est a peccato ejus actuali seu *personalī* ad posteros per *naturæ* corruptionem, gratia autem a Christo ad nos devenit non mediante natura humana, sed per solam personalem Christi actionem; unde non datur locus distinguendi gratiam personæ et gratiam naturæ respondentem.

OBJ. 2.—Habitus distinguuntur secundum actus. Atqui ad alium actum ordinatur gratia personalis Christi, ad alium gratia Capitis. Ergo.

RESP. D. M:... secundum actus independentes ab invicem, C; secundi.m actus quorum unus ratio est alterius, N.—C.d.m.—*Neg. conseq.*

OBJ. 3.—In Christo distinguimus triplicem gratiam, gratiam unionis, gratiam capititis et gratiam singularem. Atqui gratia singularis realiter differt a gratia unionis. Ergo.

RESP. D. M:... quasi tria membra æque dividentia genus gratiæ, N; ita ut una (gratia unionis) ordinetur ad esse *personale*, aliæ vero involvant modum quemdam *accidentalem*, C.—C.m.—*Neg. conseq.*

ARTICULUS V.

Utrum esse caput Ecclesiae sit proprium Christo.

(Art. 6-8)

Unum hoc de Christi-capitis gratia inquirendum manet, nimirum an tanta sit ut aliis communicari non possit.—Quo in proposito, advertere opus est dupliceiter caput in alia membra influere: *uno modo per intrinsecum influxum*, prout scil. vis sensitiva et motiva a capite in totum corpus defluit et permeat; *alio modo secundum quanidam exteriorem gubernationem*, quatenus secundum visum aliquosque sensus in capite radicatos et intellectui deservientes homo dirigitur in externis suis actibus. Hinc duo concludenda.

Conclusio 1^a.—**QUANTUM AD INTERNUM, IDEOQUE PRÆCIPUUM, CAPITIS INFLUXUM, SOLUS CHRISTUS EST ECCLESIAE CAPUT.**

Nam 1^o juxta Ap. (Coloss. II, 19) *caput Ecclesiae est ex quo totum corpus per nexus et conjunctiones subministratum et constructum crescit in augmentum Dei.* Atqui hic organismus vitalis a solo Christo auctore dependet. Ergo.—2^o Id clarius innotescit, si attendamus non solum Christum jure exclusivo suis Ecclesiae fundatorem et Sacramentorum institutorem, sed ad ipsum dumtaxat per humanitatem Divinitati conjunctam competere vim justificandi, merendi et satisfaciendi adæquate pro omnibus.

Conclusio 2^a.—**QUANTUM AD EXTERNAM GUBERNATIONEM, DIGNITAS CAPITALIS ALIIS PRÆTER CHRISTUM CONVENIT, CHRISTO TAMEN MULTO EXCELLENTIUS.**

1^a *Pars* liquet ex constitutione Ecclesiae in qua, sub supremo Duce, sunt qui visibiliter populi Christiani rationes moderantur; quibus congruit illud (Amos. III, 1): *Optimates capita populorum.*

2^a *Pars* ostenditur, quia regia Christi potestas præ cœteris eminent triplici præsertim dote:—1^o *universalitate.* Christus enim est caput *omnium* eorum qui ad Ecclesiam secundum *omnem* locum statumve pertinent, alii autem homines dicuntur capita secundum quædam specialia loca, ut episcopi, vel secundum speciale statum, ut abbates.—2^o *Perennitate.*

Nam "in æternum rex Christus est, itemque moderari in æternum tuerique regnum suum e cœlo non visus perseverat" (Encycl. *Satis cognitum* Leonis XIII). His autem in terris Papa, Christi vices supplens, caput quidem est totius Ecclesiæ, sed pro determinato tempore; nec pontificalia potestas ultra conditionem viæ se extendet.—^{3º} *Efficacia*. Namque Christus est caput Ecclesiæ *propria* virtute et auctoritate; cæteri vero capita dicuntur participative, in quantum Christi personam gerunt, secundum illud (2 Cor. II, 10): *Quod donavi, si quid donavi, propter vos in persona Christi*; et (*ibid.* V, 20): *Pro Christo legatione fungimur, tanquam Deo exhortante per nos*. Unde, quamvis præpositi Ecclesiæ *pastorum* voce possint appellari, solus Christus *ostium* regni coelestis verissime nominatur.

Adnotanda.—^{1º} Sieuti imperium Boni Rex Christus tenet et moderatur, ita ex opposito *Mali* imperiu*m* regit *diabolus*, cui tanquam capiti omnes mali homines, qua tales, subduntur, juxta illud (Job. XLI, 25): *Ipse est rex super universos filios superbicæ*. Etenim pertinet ad gubernatorem eos qui sibi subsunt ad suum finem adducere, eis proponendo signum suæ voluntatis veluti vexillum, ad quod secundum aliqui suggestente duce, alii vero propria sponte inducuntur. Atqui finis diaboli (scil. Luciferi cum toto exercitu diabolico) est avertire creaturam rationalem a Deo; quam aversionem sub specie libertatis appetendam exhibit secundum illud (Jer. II, 20): *A sæculo confregisti jugum meum, rupisti vincula mea, et dixisti: Non serviam*. Ergo inquantum aliqui peccando sese a Deo avertunt, sub diaboli regimine cadunt (art. 7).

^{2º} *Antichristus*, etsi futurus sit diaboli satelles, potest tamen et ipse dici omnium malorum caput: non quidem quoad *prioritatem temporis*, cum sit tantum sub extremo tempore venturus; neque quoad *influxum*, cum in peccatores ipso anteriores influere non possit; sed quoad eminentiam et veluti *plenitudinem malitiae* sibi a diabolo imprimendæ, ita ut omnes mali qui eum præcesserint rite habeantur quasi ejus imago et præfiguratio (art. 8).

QUÆSTIO TERTIA

DE SCIENTIA CHRISTI IN COMMUNI

Quem olim Deus ipse velut gentium *Doctorem* prænuntiaverat, v.g. (Is. LV, 4) *Ecce testem populis dedi eum, ducem ac præceptorem gentibus*, hunc Novi Fœderis paginæ solemnibus eloquiis proclaimant, puta (Joan. VII, 40) *Cum audissent hos sermones ejus, dicebant: Hic est vere propheta, et (Matth. XXIII, 10) Nec vocemini magistri; quia Magister vester unus est, Christus.*

Igitur tanti Doctoris scientiam ac sapientiam perscrutemur oportet; quæ quidem investigari potest vel in communi vel in specie: modo sit *communis* consideratio.—Circa quod, supposita scientia *divina* jam in Tract. de Deo explorata, inquirentur quatuor: nimurum *an* sit aliqua scientia *creata* in Christo (art. 1), et *quænam* sit, num *beata* (art. 2), num *infusa* (art. 3), num et *acquisita* (art. 4).

ARTICULUS I.

Utrum Christus habuerit aliquam scientiam præter divinam.

1º Scientia hic *large* accipitur pro qualibet cognitione intellectus humani.

2º *Errores* trifariam distingui possunt.—*a)* Negatio imprimis scientiae creatæ, a divina in Christo distinctæ, merito tribuitur *tuin Monophysitis* (Ario, Apollinari, Eutycheti) *tuin Monothelitis* qui (teste Petavio, l. VIII, c. 6, n. 4) illorum omnium virus hauserunt unamque Christi operacionem professi sunt; ad quod reducitur opinio quorundam ponentium scientiam, quam vocant *unionis*.—*b)* *Quibusdam*

catholicis (Joan. de Ripa, Hug. de S. Vict. etc.) olim visum est, animam Christi non alia usam esse intellectione quam divina sibi, in locum creatæ scientiæ, divinitus communica. —*c)* In eundem quoque reducendus est error *Ontologismi*, cognitionem nostram naturalem elevans usque ad intuitionem divini esse lucisque divinæ.

3º Duo concludemus ad doctrinam D. Thomæ in se et contra vanas hypotheses manifestandam.

Conclusio 1a. — PRÆTER SCIENTIAM DIVINAM CHRISTUS HABUIT SCIENTIAM CREATAM. — Id, juxta *Suarezium* (Disp. XXIV, Sect. 2), certum ~~est~~ est vi decreti *Agath. R. P.* a *Conc. œcum VI* (Cptano III) approbat, quo duplex operatio, divina et humana, universaliter in Christo asseritur.

Concl. ostend: — 1º *auctoritate.* Dicit Christus (Joan. VIII, 55): *Scio eum* (Patrem), *ei sermonem ejus servo.* Sicut ergo servabat mandata ut homo; ita et Dei legem servandam noverat ut homo; cf. loca biblica in hac et seq. quæstione adducenda. — Diserte ait *Joan. Damasc.* (de Fid. orth. I. III, c. 13): “Profitemur eundem (D. N. Jes. Christum) habere... sapientiam et scientiam duplificem, divinam et humanam.”

2º *Ratione* (præsupposito principio quod Filius Dei humanae naturam *integrām*, scil. corpore animaque rationali completam, assumpserit) tripliciter arguitur.

a) Primo ex animæ perfectione. — Anima enim secundum se est in potentia ad capessendam veri notionem, cum sit velut tabula scripto vacua, sed per intellectum *possibilem* idonea rerum impressioni suscipiendæ; quod autem est in potentia imperfectione privativa laborat, nisi educatur ad actum. Atqui conveniens non erat ut Filius Dei humanam naturam imperfectam assumeret, tum quia ea mediante totum humanum genus perficiendum erat, tum quia securus anima Christi imperfectior fuissest animabus aliorum hominum. Ergo.

b) Secundo ex animæ rationalis fine. — Sicuti quælibet res est propter suam operationem, ita rationalis anima proxime ordinatur ad intellectuē, ex qua humana moralisque vita efflorescit. Atqui repugnat ut anima intellectiva Christi sit a proprio fine frustrata. Ergo.

c) Tertio ex cognitionis nexu cum anima. — Est aliqua

creata cognitio quæ ad animæ humanæ naturam quodammodo pertinet, scil. habitus primorum principiorum, quorum notitia, etsi per species a phantasmatibus accepta, tam spontanea est ut a nature vi legitime repetatur. Atqui nihil naturalium Christo defuit, qui humanitatem prorsus integrum suscepit. Ergo.

Conclusio 2^a. — INTELLECTUS HUMANUS CHRISTI NON POTUIT, ETIAM DE POTENTIA ABSOLUTA, PER INCREATAM DEI SCIENTIAM INTELLIGERE — Propositio hæc, directa contra catholicos supra memoratos, pro certa habenda est.

1^o Expresse ait *S. Thomas* (resp. ad 1) : “Hic actus (intellectio Dei increata) non potuit esse animæ humanæ Christi, cum sit alterius naturæ.”

2^o Duplex ratio a *Cajetano* (in h. art.) profertur.—
a) Nam, ut ipse *Angelicus* loc. cit. insinuat, quia operatio est actus operantis in esse naturæ, impossibile est quod operatio, quæ est *substantia* unius, conveniat alteri naturæ, nisi substantia illa huic naturæ in esse naturali jungatur. Atqui divinum intelligere est ipsa Dei substantia; nequit autem substantia divina, in esse naturali, esse actus seu forma aliquujus creaturæ. Ergo.—b) Preterea, intelligere est operatio *vitalis*, subjecti intelligentis, immo summus vitæ gradus. Atqui de ratione operationis vitalis est quod ab ipso subjecto vivente procedat, sicut generatio a generante. Ergo.

Solv. obj. — OBJ. 1 (cont. 1^{am} concl.). — Ad hoc necessaria est scientia ut per eam aliqua cognoscantur. Atqui Christus per scientiam divinam cognoscebat omnia. Ergo.

RESP. C. M. — D.m : ...operatione increata, C; operatione creata et propria animæ assumptæ, N. — Neg. conseq.

Altera obj. de duobus luminibus jam superius (Disp. II, Q. III, art. 4) præoccupata est.

OBJ. 2. — Ponenda est in Christo scientia quædam unionis. Atqui talis scientia, sicut esse personale, una est. Ergo.

RESP. D. M : ...scil. scientia ex parte *unitorum* seu naturis unitis conveniens, C; ex parte *ipsius unionis* seu conjunctionis in esse personali, N. — C.d.m : i. e. una est scientia conveniens duabus naturis unitis, N; una foret, si dari posset, scientia unionis secundum se acceptæ, C. — Neg. conseq.

OBJ. 3 (cont. 2^{am} concl.). — Scientia divina se habet ad intellectum humanum, sicut personalitas Verbi ad humani-

tatem. Atqui haec Verbi personalitas potuit communicari humanitati. Ergo.

Resp. D. M : ... secundum generalem quamdam proportionem, *C*; secundum eamdem prorsus habitudinem, *N*.—*C.m.*
—*Neg. conseq.*

Proprio generalis est in eo quod scientia divina humanam eminenter precontinet, sicut personalitas Verbi subsistentiam creatam.—At essestiale existit *discrimen*, quia personalitas pro munere habet *terminare* naturam, scientia vero vel cognitio intellectum *actuare* seu informare.—Quapropter potest Verbum Dei personare humanitatem, quin fiat actus ejus, ideoque sine imperfectione; non posset tamen Dei intelligere vel scire communicari animae humanae quin eam physice actuaret: quod est impossibile et ad Pantheismum ducit¹.

ARTICULUS II.

Utrum Christus habuerit scientiam beatorum.

1º Posito quod *aliqua* scientia creata Christo tribui debeat, ulterius progrediendum est et primo respondendum dubio *an* scientia, qua *beati* Deum immediate intuentur, mentem Christi ornaverit, et *quandonam* scientia illa in eo incepit.

2º Etenim recensenda occurrit *Güntheri* positio qui, *Novatorum* errorem e cinere suscitans, adseruit Christum paulatim ad sūt conscientiam meritisque propriis ad Dei visionem sese erexit.—*Bougaud*², eadem evolutionis lege illectus, senserat et ipse Christum de ignorantia ad scientiam profecisse, nec nisi post Ascensionem plenam visionis beatificæ lucem assecutum fuisse; at in subsequenti sui operis editione hæc laudabiliter suppressit.

1—Cf. Cajet. in h. art.

2—In opere *Le Christianisme et les temps présents*, t. III (1^{re} éd.);—cf. Monsabré, Conf. 1879, *Index*. I.

Conclusio.—CHRISTUS BEATORUM SCIENTIA EXCELLENTISSIME POTITUS EST ETIAM IN TERRIS, IMO AB IPSO INCARNATIONIS EXORDIO.

1^o Pars ob unanimem theologorum consensum dici potest aut fidei proxima aut adeo certa ut doctrina contraria prorsus temeraria videatur.

1^o Inscius non sum desiderari *Scripturæ* testimonia seip-
sis et singillatim omnino cogentia; at si sacri textus una
simul sumantur et secundum quod Patrum et Doctorum
sententiis illustrantur, magna fidem faciunt (ait Suarez):
duo proferemus.—Legitur (Joan. III, 13): *Nemo ascendit in cælum, nisi qui descendit de cælo, Filius hominis qui est in cælo.* Porro hoc in textu verbum *ascendit* non immērito intelligitur de scientia beata et cœlesti qua anima Christi
in terris fruebatur: siquidem explicari nequit neque de Divinitate, quæ semper in cælo est (quin illuc ascendat), neque etiam de humanitate gloria futuroque Christi ascensu post resurrectionem, obstante tempore præterito illius vocis *ascendit*, ut constat ex græco¹. Interpretatio autem de ascensione per scientiam beatificam animæ apprime consonat descensiū e cælo, qui non potest Filio hominis convenire nisi secundum humanitatem assumptam.—Præterea scientia beatorum in plena Dei cognitione consistit; hanc autem non improbabiliter creditur Christo tribui per vocem (Joan. VIII, 55): *Scio eum,* cum scientia Dei simpliciter sit cognitio intuitiva ejus essentiæ, nec nisi de homine-Christo agatur, ut patet ex sequentibus: *et sermonem ejus servo*².

2^o Succedit rationis confirmatio.—a) Omne quod est in potentia, si reducitur ad actum, reduci oportet per aliquod ens in actu, ut patet de calido calefaciente. Atqui homo est in potentia ad scientiam beatorum seu ad immediatam Dei visionem, ad quam velut ad finem ordinatur, non quidem ex scia vi naturali, sed ex aptitudine quadam divinitus elevata. Ergo necesse est beatitudinis actum in illo præexistere, cuius influxu homo in finem prædictum contendit. Atqui ad beati-

1.—Hanc explicationem approbat *Maldonatus, Comm. in Joan.*

2.—Quoad argumenta biblica vel patristica, vid plura ap. Melch. Canum, *De loc. theol.* l. XII, c. 14;—Petav. l. XI, c. 4;—Knoll, S. I, c. IV, a. 1, etc.

tudinem homines reducuntur per hominem-Christum tum ut veritatis divinae *testem*, tum ut salutis humanæ *auctorem*, multos filios in gloriam adducentem (Heb. II, 10). Ego oportuit ut anima Christi scientiam beatificam præhaberet.—
b) Cum autem causa potior sit causato seu perfectionem effectus excellentius contineat, consequitur scientiam beatorum *excellentissime* Christo convenire, utpote universalis beatitudinis principio.

2^a Pars, de tempore quo Christus scientiam illam nactus est, eam ab ipso Incarnationis ortu repetit, rejecta progressus *Guthieriani* hypothesi: quod quidem communis sensu tanquam theologice *certum* habetur (Melch. Canus, *l. cit.*).

Sane 1^o ad hoc *D. Thomas*¹ accommodat verba psalmistæ (Ps. LXIV, 5): *Beatus quem elegisti et assumperisti*; at manifestius id evincitur ex (Joan. I, 14), ubi indicatur gloriam et plenitudinem *gratiae* et *veritatis* datam esse Christo-homini, *quia* est Unigenitus Patris, ideoque ab ipso momento quo homo fuit Deus.

2^b Ex una parte, beatitudo animæ Christi in terris, etiam ab Incarnationis exordio, *non erat incompossibilis* cum statu viæ secundum partem inferiorem.—*Ex altera parte*, maxime congruebat dignitati Christi ut ejus anima jam tunc frueretur ea perfectione cuius capax erat, et qua deficiente, *imperfecta* mansisset.

Solv. obj.—OBJ. 1.—Scientia beatorum habetur per participationem divini luminis. Atqui in Christo erat ipsum essentiale Divinitatis lumen. Ergo.

RESP. C. M.—*D.m*:... secundum divinam naturam, *C*; quin anima humana Christi indigeret per aliquod lumen participationem a Divinitate perfici, *N*.—*Neg. conseq.*

OBJ. 2.—Scientia beata eo juvat ut homines beatos efficiat. Atqui homo-Christus ex ipsa conjunctione personali cum Verbo beatus fuit. Ergo.

RESP. C. M.—*D.m*:... beatitudine increata, *C*; nec oportuit ejus humanitatem creata beatitudine honestari, *N*.—*Neg. conseq.*

OBJ. 3.—Scientia duplex homini competit, una secundum

naturam, alia supra naturam. Atqui scientia supernaturalis in Christo erat scientia divina. Ergo.

RESP. D. M :... alia supra naturam, scil. quæ oīnibus modis naturam excedit, *N*; quæ propria quidem animæ virtute comparari non potest, at radicali ejus aptitudini con-
gruit, *C*.—*C.d.m* : scientia supernaturalis omni ex parte... *C*; nec locus dabatur scientiæ *simpliciter* quidem supernaturali,
at secundum quid naturali seu respondenti secundum potentiam Dei obedientialem capacitatì animæ rationalis, qualis est scientia beatorum, *N*.—*Neg. conseq.*

ARTICULUS III.

Utrum Christus habuerit scientiam inditam vel infusam.

Scientia *indita* denominatur, ex eo quod simul cum natura datur; *infusa* vero, ex principio infundente Deo, sine quo haberri non potest (Cajet.). Utroque nomine, ad instar scientiæ angelicæ, appellatur scientia quam modo animæ Christi vindicandam suscipimus: quippe et Deus illam infudisse, et anima ut assumpta a Verbo et ab assumptionis instanti illam ex postulasse intelligitur.—Nonnulli quidem, ut *Nominales*, *Alensis*, *Durandus*, etc, infusam illam in Christo sapientiam agnoscere detrectarunt; sed *communius* post D. Thomam theologi eam admittunt.

Conclusio.—OPORTET IN CHRISTO PONERE SCIENTIAM INDITAM SEU INFUSAM.

1º Hoc innuitur (Coloss. II, 3), ubi de Christo dicitur: *In quo sunt omnes thesauri sapientiae et scientiae absconditi*; quibus verbis significari videtur nullum scientiæ genus Christo deesse.

2º Cum Angelico dupliciter argumentabimur:—*a) primo* ex *vitanda imperfectione* naturæ assumptæ. Decebat enim ut humanitas conjuncta Verbo Dei imperfecta non esset. Atqui nisi scientiæ inditæ lumen accepisset, imperfectioni subjacuisset: ergo. *Min. ostend.* Omne quod est in potentia,

sive secundum ordinem naturæ, sive secundum ordinem gratiæ, imperfectum manet, quoadusque ad suum actum non adducatur. Atqui intellectus animæ Christi duplex erat potentialitas respectu intelligibilium extra Verbum: una quidem respondens *statui viæ* et dependentiæ corporalis, ideoque implenda per species a rebus abstractas; alia respondens *statui termini* et independentiæ spiritualis in quo Christus, ut comprehensor, jam versabatur, ideoque implenda per species divinitus infusas¹. Ergo ad salvandam Christi perfectionem largienda ei est scientia ab initio indita.

b) *Secundo, a simili.* Christus, ut comprehensor et secundum quod perfecte in eo anima corpori dominabatur, æquiparari potest Angelis beatis. Atqui in Angelis (ut appareat ex Tract. de Creatione) duplex ponitur cognitio: una, quam vocant *matutinum* (clariorem), qua res contuentur in Verbo; et alia *vespertina* (veluti decoloratior), qua res attingunt in propria natura per species sibi inditas. Similiter ergo, preter scientiam divinam et increatam, congrue admittitur in Christo tum scientia beata qua cognoscit Verbum et res in Verbo, tum scientia infusa sive indita, qua perspicit res in propria natura per species intelligibles humanæ menti proportionatas.

Solv. obj.—OBJ. 1.—Omnis scientia creata ad beatam comparatur ut imperfectum ad perfectum. Atqui per cognitionem perfectam excluditur imperfecta, ut fides per visionem. Ergo.

RESP. C. M.—*D.m* ...excluditur imperfecta quæ in suâ ratione includat oppositum cognitionis perfectæ, ut fides respectu visionis, *C*; excluditur imperfecta perfectæ haud adversa, *N*.—*Neg. conseq.*

OBJ. 2.—Habita jam perfectione aliqua, non requiritur dispositio ad eam. Atqui cognitio quæcumque creata comparatur ad scientiam beatam quasi dispositio ad terminum consequendæ perfectionis. Ergo.

¹—Scribit *D. Thomas* de cognitione *animæ separatae* (I, Q. LXXXIX, a. 1 ad 3): “Anima separata non intelligit per species innatas, nec per species quas tunc abstrahit, nec solum per species conservatas... sed per species ex influentia divini lumini participatas, quarum anima fit particeps, sicut et alii susbuntiæ separatae, quamvis inferiori modo. Unde, tam cito cessante conversione ad corpus, ad superiora convertitur.”

RESP. *D. M.* ... non requiritur dispositio per modum viæ ducentis ad illam perfectionem, *C*; neque per modum effectus consequentis, *N*.—*C.d.m.*—*Neg. conseq.*

Dispositio dupliceiter se habet ad perfectionem: vel ut *via*, vel ut *effectus*. Ex. gr. per calorem disponitur materia ad formam ignis; qua adveniente, calor non cessat, sed remanet veluti effectus talis formæ. Pariter opinio via est ad scientiam; qua jam acquisita, potest ramanere cognitio parta per syllogismum dialecticum quasi consequens et lucem accipiens ex notitia demonstrativa: siquidem, ille qui cognoscit natum rei, melius etiam signa probabilia attingit. Modo non dissimili in Christo simul cum scientia beatitudinis existit scientia indita, non quasi via ad beatitudinem, sed veluti eam consequens, ei subjecta et per eam confirmata.

OBJ. 3.—Sicut materia est in potentia ad formam sensibilem, ita intellectus possibilis ad formam intelligibilem. Atqui materia non potest simul recipere duas formas sensibiles. Ergo.

RESP. *Trans. M.*—*D.m.* ... duas formas unius generis et secundum idem, *C*; duas formas diversi generis vel diversæ rationis, *N*.—*Veg. conseq.*

Certe non repugnat ut una substantia recipiat plures formas accidentales genere vel ratione propria diversas.—Ad hunc modum nihil prohibet quominus mens Christi perfecta fuerit per *speciem superecedentem*, qualis est essentia divina immediate terminans visionem beatorum, et simul acceperit species intelligibles inferioris ordinis respondentes proportioni suæ naturæ.

ARTICULUS IV.

Utrum Christus habuerit aliquam scientiam acquisitam.

Prenotanda quedam sunt.—1º a) Scientia *acquisita* talis dicitur vel ex *genere suo* et secundum quod *acquisibilis* est per species abstractas a phantasmatibus, vel etiam quoad *acquisitionis modum* per illas species: hoc postremo sensu

dividitur contra scientiam *infusam per accidens*, qualis fuit in Adam.—*b)* Differt igitur scientia acquisita a scientia infusa simpliciter seu infusa *per se* (de qua in art. præc.), tum quia hæc per solam infusionem gignitur, non altera, tum maxime quia non eadem objectiva ratione specificantur. Objectum enim scientiæ acquisitæ est quidditas rei materialis ut abstracta a singularibus et proportionata phantasmatibus in quibus relucet; unde non se extendit ad singularia ipsa, nec ad substantias angelicas nisi indirecte et ad modum rerum corporearum. Objectum vero scientiæ infusæ est quidditas nedium materialis, sed etiam immaterialis creaturæ, non ut abstracta, sed ut concreta singularibus, neque secundum proportionem phantasmatum.

2º Quoad *opiniones* in proposito referendas, vix reperire est ullum theologum, qui scientiam acquisitam in Christo fuisse *secundum se* negaverit.—At quod pertinet ad *ortum* hujus scientiæ, nonnulli fuerunt qui cum S. Bonav., Scoto, Suarez, existimarent eam fuisse infusam in Christo *per accidens* ab Incarnationis initio; plures tamen tenent Christum humano more, scil. propriis actibus, illam sibi comparsasse.—Notatu hic dignus est progressus mentis *Angelici Doctoris* qui primum quidem (3 S. D. XIV, Q. I, a. 3, sol. 5) sententiam de infusione scientiæ acquisitæ professus erat, at in *Sum. thol.* "seipso doctior" (ait *Satolli*) contrarium amplectendum declaravit¹.

Conclusio.—CHRISTUS HABUIT SCIENTIAM DE SE ACQUISIBILEM, TUM QUOD ESSENTIAM, TUM QUOD ACQUIRENDI MODUM EX PROPRIIS ACTIBUS.

1º *Pars* negari nequit sine magno errore.—Nam in Christo est humana natura cum omni proprietate et perfectione *conaturali* quæ nullum inconveniens, sive quoad statum Christi, sive quoad Redemptionis finem, involvat. Atqui scientia humana procul dubio una est ex hisce perfectionibus: ergo.

2º *Pars* aut *certa*, aut saltem *longe probabili* videtur.

1º Indicium veritatis colligitur ex verbis Ap. (Heb. V, 8): *Cum esset Filius Dei, didicit ex iis quæ passus est obedientiam*; scilicet (ut commentatur S. Thomas) quamvis Christus

1.—Magni ingenii est majorisque animi seipsum, detecto errore, corrigere.

(ut Deus) ab æterno sciret simplici notitia quid sit obedientia, tamen (ut homo) experimento didicit, difficultia quæque tolerando usque ad mortem crucis, quam grave sit obedire.

2º Duplex *ratio* ab Auctore profertur.—*a)* Sane vero, nihil eorum, quæ Deus in nostra natura plantavit, defuit humanæ naturæ assumptæ a Verbo Dei. Atqui Deus, humanitatis auctor, ei inseruit non solum intellectum possibilem, sed etiam intellectum agentem. Ergo in anima Christi cum possibilis, tum quoque *agens intellectus* ponendus est. Atqui, cum non contingat aliquid frustra a Deo naturave fieri, nullum datur activum principium expers proprieæ operationis propter quam est, et quam habere debet. Ergo in Christo admittatur oportet propria et connaturalis operatio intellectus agentis. Atqui hujus intellectus proprium et principale unus est, facere species actu intelligibiles, eas abstrahendo a conditionibus individualibus phantasmatum, ut mox in intellectu possibili receptæ hunc ad intelligendum moveant: ex quo scientia acquisita resultat. Ergo¹.

b) Præterea, quia Christus erat Deus-homo, viator simul et comprehensor, congruebat ei scientia non solum per modum comprehensorum, sed etiam per modum viatorum, more undequaque humano. Atqui sola scientia propriis actibus acquisita *totaliter humana* est, scil. non solum ex parte subjecti recipientis, verum quoque ex parte causæ agentis: scientia enim *beata*, per quam ipsa Dei essentia videtur, propria est et connaturalis soli Deo; scientia autem *infusa* attribuitur animæ secundum lumen desuper emissum et connaturale naturæ angelicæ; at scientia *acquisita* accipitur secundum lumen intellectus agentis connaturale animæ, ideoque undequaque est humana. Ergo hæc scientia homini-Christo apprime conveniebat.—*Conf. ab exemplo:* quemadmodum enim sensibilis objectorum illustratio, nec frustra, nec sine adspectus illecebra, multipliciter contingit aut arte figuratur, modo irradiante sole, modo lucente luna, nunc sub auroræ ignibus, nunc sub crepusculo; ita etiam haud inutiliter, imo nec sine maxima convenientia factum est ut omnes scientiæ creatæ, suis quæque radiis et modis, non excepta scientia acquisita, in mente Christi circa pleraque eadem objecta illustranda convergerent.

1—Circa vim hujus rationis cfr. Cajet. in h. art.

3º Ut occurramus quibusdam dubiis, duo *subjiciemus ex Cajetano* (in h. art.).—*a)* Primo *melius* est, Christum sibi humanam scientiam temporis lapsu comparasse quam initio habuisse: ex parte quidem *scientiae*, quia generatio *per se*, qualis est acquisitio pro illa scientia, præstat generationi *per accidens*; ex parte *scientias*, quia nobilior est id quod seipsum movet quam illud quod ab alio movetur; ex parte *modi sciendi*, quia sicut in Christo fuit scientia beata modo Beatorum, et scientia indita modo scientiae inditæ, ita debuit esse scientia acquisita modo scientiae acquisitæ.—*b)* Nec similis est ratio de *Adamo et homine-Christo*. Nam “Adam creatus est ut principium naturæ humanæ in naturalibus tam secundum corpus quam secundum animam; et quia perfecta sunt secundum naturæ ordinem priora imperfectis (Arist.), ideo Adam sicut secundum corpus creatus est perfectus in quantitate, ita et secundum animam creatus est perfectus in scientia. Christus autem non est productus ut principium hominum in esse naturæ, nec in naturalibus pro hoc statu, sed ut doctor mysteriorum Dei et regni cœlestis. In cuius signum productus est secundum corpus quantitatis imperfectæ; et similiter secundum animam in pura potentia quoad scientiam naturaliter acquisibilem. Et sicut crevit æstate et vere augmentum corporale habuit, ita crevit sapientia” (Cajet. *ibid.*).

Solv. obj.—OBJ. 1.—Scientia acquisita, præsertim excellenter, comparatur ex studio. Atqui Christus non instituit studio litterarum, ut constat ex (Joan. VII, 15). Ergo.

RESP. *D. M* :...aut per modum inventionis aut per modum disciplinæ, *C*; per modum disciplinæ tantum, *N*.—*C.d.m* :...nec poterat scientiam per se invenire, *N*; ita ut inventio magis quam disciplina excellentiæ Christi congrueret, *C*.—*Neg. conseq.*

1º Cum duplex sit modus acquirendi scientiam, inveniendo et addiscendo, præcipuus est modus per *inventionem*, secundarius vero per *disciplinam*, quia nobilior est instrui *per se* quam *per alium*. Unde excellentiæ Christi magis congruebat scientiam acquirere inventione quam disciplina.—Eo magis 2º quia Ipse *omnibus* a Deo dabatur in doctorem, juxta illud (Joël. II, 23): *Lætamini in Domino Deo vestro... quia dedit vobis doctorem justitiae*.—Idcirco 3º ex subli-

miori Verbi refulgentia et participatione inerat animæ Christi excellentissimus intellectus, cui corpus et sensus optime deserviebant, quique eminenter continens totam vim præclarissimorum ingeniorum poterat, singulari quodam et pene divino inventionis lumine, disciplinæ documentis supplere.

OBJ. 2.—Ei quod est plenum, non potest aliquid superaddi. Atqui potentia animæ Christi fuit impleta per species intelligibiles divinitus inditas. Ergo.

RESP. D. M: Ei quod est plenum sub omni respectu...C; sub aliquo respectu tantum...N.—C.d.m ...per respectum ad superiora, C; per respectum ad inferiora seu ad phantas mata, N.—*Neg. consec.*

Humana mens duplicem habet respectum: unum quidem ad *superiora*, qualis est in animabus separatis; et hanc perfectibilitatem in anima Christi explevit scientia indita. Alius autem respectus est ad *inferiora* sen ad phantasinata, quæ nata sunt mentem nostram vi intellectus agentis movere; et secundum hunc respectum oportuit animam Christi scientia repleri, non quin prima plenitudo in suo ordine ei sufficeret, sed ut mens ejus etiam modo connaturali perficeretur.

OBJ. 3.—In eo qui jam habet scientiam, non acquiritur novus scientiæ habitus per actus, sed primus augetur. Atqui ostensum est in Christo fuisse habitum scientiæ inditæ. Ergo.

RESP. D. M:... non acquiritur novus habitus *eiusdem rationis*, C; nec *diversæ rationis*, N.—C.d.m :...et habitus scientiæ infusæ convenit in eadem specifica ratione cum habitu scientiæ acquisitæ, N; ab eo essentialiter differt. C.—*Neg. consec.*

QUÆSTIO QUARTA

DE SCIENTIA CHRISTI IN SPECIE

Quæstio hæc, pro triplici genere scientiæ creatæ Christi Domini, in tres partes ultro dispescitur.—Missis iis quæ alio loco circa visionem beatificam generatim disputantur, primum de scientia *beata Christi* inquiremus quoad perfectionem tum intensivam (art. 1), tum extensivam (art. 2).—De scientia *infusa* quoque dicemus tum quoad objectum et actum (art. 3), tum quoad habitum (art. 4).—Denique scientiam *acquisitam* in examen vocabimus sive ex parte objecti cogniti (art. 5), sive ex parte cognoscentis (art. 6).

ARTICULUS I.

De perfectione intensiva scientiæ beatæ in Christo.

(Q. X, a. 1 et 4)

Clauduntur sub hoc articulo duo indaganda : *unum* absolute, videlicet an anima Christi divinam essentiam comprehenderit; *aliud* relative, nempe an saltem beata illa anima clarius qualibet aliâ creaturâ Supremam Veritatem contempletur.—Ad concludendum festinamus.

Conclusio 1^a.—ANIMA CHRISTI MINIME COMPREHENDIT DIVINAM ESSENTIAM.—Id fide tenendum est post *CC. Lat. IV* et *Vatic.*, ubi sanctum est universaliter Deum esse *incomprehensibilem*; cum qua definitione cohæret damnatio, a *Conc. Basilæensi* lata et a *Nicolao V* approbata, seq. propositionis *Augustini de Roma*: “Anima Christi videt Deum tam clare et intense sicut Deus videt seipsum.”

Etenim 1^o textus *Scripturæ* allati (*de Deo*, Disp. III, Q. II, a. 7), quibus Deus exhibetur *incomprehensibilis cogitatu* (*Jerem. XXXII, 18*) et *investigabilis viæ ejus* (*Rom. XI, 33*) asseruntur, etc, vim prorsus generalem præ se ferunt.—2^o Sic facta est unio naturarum in persona Christi quod utraque suam inconfusam retineret proprietatem. Atqui ratio ipsæ naturæ createæ prohibet quominus creatura aliqua essentiam divinam comprehendat: siquidem comprehendi infinitum a finito, res est omnino impossibilis. Ergo.

Conclusio 2^a.—ANIMA CHRISTI DEI VERBUM SEU ESSEN-TIAM VIDET CLARIUS QUALIBET CREATURA, ETSI VISIONE SPECIEI NON DIVERSÆ.

1^o *Pars* :—1^o eruitur ex verbis Ap: (*Eph. I, 20-21*), quo loco Christus dicitur a Deo constitutus *supra... omne nomen quod nominatur non solum in hoc sæculo, sed etiam in futuro*: quandoquidem, in illa cœlesti gloria, superioritas simpliciter mensuratur ex perfectione cognitionis Veritatis divinæ.

2^a a) Visio divinæ essentiae convenit omnibus beatis secundum participationem luminis in eos derivati a fonte Verbi Dei, juxta illud (*Eccli. I, 5*): *Fons sapientiae Verbum Dei in excelso*. Atqui anima Christi, pro sua cum Verbo unione personali, propinquius ei conjungitur quam quævis alia crea-tura. Ergo pleniori supernæ lucis copia perfunditur, ideoque cæteris creaturis clarius perfectiusque primam Veritatem contuetur.—b) Nec obstat præminentia naturæ *angelicæ* super humanam: quippe visio beatifica necessario excedit naturalem creature facultatem, subindeque ejus gradus magis attenduntur secundum ordinem gratiæ, in quo præcel-lit Christus, quam secundum ordinem naturæ.—c) Attamen, ut docet *Cajetanus* (*Comm. in art. 4 ad 3*), si contingere natu-ram angelicam a Verbo Dei assumi in unitatem personæ et ad idem gloriæ lumen quo anima Christi fruictur, altior Angelo quam homini-Christo beatitudinis gradus obveniret, non quidem ex parte ipsius luminis, sed ex parte majoris acumi-nis intellectivi quo Angeli naturaliter pollent.

2^a *Pars*, de *identitate specifica* visionis beatæ Christi cum visione aliorum beatorum, vix ulla declaratione indiget.—Hæc enim identitas liquido dignoscitur ex identitate luminis objectivi sub quo divina essentia seipsam eamdemque omni-

bus beatis revelat, absque media specie intelligibili; cui lumini objectivo specifico correspondet subjectivum gloriae lumen.

Solv. obj. (cont. 1^{am} concl.).—OBJ. 1.—Ait Isidorus (in Exodum, c. 42, n. 3): “Sola sibi integre nota est Trinitas, et humanitati susceptae, quae tertia est in Trinitate persona.” Atqui notitia sui, Trinitati propria, est notitia comprehensionis. Ergo.

RESP. D. M.:... et haec notitia attribuitur homini-Chrysto ratione divinitatis, ut probabilius appareat ex contextu, C; ei attribuitur ratione humanitatis, S.d: et tunc homo assumptus connumeratur Trinitati ob cognitionem comprehensivam, N; ob cognitionem excellentissimam praे ceteris creaturis, C.—C.m.—*Neg. consequ.*

OBJ. 2.—Majus est uniri Deo secundum esse personale quam secundum visionem. Atqui tota divinitas fuit humanæ naturæ unita in persona Verbi. Ergo multo magis etc.

RESP. C. M.—D.m: Tota divinitas, non tamen totaliter... C; quasi tota virtus divinitatis fuerit ab humanitate circumscripta, N.—*Neg. consequ.*

OBJ. 3.—Illud quod convenit Filio Dei per naturam, convenit filio hominis per gratiam. Atqui comprehendere divinam essentiam convenit Filio Dei per naturam. Ergo.

RESP. D. M.:... i. e. per *gratiam unionis* factum est ut quæ conveniunt Filio Dei secundum divinitatem etiam dicantur de filio hominis propter *identitatem suppositi*, C; ut dicantur de filio hominis secundum *humanam naturam*, N.—C.m.—*Neg. consequ.*

ARTICULUS II.

De extensione scientiae beatæ in Christo.

(Art. 2-3)

Visio beatifica non solum Deum, sed et res in Deo pro suæ perfectionis gradu attingit; ex quo orta est circa beatam Christi animam dubitandi occasio, num in Verbo *omnia cognoverit, etiam infinita.*—Ad hanc definiendam questionem prænotare oportet illud *omnia dupliciter accipi posse:*

uno modo *proprie*, quatenus distribuat pro omnibus quæ quocumque modo sunt, vel erunt, vel fuerunt sive facta, sive dicta, sive cogitata a quocumque secundum quodcumque tempus; alio modo *latius*, ita ut extendatur non solum ad omnia quæ in aliqua temporis differentia existunt vel existent, sed etiam ad omnia quæcunque sunt in potentia nunquam ad actum reducta vel reducenda.—His præfatis, doctrinam Angelici Magistri, contracta licet oratione, pandamus.

Conclusio 1^a. — ANIMA CHRISTI IN VERBO COGNOSCIT OMNIA QUÆ ALIQUANDO SUNT ACTU, OMNIA ETIAM QUÆ SUNT IN POTENTIA CREATORÆ, NON VERO OMNIA IN VIRTUTE DEI CONTENTA.

Prob. concl. per partes.

1^a *Pars* asseritur (contra paucos).—1^o Unusquisque intellectus creatus in Verbo cognoscit, non quidem omnia simpliciter, sed tanto plura quanto perfectius Verbum intuetur; nulli tamen intellectui beato deest quin in eodem Verbo attingat *omnia ad se spectantia*. Atqui ad Christum ejusque dignitatem spectant quodammodo omnia: siquidem omnia ei, ut *Regi* et Domino, subjecta sunt; omnium quoque *Judex* a Deo constitutus est, *quia Filius hominis est* (Joan. V, 27). Ergo anima Christi in Verbo cognoscit omnia existentia secundum quodcumque tempus, etiam secretiores cogitatus cordiumque motus, juxta illud (*ibid.* II, 25): *Ipse enim sciebat quid esset in homine.*

2^o Objici solent verba (Marc. XIII, 32): *De die illo vel hora nemo scit, neque Angeli in cælo, neque Filius, nisi Pater;* quorum multiplex data est expositio.—a) *Prima*, et quidem hæretica, refertur *Arianorum* ignorantiam judicij Christo tribuentium secundum divinitatem minoratam, qua eum consistere docebant: patet absurditas.—b) *Secunda*, pariter abjicienda, est *Agnoitarum* tenentium Christum, ut hominem, vere ignorasse diem judicij saltem eo tempore quo verba illa protulit: quod dignitati supremi Regis et Judicis repugnat.—c) *Tertia*, parum probabilis, habetur, quod hæc verba sint intelligenda de Christo, ut est in suo corpore mystico seu Ecclesia aut in hominibus justis seu filiis Dei adoptivis.—d) *Quarta*, certe probabilis, proposita est a S. Basilio alii-que Patribus, eo sensu quod Christus, ut homo, ignorasset judicij diem, nisi Pater illam ipsi revelasset; proinde

illud *neque Filius* intelligitur "ex conditione humanitatis."—
e) *Quinta* probabilior est quod Christus dicitur nescire diem et horam judicii, quia illud sub secreto sciebat dependenter a Deo-Patre, neque tunc expediebat aliis revelare (cf. *Suarez, Comm. in art. 2*).

2^a *Pars* concl. affirmat animam Christi in Verbo cognoscere omnia ea quae sunt *in potentia creature*.—Ratio est, quia *beata* illa et excellentissima anima comprehendit in Verbo omnis creaturæ essentiam potentiamque seu virtutem consequentem. Porro comprehendenti potentiam ac virtutem aliquam, jam eo ipso comperta sunt ea omnia quae in potentia illa præexistunt. Ergo.

3^a *Pars* negat animæ Christi patere omnia quae sunt in *sola potentia divina*.—Ratio etiam liquida est: quippe cognitio omnium eorum quae Deus facere potest nequit haberi, quin divina virtus subindeque divina essentia comprehendatur. Atqui constat ex art. præc. animam Christi non posse Deum ullo modo comprehendere. Ergo. *Maj.* innotescit ex eo quod cognoscere omnes effectus possibles per cognitionem causæ nihil aliud est quam hujus causæ vim, activitatem indolem et universalitatem penitus assequi: quod est eamdem causam adæquate cognoscere seu comprehendere¹.

Conclusio 2^a.—ANIMA CHRISTI IN VERBO NON SCIT ENTIA INFINITA ACTU SIMUL; SCIT TAMEN EA QUAE SUNT IN INFINITUM MULTIPLICANDA NECNON INFINITA IN POTENTIA.

Prænotetur cuin auctore scientiam non esse nisi entis, eo quod ens et verum convertuntur. Porro aliud est ens actu et *simpliciter*, aliud ens *in potentia* et *secundum quid*, cognoscibile in alio: idcirco primo et principaliter scientia respicit ens actu, secundario ens *in potentia*.—Præterea, ea quae sunt actu vel ut existentia *simul*, vel ut *successive* produuntia accipiuntur.

Ostend. concl. per partes.

1^a *Pars* est de entibus quae *simul actu* sunt. Nequit sane anima Christi in Verbo cognoscere illud infinitorum genus quae reapse dari non possunt. Atqui infinita *actu coexistentia* nec dantur nec dari possunt; neque enim si

1—Cf. *de Ver.*, Q. XX, a. 5.

admittatur (quod S. Thomas negat) futura in infinitum corruptio et generatio, ideo haberentur infinita actu simul. Ergo.—*Infinitum* tamen formale et perfectissimum, quod est Deus, cognoscit anima Christi (sicut et cognoscunt aliæ animæ beatæ), sed *modo finito*, minime autem comprehensivo.

2^a Pars decl.—1^o a) Cum cogitationes et affectiones sanctorum certo in æternum multiplicandæ sint, concedendum est animam Christi cognoscere saltem *accidentia infinita*, quorum infinitas, non simul, sed *successive* actu consistit.—b) Præterea, per scientiam beatam Christus novit omnia quæ sunt *in potentia creaturæ*. Atqui hæc sunt quodammodo infinita: ergo.

2^o Ut hæc melius intelligantur, sequentia adjiciemus (ex art. 3, resp. ad obj.).—a) Primum, repugnat quidem infinitum quantitative cognosci *per modum infiniti* seu accepta parte post partem, cum hac ratione sit impertransibile; at sicuti ~~im~~materialia possunt mente accipi immaterialiter et multa unite, ita et infinita *per modum finiti*, quatenus in aliquo uno, principaliter in Verbo, deprehenduntur.—b) Porro hæc *scientia*, animæ Christi competens, dici debet *simpliciter finita*. Nam scientia finita vel infinita denominatur ex indole objecti proprii; proprium autem intellectus objectum est essentia seu quidditas rei. Atqui essentia quidem divina simpliciter infinita est, quam ideo sola adæquat scientia infinita Dei; essentiae autem creatæ, utpote clausæ in genere vel in specie, simpliciter sunt finitæ, etsi possint in eis individua multiplicari indefinite. Ergo eas perfecte adæquando scientia animæ Christi simpliciter finita manet, quin tamen limitata hæc capacitas assequi prohibeat infinita successive vel potentialiter.—c) Tandem haud diffitemur notitiam hanc talē esse qua extensior, in *eodem cognitionis ordine*, dari non possit; at sicuti infinitum *simpliciter* magis est infinito *secundum quid*, ita plura sunt in potentia Dei quam in potentia creaturæ; ideoque scientia possibilium, quantacumque sit in anima Christi, nequit adæquare eamdem scientiam, qualis est in mente divina¹.

1—Vid. plura ap. Auctorem et Cajetanum;—cf. quoque *de Ver.*, Q. XX, a. 4.

Coroll.—1º Scit equidem anima beata Christi omnia quæ Deus in seipso cognoscit per *scientiam visionis*, unde scientia hæc in Christo parificatur scientiæ Dei quantum ad *numerum scibilium*, non tamen quantum ad *modum sciendi*.—2º Quod pertinet ad *scientiam simplicis intelligentiæ*, quæ est de possibilibus, sub utroque respectu scientia Dei beatam Christi scientiam excedit.

c/ ficha ARTICULUS III.

De objecto et actu scientiæ infusæ Christi.

(Q. XI, a. 1-4)

Scientiam beatam Christi excipit scientia *infusa*; de qua, jam existentiam assecuti, cætera ad naturam spectantia disserere proponimus, tum ex parte objecti et actus, tum ex parte habitus.— Sub præs. articulo *objectum* et *actus* scientiæ Christi per se infusæ in duabus conclusionibus considerationi subjiciuntur.

Conclusio 1^a.—PER SCIENTIAM INFUSAM CHRISTUS COGNOVIT OMNIA ALIA A DEO.

Id 1^a prob. generaliter.

a) Sane, non minor fuit extensio scientiæ inditæ seu infusæ in Christo quam donorum Sp. Sancti. Atqui quatuor dona intellectualia, quibus Christus repletus est, ad omnia quodammodo cognoscibilia se extendunt, scil. ad immaterialia (*intellectus*), ad divina (*sapientia*), ad inferiora scibia (*scientia*), ad agibilia (*consilium*). Ergo.

b) Enimvero conveniebat animam Christi taliter perfici ut statim, eo modo qui statui viatoris simul et comprehensoris congrueret, omnis ejus potentialitas ad actum reduceretur. Atqui in anima humana, sicut in qualibet creatura, duplex potentia passiva distinguitur: una per respectum ad agens naturale; altera per respectum ad primum agens, quæ (*Cajetanus monet*) etsi absolute sit mere obedientialis et inexplicabilis, tamen connaturalis alicui et determinata esse potest

secundum exigentiam altioris status et dignitatis. Ergo anima Christi, præ cæteris creaturis intellectualibus, utroque modo perfici debuit, ita ut per scientiæ inditæ immissas species cognosceret quæcumque vel Angelo vel homini cognoscibilia sunt, sive per rationem sive per revelationis lumen, sive secundum præsentem vitam sive secundum statum separationis a corpore.

Idem 2º *specialius* declaratur.

a) Primo, quoad *singularia*. Requirebat perfectio Christi ejusque scientiæ infuse ut res non solum in communi, at etiam in individuo cognosceret: quod optine fieri poterat per species *exemplatas a divina essentia* in qua præcontinentur et repræsentantur tum naturæ rerum tum principia singularem individuantia (cf. Cajet. in art. 1).—*b) Secundo*, nec excipienda sunt ab illa scientia *futura contingentia* et *secreta cordium* (in quo D. Thomas seipsum retractavit). Etenim hæc omnia perspecta habere pertinet ad perfectionem cognitionis *practicæ* et *prudentialis*, maxime in eo cuius providentiæ omnia subjecta sunt. Cum igitur Christus-homo, inde ab initio, totius universi monarchiam quodammodo tenuerit atque plenitudinem prudentiæ omnimodæ secundum consilii donum receperit, consequens est quod omnia singulare, præsentia, præterita et futura, scientiæ infuse illustratione noverit (art. 1, resp. ad 3).—*c) Dubitandum* non est quin etiam ejus anima, corporis obligatione in superioribus soluta, *substantias angelicas* per infusas species longe melius quam aninæ separate a corpore, licet ad modum earum, perspexerit: participabat enim de conditione Angelorum sibi tanquam Regi subjectorum (resp. ad 2).—*d) Quod spectat* ad *mysteria revelationis* et *gratiæ*, certum est ex dictis cuncta hæc plenius et abundantius animæ Christi per scientiam infusam innotuisse quam cæteris creaturis. *Disputant* tamen theologi de cognitionis gradu seu natura, quærentes num Christus per illam scientiam cognoverit entia creata supernaturalia *quidditative*, imo et *comprehensive*. Negant *Bannez*, *Alvarez* (ut Gonet refert, Disp. XVII, a. 3); alii plures, *Gonet* ipse, *Billuart*, etc., affirmant. Nobis distinguendum videtur inter *mysteria gratiae* quatenus *entia creata* et quatenus *specificata* per respectum ad ipsam divinam essentiam, cuius gratia est participatio formalis (etiam univoca

objective)¹. Sub primo respectu concedimus mysteria illa fuisse animæ Christi per species infusas quidditative et etiam comprehensive perspecta; at vero, ut posset anima Christi per inditam scientiam *speciem* propriam gratiæ, virtutum etc, penitus intueri, deberet (ni fallimur) ipsam divinam naturam, ex qua illa entia specificantur, quidditative noscere, quod merito abnuit *S. Thomas* dicens (h. art.) : “ *Ipsam Dei essentiam* per hanc scientiam non cognovit.” Ergo etc.

Conclusio 2^a. — **ANIMA CHRISTI SECUNDUM SCIENTIAM INFUSAM POTERAT INTELLIGERE ABSQUE MINISTERIO PHANTASMA-TUM, NEC SCIENTIA ILLA DISCURSIVA FUIT NISI USU LIBERO.**

1^a *Pars* tenenda est ut certa contra *Durandum*.

Et 1^o *signum* haud ambiguum veritatis est quod Christus infusa scientia cognovit entia non apta a phantasmatisbus abstrahi et per phantasmatum speciem representari, scil. substantias *angelicas*. — 2^o Christus ante passionem versabatur in conditione viatoris ex parte corporis passibilis, in statu vero comprehensoris ex parte anime intellectivæ. Atqui hæc est beatæ animæ conditio ut nullo modo corpori subdatur aut ab eo dependeat, sed *totaliter ei dominetur*, prout ostendet redundantia glorie animæ ad corpus post resurrectionem; ideo vero mens nostra indiget ad phantasmatâ converti quia vineulis corporeis quodammodo adstricta est. Ergo animæ beatæ, tum ante tum quoque post resurrectionem, intelligere possunt absque phantasmatisbus, quæ non sunt de intellectioñis essentia (a. 2 ad 1); et multo magis anima Christi. — 3^o Tamen poterat Christus per scientiam infusam se ad phantasmatâ convertere, non quidem ut species secundum illam scientiam a sensilibus abstraheret, sed ut phantasiæ imperium daret ministrandi phantasmatâ affinia speciebus jam existentibus et per respectum ad has species speculanda (*ibid.* ad 3).

2^a *Pars* ostend.—Aliqua scientia potest esse discursiva vel collativa dupliciter: uno modo quantum ad scientiae acquisitionem; alio modo, quantum ad *useum* seu scientiae exercitium. Porro a) *primo modo* scientia indita Christi non fuit discursiva, ut patet: quia per discursum illum ignota inquirimus de uno ad aliud gradientes; scientiam autem, de

¹—Cf. *Tract. nost. de Gratia*, Disp. III, Q. I, n. 3.

qua loquimur Christus infusione, non investigatione rationis accepit. b) Quoad usum vero discursus habetur, non ut de novo quis addiscat, sed quia vult in exercendo scientiae actu n^exum causae et effectus observare. Atqui Christus certissime poterat ex uno aliud concludere, sicut sibi plac^ebat. Ergo etc.—Ubi liquet *differentia* inter *Angelos* et *animas beatorum*; his quippe connaturale est uti collatione et discursu, non autem illis.

Sub fine *notabimus*: 1^o ex parte *causae influentis* et *simpliciter* scientiam inditam Christi praestitisse scientiae Angelorum tum abundanter lumine, tum cognitorum multitudine et cognitionis firmitate;—2^o tamen ex parte *subjecti recipientis* Christi scientiam fuisse inferiorum, utpote conflamat ex speciebus magis commensuratis humano intellectui ideoque magis dearticulatis.

ARTICULUS IV.

De scientia infusa Christi sub ratione habitus.

(Art. 5-6)

Natura scientiae inditae nequit completam in lucem adduci, nisi ex parte subjecti et quoad rationem ipsius *habitus* scientiae exploretur: quod præstabimus tum *in genere*, tum *in specie*.—Atque (ut scite observat Em^{us} Satolli in h. art.) per *habitum* significatur non species intelligibilis tantum, ne*o* specierum infusarum ordinata complexio, sed qualitas illa qua instructus intellectus iis, cum vellet, speciebus uteretur prompte ac faciliter.

Conclusio 1^a. — SCIENTIA INDITA ANIMÆ CHRISTI FUIT HABITUALIS, QUIN TAMEN (SALTEM PROBABILIUS) CHRISTUS AB OMNI ACTU TALIS SCIENTIE CESSAVERIT.

1^a *Pars prob.* — 1^o Modus hujus scientiae adaptabatur *subjecto* recipiente: quippe receptum est in recipiente juxta indolem ejus. Atqui connaturale est anime humanae ut quandoque intelligat actu, quandoque in potentia, dum inter

puram potentiam et actum completum mediat habitus ejusdem generis cum extremis. Ergo connaturale fuit animæ Christi ut scientiam per modum habitus adipisceretur. — 2º Ab initio duplex fuit in anima Christi cognitio: una quidem perfectissima *simpliciter*, utpote excedens omnem modum naturæ humanæ, qua videbatur Deus per essentiam; alia infusa, et *suo quoque modo* perfectissima, nempe in genere dumtaxat humanæ cognitionis. Ergo prima tantum debuit esse in actu simpliciter et absque ullo habitu quoad omnia intra suum ambitum comprehensa; nihil vero exigebat ut altera semper, respectu omnium, actu exerceretur, sed congruebat ut habitualis foret (art. 5 ad 1). — 3º *Nec frustra* ponitur ille habitus pro lubitu ad actum reducendus, etsi non ad cuncta sibi subjecta actualiter adhiberetur: in hoc enim utilitas talis habitus deprehenditur quod voluntas eo uti possit eumque ad quocumque maluerit applicare pro exigentia loci, temporis, negotiorum, finis (*ibid.* ad 2).

2º *Pars* probabilius admittenda videtur: quia ex una parte nequaquam repugnat animam Christi, utpote a corpore independentem, semper fuisse in *aliquo* actu secundo scientiæ infusa; ex altera parte, major per hoc Hominis-Christi perfectio ostenditur, in quantum expressius spiritibus angelicis assimilatur.

Conclusio 2º.—SCIENTIA INFUSA CHRISTI FUIT DISTINCTA SECUNDUM HABITUS SPECIFICE DIVERSOS.

Prob. — Habitus scientiæ diversificatur in nobis ex diversitate generis scibilium, quatenus ea tantum quæ reducuntur ad unum g  nus eodem scientifico habitu cognoscuntur. Atqui respectu scientiæ infusa Christi invenitur diversitas generis scibilium. Ergo. *Min. manif.* Prædicta Christi scientia ferebat modum connaturalem animæ humanæ. Atqui animæ nostræ connaturale est recipere species in minori universalitate quam Angli, ita ut per diversas species intelligibiles diversas naturas specificas attingat et consequenter diversa scibilem genera. Ergo.

Ad majorem argumenti *explicationem*, notabimus cum *Sylvio* (*Comm.* in art. 6) :—*a)* lumen divinitus inditum, sub quo procedit infusa Christi scientia, licet communitate quadam sit unum, in concreto tamen diversificari secundum diversos habitus scientificos quibus intellectus afficitur et habi-

litatur ad sciendum ;—*b*) idcirco eoque sub respectu scientiam illam non posse æquiparari *fidei*: fides enim fertur in omnia credibilia sub una ratione formalis adæquata, nimis sub auctoritate divina, ideoque sufficit unus fidei habitus; scientia vero Christi infusa fertur sub diversis rationibus formalibus in diversa genere scibilia, ideoque diversos habitus exposit (resp. ad 2 et 3).

ARTICULUS V.

De objecto scientiæ Christi acquisitæ.

(Q. XII, a. 1)

Superest dicendum de scientia *acquisita* Christi tum quoad *objecti extensionem*, tum quoad acquisitionis *modum*: primo de objecto.—Nominis scientiæ *acquisitæ* intelligitur humana scientia universim sumpta, tum quæ potissimum ratione pura procedit, tum quæ frequentibus experimentis nititur.

Conclusio.—PER SCIENTIAM ACQUISITAM CHRISTUS SCIVIT OMNIA EA QUÆ POSSUNT LUMINE INTELLECTUS AGENTIS COGNOSCI.—His profecto annumerari non debent neque substantiæ *separatæ*, quarum essentiæ humanum captum effungiunt, neque *singularia* saltem universaliter sumpta: quæ tamen Christus per scientiam infusam noverat (resp. ad 3).

1º *Prob. concl.*—*a*) Nihil imperfectum fuit in Christo quantum ad animam. Atqui scientia *acquisita*, per quam Christus non omnia scivisset, *imperfecta* sane fuisse, utpote additamentis obnoxia. Ergo.—*b*) Item, sicut scientia infusa Christo conceditur ob perfectionem intellectus possibilis, ita in eo scientia *acquisita* agnoscitur propter convergentiam intellectus agentis, ne scil. otiosus manueret. Atqui quemadmodum ad intellectum *possibilem* pertinet *omnia* quadammodo fieri suscipiendo omnium intelligibiles species, ita intellectui *agenti* convenit *omnia* actu intelligibilia facere abstrahendo species omnium quæ possunt sub sensuum experientiam cadere et phantasiâ repræsentari. Ergo sicut per scientiam inditum Christus omnia scivit ad quæ quocumque

modo in potentia se habet; ita per scientiam acquisitam assecutus est quæcumque lumine agentis intellectus, sensibus ministrantibus, deprehendi queunt.—c) Accedit aliud, vid. *typicæ Christi*, perfectioni apprime conveniens fuisse, ut omnes scientias, omnia studia, omnia ingenii humani molimina, *exemplo suo* co honestaret et veluti consecraret.

2º *Concl. decl.* (resp. ad 1 et 2).—a) Eo latius atque remotius humana scientia sua undique dilatat confinia, quo *rationis vis* altior aciesque excellentior fuerit; in exemplum sint *Aristoteles*, *Alb. Magnus*, *D. Thomas*, etc, qui de tam multis tanta doctrinarum laude dissertarunt. Porro Christum-hominem excellentia et acumine intellectus, præ ceteris cunctis hominibus, præstisset, partim naturaliter, partim ex lumine adjuncto scientiae beatæ et infusæ, quis legitime negaverit?—b) Neque objiciatur restricta Christi experientia. Ex iis enim quæ expertus erat “potuit in aliorum notitiam devenire secundum quascumque *leges associationis idearum* (puta circa effectus et causas, similia et contraria). Nam excellenti ingenio ex unius rei naturalis observatione potest intelligi quidquid illi conveniat et quidquid aliud reali habitudine ad illam referatur: e. g. si quis comprehendat uno experimento lucem, et altero vim electricam, poterit immediate vel mediate totam scientiam physicam adipisci quæ circa istarum virium naturam, leges, et phenomena versatur” (*Satolli* in h. art.).—c) Præterea, cum homo sit quasi minor mundus et totius universitatis rerum admirandus epilogus, numquid adæquata *humani compositi* notitia, Christo certe tribuenda, non poterat ejus mentem, non solum in ordine psychologico et metaphysico, sed et in dominio inferiorum scientiarum ad infinita pene capessenda perducere?—d) Tandem nou disiplent quæ scribit *Cajetanus* (in h. art.) de *ministerio Angelorum*: “Si (inquit), Evangelista testante, cibum corporalem Angeli Christo esurienti ministraverunt; multo magis rationabile est, ut indigenti Christo spirituali cibo scientiae acquisitæ ministraverint singularia opportuna, ex quibus ipse suo ingenio adinveniret scientiam. Hoc enim nullum inconveniens habet annexum, nec est miraculum voluntarie fictum, sed super simili et minus necessario expresso in Evangelio fundatum: propterea ut rationabile id nobis amplectendum videtur.”

ARTICULUS VI.

De modo originis scientiae acquisitae in Christo.

(Art. 2-4)

1º Duo subeunt circa originem scientiae acquisitæ discussienda: scil. agendum est tum de *progressu* illius scientiae, tum de *virtute* ejusdem acquisitiva.

2º *Premittatur* duplēcēm esse profectum scientiae: unum quidem secundum *essentialiam*, prout ipse habitus scientificus augetur; aliū secundum *effectum*, cām nempe prius minora et dehinc majora et subtiliora in medium producuntur.

3º a) *Hoc secundo modo* plane liquet Christum in scientia profecisse; quatenus progrediente ætate opera in dies majora perficiebat quæ majorem scientiam demonstrabant.—b) Quantum vero ad ipsū *scientiae habitum*, certe nec *beata*, nec *infusa* Christi scientia augmentata est: at quæstio movetur de scientia *acquisita*.—c) Qui opinantur scientiam de se acquisibilem fuisse ab initio in anima Christi infusam, proclive est ut negent esse entiale augmentum hujus scientiae, nec in ea profectum admittere possunt nisi quem vocant *experimentalē*, scil. per conversionem seu applicationem specierum intelligibilium inditarum ad phantasmatā variis subformis ocurrēntia: id tamen merito rejicitur.

Conclusio 1º.—CHRISTUS SECUNDUM SCIENTIAM ACQUISITAM ESSENTIALITER PROFECIT.

1º Sententia hæc conformior dici potest textui biblico (Luc. II, 52): *Et Jesus proficiebat sapientia et ætate etc*; ubi, Evangelista conjungente scientiam cū ætate (S. Thom. art. 2 ad 1), profectus unius assimilari videtur profectui alterius.—Hinc S. Cyrill. Alex. (Schol. de Inc. Unig. c. XIII) super illum locum ait: “ Deus Verbum humanitatem *more suo* proficere permittebat, et quasi paulatim divinitatis suæ gloriam volebat ostendere.” Cf. S. Ambr. l. de Inc. Dom. c. 7.

2º *Ratio* luculenta ad arguendum suppetit.—Ideo censimus scientiam acquisitam in Christo esse admittendam, ut intellectus agens, propria vi prædictus, non frustraretur exercitio suæ naturalis actionis quæ est specierum intelligibilium

abstractio a phantasmatibus. Atqui intellectus agens, juxta naturae humanae modum, non simul, sed successive munus suum exercet. Ergo secundum illam scientiam Christus non a principio omnia cognovit, sed gradatim processit usque ad plenam perfectae ætatis sapientiam.

Conclusio 2^a. — NEQUE AB HOMINE, NEQUE AB ANGELIS CHRISTUS, SUPREMUS DOCTOR, QUIDQUAM DIDICIT.

1^a *Pars* excludit omnem disciplinam *hominum* ore traditam.—Sane 1^o de Christo predictum est (Is: LV, 4) : *Ecce tecum populus dedi eum, ducem ac preceptorem gentibus*; a quo scil. non solum gratiam, sed et veritatis doctrinam omnes reciperent, juxta alia verba (Joan. XVIII, 37) : *In hoc natus sum et ad hoc veni in mundum, ut testimonium perhibeam veritati*. Atqui præceptoris est docere, non autem doceri; præsertim si de *Doctore supremo* agatur: nam in quolibet genere id quod est primum movens non movetur ab alio secundum illam speciem motus, secus procederetur in infinitum. Ergo.—2^o Acquisitio scientiae Christo tribuenda est ea ratione quæ magis ejus *dignitati* congruat. Atqui dignius est scientiam a Deo ipso accipere per sensibiles creaturas, quæ sunt totidem divinæ sapientiæ voces, quam per humanas litteras humanave eloquia (art. 3 ad 2). Ergo.—3^o a) Nos non latet quod legitur (Luc. II, 46), nimirum Christum juvenem in medio doctorum stetisse eosque *interrogasse*. At (monente Origene, hom. in Luc.) “interrogabat, non ut aliquid addisceret, sed ut *interrogans erudiret*;” et reapse (v. 47) *stupebant omnes qui eum audiebant super prudentia et responsis ejus*. b) Quocirca audiendis doctrinæ alienæ sermonibus non accommodabat auditum, nisi *illo tempore* quo etiam per viam experientiæ poterat parem, imo et majorem, scientiæ gradum attigisse (resp. ad 1 et 3).

2^a *Pars* removet disciplinam *angelicam* :—Et 1^o innitur in *excellentiâ* Christi quem, Angelorum Regem et Doctorem, ab Angelis erudiri nequaquam decebat.—2^o Evinci potest, quoad scientiam *acquisitam*, ex perfectione intellectus agentis quo pollens Christus valebat, absque auxilio, omnia capessere; sicut et quoad scientiam *infusam*, ex immediata conjunctione animæ Christi cum fonte celestis sapientiæ.—Quapropter 3^o *ministerium* Angelorum circa Christum, de quo (Matth. IV, 11), Angelique *confortatio* ei praestita (Luc.

XXII, 43), intelligi debent non per modum *instructionis* eujuscumque, sed per modum *famulatus* adhibiti in iis inferioribus, in quibus Rex cœlorum voluit esse passibilis et indigerus: sic Angelus eum refecit, vel corpus ejus defessum levando, vel quoque ejus tristitiam præsentia amicabili pellendo¹.

Solv. obj. (cont. 1^{am} concl.)—OBJ. 1.—Eadem fuit proportionaliter extensio scientiæ beatæ et infusæ ac scientiæ acquisitæ in Christo. Atqui secundum scientiam beatam et infusam Christus non profecit. Ergo.

RESP. D. M:...et eademi origo, N; scientia beata et infusa sunt ab infinita Dei virtute qui potest totum simul operari, scientia autem acquisita est ab intellectu qui non statim, sed successive opus suum complet, C.—C.m.—Neg. conseq.

OBJ. 2.—Proficere in scientia imperfectionem supponit. Atqui in Christo nulla scientia imperfectio. Ergo.

RESP. D. M:...imperfectionem negativam, C; privativam, S.d: proficere citra debitum...C; secundum quod tempus gradatim exigit, N.—C.d.m:...nulla fuit scientiæ imperfectio privativa, C; neque negativa, S.d: loquendo de scientia divina, C; de scientia creata, N.—Neg. conseq.

OBJ. 3.—Juxta Damasc. (de Orth. Fid. l. III, c. 22), qui Christum sapientia et gratia profecisse aiunt, tanquam horum incrementum acciperet, unionem hypostaticam offendunt. Atqui impium est illam unionem offendere. Ergo.

RESP. D. M:...et Damascenus eos ferit qui simpliciter admittunt incrementum scientiæ Christi, scil. secundum quamcumque ejus scientiam et præcipue secundum scientiam infusam ex unione ad Verbum provenientem, C; negat augmentum scientiæ naturaliter acquisitæ, N.—C.m.—Neg. conseq.²

1—Ita S. Thom. in 3 S. D. XIV, Q. I, a. 3, quæstiunc. 6 ad 2.

2—De scientia Christi legatur Monsabré, 37^e Conf., 1879.

QUÆSTIO QUINTA

DE POTENTIA ANIMÆ CHRISTI

Cum superius egerimus de perfectionibus animæ Christi tum quæ ejus essentiam (gratia) tum quæ principia operacionum immanentium in ea attinent (virtutes et scientia), dicendum superest de *potentia*, quatenus est principium operacionum ad extra.—Nec sane dubium esse potest quin humanitas Christi potentiam aliquam, quasi propriam agendi vim, habuerit; unde quæstio maxime proponitur de gradu et objecto hujus potentiae, num videlicet usque ad omnipotentiam iverit.—Omnipotentia duplex est, una *simpliciter* (art. 1), alia *secundum quid*: quæ postrema spectari potest sive respectu immutationis creaturarum absolute (art. 2), sive quoad ipsum Christi corpus mutandum ejusque voluntatem exequendam (art. 3). Trium ergo articulorum materia versanda subit.

ARTICULUS I.

Utrum anima Christi habuerit omnipotentium simpliciter.

“*Augustinus de Roma*, ut refert *Conc. Basilæense* sess. 22, docuit, quod anima Christi, quia est persona Verbi, habeat omnipotentiam simpliciter. *Lutherus* quoque ejusque gregales propugnarunt, vi unionis hypostaticæ humanitatib; Christi, sicuti omnipresentiam seu ubiquitateim, ita etiam omnipotentiam communicatam fuisse” (Knoll, P. III, S. I, c. 4, a. 3).—Veritas ex ore D. Thomæ accipiatur.

Conclusio.—IMPOSSIBILE EST QUOD ANIMA CHRISTI SIT SIMPLICITER OMNIPOTENS.—Id dici potest *fidei* proximum.

1º Enim vero quod proprium Dei est, nequit alicui creature, quantumvis perfectæ, convenire. Atqui omnipotentiam

propriam Dei esse, coniungunt Scripturæ, puta (Ex. XV, 2-3); *Iste Deus meus, et glorificabo eum...* *Omnipotens nomen Iesus;* et (Job. XXXIV, 2-13); *Omnipotens... quem constituit alium super terram? aut quem posuit super orbem quem fabricatus est?* Ergo.

2º In Incarnatione ita facta est unio in persona, ut salva maneret naturarum distinctio, utraque natura retinente quod sibi proprium est. Atqui soli naturæ divinae omnipotentia attribui potest. Ergo anima Christi, utpote pars naturæ humanæ, nequit eam sibi adseiscere. *Min. prob.* Potentia activa sequitur formam rei, quasi primum agendi principium. Forma autem illa vel est ipsa natura, ut in simplicibus, vel naturam rei constituit, ut in compositis. Ergo activa ejuslibet rei potentia naturæ ejusdem rei proportionatur. Atqui natura divina est ipsum esse subsistens et incircumscriptum, a quo participatum esse creaturarum essentialiter deficit. Ergo Deus secundum divinam naturam potentia activa potitur respectu omnium eorum quae possunt habere rationem entis; animæ autem humanæ potentia non fertur nisi ad ea quæ perfectioni humanæ nature proportionata sunt.

Solv. obj.—Obj. 1.—Potentiam, quam Iei Filius naturaliter habet, homo erat ex tempore accepturus (*Ambr. in Lue. I*), scil. per Incarnationem. Atqui Filius Dei ab aeterno fuit omnipotens. Ergo.

RESP. D. M. ...homo erat accepturus, ita ut de eo prædicaretur secundum naturam humanam, *N*; quatenus, ob unitatem suppositi humani et divini, de eo prædicaretur secundum naturam divinam, *C*.—*C.m.*—*Neg. conseq.*

Obj. 2.—Ei convenit Dei omnipotentia, cui conferri potuit scientia divina. Atqui anima Christi habet scientiam omnium quæ seit Deus. Ergo.

RESP. D. M. ...cui conferri potuit scientia divina tum visionis, tum simplicis intelligentiæ, *C*; scientia visionis tantum, *S.d.*: secundum modum quo Deo competit, *C*; secundum modum inferiorem, *N*.—*C.d.m.*—*Neg. conseq.*

1º Ut compertum est ex supra dictis, longe inferior est scientia animæ Christi scientiâ divinâ: hand minor viget distantia inter potentiam divinam et humanam in Christo.—Immo 2º potest quorundam scientia hominibus a Deo communicari (ut creationis sui ipsius et aliorum) quorum tamen

communicari effectrix potentia non potest; nam ad nullius rei cognitionem aliqualiter habendam requiritur virtus infinita, quæ tamen ad quorumdam productionem omnia necessaria est.

OBJ. 3.—Anima Christi habet omnium quæ sunt scientiam tum speculativam tum practicam. Atqui universalitas scientiæ practicæ infert omnipotentiam. Ergo.

RESP. D. M.:... quasi in anima Christi eadem sit extensio scientiæ speculativæ et practicæ, N; quatenus speculative noscit nonnulla operabilia, v.g. creationem, quorum factivam ideoque *simpliciter* practicam scientiam non habet, C.—D.m: universalitas scientiæ practicæ *simpliciter*... C; scientiæ practicæ ex objecto tantum, N.—Neg. conseq.

*Conclusiones
secundum art. 3.*

ARTICULUS II.

Utrum anima Christi habuerit omnipotentiam respectu immutationis creaturarum.

3^o Denegatâ animæ Christi omnipotentiâ *simpliciter*, discussienda occurrit omnipotentia *secundum quid*; et primum *in genere* quoad immutandas creaturas: quæ q idem altera omnipotentia rursus abnuenda videbitur, non tamen sine præviis distinctionibus et animadversionibus.

2^o Eterim a) *transmutatio* creaturarum triplex esse potest: una quidem *naturalis*, quæ fit a proprio agente secundum ordinem naturæ; alia *miraculosa*, quæ fit ab agente supernaturali ultra consuetum rerum cursum et ordinem: tertia *profundior* secundum vertibilitatem creaturarum in nihil.—b) Præterea anima Christi duplice potest considerari, vel secundum *propriam* naturam et *virtutem* sive *naturalem* sive *gratuitam*, vel prout est *instrumentum Verbi Dei* sibi personaliter uniti; quod est, secundum rationem causæ *principalis* et *instrumentalis*.

3^o Quod ad *opiniones* attinet, a) senserunt nonnulli Christum per humanitatem tanq; am per causam *principalem* efficere gratiam; “quæ sententia habet speciem pie-

tatis aliquam, veritatis autem aut probabilitatis nullam" (*Suarez*, Disp. XXXI, S. 4). — b) Cum igitur pro certo habeatur virtutem animæ Christi fuisse effectricem gratiæ et miraculorum instrumentaliter tantum, *quidam*, ut *Scotista* et *Vasquez*, id intelligent secundum solum *moralēm* influxum; *alii*, ut *Capreolus*, causalitatem *physicam* propagnant etiam pro tempore quo nondum humanitas Christi exstabat; *alii*, cum *And. Vega*, causalitatem istam restringunt ad tempus quo Christus degebatur in terris; *alii* tandem cum *Thomistis* eam extendunt ad omne tempus Incarnatione posteriorius. — c) *Suarez* (*l. cit. S. 9*) impossibile non aestimat quod vis instrumentaria *annihilandī*, sicut et creandi, humanitati Christi competit.

4º Veram *D. Thomæ* doctrinam, quoad fieri poterit, tribus in conclusionibus aperiemus.

B. Conclusio 1º. — ANIMA CHRISTI SECUNDUM VIRTUTEM PROPRIAM, SIVE NATURALEM, SIVE SUPERNATURALEM, CAUSA PRINCIPALIS EXSTITIT OMNIM EFFECTUUM ANIMÆ CONVENIENTIUM.

Hoc ab omnibus admittitur, neque fusiori declaratione eget. — Nam causa *principalis* ea est quæ *propria* virtute aut nativa aut superaddita effectum producit. Atqui inerat animæ Christi virtus propria, cum naturalis, tum gratuita, ad multiplex effectuum genus operandum, nempe ad gubernandum *corpus*, ad disponendos *humanos actus*, ad illuminandum et juvandum modo sibi convenienti omnes creaturas rationales ab ejus perfectione deficientes: quippe Christus-homo, quatenus Ecclesiæ Caput plenitudine gratiæ et scientiæ instructum, purissimumque sanctitatis exemplar, poterat et docere opere ac verbo, et orare, et mereri, et satisfacere pro humano genere. Ergo.

Conclusio 2º. — HUMANITAS CHRISTI NEQUIT ESSE SIMPLICITER CAUSA PRINCIPALIS GRATIÆ OPERUMQUE SUPERNATURALIUM // AT, AB INCARNATIONE PERACTA, HABERI DEBET TANQUAM INSTRUMENTUM PHYSICE DICTUM, SEU PHYSICE INFLUENS OMNIM EFFECTUUM AD FINEM INCARNATIONIS ORDINABILIUM, // QUATENUS EST DIVINITATIS ORGANUM CONJUNCTUM IDEOQUE EXCELLENTISSIMUM. — Quatuor partes in hac propositione, lucidioris methodi gratiæ, distingui poterunt.

1º Pars negat dignitatem causæ *principalis* gratiæ alio-

*de causalitate
principalis*

*de causalitate
instrumentali
Christi*

rumque supernaturalem *simpliciter* competere humanitati aut animae Christi. — Id 1^o constat ex iis quae alibi (*Tract. de Gratia*, D. IV, Q. I, a. 1) disputavimus circa causam gratiae, cuius supernaturalitas et altitudo transcendit omnem vim creatam, etiam donis gratuitis perfectam. — 2^o Non diffitemur potuisse Christum per sanctissimam suam humanitatem efficaciter nobis *impetrare* et mereri omnes gratias Redemptionis. At preces, merita aliqua hujusmodi non pertinent ad causam efficientem principalem nisi *reductive*, *diminutive* et *participative*¹, quatenus scil. principali agenti praebent morali modo *rationem* agendi (unde vocantur cause morales) quin ipsa sint agentia productiva effectus.

2^a Pars tribuit humanitati Christi rationem *causae instrumentalis physicae* effectuum supernaturalium, tamen cum restrictione illa: *ab Incarnatione peracta*. Siquidem id quod nondum est, nequit *efficienter* agere, quamvis *moralement* quemdam *finalemque* influxum exercere valeat. — Communiter conceditur humanitatem Christi esse instrumentum *aliquale* Divinitatis, quod universa traditio predicit; ideoque dubium proponitur de instrumento *proprie* dicto seu *physice* agente. — Qua in re expedit recolere quod instrumentum *definitur* “causa secunda quae sua virtute, mota vel applicata a principali, operatur *dispositiva* ad effectum principalis agentis;” sicut serra operatur ad scannum faciendum. Unde a) instrumentum habet unam actionem *vi sue formae*, alias vero *in quantum movetur a principali agente*; et secundum hoc ejus actio ad aliquid altius pertingit². b) Quare ad instrumentum pertinet ut *modo sibi consentaneo* actionem principalis agentis ad effectum *deferat*. c) Quod quidem intelligendum est, non tantum per modum *designationis*³ effectus producendi, sed per modum *realis executionis* ejus quod a per se agente intenditur, in quantum scil. virtus principalis agentis non attingit effectum nisi ut defluens per instrumentum et modificata per ejus actionem⁴. — Hisce praestitutis, intenta veritas prob:

¹—Cf. Cajetanus in I, Q. LXXX, a. 2; — Lorenzelli, *Phil. theor. instit.*, *Metaphys. gen.* P. I, lect. 4.

²—Cf. Qq. *Dp. de Ver.*, Q. XXVII, a. 4.

³—Ita Billot, *Comm.* in h. loc.

⁴—Cf. Cajet. in h. art; — Satolli, *Praelectiones in I-II^o*, Q. CXII, a. 1.

1^o Ex Scriptura.—a) Nam legitur (Luc. VI, 19): *Omnis turba querebat eum tangere, quia virtus de illo exibat et sanabat omnes; et (ibid., VIII, 46) cum mulier quædam ægrotans furtim Christum tetigisset confessimque sanata fuisset, ait Jesus: Tetigit me aliquis; nam ego novi virtutem de me exiisse.* Porro virtus hæc salutifera, egrediens ab humanitate Christi, proprio obvioque sensu importat causalitatem *physicam*.—b) Id ipsum persuadetur ex eo quod Christus filiam Jairi suscitavit manus ejus *tangendo*, item Lazarum voce *imperativa* evocando; quia dedit discipulis Sp. Sanctum *insufflando*, etc.

2^o Ex traditione merito referunt verba Conc. *Ephes.* (can. 11), quod “*caro Christi sit vivificatrix propter unionem ad Verbum;*” verba quoque *S. Hilarii, SS. Cyrill. Alex. et Joan. Damasc.* (Knoll, P. III, S. I, c. IV, a. 3).—Accedit auctoritas *S. Thomæ* qui pluribus in locis (III, Q. VIII, a. 1; Q. XLVIII, a. 6, etc.) docet Christum hominem duplice modo causare gratiam, per *meritum* et *efficientiam* profecto instrumentalem; eum audiamus (*dé Ver. Q. XXVII, a. 4*): “*Humana natura aliquid communicabat in operatione virtutis divinæ, sicut quod Christus tangendo leprosum mundavit; sic enim ipse tactus Christi causabat instrumentaliter salutem leprosi.* Sicut autem humana natura in Christo communicabat ad effectus divinae virtutis *instrumentaliter in corporalibus effectibus, ita in spiritualibus;* unde sanguis Christi pro nobis effusus habuit vim ablutivam peccatorum (Apoc. I, 5): *Lavit nos a peccatis nostris in sanguine suo.*”

3^o Ratione compleetur demonstratio.

a) Primo, ex dignitate Christi-capitis.—Nam nihil magis commendat dignitatem Ejus, quam quod non solum uno modo, sed *pluribus modis*, maximeque efficientiâ saltem instrumentalis, in effectus supernaturales influat.—“*Colligitur idem ex hoc, quia est Caput super omnem Ecclesiam.* Atqui non esset *secundum rem Cuput* totius Ecclesiæ, nisi secundum humanitatem haberet virtutem saltem instrumentalis producendi gratiam in aliis; secus enim mera denominatio extrinseca relinqueretur, aut sola ordinis relatio sine actu” (Satolli, *l. cit.*).

b) Secundo, ex appellatione instrumenti.—Ecclesiæ sensus, Conciliis Patribusque innixus, habet quod humanitas

Christi sit organum et instrumentum Divinitatis. Atqui instrumentum *proprie* acceptum illud est quod efficienter operatur; neque, in proposito, *large* sumi potest pre vi meritoria Christi: merens enim, qua talis et in hoc morali genere, munere fungitur causæ principalis, quod abludit a ratione instrumenti. Ergo.

3^a *Pars* est de *objecto* virtutis instrumentalis animæ Christi.—Et 1^o objectum istud recte extenditur “ad omnes immutationes miraculosas faciendas, ordinabiles ad Incarnationis finem, qui est instaurare omnia, sive quæ in celis, sive quæ in terris sunt” (*S. Thom. h. art.*); quo sub effectuum genere comprehenditur infusio gratiæ (quæ immutatio est, non creatio), remissio peccatorum, transsubstantiatio qua ex pane fit corpus Christi, illuminatio mentium, sanatio corporum, etc.—Immensam hanc Christi virtutem commendat evangelica narratio, quæ tam multa tamque mirabilia Salvatoris opera in mundo tum animato tum inanimato peracta recenset, addens (*Joan. XXI, 25*): *Sunt autem et alia multa quæ fecit Jesus, que si scribantur per singula, nec ipsum arbitror mundum capere posse eos, qui scribendi sunt, libros.*

2^o Efficientia instrumentalis Christi, quasi principium totius vitæ spiritualis nostræ, attingit opera supernaturalia omnium temporum omniumque locorum. a) “Neque enim, ait *Cajetanus* in *h. art.*, minuitur aut arctatur omnipotentia divina ad limites instrumenti quod assumit, sed instrumentum elevatur ad omnipotentiae executionem in tali miraculo, ad quod efficiendum ordinatur ab ipsa.” b) Idecirco, supplente Deo, Christi humanitas, tametsi distans ab effectibus sibi subjectis, eis tamen *virtutis contactu*¹ conjungitur, quatenus Verbum effectus illos non producit nisi dependenter ab humanitate. c) Quo in casu, humanitas Christi *dispositive* operatur ad effectum principalis agentis non tam ex parte rei, operate quam ex parte *modi operandi*, divinam actionem veluti modificans, v. g. verbo, signo, voluntatis actu, etc.

4^a *Pars* indigitat *specialem modum* quo Christi humanitas Divinitati instrumentaliter deseruit.

1^o Namque, quatenus est Divinitatis organum *conjunc-*

1—Cf. III, Q. XLVIII, a. 6 ad 2; Q. LVI, a. 1 ad 3.

tum secundum esse personale, ei competit quædam principitas causalitatis, respectu instrumentorum extrinsecorum¹, quæ nuncupatur *potestas excellentia*, præeminens *intimitatem* singulari virtutis instrumentalis, *continuitatem* actualis conjunctionis, *universalitatem* effectuum et facultate gratiam miraculorum *in alios transfundendi*, ut constat ex Matth. X, 1 (*Satolli* in h. art.).

2^o De *natura virtutis instrumentalis* in humanitate Christi, hæc tenenda videntur:—*a)* Primum, humanitas a Verbo assumpta constituta est in esse quodam habituali seu radicali instrumenti per ipsam hypostaticam Unionem, quin necesse sit confugere ad aliquem specialem habitum neque ad potentiam obedientialem *activam* quam nonnulli ponunt²: alia enim non datur potentia creaturæ ad actus supernaturales quam *obedientialis* passiva respectu Dei cui omne ens obedit in iis quæ contradictionem non involvunt, licet intra genus hujus potentiae passivæ quædam entia divinitus eleventur ad agendum, quædam vero ad recipiendum.—*b)* Vis autem instrumentaria humanitatis Christi, prout hæc munus instrumenti exercet, quid est nisi ipsa *actuosa motio* qua eadem humanitas a Deo educitur de potentia obedientiali ad actum? Hic instrumenti motus et usus se habet per modum entis incompleti et fluentis³.

Conclusio 3^a.—ANIMÆ CHRISTI DÉFUIT POTENTIA, SIVE PROPRIA, SIVE INSTRUMENTALIS, ANNIHILATIONIS CREATURUM.

Etenim immutatio creaturarum usque ad annihilationem correspondet creationi, qua producuntur ex nihilo, et conservationi vetanti ne in nihilum decendant. Atqui solius Dei est res creare et conservare; immo in creatione nec dari potest instrumenti influxus. Ergo anima Christi annihilare quidam non potest, ideoque caret omnipotentia immutativa creaturarum.

1—III. Q. LXIV, a. 3.

2—Potentiam hujusmodi asserit *Suarez*, Disp. XXXI, S. 6.

3—De hoc arguento utiliter (inter alia) consuli poterit egregium opusc. prof. Lépicier, *Del Miracolo* (1897), c. 12.—Cæterum plura de causa instrumentalis discutiemus in Tract. *de Sacramentis* in genere.

Solv. obj. (cont. 3^{am} concl.).—OBJ. 1.—Dicit Christus (Matth. XXVIII, 18): *Data est mihi omnis potestas in cœlo et in terra*. Atqui nomine cœli et terræ intelligitur omnia creatura. Ergo.

RESP. *D. M* :...et hoc intelligitur ratione *unionis hypostaticæ* per quam factum est ut homo prædicaretur omnipotens, *C*; ratione humanitatis Christi, *S.d*: quatenus hæc accipit quamdam plenitudinem *potestatis spiritualis*, *C*; quasi acceperit omnipotentiam immutativam creaturarum, *N*.—*C.m*.—*Neg. conseq.*

OBJ. 2.—Anima Christi est perfectior qualibet creatura. Atqui creatura quælibet potest ab alia moveri. Ergo.

RESP. *C. M*.—*D.m* :... aliqualiter, *C*; quocumque immutationis genere, *N*.—*Neg. conseq.*

OBJ. 3.—Anima Christi plenissime habuit gratiam miraculorum. Atqui omnis immutatio creature ad gratiam miraculorum pertinere potest. Ergo.

RESP. *D. M* :...per modum causæ *principalis*, *N*; per modum causæ *instrumentalis excellentioris*, *S.d*: et hanc gratiam habuit per respectum ad finem Incarnationis, *C*; citra talē respectum, *N*.—*C.d.m* :...ad causam principalem miraculorum, *C*; ad causam instrumentalem, *S.d*: omnis immutatio instrumenta admittens et superiori fini deserbiens...*C*; immutatio quæcumque...*N*.—*Neg. conseq.*

ARTICULUS III.

conclusiones

Utrum anima Christi habuerit omnipotentium respectu proprii corporis suæque exequendæ voluntatis.

(Q. XIII, a. 3-4)

Potentia animæ Christi, quam mox respectu creaturarum exploravimus, nunc adspicienda suscipitur *in ordine ad ipsum Christum*, sive quoad immutandum proprium *corpus*, sive quoad exequendam suam *voluntatem*.

Conclusio 1^a.—EX SE NON POTERAT ANIMA CHRISTI PROPRIUM MOVERE CORPUS A NATURALI DISPOSITIONE; ID TAMEN POTERAT UT INSTRUMENTUM VERBI; QUANQUAM FACULTAS HÆC MAGIS ATTRIBUITUR VERBO IPSI.

1^a *Pars* ostend.—Nam 1^o Christus *debuit per omnia fratribus similari* (Heb. II, 17), maxime in his quæ pertinent ad conditionem humani corporis. Atqui ad conditionem humani corporis pertinet ut ejus valetudo, nutritio, augmentum, imperio voluntatis non subdantur, sed soli naturæ Auctori. Ergo.—^{2o} Ex dictis (art. præc.) constat non potuisse animam Christi *propria virtute* dimovere exteriora corpora a cursu et ordine naturæ. Atqui secundum naturæ ordinem viget animam inter et corpus determinata proportio. Ergo.—^{3o} Nec provocetur ad perfectissimam *vim imaginativam* in Christo. Imaginationi enim, si fuerit fortis, corpus obedit quantum ad aliqua a motu locali animæque passionibus dependentia, non tamen quantum ad omnes dispositiones corporales, v. g. quoad figuram manus, pedis aliudve simile (art. 3 ad 3).

2^a *Pars* manifesta est; quippe virtuti instrumentalis animæ Christi subdebat quidquid in finem Incarnationis conferre posset: ergo et dispositio proprii corporis.—Huc spectat illud (Joan. X, 18): *Potestatem habeo ponendi eam* (animam meam) *et... iterum sumendi eam.* Scilicet “erat in potestate Christi, ut quamdiu vellet, anima ejus corpori unita remanceret, et statim cum vellet, separaretur ab ipso” (S. Thom. Opusc. II, c. 230).

3^a *Pars* liquet ex eo quod virtus effectiva actionis non proprie attribuitur instrumento, sed principali agenti.

Conclusio 2^a.—POTUIT ANIMA CHRISTI EX EQUI QUIDQUID VELLET, SIVE UT IMPLENDUM PER SE, SIVE UT IMPLENDUM INSTRUMENTALITER VIRTUTE DIVINA; TAMEN NON SEMPER IMPLETA FUIT PROPRIA IPSIUS VOLUNTAS ANTECEDENS, NEO DESIDERIUM EJUS QUOD AB ALIIS EXEQUENDUM DEPENDERET.

1^a *Pars* evincitur ex *sapientia* animæ Christi: non enim ejus scientiam prudentiamque decebat ut aliquid vellet *per se* facere quod suæ virtuti non subjaceret.—*Oravit autem* Christus etiam pro iis quæ humana voluntate erat facturus, quia (inquit Cajetanus in art. 4) “orationes cause mediæ sunt ad operanda et consequenda; sine causis autem mediis

velle effectus stulti est, sicut velle colligere frumenta sine seminatione¹."

2^a Pars comperta est ex eo quod anima Christi erat Divinitatis instrumentum, liberum quidem, at principali agenti conjunctissimum.

3^a Pars constat, quia nec voluntas Dei antecedens semper impletur.—Ad *antecedentem* animæ Christi voluntatem reducitur præceptum, effectu frustratum, quod legitur (Matth. IX, 30-31) de cœcis illuminatis, quibus dixerat Christus: *Videte ne quis sciat. Illi autem exeuntes diffamaverunt eum in tota terra illa.* Antecedenter enim ostendit Dominus se refugere humanam gloriam, sed *consequenter* voluit miraculum publicari ad majorem utilitatem (resp. ad 2).—Ad eamdem distinctionem probabilius refertur quod Christus secundum humanam voluntatem quandoque aliquid vellet et disponeret *quantum erat in se*, quod tamen *aliorum* voluntas sibi non subjecta exequi renueret²: v. g. narratur (Marc. VII, 24) quod, in finibus Tyri et Sidonis, Christus *ingressus domum neminem voluit scire, et non potuit latere*; ex quo accipitur Christum adhibuisse media naturalia tunc occurrentia ut incognitus maneret, quin tamen efficaci voluntate prohibuerit se ab aliis requiri.

1—Cf. II-II^e, Q. LXXXIII, a. 2.

2—De hac controversia minoris momenti cf. ex una parte Joan. a S. Thoma et ex altera Biliuart.

QUÆSTIO SEXTA

DE DEFECTIBUS CORPORIS A VERBO COASSUMPTIS

Defectus quos Christus in humana natura assumpsit alii sunt *corporis, animæ* vero alii.—Modo agendum est de defectibus corporis juxta sequentem quæstionis partitionem, *an* (art. 1), *qualiter* (art. 2) et *quinam* (art. 3) in Christo extiterint.

ARTICULUS I.

Utrum Filius Dei in humana natura assumere debuerit corporis defectus.

Nomine *defectum corporis* hic intelliguntur inordinationes seu labes quæ *corpus* removent a naturali sua dispositione; quod quidem fieri potest per membrorum lensionem et alterationem, aut per organorum irritationem, ut patet ex vulneribus, fame, siti, etc.—*Phantasiastæ* (quos etiam *Incorrūpticolas* vocant), duce *Juliano Halicarnassensi*, Christi corpus incorruptibile fuisse docuerunt, nec nisi specie tenus infirmitates humanas in eo admiserunt (cfr. Petavius, l. X, c. 3).

Conclusio.—CONVENIENS FUIT CORPUS A VERBO ASSUMPTUM HUMANIS DEFECTIBUS SUBJACERE.—*Factum* quidem passibilitatis corporis Christi *fide* constat ex *Conc. Ephes.* c. 12, necnon ex *Eugenii IV* verbis in *Conc. Flor.* constitutione pro unione Jacobitarum.

1º *Scripturæ* indubium est suffragium.—Nam legitur (*Is. LIII, 4-5*): *Vere languores nostros ipse tulit... Ipse vulneratus est propter iniurias nostras, attritus est propter scelera nostra.*—Prieterea, ad hoc Filius Dei venit in mundum, ut nos adjuvaret, juxta illud (*Ps. CXX, 1*): *Levavi oculos meos in montes, unde veniet auxilium mihi.* Atqui

ait Ap. (Heb. II, 18) : *In eo, in quo passus est ipse et tentatus, potens est et eis qui tentantur auxiliari.* Ergo congruebat Christi carnem esse hujusmodi ut in ea pateretur nobisque per eam auxilium ferret.

2º *Traditio* suum Scripturæ adjicit testimonium.—Audiatur S. Ignatius M. (Ep. ad Trall. n. 9) : “Obturate, inquit, aures vestras, cum vobis quispiam loquitur sine Iesu Christo, Filio Dei, qui ex genere Davidis, qui ex Maria, qui vere natus est ex Deo et Virgine...vere edit et bibit...vere crucifixus et mortuus est.” Et S. Leo M. (Ep. 28 ad Flavianum, c. 3) : “Salva proprietate utriusque naturæ et substantiæ, et in unam coeunte personam, suscepta est a majestate humilitas, a virtute infirmitas, ab æternitate mortalitas, et ad resolvendum conditionis nostræ debitum, natura inviolabilis naturæ est unita passibili.”—Probe quidem novimus citari posse quosdam Patres, ut Dyon. Alexandrinum, S. Hilarium, etc, qui oppositæ doctrinæ, apparenter saltem, faveant: de quibus haec teuco. a) *Unius alteriusve Patris dissensus traditionis argumentum non enervat.* b) Sana autem hermeneutica exigit ut loca obscuriora per *clariora explicentur*; quæ clariores sententiae apud S. Hilarium non desunt, adeo ut nonnullis visus sit se his in locis retractasse. c) Quidam ex Patribus passibilitatem Christi negantibus de eo loqui censendi sunt, quatenus est Deus. d) Tandem alii forte significare volunt *libere* Christum, non ea necessitate quæ nos obstringimur, corporeas miseras suscepisse¹.

3º Tripliciter *argumentari* fas est.

a) Ex *fine Incarnationis*.—Dei Filius eo fine carnem assumpsit ut pro peccato humani generis satisfaceret, suscipiendo in se poenam pro peccatis nostris debitam, non quamcumque (ut blasphemavit Calvinus ponens Christum etiam inferni poenas sustinuisse), sed eam quæ operi reconciliationis congrueret. Atqui defectus corporales, ut mors, famæ, sitis, etc, poenæ sunt peccati quod per Adam in mundum introductum est, quemadmodum asseritur (Rom. V, 12). Ergo.

b) Ex *manifestanda Incarnatione*.—Taliter humana natura erat a Verbo assumenda ut fides Incarnationis, humanitatis veritate in lucem emergente, adstrueretur. Atqui, cum

1—Cf. Petavius, l. X, c. 5;—Knoll, P. III, S. I, c. 1, a. 1.

ordinaria naturæ nostræ conditio sit multiplex passibilitas, nisi Filius Dei humanitatem assumpsisset defectibus obnoxiam, videretur nec fuisse verus homo, nec veram sumpsisse carnem; et contra passibilitas veritatem naturæ nostræ suadet: unde B. Thomas per aspectum vulnerum est ad fidem revocatus, ut constat ex Joan. XX. Ergo convenienter Dei Filius *semetipsum exinanivit, formam servi accipiens, in similitudinem hominum factus, et habitu inventus ut homo* (Phil. II, 7).

c) Ex virtutibus Incarnatione fovendis.—Christus enim, passiones et defectus humanos assumendo fortiterque tolerando, compassione sua nostrum in se *caritatis* amorem excitavit, atque *patientiae* exemplum exhibuit, juxta illud (Heb. XII, 3): *Sustinuit a peccatoribus adversum semetipsum contradictionem, ut ne fatigemini, animis vestris deficientes.*

Solv. obj.—OBJ. 1.—Sicut anima unita est personaliter Verbo Dei, ita et corpus. Atqui anima Christi omnimoda perfectione gratiæ scientiæque claruit. Ergo.

RESP. D. M.:... eademque est utriusque habitudo ad Incarnationis finem, N; anima *principium* est meriti et satisfactionis condignæ pro humano genere ex plenitudine gratiæ, corpus vero poenas, quasi satisfactionis *materiam*, pro peccato sustinendas ministrat, C.—C.m.—*Neg. conseq.*

OBJ. 2.—Anima Christi beata erat. Atqui ex beatitudine animæ redundant in corpus incorruptionis vigor. Ergo.

RESP. C. M.—D.m:... secundum *naturalem* habitudinem quæ est inter animam et corpus, C; nec potuit ex divina Christi voluntate redundantia illa suspendi, ut corpus pati permetteretur, N.—*Neg. conseq.*

OBJ. 3.—Poena consequitur culpam. Atqui in Christo nulla culpa fuit. Ergo.

RESP. D. M:... sive ejus qui punitur, sive alterius pro quo ille qui poenas sustinet satisfacit, C; ejus qui punitur tantum, N.—C.m.—*Neg. conseq.*

OBJ. 4.—Sapiens non assumit id per quod ab assequendo fine impeditur. Atqui infirmitas nequit ad finem humanæ restaurationis, devicto diabolo, conducere. Ergo.

RESP. C. M.—D.m: infirmitas *spiritualis...* C; *corporalis*, N.—*Neg. conseq.*

ARTICULUS II.

Quomodo Christus defectibus corporalibus subjacuit.

(Q. XIV, 2-3)

Sub hoc articulo indagandum succedit *qualiter* defectus corporales in Christo fuerint; quod ex duis resolvitur: scilicet an *necessitas* talium defectuum Christi corpus strinxerit; et an Christus dici possit defectus illos *contraxisse*.

Esto ergo:

Conclusio 1^a.—DEFECTUS CORPORALES IN CHRISTO NECESSARIIS FUERUNT RESPECTU CORPORIS ET ANIMÆ SECUNDUM PROPRIAM VIRTUTEM SPECTATAE, NON TAMEN RESPECTU DIVINÆ HUMANÆQUE VOLUNTATIS DELIBERATAE.

1^a Pars prob.—1^o Juxta Ap. (Rom. VIII, 3) Deus Filium suum misit *in similitudinem carnis peccati*. Atqui conditio carnis peccati est quod *necessitat moriendi* aliasque passiones sustinendi subjaceat. Ergo.—2^o *Duplex est necessitas*: una quidem *naturalis*, quæ intrinseca rei principia consequitur; alia *coactiva*, quæ fit ab agente extrinseco, et naturæ ac voluntati contrariatur. Atqui necessitas defectuum corporalium in Christo utroque modo agnoscitur: a) nam corpori contrariis ex elementis composito naturaliter inest corruptibilitas; b) iterum corpus Christi secundum suam conditionem necessitati suberat clavi perforantis et flagelli percutientis, quin anima propria virtute posset effectum hunc impedire. Ergo.

*per naturam
ex aere
per naturam aere
et voluntate et
natura humanae
deliberatae*

2^a Pars constat; quia, licet naturali quodam voluntatis *instinctu* Christi humanitas mortem aliaque corporalia nocuimenta refugeret, tamen voluntas *divina* hunc Redemptionis modum libere elegerat, et necessitatem patiendi sic voluntarie assumptam humana Christi *deliberata* voluntas a primo conceptionis instanti ultro acceptavit, juxta illud (Ps. XXXIX, 7-8): *Sacrificium et oblationem noluisti; aures autem perfecisti mihi... tunc dixi: Ecce venio.*—Huc etiam referuntur vaticinium Isaiae (LIII, 7): *Oblatus est, quia ipse voluit.*

Conclusio 2^a.—CHRISTUS NEQUAM CONTRAXIT DEFECTUS CORPOREOS QUOS HABUIT.

Prob. — Illud dicitur contrahi quod simul cum sua causa ex necessitate trahitur. Atqui causa mortis et corporalium defectuum hominis est duplex: *una* quidem *remota*, quæ accipitur ex parte principiorum materialium humani corporis, quæque per originalem justitiam impediens batur; *altera proxima*, scil. peccatum originale, quo primordialis illa justitia subtracta est; quæ quidem causa, theologicæ loquendo, propria et *simpliciter* dici debet. Ergo illi proprie censemur defectus corporales *contrahere* qui aut ex transmisso peccato aut ex debito peccati per carnalem generationem eosdem defectus incurunt. Atqui Filius Dei accepit naturam humanae virtute Sp. Sancti conceptam et immunem a peccato omniæ peccati debito. Ergo defectus corporales non contraxit, sed voluntarie assumpsit.

Solv. obj. (cont. 2^{ma} concl.). — **OBJ. 1.** — Illud contrahere dicimur quod simul cum natura origine trahitur. Atqui Christus simul cum natura humana corporeos defectus origine traxit a matre. Ergo.

RESP. D. M: ...quod trahitur vi ipsius originis, *C*; cum origine quidem, at libera voluntate, *N*. — *C.d.m* : ...vi suæ originis cuius activum principium fuit Sp. Sanctus, *N*; cum origine, sed voluntaria susceptione, *C*. — *Neg. consequ.*

OBJ. 2. — Id quod ex principiis naturæ causatur, contrahitur. Atqui penalitates, quibus Christus subjectus fuit, ex principiis humanae naturæ prodibant. Ergo.

RESP. D. M: Quod ex principiis naturæ, tanquam ex causa *proxima* et propria, causatur... *C*; tanquam ex causa *remota* tantum... *N*. — *C.d.m* : ...remote, *C*; proxime et proprie, *S.d* : sub respectu *physico*, *C*; sub respectu *theologico*, *N*. — *Neg. consequ.*

OBJ. 3. — Secundum defectus corporales Christus aliis hominibus assimilatus est (Heb. II, 17). Atqui cæteri homines defectus illos contrahunt. Ergo.

RESP. D. M: ... quantum ad *qualitatem defectuum*, *C*; quantum ad *causam*, *N*. — *C.m.* — *Neg. consequ.*

ARTICULUS III.

Utrum Christus omnes defectus corporales hominum assumere debuerit;—de pulchritudine Christi.

Agitur de *extensione* defectuum quos Christus in corpore assumpsit; qua capta occasione, legitimæ curiositati indulgebimus inquirendo de *specie* corporis Christi, num scil. deformitatem admiserit quæ sibi pulchritudinis laudem præripe-ret:—hinc duo concludenda.

Conclusio 1^a.—NON OMNES CHRISTUS HUMANI CORPORIS DEFECTUS INFIRMITATESQUE ASSUMPSIT.

Sane 1^o contraria non possunt simul in eodem reperiri. Atqui quedam infirmitates sibi invicem contrariantur, utpote ex contrariis principiis causatae. Ergo.

2^o Christus humanos defectus assumpsit, ut pro peccato totius humanæ naturæ satisfaceret; ad quod salutiferum opus requirebatur in Salvatoris anima plenitudo scientiæ et gratiæ. Ergo illos defectus Christus suscipere debuit qui ex una parte commune totius nature peccatum consequuntur, ex altera vero nec scientiæ nec gratiæ perfectioni repugnant. Atqui ex defectibus humanis alii contrariantur scientiæ et sanctitatib; alii ex causis particularibus procedunt, quæ Christo non convenient. Ergo. *Min. decl.*—*a)* *Primo*, experientiâ constat quosdam esse defectus corporis humanæque complexionis qui vel scientiæ acquisitioni vel virtutis exercitio nocent et obsistunt; eujsmodi sunt cæcitas, pronitas organica ad malum, etc.—*b)* *Secundo*, alii defectus in aliquibus hominibus oriuntur ex causis particularibus, v.g. lepra, caducus morbus, etc.; qui quidem defectus quandoque generantur ex culpa hominis, puta ex inordinato victu, quandoque ex defectu virtutis formativæ. Horum autem neutrum Christo attribui potest: siquidem caro ejus de Sp. Sancto est, qui sapientia virtuteque pollet infinita; ipse vero nihil inordinatum in regimine sua vitæ admisit.—*c)* *Tertio* demum sunt defectus ex primi peccati fonte communiter in omnibus manantes, ut mors, famæ, sitis, lacrymæ, aliaque hujusmodi: quas omnes infirmitates Christus suscepit. “Naturales, inquit *Damascenus* (l. III Orth. Fid. c. 20), et inculpatæ passiones

hæ sunt quæ in arbitrio nostro sitæ non sunt; quæ nimirum in violati præcepti pœnam humanæ vitæ irrepserunt... Omnia assumpsit (Christus), ut omnibus sanctitatem conciliaret."

Conclusio 2^a.—MAXIMA FUIT CORPORIS CHRISTI PULCHRITUDO, SECUNDUM QUOD SINGULARI EJUS CONDITIONI COMPETEBAT.

1^o Non defuere olim (refert *Petavius*, l. X, c. 5) qui carni Christi formositatem detraherent; — immerito tamen, ut opinamur. Præferenda est opposita sententia, quam sic tradit *S. J. Chrysostomus* (Hom. 27 in Matth.): "Non enim miracula duntaxat faciens, admirabilis erat; sed etiam cum simpliciter aspiceretur, ingenti abundabat gratia. Atque hoc Propheta significans canebat¹: *Speciosus forma præ filiis hominum*. Quod autem Isaïas dicit: *Non habebat speciem neque decorum*², vel ad divinitatis gloriam arcauam illam et inexplicabilem respiciens ita loquitur; vel ea, narrans quæ passionis tempore contigerunt, nempe de honestationem illam quam in cruce pendens sustinuit et abjectionem quam per omnia toto vitæ suæ tempore præ se tulit." His consentit *S. Hieronymus* (Comm. in Matth. IX, 9): "Certe, inquit, fulgor ipse et majestas divinitatis occultæ quæ etiam in humana facie reucebat, ex primo ad se videntes trahere poterat aspectu." Addamus *S. Augustinum*, *S. Bernardum*, etc³.

2^o Juxta principia *D. Thomæ* (I, Q. XXXIX, a. 8), tria ad pulchritudinem corporis requiruntur: membrorum integritas, debita proportio, et claritas seu color conveniens. Atqui corpus Christi, utpote virtute Sp. Sancti formatum, integrum erat, optime proportionatum et lumine tum sensibili tum spirituali divinitus illustratum. Ergo.—Præclara sunt quæ scribit idem *Angelicus* (in Ps. XLIV)⁴: "Hanc

1—Ps. XLIV, 3.

2—Is. LIII, 2.

3—Scribit *J. Damascenus* (De Orth. fid. l. IV, c. 16): "Fertur autem etiam ejusmodi historia quædam: puta cum Abgarus Edes-senorum rex pictorem misisset, qui Domini exprimeret effigiem, neque id pictor ob splendorem ex ejus vultu emicantem assequi posset, Dominum ipsum, admoto divinæ vivificæque faciei sua pallio, imaginem suam in eo depinxisse, quam ad Abgarum misit, ut hoc pacto desiderio ejus faceret satis."

4—Vers 3: *Speciosus forma* etc.

pulchritudinem Christus, secundum quod competit ad statum et reverentiam suæ conditionis, habuit. Non est ergo intelligendum quod Christus haberit capillos flavos vel fuerit rubeus, quia hoc non decuisset eum; sed illam pulchritudinem corporalem habuit *summe*, quæ pertinebat ad statum, et reverentiam, et gratiositatem in aspectu; ita *quod-dam divinum radiabat in vultu ejus*, quod omnes eum reverebantur, ut Augustinus dicit."

Solv. obj. (cont. 1^{am} concl.).—OBJ. 1.—Ait *Damasc.* (Orth. Fid. l. III, c. 6): "Non potuit sanari quod assumptum non fuit." Atqui Christus venit omnes defectus nostros sanare. Ergo.

RESP. *D. M* :...quod nullo modo assumptum fuit, *Trans*; quod non assumptum fuit *formaliter*, sed *virtualiter* in corpore passibili, *N.*—*D.m* :...sanando *radicem ipsam* horum defectuum, scil. passibilitatem et corruptibilitatem corporis, *C*; quasi non potuerint consequentes defectus sic radicaliter extingui, *N.*—*Neg. conseq.*

OBJ. 2.—Christus ad satisfaciendum pro nobis simul assumpsit perfectiones animæ et corporis infirmitates. Atqui omnes perfectiones in animam Christi confluxerunt. Ergo.

RESP. *D. M* :... et perfectiones animæ non debebantur Christo ex ipsa unione hypostatica, *N*; ei competit *secundum se*, defectus vero corporis *dispensative* tantum, *C*.—*C.m.*—*Neg. conseq.*

OBJ. 3.—Qui majores defectus assumpsit, et minores suscepisse censendus est. Atqui Christus assumpsit præcipuum inter defectus corporales, scil. morteni. Ergo multo magis etc.

RESP. *D. M* :...cæteris paribus, *C*; supposita assumptibilitate graviorum defectuum quæ minoribus desit, *N*.—*C.d.m* :... et mors provenit ex peccato naturæ, *C*; etiam omnes alii defectus, morte minores, ex illo fonte similiter profluunt, *N*.—*Neg. conseq.*

QUÆSTIO SEPTIMA

DE DEFECTIBUS ANIMÆ A CHRISTO COASSUMPTIS

Defectus *animæ* considerari possunt vel in superiori vel in inferiori parte.—In parte *superiori*, dubitatio oritur aut circa malum *morale* quod est peccatum (art. 1) et peccati fomes (art. 2), aut circa malum *intellectuale* seu ignorantiam (art. 3). — In parte *inferiori* discutienda subit passibilitas *animæ* in genere (art. 4) et in specie (art. 5).

ARTICULUS I.

Utrum in Christo fuerit peccatum.

Extiterunt (teste *Suarezio*, D. XXXIII, S. 1) *hæretici* qui Christo Domino maculam aut peccatum imponere auderent, puta inordinatam orationem in horto (*Calvinus*) vel desperationem quamdam in cruce.—A sermone isto penitus abhorret fidei puritas et religionis pietas.

Conclusio.—CHRISTUS NULLO MODO ASSUMPSIT DEFECTUM PECCATI NEQUE ORIGINALIS NEQUE ACTUALIS;—quod definit *Conc. Ephes.* (can. 10): “Non eguit oblatione, qui peccatum omnino nescivit.”

Revera 1º ipse Christus, *Judeos* increpans, de se dixit (*Joan. VIII, 46*): *Quis ex vobis arguet me de peccato?* Unde legitur (*1 Pet. II, 22*): *Qui peccatum non fecit, nec inventus est dolus in ore ejus.* Et (*Heb. VII, 26*): *Talis decebat ut nobis esset pontifex sanctus, innocens, impollutus, segregatus a peccatoribus.*—Per hoc excluditur cum actuale, tum *originale* peccatum: quandoquidem Christus dicitur universaliter *impollutus*, nec *præexistit* in Adam

Concl.

secundum activam et seminalem rationem qua peccatum naturæ propagatur (resp. ad 2).

2º Ut constat ex præc. quæst., Christus defectus nostros suscepit ut pro nobis satisfaceret, veritatem humanæ naturæ comprobaret, et nobis fieret virtutis exemplum. Atqui tria hæc, nedum faveant, omnino planeque repugnant assumptioni cuiuscumque peccati in humanitate Christi. Ergo. *Min. decl.—a)* Nam *primo* peccatum nihil operatur ad satisfactionem; quiu imo, caritatem tollendo, satisfaciendi virtutem permit vel infirmat, juxta illud (*Ecli. XXXIV, 23*): *Dona iniquorum non probat Altissimus*; præterquam quod, admissâ culpâ in Christo, poena quam sustinuit ei fuisset proprio peccato debita.—*b)* *Secundo* ex peccato non demonstratur veritas humanæ naturæ: quippe peccatum minime pertinet ad naturæ nostræ integritatem divina opera perfectam, sed magis ad ejus defectionem fraude diabolica induc tam.—*c)* *Tertio* quisque videt non potuisse Christum pec cando exemplum virtutis præbere, propterea quod peccatum virtuti e diametro adversatur. Ergo.

Solv. obj.—OBJ. 1.—Querebatur Christus gemens in cruce (*Ps. XXI, 1*): *Deus, Deus meus, respice in me: quare me dereliquisti? Longe a salute mea verba delictorum meorum.* Ergo.

RESP. *D. antec*:...et ibi *delicta* intelligi debent de Christi persona *naturali*, *N*; de ejus persona *morali* seu de persona membrorum suorum, prout scil. delicta nostra a Christo suscepta (secundum pœnam) ejus mortem adduxerunt, *C*.—*Neg. conseq.*¹

OBJ. 2.—Juxta Ap. (*Heb. II, 18*) potens est Christus nobis auxiliari per ea quæ in se passus est. Atqui maxime indigemus auxilio Christi contra peccatum. Ergo.

RESP. *D. M*:...per ea quæ in se passus est, quæque naturâ suâ vim satisfaciendi et merendi præ se ferunt, *C*; quæ satisfactioni et merito contrariantur, *N*.—*C.d.m*:...et peccatum satisfactorium est *in se*, *N*; *in pœnis* sibi debitâ ac toleratis ab eo qui purus est a peccato, *C*.—*Neg. conseq.*

OBJ. 3.—Legitur (*2 Cor. V, 21*): *Eum, qui non noverat peccatum, pro nobis peccatum fecit.* Ergo.

1—Cf. *Expl. Bellarmini* (in h. loc.).

RESP. D. antec:... i. e. Deus fecit Christum hostiam pro peccato, vel eum vestivit carne simili quodammodo carni peccati, *C*; Christus vere peccator fuit, *N*.—*Neg. conseq.*

1^o *a*) Non inusitata in Scripturis est loquendi ratio, quod vox *peccatum* usurpetur ad significandum *hostiam* pro peccato, sicut (Ps. IV, 8) dicitur de sacerdotibus comedentibus hostias pro peccato populi oblatas: *Peccata populi mei comedent.* *b*) Quam ob rem habetur (Is. LIII, 6) quod *posuit Dominus in eo iniquitatem omnium nostrum*, scil. tradidit Christum ut esset victima pro peccatis omnium hominum.—2^o Eadem sententia explicari potest, quatenus Deus fecit Christum habentem *similitudinem carnis peccati* (Rom. VIII, 3) propter corpus passibile et mortale quod assumpsit.

OBJ. 4.—Christus se nobis in exemplum vitæ præbuit. Atqui maxime indigemus exemplo penitentiae de peccatis. Ergo.

RESP. C. M.—*D.m*:... exemplo ejus qui vel pro proprio vel pro alieno peccato poenam sustinet, *C*; pro proprio tantum, *N*.—*Neg. conseq.*

ARTICULUS II.

Utrum in Christo fuerit formes peccati peccandiique possibilitas.

Duo, ut patet, sub præs. articulo consideranda proponuntur: de quibus pauca preloquar.

1^o *Fomes peccati* (qui communius *concupiscentia* vocatur) spectari potest in actu primo et in actu secundo: in *actu primo* fomes est appetitus sensitivus secundum pronitatem ad ea que rationis ordini contrariantur; in *actu secundo* autem dicit ipsum motum sensualem in objectum rationi contrarium.

2^o Ad *peccabilitatem* quod attinet, *simpliciter* loquendo, aliquis peccabilis denominatur non solum ex *remota* potentia qua peccatur, qualis est per se omnis creata voluntas, sed ex

potentia proxima et expedita seu moraliter sumpta; quam si removerimus, impeccantia habebitur.—Hæc autem impeccantia repeti potest vel ab *extrinseca* Dei providentia vel ab exigentia aliqua *intrinseca*, et hoc aut secundum legem ordinariam aut secundum potentiam *absolutam*: ista mox patet.

Conclusio 1^a.—NON FUIT IN CHRISTO FOMES PECCATI,
NEQUE IN ACTU SECUNDO, NEQUE IN ACTU PRIMO.

Id certissimum est ex *Conc. eccl. V* (can. 12), in quo damnatus est Theod. Mopsuestenus, quod dixerit “alium esse Deum Verbum et alium Christum passionibus animæ et concupiscentiis carnis molestatum.”

Ratio triplex ex triplici causa, efficiente, formali et finali, duci potest.—*a)* *Primo enim quod in ea natum est, de Sp. Sancto est* (Matth. I, 20). Atqui Sp. Sanctus excludit peccatum omnemque peccati inclinationem tum actualem tum habitualem. Ergo.—*b)* *Secundo, quia virtus moralis, quæ subjectatur in appetitu sensitivo, pro munere habet inclinations sensuales subjicere rationi, quanto virtus in aliquo fortior fuerit, tanto magis in eo vis fomitis infirmatur.* Atqui gratia virtutesque omnes in Christo florebant secundum gradum perfectissimum. Ergo in eo fomes peccati non solum ligatus, sed penitus *extinctus* est.—*c)* *Tertio, accedit quod iste defectus, quomodocumque sumptus, nendum potuerit ad finem Incarnationis seu ad satisfactionem ordinari, magis ad contrarium, scil. ad peccatum, inclinasset: ergo nullo modo erat assumptibilis.*

Conclusio 2^a.—CHRISTUS DICENDUS EST INTRINSECE ABSOLUTEQUE IMPÉCCABILIS.—*a)* Agitur de Christo secundum naturam *humanam*.—*b)* Ei autem vindicatur *intrinseca* impeccantia, scil. non solum ea quam abundantia gratiae conjuncta cum speciali Providentiae cura infallibiliter adducit (prout in B. V. Maria factum est), verum etiam illa quæ a proprio internoque principio exigente dependet.—*c)* Hæc impeccantia appellatur etiam *absoluta* (*contra Durandum et Scotistas*), quatenus nec de absoluta Dei potentia humanitas Verbo hypostatice unita peccare potuerit.—*d)* Hanc conclusionem adeo veram existimat *Suarez* (D. XXXIII, S. 2), ut contraria neque sine *temeritate*, neque sine quadam *impietatis* specie defendi posse videatur.

1^o Ex *Patribus* (quos *Petavius*, l. XI, c. 10, copiose recitat) pauca afferemus.—*S. Augustinus* ait (l. de Corr. et Gr. c. 11): “Neque metuendum erat ne isto ineffabili modo in unitatem personæ a Verbo Dei natura humana suscepta per liberum voluntatis peccaret arbitrium, cum ista susceptio talis esset ut natura hominis a Deo ita suscepta nullum in se motum malæ voluntatis admitteret.” Ubi liquet impeccabilitatem Unioni hypostaticæ adscribi.—Itidem sentit *S. Fulgentius* (l. III ad Trasim. c. 38): “Propterea Christi humana res sine peccato permansit, quia eam in unitate personæ Divinitas accepit, quæ naturaliter peccare non potuit.”—Eadem veritas ab *aliis Patribus* illustratur variis similitudinibus, puta *lucis* tam alienæ a tenebris ut, dum subsistit, nulla obscuritate fuscari possit, aut *vasis* quod suave continens unguentum nihil foetidum redolere potest.

2^o Ratione cum *D. Thoma* (3 S. D. XII, Q. II, a. 1) tricliciter arguimur, prout Christus spectetur ut viator, comprehensor et homo-Deus.

a) Ut *viator* quidem Christus dux erat, nos per viam rectam secum trahens et dirigens. Atqui in quolibet genere oportet primum regulans firma rectitudine consistere, ne fiat deviationis principium. Ergo Christus tantam gratiarum auxiliorumque plenitudinem habuit, ut etiam in quantum viator peccare non posset.—Hujus generis fuit, a Christo tamen dependens, *impeccantia Marie*, ad quam Apostolorum aliorumque sanctorum perfectio diversis gradibus accessit.

b) Secundum vero quod fuit *comprehensor* per visionem beatificam, Christi mens inde a conceptionis initio ita fuit supremo fini conjuncta ut agere non posset nisi secundum ordinem ad finem. Atqui actus ad finem seu Deum ordinabiles nequaquam peccati labore infecti sunt. Ergo.—Hæc altera impeccantia ratio convenit *beatis animabus* et *Angelis*, minus perfecte tamen quam Christo.

c) Verum impeccabilitas Christi altius et *præcipue* repetenda est ex *Unione hypostatica*, adeo ut in natura a Verbo assumpta peccatum quocumque prorsus repugnet.—Sane primo, cum Christus ex unitate suppositi sit principium quod operationum divinae et humanae nature, “quidquid fecit ille homo, potest dici Deus fecisse. Si ergo ille homo peccasset, sequeretur quod Deus peccasset: quod est impossibile.

Ergo et primum" (S. Thom. *l. cit.*).—*Secundo*, humanitas in Christo erat quasi organum Divinitatis, Verbo dirigenti specialiter subjectum, eo ferme modo quo appetitus inferior rationi subditur. Atqui nihil peccati contingere potest in iis quæ Verbum *specialiter* dirigit; imo si quis moralis defectus accideret, in Verbum ipsum refunderetur. Ergo¹.

Solv. obj. (cont. 1^{am} concl.).—OBJ. 1.—Ab eodem principio derivatur fomes peccati et passibilitas corporis, scil. ex subtractione justitiae originalis. Atqui in Christo fuit corporis passibilitas. Ergo.

RESP. *D. M*:... in nobis, *C*; absolute, *S.d*: quin unum gratiæ prohiberi possit sine altero, *N*; ita ut perfectio virtutis et gratiæ se extendat quidem ad vires sensitivas rationi subjiciendas, non tamen secundum se ad vires corporales, *C*.—*C.m.*—*Neg. consequ.*

OBJ. 2.—Beneplacito divinæ voluntatis permittatur carni Christi pati et operari quæ propria sunt. Atqui proprium est carni ut delectabilia concupiscat. Ergo.

RESP. *C. M*.—*D.m*:...secundum modum et ordinem rationis, *C*; praeter rationis prescripta, *N*.—*Neg. consequ.*

OBJ. 3.—Tanto fortior digniorque coronæ spiritus hominis ostenditur, quanto magis concupiscentiam carnis superat. Atqui Christus habuit fortissimum spiritum, maximè coronæ dignum, iuxta illud (Apoc. VI, 2): *Data est ei corona, et exivit vincens ut vinceret*. Ergo.

RESP. *D. M*:...solum resistendo fomiti contrarianti, *N*; præsertim comprimendo totaliter carnem ne contra mentem concupiscere valeat, *C*.—*C.d.m.*—*Neg. consequ.*

I'lus est hostem debellare destruendo quam repellendo. Unde Christo, cuius spiritus summum fortitudinis gradum attigerat, maxime competebat de omni carnis rebellione *radicitus evulsa* triumphare.—Licet autem interior ei impugnatio ex parte fomitis defueit, *exteriorem* tamen sustinuit ex parte mundi et diaboli, quos superando victorie coronam proineruit.

1—Vid. plura ap. *Jean. & S. Thoma, Billuart*, etc; a quibus plerique adversariorum objectiones diluuntur.

ARTICULUS III.

Utrum in Christo fuerit ignorantia et admiratio.

(Q. XV, a. 3 et 8)

Exclusis a Christo defectibus quibus *voluntas* afficitur, subit consideranda conditio *intellectus* ab eo que arcendus omnis defectus cum summa scientiae Christi perfectione incompositibilis:—unde duo concludenda.

Conclusio 1^a.—NON FUIT IN CHRISTO IGNORANTIA.

Prob.—1^o Ignorantia per ignorantiam non pellitur. Atqui Christus *eo fine* venit in mundum ut ignorantiae nostrae caliginem dissiparet, illuminans eos qui *in tenebris et in umbra mortis* sedent (Luc. I, 19). Ergo.

2^o Sicut in Christo fuit plenitudo gratiae et virtutis, ita et *plenitudo omnis scientiae* sibi debitae. Atqui plenitudo haec non minus ignorantiae opponitur quam altera fomiti peccati. Ergo non minus ignorantia quam peccati fomes a Christo removeri debet.

3^o Nullam difficultatem faciunt verba (Is. VIII, 4): *Antequam sciat puer vocare patrem suum et matrem suam, auferetur fortitudo Damasci etc.*—Nam a) primo plerique textum hunc multoque probabilius¹ interpretantur tantum de filio ipsius prophetæ Isaiae. b) Secundo, accepta quorundam expositione de ipso Christo, nullatenus inde Domini ignorantia inferri potest. Quippe duplex solutio habetur (a. 3, resp. ad 3): *una* est quod, antequam Deus fiat puer habens matrem et patrem putativum seu ante Incarnationem, fortitudo Damasci tolletur vel (sensu spirituali) potestatem suam salutiferam exercebit Christus (ut in sanctis V. L.); *altera* est, quod statim post Incarnationem, et antequam puer Jesus secundum infantilem progressum matrem et patrem nominet, ad se Gentes convertet (scil. in persona Magorum).

1.—Huic sententiae tenaciter adhaeret Knabenbauer, *Curs. Scrip. Sac.*, *Comm.* in h. l.

Conclusio 2^a. — NON FUIT IN CHRISTO ADMIRATIO NEQUE QUANTUM AD SCIENTIAM DIVINAM, NEQUE QUANTUM AD SCIENTIAM CREATAM, BEATAM ET INFUSAM; POTUIT TAMEN IN EO ESSE QUANTUM AD SCIENTIAM EXPERIMENTALEM.

1^a *Pars* constat: nam admiratio proprie est de aliquo novo et insolito. In Christo autem non poterat esse aliquid novum et insolitum neque quantum ad scientiam divinam omnium comprehensivam, neque quantum ad scientiam creatam, sive beatam sive infusam, quæ latissime in eo patebat.

2^a *Pars* concedit Christo admirationem quamdam respectu scientiae experimentalis.—Sane 1^o legitur (Matth. VIII, 10): *Audiens autem Christus (verba Centurionis) miratus est, et sequentibus se dixit: Amen, dico vobis, non inveni tantam fidem in Israël.* — 2^o Conveniens erat admirationis sensum a Christo assumi ad nostram instructionem, ut scil. nos exemplo provocaret ad ea magnificanda quæ ipse admiratione digna reputasset.—3^o Quo pacto admirationis in Christo contingeret, ex eo deprehenditur quia humana seu acquisibili scientiâ poterat nova quædam magna et insolita sibi supra rerum hominumve consuetudinem occurrentia experiri. Hanc autem experimentalem apprehensionem sponte in ejus animo conseqüebatur sive *complacentia* quædam, quod res apprehensa bona perfectaque videretur (ut in exemplo allato mirandæ fidei Centurionis), sive *desiderium* ulterioris inquisitionis ex timore ferendi deficiens iudicium: acquisita enim Christi scientia progressiva erat. Igitur in Christo admiratio agnoscitur tum quoad id quod ponit in cognitione, tum quoad id quod importat in appetitu.

ARTICULUS IV.

Utrum anima Christi fuerit passibilis.

Passibilitas animæ Christi nunc *in genere* discutienda assamitur.—Ubi jam expedit duplicom passionem distinguere, *corporalem* scil. et *animalem*, prout vel corporis vel animæ

principalius sit. *a)* Læso et perturbato corpore per aliquam corpoream passionem, necesse est ut anima, quæ est corporis forma, perturbetur *per accidens*, nempe quantum ad esse quod habet in materia: hoc modo pati dicitur *passione corporali*. *b)* *Passionem autem animalem* propriæ anima experitur secundum affectiones appetitus sensitivi quæ non habentur sine aliqua transmutatione corporea, quæquè eo magis passionum nomen rationemque vindicant quo mutationes seu diversi motus, quibus materialiter constant, in deteriorius declinent abjectione convenientis dispositionis¹.

Conclusio.—ANIMA CHRISTI PASSIBILIS FUIT PASSIONE CORPORALI; HÆ AUTEM PASSIONES ANIMALES ALITER FUERUNT IN CHRISTO QUAM IN NOBIS.

1^a Pars de passione *corporeli* perspicua est ex dictis: cum enim corpus Christi fuerit passibile et mortale, accidente quacumque perturbatione corporea, oportebat ejus animam in suo esse affici ideoque *per accidens* pati.

2^a Pars de passione *animali* evincitur:—*1^o* ex *auctoritate*. Dicitur enim (Ps. LXXXVII, 3) ex persona Christi: *Repleta est malis anima mea*, scil. non peccatis, sed doloribus. Unde *S. Augustinus* (l. XIV de Civ. Dei, c. 9) de passionibus ait: “Etiam ipse Dominus in forma servi agere vitam dignatus humanam, adhibuit eas, ubi adhibendas esse judicavit. Neque enim in quo verum erat hominis corpus et verus hominis animus, falsus erat humanus affectus. Cum ergo ejus in Evangelio ista referuntur, quod super duritiam cordis Iudeorum cum ira contristatus est (Marc. III, 5); quod Lazarum suscitaturus etiam lacrymas fuderit (Joan. XI, 35); quod concepiverit cum discipulis suis manducare Pascha (Luc. XXII, 15); quod propinquante passione, tristis fuerit anima ejus (Matth. XXVI, 38), non falso utique referruntur.”—*2^o* *Ratio* illa est quam *D. Thomas*, post ipsum *S. Augustinum*, suppeditat: Christus enim assumpsit ea quæ pertinent ad naturam hominis. Atqui passiones animales (generati sumptæ) sunt motus proprii naturæ humanæ secundum sensitivum genus. Ergo.

3^a Pars versatur circa modum quo passiones animales

1—I-II^m, Q. XXII, a. 1.

vigebant in Christo ; ubi triplex differentia, utique accidentalis, inter passiones Christi et nostras assignanda est :—
 1^a *diff. ex objecto*. In nobis enim plerumque passiones hujusmodi feruntur ad illicita : quod in Christo non fuit.—2^a *diff. ex principio*. Passiones nostræ frequenter judicium rationis præveniunt; in Christo vero, summa ejus sapientia ordinante, omnes motus sensitivi appetitus oriebantur secundum rationis nutum et imperium.—3^a *diff. ex effectu*. Nam in nobis quandoque passiones, justum modum excedentes, eo usque progrediuntur ut rationem vel trahant vel obnubilent et impediант a perficiendo proprio opere. In Christo autem motus humanæ carni connaturales sic ex ejus dispositione in appetitu sensitivo sistebant quod nullum ex his obstaculum exercendæ rationi occurreret. Idcirco *S. Hieronymus* (*Comm. in Matth. XXVI, 37*), passionem perfectam intelligens quæ rationi dominatur, eam negat in Christo fuisse, sed admittit *propassionem* veluti passionem inchoatam et intra appetitus sensitivi limites conclusam.

Solv. obj.—OBJ. 1.—Nihil patitur nisi ab agente fortiori. Atqui nulla creatura fuit animâ Christi præstantior. Ergo.

RESP. *C. M.*—*D.m* :...et ideo Christi anima poterat, præsertim virtute divina, resistere passionibus ne sibi supervenirent, *C*; nec decebat se eisdem propria voluntate subjicere, *N*.—*Neg. conseq.*

OBJ. 2.—Juxta Tullium (l. 3 de Tuscul. quæst.), passiones animæ sunt quædam ægritudines. Atqui in anima Christi repugnat ægritudinem admittere. Ergo.

RESP. *D. M* : Passiones quæcumque...*N*; passiones Stoïcorum sensu acceptæ pro motibus *inordinatis*, *C*.—*Trans. m.*—*Neg. conseq.*

OBJ. 3.—Idem esse videntur passiones animæ ac peccati fomes. Atqui in Christo non erat fomes peccati. Ergo.

RESP. *D. M* :...passiones in illicita tendentes...*C*; passiones simpliciter seu essentialiter sumptæ, *N*.—*C.m.*—*Neg. conseq.*

ARTICULUS V.

Utrum in Christo fuerint dolor et tristitia, timor et ira.

(Art. 5, 6, 7, 9)

1º De possibilitate animæ Christi acturi *in specie*, breviter sub una disquisitione tangemus passiones illas quæ prima fronte Dominicæ perfectioni repugnare videantur, quales sunt *dolor* et *tristitia* in appetitu concupiscibili, *timor* vero et *ira* in irascibili.

2º Noverit lector appetitum sensitivum partiri in concupisibilem et irascibilem pro generica objectorum diversitate, quatenus scil. concupisibilis est de bono et malo *absolute*, irascibilis vero de bono et malo sub ratione *ardui* et *difficilis*.—*a)* Hinc ad vim concupisibilem pertinent *amor* et *odium*, quibus simpliciter inclinamur in bonum et avertimur a malo; *desiderium* et *fuga*, quibus ferimur in bonum absens et avertiuntur a malo futuro; *gaudium* et *tristitia*, quæ sunt de bono maloque præsente.—*b)* Ad vim irascibilem pertinent *spes* et *desperatio*, quibus movemur in bonum arduum sed adeptu possibile vel a bono arduo et adeptu impossibili; *audacia* et *timor*, quæ sunt circa malum immensus evitabile vel cui non de facili resisti potest; *ira*, qua vehementer ad vindictam inclinamur¹.

Conclusio 1^a. — NEMINI DUBIUM ESSE DEBET QUIN IN CHRISTO FUERIT VERUS DOLOR SENSIBILIS VERAQUE TRISTITIA.

1^a *Pars prob:*—1º *a)* Ex celebri vaticinio (Is. LIII, 4): *Vere languores nostros ipse tulit, et dolores nostros ipse portavit*; quibus verbis consonant historia *evangelica* Christi patients Ecclesiæque *traditio*.—*b)* Objectam sibi sententiam S. Hilarii negantis (l. X de Trin.) *dolorem passionis Christo illatum fuisse*, solvit D. Thomas (a. 5 ad 1) inquiens: “In omnibus illis verbis et similibus Hilarius a carne Christi, non veritatem doloris, sed necessitatem excludere intendit,” scil. necessitatem *ex naturæ peccato profectam* qua nos adigimus, non necessitatem illam quam natura corruptibilis de se

1—Cf. I-II^o, *de Passionibus*.

efficit. Quod vero Doctor Pictaviensis ait (l. cit.) : "Virtus corporis *sine sensu pœnæ* vim pœnæ in se desæventis exceptit," accipiendum est de Christi *Divinitate* (nomine *Virtutis* significata) quam contra Arianos ab omni infirmitate immunem pronuntiavit.

2º Ratione.—Ad veritatem doloris sensibilis requiritur laesio corporis et laesionis perceptio, ex qua in appetitu sensitivo consurgit passio apprehensioni illius mali presentis proportionata. Atqui corpus Christi, utpote passibile et mortale, laedi poterat, nec ejus animæ, omnibus potentias naturæ libus excellenter instructæ, deerat laesionis sensus. Ergo.

2º Pars additur circa *tristitiam*, quæ sic persuadetur.—
1º Dominus ipse de se testatus est (Matth. XXVI, 38) : *Tristis est anima mea usque ad mortem.*—Neque huic sententiae contradicit altera (Is. XLII, 4) : *Non erit tristis neque turbulentus*; quippe hic negatur tristitia commovens usque ad rationis perturbationem. Hunc in sensum quadrant verba (Prov. XII, 21) : *Non contristabit justum quidquid ei acciderit*; quatenus in animo sapientis ærumnæ sensitivitatem quidem affligunt, nequaquam tamen mentis serenitatem nubilant.

2º Tristitia convenit cum dolore, in quantum est passio appetitus sensitivi consequens perceptionem mali aliqualiter presentis, sive re, sive apprehensive. Differt tamen secundum motivum seu objectum: nam objectum et motivum doloris est laesio sensu tactus percepta, sicut cum aliquis vulneratur; objectum autem et motivum *tristitiae* est nocivum seu *malum interius apprehensum* ratione aut imaginatione, puta cum aliquis tristatur de ammissione gratiæ vel pecunia. Atqui potuit anima Christi interius apprehendere aliquid ut nocivum et quantum ad se, sicut passio et mors ejus fuit, et quantum ad alios, ut peccatum discipulorum vel Iudeorum deicidium. Ergo quemadmodum in Christo potuit esse verus dolor, ita et vera tristitia.

Conclusio 2º.—FUIT IN CHRISTO ALIQUALIS TIMOR, NEG NON IRA PER ZELUM.

1º *Pars* ostendit:—1º ex *Scriptura*; legitur enim (Marc. XIV, 33) : *Cœpit (Jesus) pavere et tædere.* Ex timore mortis etiam procedebat oratio (Matth. XXVI, 39) : *Pater mi, si possibile est, transeat a me calix iste.* Hinc sicubi-


justus esse dicitur *abque terrore* (Prov. XXVIII, 1), id accipiendum est secundum quod terror importat excessum passionis avertentem hominem ab exercitio prudentiae.

2^o Ratione.—Sicut tristitia oritur ex apprehensione mali quodammodo praesentis, ita *timor ex apprehensione mali, futuri, quadammodo incerti*: que quarta conditio apponitur, quia malum apprehensum ut omnino certum habetur quasi praesens ideoque tristitiam magis quam timorem generat. Atqui in Christo poterant verificari simpliciter vel secundum quid praefatae conditiones. Ergo. *Min. decl. a)* Licet enim Christus potuerit vitare maia futura secundum virtutem divinitatis, erant tamen mala illa (prout timor exigit) inevitabilia vel saltem non de facili vitabilia secundum infirmitatem carnis. *b)* Etiam Christus perfecte noverat quid sibi futurum accideret secundum omnes rerum circumstantias; attamen (ut notat *Cajetanus*) pro quanto ratio ejus inferior, cuius apprehensionem sequitur timor, malum futurum apprehenderet actu praescindens a certo incertoque eventu, potuit aliqua incepsitudo futuri mali *secundum quid et negative* salvari, et consequenter quarta timoris conditio.

2^o Pars circa iram prob:—nam 1^o (Joan. II, 17) de Christo, qui ejecerat vendentes de templo, dicitur esse impletum quod legitur (Ps. LXVIII, 10): *Zelus domus tuæ comedit me.*—2^o Ira est effectus tristitiae, quatenus ex malo sibi vel aliis illato quis tristatur indeque movetur appetitu vindictæ. Atqui in Christo fuit tristitia, esse autem potuit vindictæ appetitio secundum ordinem justitiae. Ergo. *Min. decl.* Appetitus vindictæ duplex est: *unus* quidem peccato infectus, quando scil. aliquis vindictam querit præter rationis ordinem, et hæc est *ira per vitium*, Christo abjudicanda; *alter* vero honestus ac laudabilis, qui scil. rationi subordinatur et justitiæ regitur, nec moderamen mansuetudinis excedit, et hæc est *ira per zelum*, quam Christo vindicamus.

Solv. obj.—OBJ. 1.—Delectatio contemplationis divinorum minuit sensum doloris, tristitiae, etc, ut patet ex martyribus. Atqui anima Christi summe delectabatur in contemplatione Dei beatifica. Ergo. B,

RESP. D. M: Delectatio quæ retinetur in mente... *N*; quæ derivatur ad vires sensibiles, *C.*—*C.d.m.* eodem sensu.—*Neg. conseq.*









IMAGE EVALUATION TEST TARGET (MT-3)



6"



Photographic Sciences Corporation

**23 WEST MAIN STREET
WEBSTER, N.Y. 14580
(716) 872-4503**



*contra nra
dum contumeliam*

*Beatitude pot
a superiori non ducet
at in forte
sensibili.*

Ad gravem hanc objectionem dissolvendam plura conferri possunt. — 1º Per *divinam dispensationem*, sicuti gloria animæ Christi in superiori parte continebatur quin ad corpus redundaret; ita et delectatio supernæ contemplationis in mente retinebatur quin vires sensibiles afficeret; nam, ut ait *Damasc.* (III Orth. Fid. c. 15 et 20), beneplacito Divinitatis in Christo *permittebatur* "naturam pati quæ carni erant propria." — Porro 2º "tristitia quæ erat in anima Christi nullo modo gaudio fruitionis contraria erat; quod patet ex tribus: primo, quia non inerat eidem *secundum idem*, sed vel in diversis potentiis erat, vel in eadem *secundum* diversam operationem; secundo, quia non erat *de eodem*; tertio, quia unum erat materia alterius, sicut accidit in penitente qui dolet, et de dolore gaudet" (3 S. D. XV, Q. II, a. 3, quæstiunc. 2 ad 5). — 3º Distinguendum est inter *substantiam* beatitudinis et *accidentalia* sine quibus substantia illa consistere potest, quin tamen habeatur status omnium bonorum aggregatione perfectus. Christus quidem, ut comprehensor, felicitate essentiali fruebatur; at, simul viator, carebat perfectione accidentalis beatitudinis. — 4º Tandem, quod ad *martyres* pertinet, tenendum est fruitionem divini amoris id in eis effecisse, non ut vici cruciatum non sentirent, sed ut fortius mala ingruentia tolerarent; vel etiam divinitus factum esse, in illius amoris præmium et religionis gloriam, ut doloris sensu vix pungerentur: quod thesi nostræ nullatenus contradicit.

OBJ. 2.—Angores animi sunt de his quæ nobis nolentibus accidentunt. Atqui nihil passus est Christus contra suam voluntatem. Ergo,

RESP. D. M:...sub eo respectu quo angunt animum, C; sub omni respectu, N.—D.m:...contra voluntatem deliberatam, C; contra voluntatem naturalem, N.—Neg. conseq.

Nihil prohibet aliquid esse contrarium voluntati *secundum se* quod tamen volitum est *ratione finis* intenti, ut patet de medicina amara. Hoc modo mors Christi ejusque passio secundum se repugnabant voluntati *naturali* Christi, sicut et ejus sensualitati, ideoque afflictionem tum sensitivam tum spiritualem gignebat; at, propter finem redimendi humani generis, ultro a Christo voluntate *deliberata* acceptabantur.

OBJ. 3.—Passiones, quæ intensæ fuerint, ut dolor, ira, etc,

operationem mentis debilitant. Atqui in Christo mentis oculus nullam turbationem expertus est. Ergo.

RESP. *D. M* :...operationem mentis a phantasiam independentem, *N*; operationem mentis objective dependentem a sensu, *S.d* : secundum naturalem ordinem, *C*; posita speciali Dei dispensatione, *N*.—*C.m*.—*Neg. conseq.*

In nobis secundum *naturalem* ordinem, quo sensus intellectui deserviunt, potentiae animæ mutuo se impediunt; ex quo fit quod tristitia vel ira, etiamsi rationis directioni subsint, oculum mentis utcumque offuscant. Sed *in Christo* per moderationem divinæ virtutis unicuique potentiae permittebatur agere quod erat ei proprium, quin una aliam offenderet. Et ideo sicut gaudium mentis non prohibebat tristitiam vel dolorem sensibilem, ita etiam passiones inferiores in nullo rationis actui detrahebant¹.

1.—De defectibus a Christo assumptis leg. Monsabré, Conf. 41^e, *Les infirmités de J.-C.*

DISPUTATIO QUARTA

DE CONSEQUENTIBUS UNIONEM ABSOLUTE

Unionem hypostaticam, qua una persona Verbi in duabus naturis subsistit, consequi intelliguntur tum *absoluta* tum *relativa*.—Absoluta, de quibus in præs. disceptatione, ea sunt quæ Christo conveniunt *secundum se*, et hoc vel *quoad loquendi modum* de tanto mysterio, vel *quoad unitatem* quæ est entis passio. Unitas autem, communiter sumpta in Christo, pertinet tum ad *esse*, tum ad *velle*, tum ad *operari*. Quatuor itaque quæstionum instituendarum ratio datur.

QUÆSTIO PRIMA

DE MODO LOQUENDI SEU DE COMMUNICATIONE IDIOMATUM

Cum *idioma* græce proprietatem significet, nomine *communicationis idiomatum* latius accipi consuevit “ mutua in concreto de se invicem prædicatio divinæ et humanæ naturæ earunque proprietatum ; ” quæ definitio ex dicendis illustrabitur.—“ Tanti interest (scite monet Perrone, *de Inc. n. 486*) diligenter explicare et retinere id quod est communicatio idiomatum, quanti custodire sinceram et rectam Incarnationis notionem.”

Quæstio *D. Thomæ* ad quatuor articulorum capita comode revocabitur. Etenim prædicatio in mysterio Incarnationis institui potest vel *categorice* (art. 1-3) vel *reduplicative* (art. 4); categorice vero vel circa *esse* (art. 1-2) vel circa *fieri* Incarnationis (art. 3); circa *esse* tandem tunc respectu *naturarum* (art. 1), tum respectu *proprietatum* (art. 2).

ARTICULUS I.

De mutua naturarum prædicatione in Christo.

(Q. XVI, a. 1-3)

1^o Communicatio idiomatum, qua Incarnationis mysterium multiformiter exprimitur, consideranda modo est quoad *naturas* de se invicem in Christo prædicandas; quia vero naturæ aut *substantive* aut *adjective* significantur, duo singillatim enucleanda se offerunt.

2^o Cum naturæ in mysterio Incarnationis distinctæ manent, manifestum est eas minime de invicem prædicari secundum quod significantur *in abstracto*: id enim *Eutychianum* foret; unde non dicimus Divinitatem esse humanitatem (art. 1 ad 2).—Verum quæstio est de prædicatione naturarum *in concreto*, quatenus significantur per nomina *Deus, homo*.

Porro 3^o licet, sub hoc sensu, aliqualis idiomatum reciprocatio ab omnibus Christianis concedatur, quia tamen voces sunt signa conceptuum, diversa prorsus sermonis ratio apud catholicos vel hæreticos infertur.—a) Quidam, ut *Manichæi*, veritatem *humanitatis* Christi destruentes, nonnisi figurative salvare possunt prædicationem humanæ naturæ de Verbo Dei.—b) Alli e converso cum *Photino* inficiantur Christi *divinitatem*, adeo ut eamdem enunciationem Christologicam ex parte alterius extremi periment.—c) Alii demum cum *Nestorio* profitentur Christum et verum Deum esse verumque hominem; at prædicationis *nexus* seu copulam perrumpunt, eo quod morale tantum Dei hominisque conjunctionem admittunt.—d) Quid ferat catholica veritas, dupli coniunctione determinabimus.

Conclusio 1^o.—UTRAQUE PROPOSITIO PRO VERA HABENDA EST: “DEUS EST HOMO” ET “HOMO EST DEUS.”

1^o Pars effert humanitatem concrete significatam per illud *homo* vere proprieque, tum veritate terminorum, tum veritate nexus, prædicari de Deo: quod quidem *fide* asseritur ex *Symbolo Athan.* et *Concilii*, puta ex *Conc. V* (can. 8), ubi Christus dicitur consubstantialis Patri secundum divinitatem et consubstantialis nobis secundum humanitatem.

Revera 1^o legitur (Philipp. II, 6-7): *Qui, cum in forma Dei esset... semetipsum exinanivit, formam servi accipiens... habitu inventus ut homo*; quibus verbis evincitur illum qui in forma Dei est, scil. Deum, esse hominem.—*Ratio* est, quia nomen significans naturam communem in concreto potest supponere pro quolibet individuo illius naturæ, sicut nomen *homo* pro quolibet homine, nomen *Deus* pro quilibet persona divina, et, secundum exigentiam prædicati in Incarnatione, pro persona Filii Dei. Atqui persona hæc Filii Dei, ad quam designandam nomen *Deus* trahitur, reapse est suppositum humanæ naturæ, utpote in ea subsistens; de quolibet autem supposito alicujus naturæ potest *vere proprieque* prædicari nomen significans naturam illam in concreto. Ergo vere et proprie ex supposita Incarnatione *Deus est homo*.

2^o Quoad modum quo propositio hæc verificatur, sequentia observabimus.—a) *Primo* “homo univoce prædicatur de Deo et aliis hominibus. Quod autem dicitur quod nihil dicitur univoce de Deo et creaturis, intelligend' in est de illis quæ prædicantur de ipso in quantum est Deus” (3 S. I). VII, Q. I, a. 1 ad 3).—b) *Secundo*, prædicta propositio non est in *materia remota*, sed *naturali*; quippe natura divina et humana, eti maxime distantes, tamen per Incarnationem in unum suppositum convenient.—c) *Tertio* quoque propositio *Deus est homo* verificatur, non per accidentis et contingenter, sed *per se, necessario et essentialiter*, perinde ac quando species de sua hypostasi prædicatur. Id autem (ut acute notat Angelicus. 3 S. l. cit. ad 5) intelligendum est de illa propositione “secundum quod vera est,” i. e. secundum quod nomen *Deus* sumitur neque indeterminate tantum, neque pro forma significata, sed pro certo supposito quod est Filius Dei ut subsistens in natura humana¹.

2^o *Pars* versatur circa prop. *homo est Deus*, et definita est in *Conc. Eph.* (c. 15): “Si quis audeat dicere hominem Christum Theophorum, i. e. Deum ferentem, ac non potius Deum esse veraciter dixerit, A. S.”

Sane vero legimus (Rom. IX, 5): *Ex quibus est Christus*

1—Vid plura ap. Cajetanum (*Comm. in h. art.*); item ap. *Sylvium*, etc.

secundum carnem, qui est super omnia Deus benedictus in sæcula. Atqui Christus secundum carnem est homo. Ergo¹.—*Ratio* in promptu est: siquidem nomen *homo* potest supponere pro qualibet hypostasi humanæ naturæ, et, præhabita unione divinæ humanæque natæ in persona Verbi, reapse supponit pro Christo seu Filio Dei subsistente in natura humana. Atqui manifestum est ex alibi dictis (*Tract. de Deo*, D. VII, Q. I, a. 1, et *de Incarn.* D. II, Q. I, a. 2) quod de persona Filii Dei ac de Christo vere proprieque nomen *Deus* prædicatur. Ergo.

Conclusio 2^a.—CHRISTUS NON VERE POTEST DICU “ HOMO DOMINICUS,” QUAMVIS “ DIVINUS ” APPELLARI POSSIT.

1^a *Pars* militat contra veteres *haereticos* quos referunt denominatio illa usos esse contra Christi divinitatem.

Evidem 1^o ipse *S. Augustinus* Christum quandoque (l. 83 Qq., q. 36) hominem *dominicu* vocaverat; at postea perspexit quid veneni in illa voce lateret et seipsum retrac-tavit dicens (l. I *Retract.*, c. 19, n. 8): “ Non video utrum recte dicatur homo dominicus Christus Jesus, cum sit utique Dominus.”

2^o Cum dicitur homo Christus, designatur ipsa persona Filii Dei propter suppositi unitatem. Atqui de persona Filii Dei prædicatur Deus et *Dominus* essentialiter, quod excludit terminum denominativum per relationem quamdam. Ergo. *Min.* liquet; nam esse *dominicu* ita denominatur a Domino quod non significat esse dominum vel habere dominium, sed esse domini vel dominio subesse: id autem derogat divinitati Christi.

3^o a) Denominatio illa favet *Nestorianismo*, juxta quem, salva dualitate suppositorum, homo Christus assumptus est ad participationem honoris divini.—b) Ejusdem erroris vitandi gratia, Christus dicendus non est *Deifer* seu Deum ferens, neque *deificatus*.—c) At vero conceditur Deum esse *humanum*, non quasi assumpserit hominem, sed quia ab æterno præexistens sibi in tempore humanam naturam univit; pariter et ex eadem conjunctione recte poterit prædicari humanitas *deifica* vel *dominica*.

1.—De genuino habitu et sensu hujus textus cfr. Card. Franzelin, *de Verb. Incarn.* th. 9;—Cornely, *Comm.* in h. l.

2^a Pars infertur circa adjectivum *divinum*, quod *D. Thomas* annuit de Christo prædicari (a. 3 ad 3).—Ratio est, quia nominibus utendum est secundum loquendi consuetudinem. Atqui ex communi usu vocamus quidem *dominicū* quod domini est, importata duorum suppositorum distinctione; sed *divinum* consuevimus prædicare etiam de his quibus nomen *Deus* essentialiter convenit, uti Verbum divinum. Ergo.

Solv. obj.—OBJ. 1 (cont. 1^{am} p. 1^{ra} concl.).—Magis convenient tres personæ divinæ ad invicem quam humana natura et divina. Atqui in Trinitate una persona non prædicatur de alia, puta Filius de Patre. Ergo.

RESP. *D. M* :...magis convenient in natura, *C*; in supposito, *N*.—*C.m.*—*Neg. conseq.*

OBJ. 2.—In *Symb. Athan.* legitur: “Sicut anima et caro unus est homo, ita Deus et homo unus est Christus.” Atqui falsum est dicere: “Anima est corpus.” Ergo.

RESP. *Trans. M.*—*D.m* :...quia hæc significantur ut *in abstracto*, *C*; etiam si dicatur *in concreto*: “Animatum est corpus,” *N*.—*Neg. conseq.*

OBJ. 3 (cont. 2^{am} p. 1^{ra} concl.).—Quidquid convenient prædicato, prædicatur de subjecto. Atqui Deus est Pater; minime tamen conceditur ista prop: “Homo est Pater.” Ergo nec altera: “Homo est Deus.”

RESP. *D. M* :...secundum eamdem vocis suppositionem, *C*; secundum suppositionem diversam, *N*.—*C.d.m.* quoad 1^{am} partem :...secundum quod nomen *Deus* supponit indeterminate pro qualibet persona, *N*; determinate pro persona genuerante, *C*.—*C. 2^{am} p. m.* et *Neg. conseq.*

OBJ. 4.—Non est agnoscedens Deus recens, qualem finiunt idololatæ. Atqui homo est quiddam recens. Ergo.

RESP. *D. M* :...i. e. Deus qui *ratione sui* novus sit, *C*; Deus qui, propriâ naturâ et subsistentiâ æternus, sibi naturam humanam univerit a qua incepit denominari homo, *N*.—*D.m* :...prout tenet pro natura humana, *C*; pro supposito Christo subsistente in illa natura, *N*.—*Neg. conseq.*

ARTICULUS II.

De alterna proprietatum communicatione in Christo.

(Art. 4-5)

Hic strictius agitur de communicatione *idiomatum*, quod est, proprietatum :—pauca *prænotentur*.

Et 1^o idiomata in proposito triplicis generis esse possunt.—*Quædam* enim sunt quæ Christo convenient ratione solius divinæ naturæ, ut v. g. esse æternum, immensum, etc; et hæc vocantur simpliciter *divina*.—*Alia* sunt quæ Christo competunt ratione solius naturæ humanæ, quin quidpiam divinum postulent, v. g. esse passibilem, crucifixum, etc; et ista dicuntur simpliciter *humana*.—*Quædam* demum sunt quæ Christo tribuuntur ratione utriusque naturæ, divinæ et humanæ, v. g. esse Dominum, Mediatorem, Redemptorem; quæ vocari possunt *divino-humana*.

Jamvero 2^o *Nestoriani* voces Christologicas taliter partiebantur ut ea quæ pertinent ad humanam naturam non prædicarent de Deo, nec ea quæ pertinent ad divinam naturam de homine; utraque autem attributa tum divina tum humana prædicabant de nominibus mixtis seu divino-humanis, cuiusmodi sunt *Christus*, *Dominus*, *Redemptor*, etc. Unde concedebant Christum esse natum de Virgine et fuisse ab æterno; non tamen dicebant vel Deum natum de Virgine, vel hominem ab æterno fuisse.—*Eutychiani* e contrario, unicam in Christo naturam agnoscentes, contendebant posse dici: *Divinitas passa est*, vel *humanitas ab æterno fuit*. Quibus consenserunt *Lutherani*, docentes alias Divinitatis proprietates, nominatim ubiquitatem, in humanitatem Christi (quin tamen humanitas mutaretur) vere esse transfusas; unde dicti sunt *Ubiquistæ*¹.

1—De his scite scribit Ch. Hodge, etsi Protestantismi sectator (*Systematic Theology*, Vol. II, p. 418. ed. 1895): “It seems a plain contradiction in terms to say that the human becomes divine, that the finite becomes infinite; and no less a contradiction to say that the humanity of Christ has infinite attributes and yet itself is not infinite.”

3º Recolendum est prædicationem fieri posse dupliciter: *in concreto* quidem, prout forma significatur ut subjecto vel supposito inhærens; *in abstracto* vero, quatenus eadem forma exprimitur veluti per se stans seorsum a subjecto.— Hinc duæ conclusiones, quasi summæ præcipuaque *regulae*, instruendæ sunt.

Conclusio 1^a. — NON SOLUM DE CHRISTO, SED DE DEO QUOQUE ET HOMINE IN EO UNIVOCE PRÆDICARI POSSUNT ATTRIBUTA SEU IDIOMATA UTRIUSQUE NATURÆ IN CONCRETO SIGNIFICATÆ, QUAMVIS NON SECUNDUM EADEM PRÆDICATIO FIAT.

1^a *Pars* est *de fide* juxta illud *Conc. Ephes.* (anathem. 4 S. Cyrill. Alex.): “Si quis duabus personis sive hypostasibus eas, quæ in evangelicis et apostolicis conscriptionibus sunt, *dividit voces*, vel ea quæ de Christo a sanctis dicuntur, vel ab ipso Christo de semetipso, et aliquas quidem ex his homini applicandas crediderit, aliquas vero *soli* Verbo deputaverit, A. S.”

Re quidem vera, 1^o in *Scriptura* legimus (Rom. I, 3) quod Dei *Filius factus est ex semine David secundum carnem*; (1 Cor. II, 8) quod *Dominus gloriæ crucifixus est*; (Act. III, 15) quod *Auctor vitæ interfectus est*.—E converso legitur de Christo-homine (Luc. I, 35): *Quod nascetur ex te Sanctum vocabitur Filius Dei*; (Joan. III, 13): *Nemo ascendit in cælum, nisi qui descendit de cælo, Filius hominis, qui est in cælo*; et (*ibid.* VIII, 58): *Antequam Abraham fieret, ego sum*.

2º E *Patribus* sat esto retulisse *S. Ambrosium* (de Inc. c. 5, n. 36), ubi docet de Christo dici posse: “Idem patiebatur, et non patiebatur; moriebatur et non moriebatur; sepeliebatur et non sepeliebatur; resurgebat, et non resurrebat.” Et *S. Joan. Damasc.* (de Orth. Fid. l. III, c. 4): “Hic est jam alternae communicationis modus, dum unaquæque natura ea quæ sibi propria sunt alteri communicaat, propterea quod eadem est hypostasis et ob mutuam earum immeationem. Qua ratione de Christo dicere nobis licet: *Hic Deus noster in terra visus est, et cum hominibus conversatus est; et hic homo increatus est, et impassibilis, et incircumscripitus.*” (Vid. plura ap. Petavium, Knoll, etc.)

3º *Ratio manifesta* est.—Ideo enim Nestorius contrarium

enunciatæ conclusioni docebat, quia supponebat Christum significare duas hypostases realiter ab invicem distinctas, scil. Deum et hominem. Atqui *fide* accepimus eamdem prorsus esse hypostasim divinæ et humanæ naturæ, sive *Deus*, sive *Christus*, sive *Jesus* vel *homo* nominetur. Ergo de homine, supponente pro hypostasi divinæ nature, possunt dici ea quæ sunt divinitatis, v.g. hic *homo* (*Jesus*) est *æternus*, et de Deo, veluti hypostasi humanæ naturæ, possunt humanae predicatori, v.g. *Deus passibilis* fuit. — Haec autem predicatione dicenda est *univoca*; ad quam verificandam sufficit identitas *specifica* naturæ et proprietatum, quin requiratur eadem specifica convenientia ex parte suppositi.

2^a *Pars* subjicitur claritudinis causâ et ad præveniendas æquivocationes.—Nam in quacumque prædicatione attenditur non solum id *de quo* aliquid dicitur seu subjectum, sed etiam id *secundum quod* illud prædicatur seu ratio subjecti. Manente igitur identitate *subjecti* in Christo, diversæ sunt subjecti *rationes*: nam quæ sunt divinæ naturæ prædicantur de eo secundum divinam naturam, quæ vero sunt humanæ naturæ de eodem prædicantur secundum humanam naturam; eo ferme pacto quo unus idemque homo dicitur carneus secundum corpus et spiritualis secundum animam.

Adnotanda.—^{1^o Jure conceditur propositio illa: *Unus de Trinitate passus est*; quæ ab Hormisda R. P. ideo rejecta est, quod nova esset et dissidiis ansam præberet: unde postea a Joan. II R. P. probata est¹.}

^{2^o Advertunt theologi communicationem idiomatum bene procedere in propositionibus *affirmativis* etiam absolute (subaudita *ratione* prædicationis mox indicata), at cavidum esse a propositionibus *negativis* quæ (ut aiunt) *malignantis* naturæ sunt seu totum prædicatum omni ex parte a subjecto removent. Hinc recte dicitur: *Christus est æternus*; neutquam tamen enuntiari potest: *Christus non est æternus*, nisi cum addito “secundum humanitatem.”}

Conclusio 2^a.—PROPRIETATES UNIUS NATURÆ NEQUEUNT DE ALIA PRÆDICARI SECUNDUM QUOD ABSTRACTIM EXPRIMUNTUR, ATQUE ABSURDA EST UBIQUISTARUM POSITIO.

1—Cf. Petavius, l. V, c. 2-3.

1^a *Pars evincitur*; — **1^o** ex *Patribus*, quos inter sic loquitur *S. Joan. Damasc.* (de Fid. orth. l. III, c. 4): “Divinitatem itaque nominantes, ea quæ humanitati propria sunt, ipsi minime assignamus. Non enim passibilcm aut *creatam deitatem* dicimus. Nec rursus carni sive humanitati ea tribuimus quæ deitati proprie convenient. Neque enim carnem sive *humanitatem increatum* dicinus.” — **2^o** *Ratione*. Nam ea quæ sunt propria unius non possunt prædicari de alio quod non sit idem illi. Atqui in mysterio Incarnationis non est eadem natura, divina et humana. Ergo proprietates unius naturæ non possunt de alia natura prædicari, nisi ratione unius hypostasis. Atqui nomina *abstracta* significant formam seu naturam per modum formæ ac naturæ sine supposito, secus ac concretae voces significantes naturam et supponentes pro habente naturam. Ergo. — **3^o** Excipiuntur ab hac regula nomina abstracta quidem, sed *concretis aequivalentia*, ut *Sapientia*, *Vita*, loco ejus qui est vita et sapientia subsistens; unde dicit *Ecclesia* (in officio S. Crucis): “Mors mortua tunc est, in ligno quando mortua *Vita* fuit.”

2^a *Pars additur contra Ubiquistas*; quæ brevi expedietur.

1^o Ubiquitas humanitatis Christi pugnat cum *Scripturis*, puta cum loco illo (*Joan. XI, 14-15*): *Lazarus mortuus est, et gaudeo propter vos, ut credatis, quoniam non eram ibi;* — repugnat articulis *Symboli* de Christi conceptione, nativitate, morte, sepultura, descensu ad inferos, resurrectione, ascensione et descensu ad judicium, neconon præsentiae corporis Domini in Eucharistia; — contradicit omnibus *Patribus*, ut erudite demonstrat *Bellarminus* (de Christo, l. III) qui etiam cuncta adversariorum argumenta dissolvit.

2^o Huc faciunt verba *D. Thomæ* (a. 5 ad 3): “Ea quæ sunt divinæ naturæ dicuntur de humana natura, non secundum quod *essentialiter* competunt divinæ naturæ, sed secundum quod *participative* derivantur ad humanam naturam (v. g. cognoscere futura, habere virtutem salutiferam): unde ea quæ participari non possunt a natura humana (v. g. esse omnipotentem vel omnipræsentem), nullo modo de humana natura dicuntur.”

Solv. obj. — **OBJ. 1** (cont. 1^{am} concl.). — Impossibile est opposita de eodem prædicari. Atqui humana contraria sunt divinis, puta mutabilitas immutabilitati. Ergo.

RESP. D. M : ... de eodem prædicari secundum idem, C; secundum diversa, N.—C.m.—*Neg. conseq.*

OBJ. 2.—Attribuere Deo quæ defectum important, derogat divino honori. Atqui pleraque humana defectum continent, ut pati, mori. Ergo.

RESP. D. M : Attribuere Deo et secundum naturam divinam... C; secundum naturam assumptam gratiâ salvandi humani generis, N.—C.d.m.—*Neg. conseq.*

OBJ. 3.—Assumi couenit naturæ humanæ. Atqui de Deo nequit dici quod assumatur. Ergo.

RESP. D. M : ...ratione sui ipsius et antecedenter ad Unionem, C; ratione suppositi jam subsistentis in natura humana, N.—C.m.—*Neg. conseq.*

OBJ. 4 (cont. 2^{am} concl.).—Ea quæ sunt humanæ naturæ, prædicantur de Filio Dei et de Deo. Atqui Deus est sua natura. Ergo attributa humanitatis dici possunt de deitate.

RESP. D. M : ...quatenus nomen *Dei* supponit pro Deitate ipsa, N; quatenus supponit pro persona divina exercente actum subsistendi in natura humana, C.—D.m : ...secundum rem, C; quin diversus sit significandi modus diversaque ex hoc oriuntur prædicationis ratio, N.—*Neg. conseq.*

ARTICULUS III.

De formulis significantibus fieri Incarnationis.

(Art. 6—9)

Modus loquendi de Incarnatione attendendus est non solum quantum ad esse, sed etiam quantum ad fieri Unionis; qua in re solent auctores post D. Thomam tres præsertim verborum formas in trutinam vocare, vid. *factionem, creaturæ nomen et essendi initium* :—pauca de singulis.

Conclusio 1^a.—RECTE DICITUR “DEUS FACTUS EST HOMO,” NON TAMEN (PROPRIUS LOQUENDO) “HOMO FACTUS EST DEUS.”

1^a Pars :—1^o patet ex (Joan. I, 14): *Verbum caro factum est*; et ex illo *Symboli*: “Et homo factus est.”

2^o *Rutione* prob.—a) Id unumquodque factum esse dicitur quod de novo incipit prædicari de ipso. Atqui esse hominem *vere* prædicatur de Deo, non sane ab æterno, sed *ex tempore* per assumptionem humanæ naturæ. Ergo vera est prop : “Deus factus est homo,” cui aquivalet altera “Deus factus est persona Filii Dei subsistens in humana natura.”—b) Non autem sequitur Deum *factum esse simpliciter*: quippe fieri hominem est fieri simpliciter in iis in quibus humana natura incipit esse in supposito recens creato. Atqui Deus dicitur factus homo, quatenus *humanitas assumpta* est ad suppositum divinæ nature æterne præexistens. Ergo.—c) Nec rursus timenda est *mutatio ex parte Dei*. Nam quamvis in absolutis fieri importet mutationem ejus de quo aliquid incipit prædicari, tamen *relativa* possunt noviter prædicari de aliquo absque ejus mutatione, sicut Petrus fit dexter, mutato tantum Paulo, et dicitur de Deo (Ps. LXXXIX, 1): *Domine, refugium factus es nobis*. Atqui esse hominem convenit Filio Dei ratione unionis, quæ est relatio quædam resultans, non ex *informatione* humanitatis, sed ex nova tantum personatione seu terminatione ejusdem per Verbum tunc primo in ea subsistens. Ergo Deus factus est homo, acquirens esse substantiale humanæ naturæ, absque suâ mutatione, sed mutatâ solum naturâ assumptâ.

2^o *Pars communis* est (excepto Scoto) apud theologos.

1^o Ait *Joan. Damasc.* (de Orth. Fid. l. III, c. 2): “Non hominem deificatum dicimus, sed Deum humanatum.”—Et vere in prop. “homo factus est Deus,” dictio *factus sumi* potest vel *ex parte subjecti* aut *prædicati*, vel (*proprie*) *ex parte compositionis*. Atqui sub quocumque respectu propositio falsa est. Nam a) nec homo-Christus, nec Deus est factus. b) Pariter falsum est quod homo “factus sit” Deus: *primo*, quia, in hac prop., *homo* habet personalem suppositionem qua significatur suppositum humanæ nature; hoc autem suppositum, de quo verificatur esse Deum, idem est ac persona Filii Dei, quæ semper fuit Deus. *Secundo*, quia prop. illa favet *Nestorianis* ponentibus inter hominem et Deum, velut inter duo supposita, solam conjunctionem moralem.

2^o In *majorem veritatis evidentiā* plurimum conferunt que habet *D. Thomas* (a. 7 ad 4): “Terminus in *subjecto* positus tenetur *materialiter*, i. e. pro *supposito*; positus

vero in prædicato tenetur *formaliter*, i. e. pro *natura* significata. Et ideo cum dicitur, *homo factus est Deus*, ipsum fieri non attribuitur humanæ naturæ, sed supposito humanæ naturæ, quod est ab æterno Deus; et ideo non convenit ei fieri Deum. Cum autem dicitur, *Deus factus est homo*, factio intelligitur terminari ad ipsam humanam naturam. Et ideo, proprie loquendo, hæc est vera: *Deus factus est homo*; sed hæc est falsa: *homo factus est Deus*.¹

^{3º} Improprie vel saltem minus proprie præfata prop., *homo factus est Deus*, hoc sensu intelligi potest: "factum est ut homo sit Deus," vel "homo in communi (qui prius Deus non erat) in Christo fuit Deus." Quam significationem præ se ferre censendæ sunt nonnullæ *Patrum* sententiae, uti videre est penes Augustinum et Greg. Nazianzenum.

Conclusio 2º. — NON EST ABSOLUTE DICENDUM QUOD CHRISTUS SIT CREATURA, SED CUM DETERMINATIONE, SCIL. "SECUNDUM HUMANAM NATURAM."

1º Etenim, quia "ex verbis inordinate prolatis incurritur hæresis," nec nomina communia cum hæreticis habere debemus, ne eorum errori favere videamur. Atqui *Ariani* Christum dixerunt esse *creataram* et minorem Patre, non solum ratione humanæ naturæ, sed etiam ratione divinæ personæ. Ergo.—2º Ea tantum possunt simpliciter dici de Christo (ratione humanæ naturæ), etsi Deitati repugnant, de quibus suspicari non potest quod divinæ personæ convenient ratione sunt; sic v. g. simpliciter dicimus Christum esse natum de Virgine, passum, mortuum, etc, quia satis liquet cuncta hæc Christo convenire secundum humanitatem assumptam. Atqui vox *creatura* ambigua est, ne amplius dicam, cum possit vel ad naturam vel ad suppositionem referri. Ergo, quemadmodum ad vitandum errorem Manichæi Christus non dicitur *incorporeus* sine determinatione "secundum deitatem"; ita ad præcavendum errorem Arii dicendus non est *creatura*, quin addatur "secundum humanitatem". Quæ quidem determinatio, ubi brevitatis causâ apud SS. Doctores omissa fuerit, subintelligenda est.—3º Ulterius proferam cum *Sylvio*, post *D. Thomam*¹, prop. illam, *Christus est creatura*, esse simpliciter falsam. Nam *creatio* proprie respicit esse rei; esse

1—3 S. D. XI, Q. I, a. 2 et C. G. IV, 48.

autem simpliciter et per se est suppositi subsistentis. Atqui Christus habet esse creatum. Ergo.

Conclusio 3^a.—NEC DICENDUM EST QUOD HOMO-CHRISTUS INCEPERIT ESSE, SI NIHIL ADDATUR.

Nam 1^o id contrariatur verbis Ap. (Heb. XIII, 8): *Jesus Christus heri, et hodie, ipse et in sæcula.* — 2^o Duplices ratio suppetit: a) juxta sententiam catholicæ fidei unicam in Christo agnoscimus hypostasim, scil. personam Verbi, cuius æternitati repugnat *aliquando cœpisse*. Porro, in prop. de qua agitur, nomen *homo* designat divinam illam personam; quippe terminus in subjecto positus materialiter et pro supposito tenetur. b) Præterea, etiamsi propositio illa vera foret, non esset ea utendum absque debita cautela, ad præveniendam hæresim *Arianorum* qui Filio Dei attribuebant vitæ initium.

Poterit vero eadem prop. adhiberi cum *determinatione* illa: secundum *humanam naturam*. — Ex quo concluditur falsum esse hoc assertum: *Homo-Christus esse incœpit*; sed verum aliud: *Christus incœpit esse homo*.

ARTICULUS IV.

De locutionibus quibusdam reduplicativis.

(Art. 10-12)

Reduplicatio est logica propositionum proprietas, secundum quam afficiuntur particulis quasi duplicantibus subjectum vel prædicatum, ad determinandum utriusque extremi respectum;—quæ quidem determinatio induci potest vel ad specificandum subjectum prædicati, et tunc vocatur *specificativa*, vel ad designandam causam aut rationem formalem qua aliquid predicitur de subjecto, et tunc proprius dicitur *reduplicativa*.—Tria, cum Auctore, concisa oratione concludemus.

Conclusio 1^a.—MAGIS CONCEDENDA QUAM NEGANDA EST PROPOSITIO “CHRISTUS, SECUNDUM QUOD HOMO, EST CREATURA.”

Etenim in hac prop. nomen *homo* potest resumiri in reduplicativa.

catione vel ratione suppositi, vel ratione naturæ: in primo casu esset falsa assertio, in altero vera; quoniam in Christo suppositum humanæ naturæ increatum est, natura vero ipsa creata. Atqui nomen sic reduplicatum proprius tenetur *pro natura* quam pro supposito, quatenus vim habet prædicati, perinde ac si diceretur: "Christus, secundum quod est homo," etc. Ergo.—Addito tamen aliquo nomen illud trahente ad standum pro supposito, puta *hic homo*, esset propositio potius neganda.

Conclusio 2^a.—MAGIS EST NEGANDA QUAM ASSERENDA
PROP. ALTERA "CHRISTUS, SECUNDUM QUOD HOMO, EST DEUS."

Etenim, uti constat ex proxime dictis, terminus *homo* in reduplicazione positus, etsi teneri possit pro supposito, magis proprie tamen supponit *pro natura*. Atqui Christo convenit esse Deum ratione suppositi divini, non ratione naturæ humanæ. Ergo.—Bene vero conceditur prop. sic modificata: *Christus, secundum quod iste homo, est Deus*; quia pronomen demonstrativum *iste* facit ut *homo* stet pro supposito. Conceditur quoque altera: *Christus, secundum quod homo, habet gratiam unionis*, quia ordinari ad hauc gratiam convenit Christo ratione humanæ naturæ assumptibilis (a. 11 ad 1).

Conclusio 3^a.—PROPOSITIO "CHRISTUS, SECUNDUM QUOD HOMO, EST PERSONA" SUB ALIUO SENSU VERA ESSE POTEST, AT SUB ALIU FALSA DICI DEBET.

Sane, in primis terminus *homo* potest reduplicative sumi ratione *suppositi*; qua in hypothesi, patet veritas prædictæ propositionis: siquidem suppositum humanæ naturæ nihil est aliud quam persona Filii Dei.—Sin autem, et verius, homo accipiatur pro *natura*, tunc duplex esse potest determinatio per vocem illam inducta: *specificativa* quidem, quatenus significetur humanæ naturæ competere ut sit alicujus personæ in ea subsistentis, et hoc modo propositio vera est; *reduplicativa* vero, quasi Christus vi humanitatis sibi conjunctæ ex eaque derivatam hypostasis rationem habeat: quod aperte falsum est et Nestorianismum sapit.—Unde locutio illa non est adhibenda sine explicatione¹.

1.—De communicatione idiomatum conferri potest *Petavius* (l. IV, c. 16), qui ex scriptis Patrum varias collegit regulas, haud tamen a doctrina D. Thomæ dissonas.

QUÆSTIO SECUNDA

DE UNITATE CHRISTI QUÂNTUM AD ESSE

Communi sub adspectu unitas Christi consideranda objicitur (ea enim quæ pertinent ad unitatem vel pluralitatem in speciali¹ suis locis determinantur). — Cum vero unitas communius sumpta esse in primis attineat, duo disputanda instituemus, *unum* de unitate Christi absolute, *aliud* de unitate secundum esse existentiae.

ARTICULUS I.

Utrum Christus sit unum vel duo.

Ut ex titulo patet, quæritur de unitate Christi non solum *masculine*, sed etiam *neutraliter* significata. — Doctrina intenta ferit tum *veteres* illos ponentes in Christo duo supposita (etsi unam personam suppositorum completivam) ideoque docentes Christum esse unum masculine, sed duo neutraliter secundum modum informem, tum *Nestorianos* inducentes in Christo duas personas subindeque eum etiam masculine duo esse profitentes.

Conclusio. — CHRISTUS ASERENDUS EST NON SOLUMmodo UNUS, SED ETIAM UNUM.

1^a Pars est *de fide*, juxta illud *Symb. Athan*: “*Non duo, sed unus est Christus*”; cui sententiae consonant *Symb. Nicænum* et *Conc. Ephes.* (can. 2 et 13). — *Ratio* evidens est: siquidem in Christo non sunt duas persone; *unus* autem personam significat. Hinc, quemadmodum in Trinitate tres personæ dicuntur *unum* propter unitatem naturæ quacum

1 — V.g. *de scientia, de nativitate Christi.*

singulae identificantur, ita in Incarnatione Christus pronuntiatur unus propter unitatem suppositi et personæ.

2^a Pars prob.—Eatenus Christus esset duo neutraliter, quatenus ambae naturæ, *divina* et humana, de eo abstractim prædicarentur. Atqui non possunt duæ naturæ de Christo prædicari nisi concrete, seu prout significantur in supposito. Ergo, *Maj.* constat ex eo quod numerus dualitatis in Christo ponitur circa ipsas naturas; porro ut aliquis dicatur duo, non sufficit ut plura habeantur in eo, sed requiritur ut ipsemet sit illa plura per prædicationem de eo tanquam de subjecto: ergo. *Min. ostend.* Etenim natura secundum se considerata, et abstractum expressa, non vere potest prædicari de supposito seu persona, nisi in Deo, in quo non differt *quod est* et *quo est*: quam ob rem, licet in Christo Filius Dei sit divinitas et Deus, non tamen de eo prædicari potest humanitas in abstracto, sed solum in concreto. Est enim Christus, non humana natura, sed homo veluti indistincte et hic homo *Jesus* veluti distincte habens naturam humanam. Igitur habet Christus duas naturas, non tamen est duo.—*Conf. exemplo hominis.* Tamenetsi Petrus constet ex pluribus, scil. ex anima et corpore, non tamen est plura vel duo; ita Christus, subsistens in duabus naturis, unus et unum est, non duo, quia nature illæ conveniunt in unum suppositum.

Coroll.—1^o Sciscitanti an Christus sit Deus vel homo, responderi potest quod est *utrumque*, voce hac tenente vicem duorum nominum significantium divinitatem et humanitatem in concreto.

2^o Christus dici nequit *alius* et *alius*; neque etiam, proprie loquendo, *aliud* et *aliud*; ¹ et sicubi hæc locutio reperiatur (puta apud S. August. et Greg. Naz.), exponenda est adeo ut sit sensus: *habens aliam et aliam naturam*.

3^o Nec in sensu proprio et formalii conceditur propositio: *Christus est divinitas et humanitas simul*, quia Christus plus includit quam significant divina et humana natura simul conjunctæ, scil. ipsam personalitatem in qua conjunguntur. Unde Patres, penes quos sententia illa adhibetur, aut abstracta pro concretis usurparunt, aut in sensu *identico* vel *causaliter*

1—Cf. ea de re *Joan. a S. Thoma* (in h. art.), ubi D. Thomam defendit adversus Vasquezium et Suarezium.

tantum locuti sunt, quatenus Christus est persona composita ex utraque natura.

Solv. obj. — OBJ. 1. — Christus non est tantum homo. Atqui id importat quod sit aliquid aliud quam homo. Ergo.

RESP. C. M. — *D.m*: id importat quod habeat aliam naturam quam humanam, *C*; quod vere sit aliud quam homo, *N*. — *Neg. conseq.*

Aliud, cum sit relativum diversitatis substantiae, proprium refertur ad suppositum; unde Christus non est aliud quam homo, sed aliam quam humanam naturam habet.

OBJ. 2. — Christus est aliquid quod est Pater, et aliquid quod non est Pater. Atqui aliquid et aliquid sunt duo. Ergo.

RESP. C. M. — *D.m*: aliquid et aliquid absolute seu sine addito... *C*; aliquid quod est Pater, scil. natura divina, et aliquid quod non est Pater, scil. suppositum humanæ naturæ in Christo, sunt duo, *N*. — *Neg. conseq.*

Cum dicatur "Christus est aliquid quod est Pater," *aliquid* ibi tenetur pro natura divina, quæ etiam in abstracto de Patre Filioque predicatur; at in aliis verbis "Christus est aliquid quod non est Pater," *aliquid* supponit, non pro natura humana in abstracto, sed pro homine. Jamvero suppositum humanitatis in Christo, utpote ipsa persona Filii Dei, non intrat in numerum cum natura divina quæ Patri et Filio identica est.

OBJ. 3. — Sicut forma accidentalis facit alterum, ita forma substantialis aliud. Atqui Christus dici potest alterum et alterum. Ergo.

RESP. D. M. : ...spectata proportione ad utramque formam, *C*; secundum habitudinem ad suppositum, *N*. — *C.m*. — *Neg. conseq.*

Alterum importat diversitatem accidentis, *aliud* diversitatem substantiae ideoque suppositi. Quocirca aliquid, idem manens suppositaliter, dici potest simpliciter alterum; at vero nequit simpliciter praedicari aliud.

ARTICULUS II.

Utrum in Christo sit tantum unum esse.

1^o Gravior hæc quæstio jam pridem, nec levi disceptantium controversia, hinc illincque a theologis agitatur pro variis, quæ invaluerunt, systematibus de habitudine inter essentiam, personam et existentiam.—Duæ sunt præcipuae sententiæ: una quidem *Suarezii*, *Petavii*, *Franzelin* aliorumque tribuentium humanitati Christi propriam existentiam creatam præter existentiam Verbi; *alia D. Thomæ et Thomistarum* (inter quos præminent acutissimus *Cajetanus*) negantium existentiam illam creatam et docentium humanitatem in Christo existere ipsâ increatâ Verbi existentiâ.

2^o Em^{us} *Satolli* (*Prælect.* in h. art.) de prima opinione opportune scribit: “Nec tenui probabilitate fultam reputo contrariam sententiam; quæ tamen potest sustineri nou egrediendo Theologæ limites et incolumi fide, cum una et altera oppositarum conclusionum procedat ex metaphysicis principiis. Nostra vero sunt certissima S. Doctoris (Thomæ) documenta; quæ rationi maxime satisfaciunt, et dogmati Unionis hypostaticæ explorando mire accommodantur.”

3^o Pauca præmittam de essentia et existentia.—“*Ens*, primo et absolute, significat id *quod habet esse* vel *habens esse*; et consequenter *essentia* proprie et vere significat *id per quod habens esse constituitur in proprio genere vel in propria specie*¹.”—“*Esse* autem vel *existentia* est quasi exercitium essendi, et definitur: *ultima actualitas subsistentis singularis seu suppositi*². a) *Actualitas* quidem; quia per esse substantia constituitur *actu* in rerum natura. b) *Actualitas suppositi*, in quo, veluti in subjecto, recipitur; siquidem natura primo et principaliter ordinat ad esse supposita, et ex consequenti partes et accidentia. c) *Actualitas ultima*, ut distinguatur a forma substantiali quæ rem actuat in linea *quidditatis* antequam per esse actuari intelligatur in linea

1—Lorenzelli, *Phil. theor. insit.* (ed. altera), *Metaphys. gen.* P. II,
1. III, n. 1.
2—Ibid., l. IV, n. 1.

subsistentium. — Præsupponimus, tanquam sententiae nostræ fundamentum, essentiam et esse *realiter differre* in creaturis, prouti philosophi post D. Thomam demonstrant.

Conclusio. — IN CHRISTO PONENDUM EST UNUM TANTUM ESSE EXISTENTIÆ, LICET CUM DUPLICI RESPECTU AD NATURAM DIVINAM ET HUMANAM.

1^a *Pars prob:*

1^o *Ex unitate esse personalis seu substantialis Christi.* — Eatenus oporteret ponere in Christo duo esse, unum secundum quod est Deus, aliud secundum quod est homo, quatenus humana natura Filio Dei adveniret, non hypostatice vel personaliter, sed accidentaliter tantum. Atqui superius acceperimus (Disp. II, Q. I) humanam naturam, non accidentalis, sed substantialis vel personali unione Filio Dei esse conjunctam. Ergo, *Major* demonstranda est; in quam operam sequentia convenient. — a) Et *primo*, quia in Christo duas sunt naturæ et una hypostasis, necesse est quod ea quæ ad naturam in ipso pertinent, sint duo; quæ vero ad hypostasim, unum tantum. — b) Porro *secundo*, esse seu existentia pertinet et ad naturam et ad hypostasim: ad hypostasim quidem, sicut ad id *quod* habet esse; ad naturam vero, sicut ad id *quo* aliquid habet esse. Natura enim significatur per modum *formæ*, *qua* aliquid est ens, puta albedine est aliquid album, et humanitate est aliquid homo; suppositum autem se habet per modum *subjecti* exercentis actum essendi. — c) Sed *tertio* esse duplex secernitur: *unum* quidem non pertinens ad esse personale hypostasis subsistentis, v.g. esse album, et hoc non dicitur esse personæ simpliciter, sed *secundum quid* tantum, potestque *multiplicari* in una hypostasi vel persona, sicuti Socrates simul est albus et musicus; *aliud* autem est esse pertinens ad ipsam hypostasim secundum se seu *simpliciter*, et hoc impossibile est in una persona multiplicari, siquidem unus rei seu substantiæ unum est esse substantiale. — d) *Quarto* igitur, quemadmodum elementia integrantia personam humanam, sive sint personæ coœva, sive posterius advenientia, non nisi unum esse constituant, uti patet de partibus integralibus et essentialibus, v. g. esse capitatum et esse animatum; ita natura humana Christi, in unitatem personali Filii Dei assumpta, non secum trahit propriam existentiam, sed per ipsum esse personale seu substantiale Verbi existit.

2º Ex primo susceptivo existentiae.—Juxta doctrinam mox expositam D. Thomæ, natura non est nisi principium quo existentiae, suppositum vero est principium quod; adeo ut prius intelligi oporteat naturam personari quam existere. Hinc existentia tribuitur naturæ mediante persona, quæ est primum susceptivum actus essendi, quæque idcirco intimius naturæ inest quam ipsa existentia (*Cajet. in h. loc.*). Atqui natura humana in Christo præventa est per Verbum ne constitueret propriam personalitatem. Ergo a fortiori præventa est ne sortiretur propriam existentiam creatam.

3º Ex inconvenientibus adversœ sententiae.—Recitare libet cl. *Satolli* acute adversarios redarguentem (in h. art.) : “Hoc semel dato (subsistentiam realiter non distingui a singulari natura), quæritur ab iis, cùjusnam potentiae et subjecti sit utrumque esse naturæ et personæ. Debent respondere, quod in uno eodemque suscipiuntur, non simul naturæ, sed unum prius altero. Aut esse ergo naturæ est in potentia ad esse personæ; et tunc actualis existentia non erit amplius ultima actualitas, sed potentiale quidpiam intrinsece ordinatum ad subsequens esse personæ. Hoc quidem dissonat universim philosophiæ et conceptui actualis existentiae in genere substantiæ. Vel asserunt quod utrumque esse suscipiatur in supposito; et tunc unum prius est in genere substantiæ, et aliud in genere accidentis. Quocumque se vertant, disjunctiva illa manet: aut unionem esse accidentalem, aut in Christo unum actum existentiae divinum haberi.”

4º Ex auctoritate Doctorum, scil. Alb. Magni et S. Thomæ, quos perperam incassumque adversarii in suam partem pertrahere moliuntur.—Nam *Alb. Magnus* (3 Sent. D. VI, a. 4-5) explicite ponit *unum esse* in Christo, negans *duo esse* naturalium.—*D. Thomas* non solum hic, uti constat ex argumento fundamentali superius allato, sed etiam alibi hoc ipsum sentit, puta (3 S. D. VI, Q. II, a. 2): “Impossibile est, ait, quod unum aliquid habeat *duo esse* *substantialia*;” et (Quodlibet IX, Q. II, a. 3): “Quia ergo in Christo ponimus unam rem subsistentem tantum, ad cuius integratatem concurrit etiam humanitas, quia unum suppositum est utriusque naturæ; ideo oportet dicere quod *esse substantialia*, quod proprie attribuitur supposito, in Christo est *unum tantum*,” etc. Quæ objiciuntur ex eodem S. Doctore sub horum luce dissolvenda sunt (cf. *Cajetanus*, *Satolli*, etc).

2^a Pars ad majorem veritatis illustrationem subjicitur, paucis declaranda. — Siouti in hypothesi quod personæ humanae jam constitutæ, puta Socrati, adveniant manus¹, pedes, etc, ex his non accrescit Socrati aliud esse, sed solum nova relatio ad membra posterius accepta; sic accedente humanitate ad personam Verbi, non novum ei esse personale advenit, sed nova habitudo esse præexistentis ac naturam humanam: unde duplex jam in Christo relatio viget unius ejusdemque suppositi et esse, prima et *principalis* ad Divinitatem, altera et *secundaria* ad humanitatem. — Hac distinctione utendum est ad exponendum locum quem objiciunt ex Angelico (Q. un. de Un. Verb. Inc., a. 4), ubi tribuit Christo, quatenus homo est, esse quoddam secundarium (nisi dicamus cum pluribus aut questionem illam non fuisse ab ipso D. Thoma editam, aut S. Doctorem seipsum retractasse).

Solv. obj. — OBJ. 1. — Juxta Damasc. (Orth. Fid. III, 13), ea quæ consequuntur naturam in Christo duplicantur. Atqui esse consequitur naturam seu formam. Ergo.

RESP. D. M:... quæ consequuntur naturam tantum... C; naturam et suppositum sub diversa ratione, N. — C.d.m:... sicut subjectum *quod* existit, N; sicut principium *quo* aliquid est, S.d: scil. huic principio naturali resultantiæ nectitur subsistentia cum existentia propria, C; non potest subsistentia et existentia creata supernaturaliter prohiberi et suppleri per suppositum et esse divinum, N. — Neg. conseq.

Esse consequitur naturam sicut *qua* aliquid est tantum, personam vero sicut *habentem* esse. Unde, duplicatâ naturâ sub uno supposito per divinam actionem, esse seu existentia magis retinet unitatem secundum unitatem hypostasis ceu subjecti proprie dicti, quam habeat dualitatem secundum naturarum numerum.

OBJ. 2. — Esse Filii Dei, utpote idem ac natura divina, æternum est. Atqui hominis-Christi esse non est æternum, sed temporale. Ergo.

RESP. D. M:... secundum quod in se est et *simpliciter*, C; secundum relationem quam induit ad naturam humanam

1.—Miracula hujus generis contigisse novimus in quibusdam martyribus vel sanctis, puta in *Joan. Damasc.* cui truncata dextera, B. Virgine auxiliante, restituta est (Brev. Rom.).

cum Verbo hypostatico conjunctam, *N.*—*C.d.m.*—*Neg. conseq.*

OBJ. 3.—In Trinitate, quamvis sint tres personæ, unum est esse ob unitatem naturæ. Atqui in Christo duæ sunt naturæ. Ergo.

RESP. *D. M.*:... ob unitatem naturæ, in qua non differt realiter *quo* est et *quod* est, *C.*; quasi realis sit hæc distinctio sicut in creaturis, *N.*—*C.d.m.* :... secundum eamdem habitudinem ad personam Verbi, *N.*; ita ut natura humana non sit nisi id *quo* Christus-homo existit, *C.*—*Neg. conseq.*

OBJ. 4.—In Christo anima dat esse corpori. Atqui nequit dare esse increatum. Ergo.

RESP. *D. M.* :...dat esse specificum seu perficit corpus in ratione *speciei*, *C.*; dat esse actualis *existentiæ*, *S.d.*: per se et directe, *N.*; indirecte seu quatenus complet naturam secundum quam Christus-homo existit, *C.*—*C.d.m.*—*Neg. conseq.*

OBJ. 5.—Existentia est actualitas naturæ. Atqui repugnat quod esse increatum Verbi actuet naturam creatam. Ergo.

RESP. *D. M.* :...naturæ qualiscumque, *N.*; naturæ terminatæ per subsistentiam, *C.*—*D.m.* :...per modum *formæ* inhærentis, *C.*; per modum principii perficientis seu præbentis *excellenterius* et *terminative* consistentiam illam quam existentia creata præstat informativæ, *N.*—*Neg. conseq.*¹

1—Alia plura argumenta solvit *Cajetanus* (*Comm. in h. art.*), qui totam rem magistraliter enodat ac dilucidat.

QUÆSTIO TERTIA

DE UNITATE CHRISTI QUANTUM AD VOLUNTATEM

Consequitur determinanda unitas Christi quoad voluntatem et operationem, ut exploratum fiat quo pacto substantialis illa unitas unius volentis et operantis possit cum pluralitate activarum virium componi.—Et primum res enucleandam se præbet secundum quod ad voluntatem pertinet.

Quo in negotio, proposita disceptatio commode poterit in quatuor articulos partiri. Siquidem inquirendum venit primo an præter divinam voluntatem humana quoque voluntas in Christo ponenda sit (art. 1); secundo *qualis* fuerit voluntas hæc humana. Hoc autem alterum inspiciendum est: *absolute* quidem seu secundum modum agendi voluntatis crætæ (art. 2); *relative* vero seu per respectum ad divinam voluntatem, tum quoad rem volitam (art. 3), tum quoad ipsos volendi actus (art. 4).—Gradum faciamus ad singulorum considerationem.

ARTICULUS I.

Utrum in Christo sint due voluntates.

(Q. XVIII, a. 1-3)

Nonnulla præmittere juverit circa errores et quæstionis sensum seu statum.

1º Plures hæretici dualitatem voluntatum in Christo inficiati sunt, dispari tamen motivo inducti.—*a) Apollinaris* quidem, cum Verbum in animæ rationalis locum sufficeret, humanam Christo voluntatem subtraxit. Similiter *Eutyches*, reductis in unam Christi naturis, unam quoque voluntatem ponere cogebatur. Quin imo *Nestorius* in eumdem errorem offendit, quatenus unionem Dei et hominis tueretur secun-

dum affectus voluntatisque unitatem. — b) At, sæc. VII ineunte, directius cœpit error ille propugnari a *Sergio*, patriarcha Cptano, *Cyro Alex.*, *Macario* Antioch., eorumque sequacibus qui, licet duas in Christo naturas proflerentur, unam tantum voluntatem agnoverunt, ne voluntatum, si plures darentur, dissidia ac lites erumperent: dicti sunt isti *Monothelitæ*.

2º Dubium est inter auctores, in quo situs fuerit *error palmaris* Monothelitarum, tenentibus quibusdam illos non negasse duas potentias volitivas in Christo, sed solum voluntatem seu operationem humanam, plerisque tamen eis tribuentibus utramque negationem: quod verius æstimandum est (ut ostendit *Billuart*, Digr. hist. de *Monoth.* sect. 2). Cæterum, cum hæretici *unam energiam* in Christo admitterent, non parum dubitationi contulit ambiguitas illius vocis, quæ et qualitatem et facultatem et motionem significare potest. — Monothelismo strenue obstiterunt tres præcipui veritatis tutores, nimiruni *S. Sophronius*, Patr. Hierosol., *S. Maximus* abbas M., et postmodum *S. Joan. Damascenus*. Atque tam pertinax hæresis, cui *Honorius R. P. Sergii* fraude deceptus imprudenti sermone (non doctrina¹) faverat, anathemate perculsa fuit in *Conc. œcum. VI*; quam damnationem sequentia Concilia confirmavere.

3º Statuendum in primis est, præter voluntatem divinam, alteram quoque *humanam* in Christo poni oportere; quæ

1—Juxta Jungmann (*de Verbo inc. P. I*, c. II, a. 6, sch. 1) controversia de Honorio ad hec reduci potest capita:—1º Certo constat ex epistolis Pontificis Honorium non esse professum *doctrinam* Monothelitarum; quippe docet utrasque naturas in Christo operari quæ sua sunt. — Verum 2º quoad *loquendi modum*, inconsulte probavit Sergii consilium de omittenda professione unius vel duplicitis voluntatis seu operationis. — Unde 3º Honori culpa, non dogmatica, sed *disciplinaris* fuit, incolumi manente et fidei integritate et Romanæ Sedis infallibilitate. — 4º Ubi idem Pontifex affirmat *unam* Christi voluntatem, satis ex contextu apparet verba illa aut referri ad solam Domini *humanitatem* cuius fuit voluntas ab omni carnis rebellione libera, aut significare *unitatem moralem* inter velle divinum et humanum. — 5º *Conc. œcum. VI* damnavit Honorium, sed ut *fautorem* dumtaxat hæreses propter imprudentem agendi modum (uti multi sentiunt), vel ut *hæreticum* sed sententiæ invalida ex defectu potestatis penes Legatos pontificios (prout contendit Pennachi in sua Diss. *de Hon. I R. P. causa in Conc. VI*).

voluntas humana dupli distinctioni subest. Quippe alia est voluntas *essentialiter* sumpta, alia *participative* dicta; rursus quæ *essentialiter* voluntas est, in *naturalem* et *ratiocinalem* dispescitur. Ergo tria concludenda nos manent.

Conclusio 1^a. — NECESSUM EST AGNOSCERE IN CHRISTO DUAS VOLUNTATES, UNAM SCIL. DIVINAM, ET ALIAM HUMANAM; prout definitum est in *Conc. eccl. VI* (Cptauo III): “*Duas naturales voluntates* in eo (J. Christo) et *duas naturales operationes* indivise, inconvertibiliter, inseparabiliter, inconfuse secundum SS. Patrum doctrinam adæque prædicamus, non contrarias, absit, juxta quod impii asseruerunt hæretici, sed sequentem ejus humanam voluntatem et non resistenter vel reluctantem, sed potius et subjectam divinæ ejus atque omnipotenti voluntati.”

Sane 1^o *Scriptura* apertis in locis humanam Christi voluntatem a divina distinguit, puta (*Luc. XXII, 42*): *Pater, si vis, transfer calicem istum a me: verumtamen, non mea voluntas, sed tua fiat;* et (*Joan. V, 30*): *Non quæro voluntatem meam, sed voluntatem ejus qui misit me.* Porro voluntas divina communis erat Patri et Filio: ergo tum divina tum humana in Christo vigebant.

2^o Abstinemus a referendis *Patrum* sententiis, quæ innumeræ propeinodum sunt remque nostram testatissimam faciunt. *Græcorum* simul ac *Latinorum*, qui ante Monotheismum floruerunt, pleraque collegit testimonia eruditissimus *Petavius* (l. VIII, c. 8-9); quibus recitatis, concludit: “Hinc igitur apparet, jam pridem et ante Monotheletarum exortum, damnatam et proscripatam istorum fuisse perfidiam cum ab *singulis* Patribus qui de vera Christi humanitate contra antiquos hæreticos scriptum quodpiam fecerunt, tum ab omnibus *Concilii*, tam *generalibus* quam *minoribus*, quæ de ea re nonnihil decreverunt.”

3^o *Ratione* sic adstruitur dualitas voluntatum et motuum.
— a) Filius Dei naturam humanam assumpsit perfectam. Atqui ad perfectionem humanæ naturæ pertinet voluntas, quæ est naturalis ejus potentia, sicut et intellectus. Ergo concedendum est in Christo fuisse volendi, sicut et intelligendi, *vim* humanam. Atqui per assumptionem humanæ naturæ nullam diminutionem passus est Filius Dei in his quæ pertinent ad divinam naturam, cui competit volitiva

facultas. Ergo.—*b*) Præterea, patentibus ipsis adversariis, humana natura conjuncta est Verbo Dei, ut esset instrumentum divinitus motum secundum proprietatem suæ naturæ. Atqui instrumentum quidem inanimatum, uti serra, movetur ab artifice per solum motum corporalem; instrumentum animatum anima sensibili movetur per appetitum sensitivum; ast instrumentum perfectum anima rationali movetur secundum ejusdem animæ voluntatem, quasi servus per imperium domini. Ergo.

Conclusio 2^a.—PRÆTER VOLUNTATEM HUMANAM ESSENTIALITER DICTAM, PONENDA EST IN CHRISTO ALIQUA VOLUNTAS SENSUALITATIS SEU PER PARTICIPATIONEM. B 8, 18, a, 2

Prob.—Quia in humanitate includitur natura animalis, sicut in specie genus, oportuit ut Filius Dei cum humana natura assumeret quæ genere animalis sunt, qualis est appetitus sensitivus seu sensualitas. Atqui sensualitas, pro sua coniunctione cum ratione, nata est eidem rationi obediens et de voluntatis influxu participare. Ergo recte in Christo ponitur voluntas aliqua sensualitatis seu *participative* dicta.—Hæc tamen quia voluntarium suum ex una natura voluntateque rationali desumit, non ideo voluntas humana in uno eodemque homine plurificari solet, subindeque *una* Christi voluntas humana assuritur.

Conclusio 3^a.—IN CHRISTO ADMITTENDA EST UNA POTENTIA VOLUNTATIS ESSENTIALITER SUMPTÆ; SED QUA ACTUS IPSE DICITUR VOLUNTAS, HÆC DUPLEX EST: UNA UT NATURA, ALTERA UT RATIO. B 8, 18, a, 3

1^a *Pars* patet; quia in quolibet ordine est unum primum movens. Sed voluntas est *primum movens* in genere humorum actuum. Ergo in uno homine non est nisi una voluntas proprie dicta.—Accedit quod potentiae diversificantur secundum objecta. Omnes autem spirituales affectus feruntur in communem rationem *boni*, quod pertinet ad voluntatem.

2^a *Pars* ostend. —Diversi actus merito denominantur pro diversa unius potentiae habitudine ad suum objectum. Atqui alterius rationis est habitudo voluntatis, secundum quod fertur in aliquid *absolute* et sub specie finis volitum, uti est sanitas; alterius vero rationis ejus habitudo, secundum quod fertur in aliquid volitum solum ex *ordine ad aliud*, sicut est sumptio medicinæ. Ergo in voluntate Christi, haud secus ac in nostra,

distinguere est ex præmissis duplē actum: unum per modum *simplicis voluntatis*, qui etiam dicitur *voluntas ut natura* (*thelesis* juxta Damasc.) ; aliud per modum voluntatis *consiliativæ*, qui nuncupatur *voluntas ut ratio* (*boulesis*).

Solv. obj. (cont. 1^{am} concl.).— Voluntas est primum movens et imperans in unoquoque volente. Atqui primum movens et imperans in Christo fuit divina voluntas. Ergo.

RESP. D. M :... sive per modum causæ primæ, sive per modum causæ secundæ, *C*; per modum causæ primæ tantum, *N*.—*C.d.m* :... veluti causa prima, cui humana voluntas obsequebatur, *C*; ad exclusionem alterius voluntatis inferioris, *N*.—*Neg. conseq.*

Sicuti sanctorum pīe voluntates moventur secundum voluntatem Dei, quin ex hoc naturam propriam exuant, ita humana Christi voluntas nutu divinæ voluntatis perfecte regebatur, suam retinens agentis secundi indolem; unde legitur (Ps. XXXIX, 9): *Ut facerem voluntatem tuam, Deus meus, volui.*

OBJ. 2.— Illud solum multiplicatur in Christo quod pertinet ad naturam. Atqui voluntas non pertinet ad naturam. Ergo.

RESP. D. M :... quod pertinet ad naturam sive immediate sive mediate, *C*; immediate tantum, *N*.—*D.m* :... sub ratione potentiae et actus necessarii, puta respectu felicitatis, *N*; sub ratione actus liberi, *S.d*: non pertinet ad naturam immediate, *C*; nec mediate per rationem naturalem in qua libertas radicatur, *N*.—*Neg. conseq.*

OBJ. 3.— Voluntas magis dependet a persona quam a natura. Atqui in Christo fuit et est una tantum persona. Ergo.

RESP. D. M : Voluntas *absolute* sumpta magis dependet a persona quam a natura, *N*; *certus modus* volendi dependet a natura, secundum quod est in *tali* persona, *C*.—*C.d.m* :... et ideo una tantum in eo fuit voluntas, *N*; fuit perfectissimus et ordinatissimus volendi modus pro exigentia hypostasis et voluntatis divinæ, *C*.—*Neg. conseq.*

ARTICULUS II. (f. 18v. a. 4)

Utrum in Christo fuerit liberum arbitrium.

Nobilissima voluntatis *dōs* et proprietas est liberum arbitrium ; cuius integratatem ut in Christo salvemus, summa duo motiva suadent, scil. tum Salvatoris nostri dignitas, tum salutarium ejus meritorum necessaria conditio quæ in libertate consistit.—Jamvero, licet catholici omnes perfectam Christo libertatem humanam attribuant, magnus tamen opinionum conflictus est in *explicanda* egregia illa dote eaque concilianda cum impeccabilitate et beatifico statu Hominis-Dei.—Duabus conclusionibus veritatem statuere ejusque naturam, pro modulo nostro, definire conabimur.

Conclusio 1^o. — FUIT IN CHRISTO LIBERUM ARBITRIUM, scil. immunitas a coactione et necessitate :—quod jure definitum aestimatur in *Conc. œcum. VI*, ubi decretum est Christo competere omnes proprietates humanæ naturæ.

1^o In *Scriptura* per prophetiam prædicatur de Christo puerο et ad discretionis ætatem progrediente *eligendi* actus, proprius liberi arbitrii (*Is. VII, 15*) : *Butyrum et mel comedet, ut sciat reprobare malum et eligere bonum* ¹.—Præterea in N. T. laudatur Christi *obedientia* (*Phil. II, 8*) : *Factus obediens usque ad mortem* ; quæ virtus ex libertate laudis rationem desumit.

2^o Ut constat ex art. præc., duplex fuit in Christo voluntatis actus : unus tendens in aliquid secundum se volitum sub ratione finis, sc. voluntas ut natura ; alijs prosequens ea quæ accipiuntur per respectum ad finem, sc. voluntas ut ratio. Atqui voluntas *ut ratio*, qua contendimus in ea quæ sunt ad finem, est liberum arbitrium. Ergo. *Min.* apparet ex eo quod per hanc voluntatem unum præ pluribus eligimus, scil. id quod ratio ultimo judicio practico preferibilius voluntati in ordine ad finem proposuerit ; *eligere autem proprium* est liberi arbitrii munus. Ergo.

1.—“ Indicatur *Messias* talis qui in paupertate et humilitate vitam degat et in ea conditione in se edat præclara virtutis documenta et simul in se experiatur exercitium virtutum cum laboribus ac molestiis esse conjunctum” (*Knabenbauer, Comm. in h. l.*).

*f. fundens
(forse)*

Conclusio 2^a. — LIBERTAS CHRISTI CONCILIANDA SUSCIPITUR CUM EJUS BEATITUDINIS ET IMPECCANTIAE CONDITIONE. — Primum memorare juverit duplice in distingui libertatem : unam quidem quoad exercitium actus, puta velle aut non velle, et vocatur libertas contradictionis ; aliam quoad specificationem objecti, puta velle hoc vel illud, et vocatur libertas contrarietatis vel diversitatis, secundum quod specificatio contraria sit aut tantum *disparata*. — Certum est facultatem peccandi, quae ad libertatem contrarietatis pertinet, non esse de ratione essentiali libertatis : reliquos libertatis modos Christo vindicamus.

Concl. sibi vult beatitudinem animæ Christi ejusque impeccantiam non vetuisse quominus ipse divina præcepta cum naturalia seu moralia, tum supernaturalia (non excepto præcepto dilectionis Dei), libere exequeretur.

1^o Equidem Christus, ut beatus et supremo Bono immediate conjunctus, continuo necessarioque actu *Deum in se* diligebat eademque necessitate volebat quidquid ex se et inseparabili ter ad illum statum pertineret : id ultiro concedimus. — At 2^o quemadmodum Deus, necessario volens se ipsum, libere tamen vult alia a se ; ita Christus, necessario Deum in se diligens, poterat libere Eum diligere, prout est *ratio creaturarum* quarum connexio cum *Ipsò* contingens est, et sic, impeccabilis manens, libertatem exercitii et specificationis disparate circa media ad finem exercere. Etenim determinatio quidem intrinseca repugnat libero arbitrio, non vero, saltem præcise et formaliter loquendo, infallibilitas practicii judicii et indefectibilitas in prosequendo bono. Atqui, licet Christus infallibiliter verum speculativum et practicum cognosceret et impeccabilitate gauderet, nequaquam tamen erat forma determinante premotus ad bonum particulare. Ergo. *Maj.* constat ex alibi disputatis circa conditionem et naturam libertatis : facultas enim errandi et peccandi indicium quidem ac nœvus libertatis est, non autem ad ejus essentiam pertinet. Idcirco potest lux menti præfulgens certitudinaliter demonstrare valorem proprium mediiorum ad finem, ita ut *de facto* et infallibiliter electio boni prodeat, quin propterea libertas perimitur ; modo tamen voluntas immunis existat ab omni vi determinante ac necessitante. *Min. prob.* Necessitas determinativa voluntatis Christi nequit admitti neque ex parte

rerum volitarum, neque ex parte subjecti volentis, neque ex parte præcepti impositi: ergo. a) *Non ex parte rerum volitarum: creature non habent ex se necessariam connexionem cum Deo, imo nec certa media de se exclusive exiguntur a fine Redemptionis.* b) *Non ex parte subjecti volentis:* Deus enim movet efficaciter voluntatem humanam, non vero eam physice præmovet aut determinat (vid. Tract. de *Deo et de Gratia*). c) *Non ex parte præcepti impositi: præcepta enim (quæ vere et proprie fuisse Christo imposta secundum obvium Scripture sensum contra quosdam asserimus) moralem tantum directionem imprimunt, et impeccantia efficit quidem ut voluntas hanc directionem infallibili rectitudine sequatur, non tamen impulsu necessario.*

Conf. concl. ex verbis *D. Thomæ* (heic, resp. ad 3): "Voluntas Christi, licet sit determinata ad bonum (i. e ad bonum in genere et bonum divinum *in se*), non tamen est determinata ad hoc vel illud bonum. Et ideo pertinet ad Christum eligere per liberum arbitrium confirmatum in bono, sicut ad beatos¹."

Solv. obj.—OBJ. 1 (cont. 1st concl.).—Juxta Damasc. (Orth. Fid. III, 14), "sententiam et electionem in Domino dicere non possumus, si quidem proprie loqui studeamus." Ergo.

RESP. *D. antec...* et Damascenus excludit a Domino *simpliciter* sententiam et electionem, *N*; secundum quod sententiae et electioni accidit in natura ignorante *dubitatio*, que tamen non est de necessitate electionis, ut patet in Deo, *C.*—*Neg. consequentia.*

OBJ. 2.—*Electio supponit consilium* (I-II^æ, Q. XIV). Atqui consilium, seu inquisitio de incertis, non fuit in Christo. Ergo.

RESP. *D. M* :...supponit *judicium* certum ex quo sequitur, sive *judicium* illud habeatur per *consilium* sive non, *C*; supponit *consilium* ipsum, *S.d* : in nobis, *C*; absolute et in eo qui valeat de agendis *judicare* absque *previa inquisitione*, *N*.—*C.m.*—*Neg. consequentia.*

1.—De hac questione cfr., si lubet, *Gonet et Billuart* qui varias theologorum opiniones referunt et expendunt, suamque, solutis adversis argumentis, veluti solidiorem adstruunt.

B
OBJ. 3. (cont. 2^{am} concl.).—Stante præcepto v. g. moriendi, Christus non poterat non acceptare mortem (secus peccasset). Atqui id involvit negationem libertatis. Ergo.

RESP. D. M :... secundum potentiam physicam et in sensu diviso, N ; secundum potentiam moralem et in sensu composito, C.—C.d.m.—Neg. conseq.

Cum voluntas Christi non subbesset ulli determinationi cogenti ad observanda præcepta divina, inerat ei potentia *physica* respectu mortis non acceptandæ, ideoque præcisione facta a præcepto seu in sensu *diviso* simpliciter poterat mortem recusare. At, in sensu *composito*, datum a Patre præceptum inducebat necessitatem *moralement*, cui Christus infallibili simul et liberrimo voluntatis exercitio obsecutus est¹.

ARTICULUS III.

q. 18. a. 3
Utrum voluntas humana Christi fuerit omnino conformis divinae voluntati in volito.

Qualis fuerit in Christo humana voluntas secundum habitudinem ad voluntatem divinam ex parte *rei volitæ*, modo perspiciendum objicitur.—Ubi advertere est dubium signanter proponi de conformitate voluntatis humanæ ad divinam *in volito*: nam ipsos *actus*, qualescumque fuerint, volitionis in Christo, volebat indubitanter Deus (3 S. D. XVII, Q. I, a. 2, sol. 4):

Conclusio.—CHRISTUS SECUNDUM VOLUNTATEM SENSUALITATIS ET VOLUNTATEM ESSENTIALEM PER MODUM NATURÆ POTERAT ALIUD VELLE QUAM DEUS; SED SECUNDUM VOLUNTATEM PER MODUM RATIONIS, SEMPER IDEM VOLEBAT QUOD DEUS.

Hoc 1^o persuadetur ex ipsa *Scriptura*, scil. (Marc. XIV, 36): *Non quod ego volo, sed quod tu*; quibus verbis significatur

1—Advertas velim impeccantiam Christi etiam in ordinandis rebus contingentibus ad Deum fuisse quidem intrinsecam, non tamen per modum *physicae determinationis*, sed per modum *moralis exigentiae*.

Christum per modum rationalis voluntatis voluisse impletioneum voluntatis divinæ, dum tamen ipse alia voluntate, nempe sensualitatis et naturæ (utraque enim erat in ipso), aliud quiddam appetebat.

2º Id ipsum *ratione* manifestatur.—Enimvero Filius Dei dispensatione quadam, ante passionem suam, sinebat carnem omnesque animæ vires agere et pati quæ sunt eis propria : quod finis Redemptionis exigebat. Atqui a) ex una parte, voluntas *sensualitatis* refugit naturaliter dolores sensibiles corporisque læsionem ; similiter voluntas *ut natura* abhorret quæ sunt natura noxia et secundum se mala ; haec tamen quandoque voluntas *per modum rationis* eligere potest ut media ad finem ; v. g., in aliquo morbo, ægroti hominis sensualitas et voluntas naturalis refugit unctionem, quam tamen voluntas rationalis tolerandam decernit gratiâ recuperandæ sanitatis. b) Ex altera parte, *voluntas Dei* erat ut Christus dolores, passiones mortemque pateretur, non quod ista secundum se essent a Deo volita, sed ex ordine ad finem humanæ salutis. Ergo Christus voluntate sensualitatis et voluntate naturali (velleitate dixerim) aliud poterat velle quam Deus ; sed voluntate rationali divino beneplacito conformabatur.

Solv. obj.—OBJ. 1.—Optabat Christus voluntatem divinam implere. Atqui nemo potest voluntatem alicujus implere, quin id ipsum quod iste intendat. Ergo.

RESP. D. M :...voluntate *simpliciter* et consequente considerationem ordinis rerum ad divinam voluntatem, C ; voluntate sensualitatis cuius motus nequit se extendere usque ad voluntatem Dei, et voluntate naturali attingente objecta sub respectu absoluto tantum, N.—C.d.m.—*Neg. conseq.*

OBJ. 2.—Anima Christi ornata erat perfectissima caritate. Atqui caritatis est parere Deum inter et hominem voluntum identitatem. Ergo.

RESP. C. M.—D.m :...identitatem *formalem*, eo modo quo solent voluntates amicorum in unum ultimo conspirare, C ; identitatem *materiale*, quasi proprio impulsu omnes animæ vires sibi relicte unum appetant, N.—*Neg. conseq.*

OBJ. 3.—Christus fuit verus comprehensor. Atqui comprehensores seu sancti patris nihil aliud volunt quam quod Deus. Ergo.

RESP. *D. M.*comprehensor tantum, *N.*; comprehensor simul et viator, cui aliquid ex parte carnis passibilis accidere poterat repugnans sensualitati et naturae, *C.—C.m.—Neg. conseq.*

ARTICULUS IV.

(9, 18, 0.6) *Utrum in Christo fuerit contrarietas voluntatum.*

Talis est posteritatis Adæ sors et conditio ut, secum colluctantibus animæ viribus, gemens quisque ad Deum inclamet (Job. VII, 20): *Quare posuisti me contrarium tibi, et factus sum mihi metipsei gravis?* — Ne ex dictis in art. præc. simile quidpiam in homine Christo fuisse inferatur, præsens doctrina opportune ab Auctore exhibetur.

Conclusio.—*In CHRISTO NULLA FUIT REPUGNANTIA VEL CONTRARIETAS VOLUNTATUM.*—Id definivit *Conc. oecum. VI* in verbis superius citatis.

1º Eo pertinent quæ scribit *Joan. Damasc.* (Orth. Fid. III, 18): “Divinam ipsius voluntatem humana sequebatur, eique subdita erat, ut quæ propriâ sententiâ non moveretur, verum ea demum vellet quæ divina ejus voluntas ipsam volebat velle. Permittente siquidem divina voluntate, naturaliter ea quæ sibi propria erant patiebatur.”

2º Contrarietas esse non potest nisi attendatur oppositio *secundum idem* et *in eodem*, non autem secundum diversa aut in diversis. Atqui in eadem Christi voluntate secundum idem nulla fuit oppositio: ergo nulla contrarietas.—*Maj. expl.*; quia contrarietas est diversitatis species, clandens in se contradictionem. Jamvero oppositio contradictionis non datur nisi secundum idem et in eodem. *a)* Requiritur itaque primum ad contrarietatem voluntatis ut habeatur secundum *idem objectum* eamdem rationem: nulla enim repugnancia est quod aliquid, puta vita hominis, ametur sub ratione universali, et tamen, exigente bono publico, in aliquo casu supprimatur, nisi amor ille antecedens voluntatem consequentem prohibeat. *b)* *Amplius* requiritur ad contra-

rietatem ut sit circa *eamdem* voluntatem: si enim homo unum velit appetitu rationis, aliud autem appetitu sensitivo, nulla hic est contrarietas, nisi forte appetitus sensitivus adeo prævaleat ut appetitum rationis immutet vel remoretur.—*Min. ostend.* Nam *a) primo* neque voluntas naturalis neque voluntas sensualitatis, suo quæque objecto inbærentes, repudiabant in Christo id quod erat Dei hominisque electione formaliter volitum: quippe etiam voluntate naturali Christus volebat salutem humani generis, non tamen ejus erat illam velle ut rationem volendi mortem propriam; motus autem sensualitatis ad hoc se extendere non valebat. *b) Secundo*, voluntas divina et rationalis Christi minime per naturalem aut sensitivam retardabantur; et, vice versa, nec motus voluntatis naturalis et sensitivæ divino et rationali imperio in Christo impediebantur: siquidem ei placebat ut natura et sensualitas in objecta sibi propria modo suo moverentur. Ergo.

Solv. obj.—OBJ. 1.—Contrarietas voluntatum attenditur secundum contrarietatem objectorum. Atqui Christus voluntate humana refugiebat mortem quam divina volebat. Ergo.

RESP. *D. M* :...objectorum tantum, *N*; necnon potentiarum appetentium, *C*.—*C.d.m* :...quam divina volebat sub eodem respectu, *N*; sub diverso respectu, eadem permittente ut voluntas naturalis absolute mortem aversaretur, *C*.—*Neg. conseq.*

OBJ. 2.—Contrarietas est quod spiritus unum concupiscat, et caro aliud. Atqui id fuit in Christo. Ergo.

RESP. *D. M* :...ita ut motus spirituales impedianter vel retardentur per carnem, sicuti fit in nobis, *C*; absolute, *N*.—*C.d.m*.—*Neg. conseq.*

OBJ. 3.—De Christo dicitur (Luc. XXII, 43): *Factus in agonia, prolixius orabat*. Atqui agonia importat compunctionem quamdam animi. Ergo.

RESP. *D. M* :...i. e. voluntas rationalis Christi veluti anceps inter contraria fluctuabat, *N*; pars sensitiva timore infortunii imminentis opprimebatur, *C*.—*C.d.m*: agonia secundum partem animæ rationalem, *C*; secundum partem sensitivam, *N*.—*Neg. conseq.*

QUÆSTIO QUARTA

DE UNITATE CHRISTI QUANTUM AD OPERATIONEM

*q. 1^{a.} (q. 4¹)
fir les cinq levens
candee.*

Quamvis quæstio hæc præcedenti affinis sit, ab ea tamen profecto distinguitur, illo ferme modo quo actio a voluntate *imperata* discriminatur ab actione *elicta* ejusdem voluntatis. — Duo circa operationem Christi consideranda sunt: *primo*, an duplex admitti debeat (art. 1) cum aliqua tamen humane operationis unitate (art. 2); *secundo*, quanam vi seu efficacia preedita fuerit, nempe an ipsi Christo (art. 3), maxime vero an nobis mereri potuerit (art. 4)¹.

ARTICULUS I.

*Utrum in Christo sit una tantum operatio divinitatis
et humanitatis.*

1º Pro certo exploratoque habetur quod Christus erat *unus operans*; at dubium subit de *operatione*. — Ubi advertendum reor (cum Cajetano in h. art.) in præsenti sermonem esse de operationis unitate vel pluralitate secundum *speciem* seu per habitudinem ad *principium activum* (essentiale, non suppositale) *proprium* i. e. virtute propria agens, ita ut una operatio pro uno tali principio, multiplex vero pro pluribus principiis hujusmodi admittatur.

2º Ii *hæretici*, qui unam in Christo voluntatem posuerunt, unam quoque tantum operationem asseruerunt. — Sic vero errorem suum suadere nitebantur: ubi sunt plura agentia ordinata, ibi est una operatio proprie dicta superioris agentis,

1—De vi satisfactiva aptior disserendi locus est in quæst. *de effectu passionis*.

dum motus inferiores non sunt nisi effectus et *operata* quædam. Jamvero, quemadmodum in homine anima est primum principium movens, ita in Christo divinitas. Propterea, siout in motu manus et pedis duplex est quidem operatum, sed una solius animæ operatio, sic in Christo unica operatio ponenda est cum diversis operatis sive Divinitatis sive humilitatis.—At in hoc confusio est, hæreseos parens, ut jamjam patet.

Conclusio.—DUÆ SUNT IN CHRISTO NATURALES OPERATIONES, DIVINA SCIL. ET HUMANA, QUIN OBSTET DENOMINATIO OPERATIONIS “THEANDRICÆ” A VETERIBUS USURPATA.

1^a Pars sancita est a *Conc. œcum.* VI (*loc. jam cit.*, quæst. præc., art. 1).

Prob :—1^o *auctoritate*: Solemnis est apud theologos universæ recepta formula *S. Leonis M.* (Ep. ad Flavianum, c. IV): “Agit utraque forma, cum alterius communione, quod proprium est, Verbo scil. operante quod Verbi est, et carne exequente quod carnis est.”—Vid. plura ap. Petavium, Knoll, etc.

2^o *Ratione*.—a) *Primo ex falso supposito* adversariorum. Censem enim isti, ob unitatem Verbi agentis cunctaque in Christo moventis, non posse ex diversis operatis diversa inferri operandi principia diversasque operationes. Atqui in hoc graviter illuduntur: siquidem actio ejus quod ab altero movetur duplex est, una quam habet secundum formam *propriam*, alia quam consequitur secundum formam principalis agentis sibi *participatam*, in quantum movetur ab illo; v. g. securis propria virtute incidit, et mota ab artifice facit scannum. Ergo locus est distinguendi duplarem operationem pro duplice principio activo, nisi actio inferioris agentis precise accipiatur secundum motionem receptam a superiori.

b) *Secundo ex rei natura*.—Ubiunque enim movens et motum diversas habent formas seu operandi virtutes, ibi alia moventis aliqua moti operatio esse debet, etsi utrumque agat cum communione alterius. Atqui in Christo tum divinæ tum humanæ naturæ propria inest forma virtusque operatrix. Ergo duplex est operationis species divina, scil. et humana, quin tamen negemus operationem humanam alteri subordinari.

c) *Tertio ex conjecturiis*.—Si una tantum esset operatio

humanitatis et divinitatis in Christo, id consequeretur, nempe aut humanæ naturæ (de divina hoc dici repugnat) non esse propriam formam vimque activam, aut ex virtute divina et humana unam fuisse conflatam. Atqui utrumque impossibile est: per primum enim tollitur perfectio humanæ naturæ, visque meritoria et satisfactoria Christi perimitur; per aliud inducitur confusio naturarum, qualem finxit Eutyches. Ergo.

2^a Pars decl.—1^o Non diffitemur quosdam veteres, inter quos *Pseudo-Dionysius* (cap. II De div. nom. lect. 3), posuisse in Christo operationes *theandricus* seu *Deo-viriles*.—At vero præpostere quis inferret ideo unam tautum Christi operationem agnoscendam esse. *a)* Nam, ut de solo *Dionysio* dicamus, ipse (ut manifeste ostendit *D. Thomas* heic ad 1) loco cit. describit duas distinctas in Christo operationes, unam propriam humanitatis, aliam sublimiorem et ineffabilem Divinitatis. *b)* Præterea, in *Conc. Later.* (sub Martino I) canon hic legitur: “Si quis secundum hæreticos *Dei-virilem* operationem unam insipienter suscipit, et non duplice eam contetur, hoc est, divinam' et humanam, sit condemnatus.”

Quocirca 2^o denominatio illa accipienda est, non secundum aliquam confusionem operationum seu virtutum utriusque naturæ, sed secundum Divinitatis humanitatisque in operando *communionem*; quod dupliciter intelligi potest: *a) primo* de conjunctione quadam *physica*. Quatenus enim Verbum utebatur humanitate quasi instrumento, divina humanitas humanaque divinitus agens (exemplo est *sanc*d*io leprosi* per contactum et conceptio miraculosa Christi), una erat Hominis-Dei operatio, sicut una est actio agentis principalis et instrumenti (qua talis). *b) Secundo* de conjunctione *moralis*; si quidem operationes humanæ Christi ita Dei agentis seu divini erant suppositi ut ab eo sortirentur et sanctitatis normam et valoris infinitatem¹.

Solv. obj.—OBJ. 1.—Principalis agentis et instrumenti una est operatio. Atqui humana natura in Christo divinæ fuit instrumentum. Ergo.

RESP. *D. M*:... sumpto instrumento secundum formam suam, *N*; in quantum est instrumentum, *S.d*: una est re operatio, *C*; etiam ratione, *N*.—*C.m.*—*Neg. conseq.*

1—Cf. Petavius, l. VIII, c. 10.

Actio instrumenti, qua instrumentum, *re* non differt ab actione principalis agentis, quanquam *ratione* distinguitur quod unius et quod alterius est; potest tamen instrumentum, ut est res quædam agens per modum causæ principalis, suam habere operationem: ita in Christo, uti constat v. g. de salvatione *instrumentaliter* effecta per humanitatem atque de opere fabrili quo Jesus ex se agens S. Josepho laboranti associabatur.

OBJ. 2.—Unum esse debet quod ad unam Christi hypostasim pertinet. Atqui operatio pertinet ad hypostasim, cuius est agere. Ergo.

RESP. D. M.:...secundum unam formam, *C*; secundum diversas formas, *N*.—*D.m*:...pertinet ad hypostasim tanquam ad subjectum immediate operativum, *N*; tanquam ad primum operans, *C*.—*Neg. conseq.*

Operari est hypostasis ut ejus *quod* primo agit, sed tamen secundum *formam* et naturam a qua operatio *speciem* recipit: duplicatis itaque formis, duplicetur oportet operationis species, et si unitas numerica cujusque actionis in suo genere ab unitate hypostasis dependeat. Consequenter in Christo duæ sunt operationes *specie* differentes secundum duas ejus naturas; quælibet vero una numero simul exercetur, v. g. una sanatio et una ambulatio.

OBJ. 3.—Sicut esse est hypostasis, ita et operari. Atqui ex unitate hypostasis unum esse in Christo conclusum est. Ergo.

RESP. D. M.:... quatenus hypostasis est *quaæ* existit et operatur, *C*; quasi operatio tam intima sit hypostasi quam esse, *N*.—*C.m*.—*Neg. conseq.*

Ponderentur verba *Angelici* (in h. loc.): “Esse et operari est personæ a natura; alter tamen et aliter. Nam esse pertinet ad *ipsam constitutionem personæ*; et sic quantum ad hoc se habet in ratione termini; et ideo unitas personæ requirit unitatem ipsius esse completi et personalis. Sed *operatio* est quidam *effectus personæ* secundum aliquam *formam* vel naturam. Unde pluralitas operationum non præjudicat unitati personali.” Aliis verbis, esse *immediate* subjectatur in persona, ut ejus propria actualitas, ad quam illa constitutione sua terminatur; operatio vero se habet ad naturam ut ad susceptivum *proximum* (saltem mediante potentia) et ad personam

solum ut ad *primum* subjectum *quod* : unde specificie multiplicatur pro naturæ diversitate¹.

OBJ. 4.—Ubi est unum operatum, ibi est una operatio. Atqui idem operatum erat Divinitatis et humanitatis, v. g. sanatio leprosi ex contactu. Ergo.

RESP. C. M.—*D.m* : ... quatenus humanitas *præcise* tanquam instrumentum agebat, *C* ; quatenus vim suæ formæ exserebat, v. g. tangendo, *N*.—*Neg. conseq.*

ARTICULUS II.

Utrum in Christo sint plures operationes humanæ.

Agitur nunc de sola operatione *humana*.—Hujus autem unitas vel pluralitas inquiritur, non penes distinctiōem objectorum, potentiarum et habituum, nec secundum distinctiōnem numericam (patet enim sub his respectibus plures esse operationes), sed secundum habitudinem seu associetatem virium a *communi* natura prodeuntium.

Conclusio.—MULTO MAGIS EST UNA OPERATIO HUMANA IN CHRISTO QUAM IN QUOCUMQUE ALIO HOMINE.

Prob.—Illa operatio dicitur simpliciter humana, quæ procedit ex deliberata ratione secundum voluntatem. Atqui in quocumque alio homine, præter operationem illam, reperiuntur aliæ actiones a voluntate independentes ; sed in Christo secundum humanam naturam nulla contigit actio, quæ non fuerit aliqualiter secundum ejus voluntatem. Ergo. *Min. ostend.* Humanæ naturæ convenientiunt, prieter proprias actiones a ratione voluntateque procedentes, aliæ secundum conditiōnem corporis, v. g. ferri deorsum, aliæ secundum virtutem animæ vegetalis, v. g. nutriti et augeri, aliæ secundum partem sensitivam, ut videre, imaginari, irasci, etc. Atqui in quolibet homine actiones corporei et vegetativi ordinis nullo modo subjiciuntur rationi (saltem directe) ; actiones autem sensitivæ imperfecte tantum rationis imperio subduntur. Sed

1—Cf. Cajetanus in h. obj.

in Christo nullus erat motus sensitivæ partis qui non esset ordinatus a ratione; ipsæ etiam operationes naturales et corporales aliqualiter voluntariae erant, scil. *approbative*, quatenus volebat Christus ut unaquæque vis opera sibi propria exequeretur, *imperative* vero, in quantum humana voluntas Divinitatis imperium ad totum corpus cunctasque vires instrumentaliter deferebat. Ergo in quolibet homine, præter actiones proprie voluntarias, sunt plures aliæ; verum in Christo omnes erant quodammodo humanæ unique voluntatis motui associate.

Ex quo *infertur* hominem-Christum extremos attigisse limites quibus contineatur vis et efficacia humanæ voluntatis in corpus et facultates quascumque inferiores.

ARTICULUS III.

Utrum actio humana Christi potuerit esse sibi meritoria.

Meritum est proprietas actus humani, qua *jus* quoddam vel *congruitas* ad *præmium* inducitur.—Plura circa meritum Christi in dubium vocari possunt, nempe *an* absolute mereri potuerit, quonam *tempore* quibusve *actibus*, et *quid* hoc modo *sibi* comparaverit: de merito enim in gratiam *aliorum*, art. seq. sermo habebitur.—Materia offertur trium conclusionum.

Conclusio 1^a.—CHRISTUS PROPRIE MERERI POTERAT; quod *de fide* est post definitionem *Conc. Trid.* (Sess. VI, cap. 7).

Patet enunciata veritas ex ipsis *conditionibus* meriti¹.—Hæ enim conditiones ad tres principaliores reduci possunt: nimirum (prouti docet *S. Thomas* 3 S. D. XVIII, Q. I, a. 2) una est *libertas* actus cuius merens sit dominus; altera *status* merendi seu status *vise*; tertia quoque *gratia* seu caritas, cuius vi meritum supernaturale divinæque mercedi proportionatum habeatur. Atqui patet ex præcedentibus Christum fuisse

1—Cf. *Tract. nost. de Gratia*, Disp. V, Q. II, a. 1.

libertate arbitrii dominum suorum actuum; nec caruisse statu merendi, in quantum simul erat comprehensor et viator; amplius uberrima gratiae caritatisque munera inde ab initio recepisse. Ergo.

Conclusio 2^a. — CHRISTUS A PRIMO INSTANTI SUÆ CONCEPTIONIS ET PER OMNES ACTUS SUOS HUMANOS MERUIT.

1^a *Pars* asseritur contra *paucos* :—1^o ex (Heb. X, 5-7) : *Ingrediens mundum dicit : Hostiam et oblationem noluisti, corpus autem aptasti mihi... Tunc dixi : Ecce venio ; in capite libri scriptum est de me : Ut faciam, Deus, voluntatem tuam.* — 2^o *Ratione* (Q. XXXIV, a. 2-3). Etenim Christi dignitas requirebat ut statim ab initio, re obstante nulla, rationis subindeque voluntatis liberae actum exerceret; eo magis quia sanctificatio, quæ jam tunc ejus animam coherestabat, non solum habitualis, sed et pro perfectione sua actualis fuit. Atqui motus liberi arbitrii in opere sanctificationis meritorius est. Ergo.

2^a *Pars* intelligenda est de actibus positis in *statu vice*, extra quem Christus per *instans mortis* constitutus fuit: unde in hoc instanti mereri non potuit (Q. I, a. 6) nec posteriori tempore.

Prob. pars ista :—1^o ex *Angelico Doctore* (3 S. loc. cit.) : “ Similiter et omnis actus ejus informatus erat caritate; et iterum actus sui dominus erat per libertatem voluntatis; et ideo omni actu suo meruit.” — 2^o *Ratio* efficax petitur ex art. præcedente: quandoquidem ibi dictum est omnes Christi actiones, etiam vegetativas & naturales, quodammodo fuisse humanas seu voluntarias. Porro nihil Christus volebat nisi ex supremo motivo caritatis, quo merita supernaturalia foventur. Ergo.

Conclusio 3^a. — POTUIT CHRISTUS SIBI MERERI, NON QUIDEM DONA INFUSA ANIMÆ RATIONALI, SED INFERIORA ALIA EXTERNAQUE BENEFICIA.

1^a *Pars* manifestæ rationi innititur.—Nobilius est, cæteris paribus, quidpiam consequi *per meritum* quam sine merito. Atqui omnis perfectio et nobilitas Christo attribuenda est. Ergo. *Maj.* innotescit ex eo quod præstantius est consequi aliquod bonum *per se* quam *per aliud*. Atqui, licet *prima causa* omnium bonorum nostrorum per auctoritatem sit Deus, potest tamen quis *secundario*, nempe cooperatione

meritorum suorum, *sibi esse causa* alicujus boni compandi. Ergo.

2^a *Pars* negat Christum sibi meruisse dona animæ rationalis, qualia sunt *gratia, scientia et beatitudo essentialis*.—Id enim non congruebat Christum sibi promereri, cuius carentia magis Ejus dignitati et perfectioni præjudicasset quam per meritum acrevisset. Atqui dona recensita erant hujusmodi; quippe exigebantur vi Unionis hypostaticæ, nec, si Christus eis aliquando caruisset quæ dein mereretur, meriti perfectio æquivalenter supplevisset defectum ex eorum carentia momentanea provenientem. Ergo.

3^a *Pars* (contra *Calvinum*) affirmat Christum potuisse nonnulla alia bona sibi mereri, scil. bona pertinentia ad *gloriam corporis* et ad *exteriorem excellentiam*, uti est ascensio, veneratio ceteraque hujusmodi.

1^o Hoc *fide* constat ex manifestis *Scripturæ* eloquiis. Nam legitur (*Luc. XXIV, 26*): *Nonne haec oportuit pati Christum, et ita intrare in gloriam suam?* scil. corporis. Item (*Phil. II, 8-9*): *Humiliavit semetipsum, factus obediens usque ad mortem... propter quod et Deus exaltavit illum,* etc.—Huc refertur sententia celeberrimi psalmi CIX: *De torrente in via bibet, propterea exultabit caput* (cf. *Bellarum Expl. in Ps.*).

2^o Jam ostensum est congruum admodum fuisse ut Christus aliquid sibi mereretur, dummodo nullum inconveniens obsisteret. Atqui potuit Christus carere ab initio gloria corporis cæterisque bonis extrinsecis, sequenti merito comparandis, absque ullo majoris vel etiam æqualis dignitatis detrimento: siquidem bona illa quiddam minus sunt quam nobilitas merendi ad virtutem caritatis pertinens. Ergo.—Haec de re notare juvat quod habet *S. Thomas* (*Q. XXXIV, a. 3 ad 3*): “Nihil prohibet idem esse alicujus ex diversis causis; et secundum hoc Christus gloriam immortalitatis quam meruit in primo instanti sue conceptionis, potuit etiam posterioriter actibus et passionibus mereri, non quidem ut esset sibi magis debita, sed ut sibi *ex pluribus causis* deberetur¹.”

Solv. obj. (cont. 3^{am} concl.).—OBJ. 1.—Nullus mereretur id quod est sibi debitum. Atqui Christo ratione Unionis hypostaticæ debetur hereditas æterna. Ergo.

1—Vid. plura circa h. art. apud Gonet, Billuart, etc.

R^ES^P. D. M :...quod est sibi debitum et ita connaturale ut statim conferri petat, *C*; quod est sibi debitum uno titulo, sed posterius conferri potest accedente novo titulo, *N*.—*C.d.m* :... in quantum est Filius I^{Dei}, per *naturam* debetur gloria æterna, *C*; in quantum est homo-Deus, *S.d* : debetur gloria animæ *sine merito* et gloria corporis *cum merito*, *C*;... utraque excluso omni merito, *N*.—*Neg. conseq.*

OBJ. 2.—Habito principali, accessorium non proprie cadit sub merito. Atqui gloria corporis ex gloria animæ accedit. Ergo.

R^ES^P. D. M :...accessorium *abs^{olut}e sumptum*, *C*; accessorium secundum congruentiam humanorum meritorum, *N*.—*C.d.m* :...qualitercumque, *N*; quatenus homo, exercens actum animæ in corpore, meretur remunerari per gloriam ex anima ad corpus redundantem, *C*.—*Neg. conseq.*

OBJ. 3.—Eatenus Christus sibi gloriam externam meruisset, quatenus hæc esset suum bonum. Atqui gloria externa non est bonum ipsius Christi, sed eorum qui illum cognoscunt. Ergo.

R^ES^P. T^RANS. M.—*D.m* :...non est bonum Christi spectati in suo corpore *mystico*, *N*; nou est bonum Christi *ipsius*, *S.d* : principalius, *C*; secundario et secundum esse quod habet in notitia et affectu Christicolarum, *N*.—*Neg. conseq.*

ARTICULUS IV.

Utrum Christus aliis mereri potuerit.

Titulus accipiens est de merito *condigno*; quod singulariter Christo competit, licet justi homines possint mereri quidpiam aliis *de congruo*.—Brevi oratione determinabimus *an et quid* Christus cæteris mereri valuerit.

Conclusio 1^a.—MERITUM CHRISTI AD ALIOS DERIVATUR, ITA UT VALOREM VERE INFINITUM ADEOQUE INEXHAUSTUM PRÆ SE FERAT.

1^a *Pars* est *de fide*, ut constat ex *Conc. Trid.* (Sess. VI, cap. 7).

Etenim 1^o legimus (Rom. V, 18) : *Sicut per unius delictum in omnes homines in condemnationem, sic et per unius justitiam in omnes homines in justificationem vitæ.* Atqui demeritum Adæ derivatur ad condemnationem aliorum. Ergo meritum Christi etc.—2^o In Christo gratia fuit non solum ut in quodam homine singulari, sed ut in *Capite* totius Ecclesiæ, cui omnes velut membra uniuntur ad efformandam unam personam moralem. Atqui in uno homine actio capitinis quodammodo pertinet ad omnia membra, quæ inde motum et influxum accipiunt. Ergo meritum Christi se extendit ad alios, veluti ad membra mystici sui corporis.

2^a Pars additur circa meritorum Christi *valorem*, quem post Gonet, Joan. a S. Thoma, etc., vere infinitum pronuntiamus.

1^o Namque id deducitur ex *Clemente VI* (in Extrav. *Unigenitus*), ubi, loquens de thesauro Ecclesiæ, ait : “ De cujus consumptione aut diminutione non est aliquatenus formidandum, propter *infinita* merita Christi.”—2^o Hoc ipsum dupli ratione suadetur. a) *A priori* quidem : nam valor meriti dijudicandus est non solum secundum principium *quo operis*, at etiam secundum subjectum *quod* operatur. Atqui in Christo subjectum *quod* erat divina persona infinitæ sanctitatis : ergo. b) *A posteriori* vero : quia merita Christi talia sunt quæ etiam ad infinitos homines salvandos conducere valent.

Conclusio 2^a.—CHRISTUS NOBIS MERUIT, PRÆTER JUSTIFICATIONEM, GRATIARUM AUXILIA AD SALUTEM DISPOSITIVA, VIRTUTES ET DONA, GLORIAM, DENIQUE OMNES PRÆDESTINATIONIS NOSTRÆ EFFECTUS.—Meritum illud, saltem quoad *justificationem*, definivit *Conc. Trid.* (*l. cit.*).

1^o Præsto est Scripturæ auctoritas (Eph. I, 3) : *Benedictus Deus et Pater Domini nostri Jesu Christi, qui benedixit nos in omni benedictione spirituali in cœlestibus in Christo*; ubi patet omnia beneficia spiritualia a Christo repeti, profecto secundum meritum. Hinc etiam dicitur (Joan. XV, 5) : *Sine me nihil potestis facere.*—2^o Eo spectant verba S. Thomas (de Ver. Q. XXIX, a. 7 ad 8) : “ *Meritum Christi sufficienter operatur ut quædam causa universalis salutis humanae*; sed oportet hanc causam applicari singulis per Sacra menta et per fidem formatam quæ per

dilectionem operatur. Et ideo requiritur *aliquid aliud* ad salutem nostram præter meritum Christi, cuius tamen meritum Christi est *causa*. — Amplius 3^o *dignitati Christi Salvatoris* hoc apprime consonabat, nimirum ut influxu suo meritorio attingeret *omnia* ea quæ salutem humanam attinent.

Solv. obj. — OBJ. 1.—Meritum se habet ad merentem, sicut peccatum ad peccantem. Atqui peccatum non nocet nisi peccanti ipsi, juxta illud (Ezech. XVIII, 4): *Anima quæ peccaverit, ipsa morietur*. Ergo meritum non proficit nisi merenti.

RESP. C. M.—D.m: peccatum *singularis* personæ...C; peccatum *Capitis* totius naturæ, N.—Neg. conseq.

OBJ. 2.—De plenitudine gratiae Christi omnes accipiunt. Atqui nullus ex eis potest aliis condigne mereri. Ergo,

RESP. D. M: ...omnes accipiunt ipsum gratiæ *fontem*, N; quædam *particularem* gratiam, C.—C.m.—Neg. conseq.

OBJ. 3.—Merce, quam quis condigne meretur, debetur secundum justitiam. Atqui plures reapse neque justificantur neque salvantur. Ergo Christus eis non meruit gratiam.

RESP. D. M: ...respectu merentis, C; respectu alterius cui mercedis bonum destinatur, N.—D.m: ... et iis debetur merces operum Christi, N; Christo ipsi debetur ut homines illi salvantur, S.d: ...ut eis gratia *sufficiens* salutis exhibeat, C; gratia *efficax*, N.

Quæ bona atque beneficia Christus nobis meruit, ea *Ipsi* ex justitia *debentur*; attamen *respectu nostri* sunt omnino *gratuita*. — Eadem autem duplice modo meruit Christus, videlicet *sufficienter* et *efficaciter*, sufficienter pro omnibus, efficaciter vero pro iis qui per baptismum et fidem Christo incorporantur; quæ preferentia innui videtur (Joan. XVII, 9): *Ego pro eis rogo, non pro mundo rogo, sed pro his quos dedisti mihi*¹.

1—Alia dubia soluta reperies apud D. Th., *de Ver. Q. XXIX*, a. 7.

DISPUTATIO QUINTA

DE CONSEQUENTIBUS UNIONEM RELATIVE

Sequitur ut ad ea veniamus quæ Unionem comitari intelleguntur *relative*.—Duplex autem Christi relatio seu habitudo distingui potest, una inter ipsum et *Patrem*, altera per comparisonem ad *nos*.—Sub primo respectu, habitudo aut Christi *ad Patrem* (Q. I) aut *Patris ad Christum* (Q. II) vicissim tractanda objicitur. Sub alio respectu duo præstauda sunt, quatenus investigetur Christus honore colendus *in se* (Q. III) vel *in sanctis suis* (Q. IV).

QUÆSTIO PRIMA

DE SUBJECTI^EONI^E, ORATIONE ET SACERDOTIO CHRISTI

Ipse quæstionis titulus suadet, quæ quo^Ee ordine discutienda sint; cum autem de *sacerdotio Christi* dubitatio subeat, *an* et *quale* fuerit, idcirco quatuor articulorum materia habebitur.

ARTICULUS I.

De subjectione Christi.

(Q. XX, a. 1-2).

1^o Principalius inquiritur an Christus dici possit *subjectus Patri* ejusque servus; at secundario solvendum erit dubium, an Christus sit *subjectus sibi ipsi*.

2^o Ad subjecti^Eonem refertur servitus quasi species ad genus.—Concedunt quidem omnes Christum, ratione humanae

naturæ, utcumque Patri esse *subjectum*; negant tamen *Vasquez*, *Becanus* aliquis (Patrum quorumdam sententiis innixi) Eum proprie posse vocari *servum*.

3º In hac enodanda difficultate fac distinguas duplarem servitutem. Una est enim servitus *naturalis*, hoc est, originem vel naturam consequens, secundum quam quis alteri subditur, v. g. filius patri, creatura Deo; altera est servitus *innaturalis* ac *penalis*, qua quis a proprio statu in vilem quamdam conditionem dejicitur sive *legaliter* (servitus captivitatis) sive *moraliter* (servitus peccati).—Prior servitus, non posterior de Christo prædicanda est.

Conclusio 1ª.—*Nihil prohibet Christum dicere PATRI SUBJECTUM VEL SERVUM, DUMMODO APPONATUR VEL SUBINTELIGATUR DETERMINATIO: "SECUNDUM HUMANAM NATURAM."*

1º *Pars* ostend.—Et 1º favent *Scripturæ*; nam legitur (Joan. XIV, 28): *Pater major me est*; minor vero est *subjectus majori*. Et (Is. XLII, 1) futurus Liberator sic designatur: *Ecce servus meus, suscipiam eum*.

2º Quod ad *Patres* pertinet, non eadem dicendi forma ab eis adhibita est. Plures quidem (quos citat *Petavius*, l. VII, c. 7) Christum servum nuncuparunt aut proprie nuncupari posse arbitrati sunt; e quibus inter Græcos *Athanasius*, *Greg. Naz.* et *Nyss.* etc; inter Latinos vero *Ambrosius*, *Augustinus* etc.—Alii tamen, ut *Dionysius Alex.*, *Joan. Damasc.*, reununt servi appellationem Christo tribuere; quibus adjungi debet *Adrianus P.* in epistola quam seripsit ad episc. Hisp. contra hæresim Felicis et Elipandi, necnon *Francofordiensis Synodus* adversus eamdem hæresim coacta.—Sed, ut scite observat laudatus auctor (l. VII, c. 9, n. 12), qui servum dici noluerunt de servitute locuti sunt quæ *necessaria* est ex sese, non voluntaria, et *personam* ipsam, non naturam consequitur, aut quæ ex naturæ *vicio* et corruptela oritur.

3º *Ratione* sic procedimus.—Christo, utpote habenti naturam humanam, convenient ea quæ sunt propria hujus naturæ. Atqui natura humana ex sui conditione præ se fert triplicem subjectionem ad Deum: *unam* quidem *inæqualitatis*, quatenus divina natura est ipsa essentia bonitatis, dum natura creata participative tantum bona est; *secundam* vero *servitutis*, secundum quod omnis creatura subjacet

ordinationi divinæ potestatis eique deservit; *tertiam* tandem *obedientie* naturæque rationalis propriam, in quantum hæc natura voluntatis actu mandatis divinis obsequitur. Ergo Christo triplicem hunc subjectionis modum tribuere debemus, prout ipsæ *Scriptura* de eo profitentur; nam prima subjectione continetur (*Matth. XIX.*, 17), ubi Christus ait: *Quid me interrogas de bono? Unus est bonus, Deus;* altera exprimitur (*Phil. II.*, 7): *Semetipsum exinanivit, formam servi accipiens;* tertia a Christo adstruitur (*Joan. VIII.*, 29): *Ego quæ placita sunt ei, facio semper.*

2^a Pars decl. (ex art. 1, resp. ad 1-2).

Nam 1^o sicut ratio *creature* de Christo prædicari non potest nisi *restrictive*, i. e. secundum naturam creatam; ita non est simpliciter intelligendum quod Christus sit subjectus Patri, sed addita vel subaudita *determinatione*: “secundum *humanam naturam*”; quam determinationem satius est exprimere ad vitandum errorem Arianorum Filium Dei minorantium.—Id autem 2^o non ita accipitur quasi subjectione vel servitus naturæ ipsi directe tribuatur; sed, quoniam suppositi est suscipere prædicationem actionis et passionis subindeque dominii et servitutis, Christus proprie servus denominatur secundum naturam humanam.

Conclusio 2^a. — CHRISTUS NON EST DICENDUS SUBJECTUS SIBI IPSI NISI SIGNATA RATIONE HUMANÆ NATURÆ, NON HYPOSTASIS.

Prob. — Sapientissima *regula* est quam tradit *D. Thomas*, scil: illa *per se* et *absolute* dici possunt de Christo quæ manifeste ei convenient ratione personæ vel naturæ divinæ, v.g. esse maximum, dominum; quæ vero ei competit secundum humanam naturam, potius ei attribuenda sunt *cum determinatione* (nisi nullum sit ambiguitatis periculum, ut v. g. quando dicimus Christum mortuum). Atqui propositio illa “*Christus est subjectus sibi ipsi*” ambiguitate non vacat: siquidem sensus esse potest quod alia sit persona Verbi Dei dominantis, et alia hominis servantis, quo sensu prorsus Nestoriano prop. illa negata est a SS. *Cyrillo* et *Damasceno*; potest autem id ipsum intelligi secundum diversitatem naturarum in una persona, et hoc sensu orthodoxo *Augustinus* dixit Filium esse *seipso minorem*. Ergo.

ARTICULUS II.

De oratione Christi.

(Q. XXI, a. 1-4)

1º Subjectionem Christi ad Patrem excipit *oratio*, quæ inferiori convenit respectu superioris.—Qua de re tria investiganda occurunt, scil. *an* Christo competit orare, pro *quibus* oraverit, et quâ *efficacia*.

2º Cum oratio sit “quædam explicatio propriæ voluntatis apud Deum ut eam implete” (art. 1), patet illam non esse actum sensualitatis, sed *potentiae rationalis* qua ex virtute religionis petimus decentia a Deo.—Dupliciter autem quis orare potest, corde et ore: de utraque oratione *mentali* et *orali* quæstio indiscriminatim instituitur.

3º Quod Christus *in terris* utcumque oraverit, nemo est qui neget.—Num vero *in celis* nunc existens vere et *proprie* pro nobis deprecetur, controversum dubium est. Duo quidem constant, scil: a) Christum nunc pro nobis orare *impropriæ* seu interpretative, quatenus exhibet humanitatem suam cum cicatricibus, meritis et satisfactionibus, quibus Pater ad conferenda nobis beneficia movetur; b) præterea, Christo gloriose nequaquam convenire orationem externis *abjectionis* signis, v. g. prostratione, expressam. c) Sed dubitatur utrum oratio *proprie* dicta, salva exigentia status gloriosi, Christo competere possit.

Conclusio 1^a.—CHRISTO IN TERRIS CONVENIEBAT ORARE, IMO ETIAM NUNC IN CŒLO CONVENIT.—Christum intelligimus, secundum quod est *homo*.

1^a Pars evincitur:—1^o ex eo quod Scriptura evenisse narrat (Luc. VI, 12): *Factum est autem in illis diebus exiit orare, et erat pernoctans in oratione Dei*; et (*ibid.* XI, 1): *Cum esset in quodam loco orans, ut cessavit, dixit unus ex discipulis ejus ad eum: Domine, doce nos orare.* Quibus adjungas verba SS. *Hilarii, Ambrosii, Augustini* (ap. Auctorem), etc.—Nec alienum a veritate erit dicere quod, Christo inde ab exordiis et jugi mentis ascensu supremam Majestatem contemplante, tota ejus vita quasi continua *oratio* extiterit.

^{2º} *Ratione*, duplici ex capite.—*a) Primo ex parte Christi.* Oratio est veluti voluntatis interpres, a Deo petens ut præstare dignetur quæ in votis sunt; quo quidem medio Deus prædisposuit plura implenda esse quæ cæteroquin secundum divinam præscientiam certo futura sunt¹. Atqui in Christo, licet sit divina voluntas per quam omnia potest, est tamen et voluntas *humana* quæ non est per se efficax ad implendum ea quæ vult, nisi mediante virtute divina. Ergo Christo, quatenus est homo et humanam voluntatem habens, competit orare.—*b) Secundo ex parte nostri.* Christus enim, quamvis ut Deus esset omnipotens, voluit tamen ad Patrem preces dirigere propter nostram instructiōnem tum dogmaticam tum moralem: *dogmaticam* quidem, ostendendo se esse a Patre, juxta illud (Joan. XI, 42): *Propter populum qui circumstat dixi (verba orationis), ut credant quia tu me misisti; moralem vero, nobis præbendo exemplum orandi spiritu et lingua, privatim et publice.*

^{2º} *Pars*, quam nonnulli negant, verius affirmatur:—^{1º} propter verba *Scripturæ de Christo* (Rom. VIII, 34): *Qui est ad dexteram Dei, qui etiam interpellat pro nobis;* et (Heb. VII, 25): *Semper vivens ad interpellandum pro nobis;* ubi vox *interpellare* tum latine tum græce petitionem significat.

^{2º} Ob suffragium *Doctorum*, præsertim *S. Augustini* et *S. Thomæ*.—Ait ille (in Ps. LXXXV, n. 1): “Sitque ipse unus...D. N. J. C. Filius Dei qui et oret pro nobis, oret in nobis, et oretur a nobis: orat pro nobis, ut Sacerdos noster; orat in nobis, ut Caput nostrum; oratur a nobis, ut Deus noster.”—*Angelicus* vero (*Comm. in Heb. VII, 25*), post relata verba (1 Joan. II, 1) *Advocatum habemus apud Patrem Jesum Christum*, scribit: “Interpellat pro nobis, primo humanitatem suam, quam pro nobis assumpsit, representando; item sanctissimæ animæ sue desiderium, quod de salute nostra habuit, *exprimendo*.”

Neque ^{3º} obstat quod Christus, egressus de statu viatoris, mereri amplius non possit.—Siquidem *a)* confundenda non est

1—Cf. II-II^o, Q. LXXXIII, a. 2;—quæ *D. Thomæ de Oratione* quæstio (capta occasione dicam), una cum tract. *S. Alphonsi de Lig.* de *magno precationis adjumento*, uberrimam ac solidissimam meditationis et prædicationis materiam subministrat.

vis *impetrandi*, propria orationis, cum vi *merendi operibus* condignis vel congratis insita¹. b) Unde Christus, causam nostram agens modo consentaneo statui gloriæ, pro nobis interpellat, non merendo, sed præcedentia *merita allegando* (ut docet *D. Th.* in 1 *Joan.* II)².

Conclusio 2^a. — CHRISTUS NON SOLUM PRO NOBIS, SED ET PRO SEIPSO IN TERRIS CONVENIENTER ORAVIT.

Pars *gratiosa*
1^a *Pars* perspicua est ex *Evangelii* verbis et ipso *Incar-*
nationis fine. — Referre sufficiat orationem illam (*Joan.*
XVII, 20): *Non pro eis autem* (discipulis) *rogo tantum,*
sed et pro eis qui credituri sunt per verbum eorum in me.

2^a *Pars* ostend. — Dupliciter Christus pro se orasse in *Scripturis* narratur: *uno modo*, exprimendo affectum sensualitatis ac voluntatis simplicis vel naturalis, v. g. quando oravit a se calicem passionis transferri; *alio modo*, significando affectum voluntatis deliberatae, puta quando petiit clarificari. Atqui utraque oratio conveniens fuit: — 1^o Congruebat ut Christus veluti *sensualitatis naturaeque* interpres oraret, propter tria: nempe a) ut demonstraret veritatem humanæ naturæ cum suis naturalibus affectibus susceptæ; b) ut ostenderet homini licere aliquid naturali affectu velle quod Deus non vult; c) item, ut nos doceret proprios affectus divinæ voluntati subiecere. — 2^o Decebat etiam Christum ex *voluntate deliberata* pro se orare, sive gratias agendo, sive bona nondum habita postulando, v. g. gloriam corporis, ut disceremus et de perceptis jam muneribus auctori Deo gratulari et sperata beneficia precibus depositare.

Pars *efficienciae*
Conclusio 3^a. — OMNIS PROPRIE DICTA CHRISTI ORATIO EXAUDITA FUIT.

1^o Christus, Patrem alloquens, ait (*Joan.* XI, 42): *Ego sciebam, quia semper me audis*; et (*Heb.* V, 7) de eo dicitur: *Preces supplicationesque... cum clamore valido et lacrymis offerens, exauditus est pro sua reverentia*, i. e. erga Patrem. — Sane, tunc proprie alicujus exauditur oratio, quando ejus voluntas simpliciter impletur. Atqui voluntas hominis *simpliciter* est deliberata; illud autem quod volumus

1 — Cf. II-II^o, Q. LXXXIII, a. 15.

2 — De hac controversia cf. Suarez, Disp. XLV, S. 2; — Petavius, I. XII, c. 8.

motu sensitivo vel naturali, volumus *secundum quid* et per modum velleitatis tantum, nempe si aliud non obstet ex parte rationis. Ergo oratio proprie et simpliciter exauditur, quando voluntas deliberata impletur. Atqui secundum hanc voluntatem, apprime Deo conformem, Christus nihil aliud voluit nisi quod scivit Deum velle. Ergo.

2º *Objectioni de translatione calicis*, quam diversimode Patres exponunt, sic occurritur. a) Aut Christus per hoc petiit alios martyres suæ passionis imitatores fieri, vel se timore non perturbari vel morte non detineri, et tunc impleta est oratio. b) Aut petiit omnino amoveri calicem mortis sibi a Judæis parati, et tunc aestimandum est petitionem hanc sensualitatis et naturæ fuisse quidem a Christo, humano more, ad Patrem directam, non tamen fultam et approbatam oratione proprie dicta voluntatis deliberatæ (a. 4 ad 1).—Reliquæ objectiones de eodem arguento facile solvi poterunt, dummodo distinguatur oratio voluntatis *antecedentis* et voluntatis *consequentis*.

ARTICULUS III.

De veritate sacerdotii Christi.

(Q. XXII, a. 1 et 6)

1º “Quamvis orare sit omnium, præcipue tamen est sacerdotum munus” (Satolli in Q. XXII); unde logico gradu ferimus de oratione Christi ad ejus *sacerdotium* considerandum, in quo potissima est *Mediatoris* ratio.—“Alii homines particulatim habent quasdam gratias; sed Christus, tanquam omnium caput, habet perfectionem omnium gratiarum; et ideo quantum ad alios pertinet, alius est *legislator*, et alius *sacerdos*, et alius *rex*; sed haec omnia concurrunt in Christo tanquam in fonte omnium gratiarum. Unde dicitur (Is. XXXIII, 22): *Dominus judex noster, Dominus legifer noster, Dominus rex noster; ipse salvabit nos*” (art. 1 ad 3).

2º Duo circa sacerdotium Christi in praesenti adstruenda sunt, scil. ejus *veritas* et *excellentia* (de effectu enim illius et sacrificio Crucis dicetur infra).—Questio autem de veritate, quae hujus est articuli, tria complecti videtur, videlicet an Christus sit vere sacerdos, quanam *ratione formalis*, et secundum quemnam *ordinem*: inde tres conclusiones.

Conclusio 1º.—CHRISTO MAXIME CONVENIT ESSE SACERDOTEM, ut fide constat ex *Conc. Trid.* (Sess. XXII, cap. 1): “Oportuit...sacerdotem alium secundum ordinem Melchisedech surgere, D. N. J. C.”

1º *Scriptura* diserte id tradit, praesertim verbis B. Pauli qui in ep. ad Hebreos tam multis sententiis sacerdotium Christi commendat et super sacerdotium Aaronicum extollit: ait Ap. (IV, 14): *Habentes Pontificem magnum qui penetravit ccelos, Iesum Filium Dei, teneamus confessionem.*—Hinc sacerdotes V. T. ordinabantur ad figurandum Christum, ut docet *D. Thomas* (I-II^a, Q. CII, a. 3): “Potissimum sacrificium est quo ipse Christus seipsum obtulit Deo in odorem suavitatis, ut dicitur Eph. V, 2, et propter hoc omnia alia sacrificia offerebantur in veteri lege ut hoc unum singulare et præcipuum sacrificium figuraretur, tanquam perfectum per imperfecta.”

2º *Ratio* hoc ipsum ex *natura rei* comprobatur.—Sacerdos proprie dicitur is qui electione et consecratione speciali constituitur ut, mediatoris munere fungens, sacra populo tradat, populi preces Deo praesentet, maximeque offerat dona et sacrificia pro peccatis. Atqui haec perfectissime Christo convenient: ergo.

Maj. decl. a) Imprimis sacerdos etymologice sonat quasi *sacra dans*, sicuti pontifex intelligitur quasi *pontem erigens* hominem inter et Deum. b) Duplex autem distinguitur sacerdotium: unum quidem *improprie* dictum, in quo quis seipsum suosque actus Deo interne offert veluti spiritualem hostiam; aliud vero *proprie* sumptum, ad hoc potissime institutum ut Deo aliquid exterius offeratur in protestationem divinæ subjectionis (II-II^a, Q. LXXXV, a. 4). c) Propriam hujus sacerdotii (de quo loquimur) indolem sic describit Ap. (Heb. V, 1): *Omnis pontifex ex hominibus assumptus* (electio) *pro hominibus constituitur* (auctoritativa consecratio et finis) *in iis quæ sunt ad Deum* (communis materia sacer-

dotii), *ut offerat dona et sacrificia pro peccatis* (actus proprius qui est sacrificium) ¹.

Min. ostend. a) Siquidem Christus ab instanti Incarnationis sacerdos, præ reliquis sacerdotibus necnon angelis, unctionis et constitutus est, juxta illud (Ps. XLIV, 8): *Unxit te Deus, Deus tuus, oleo latitiae præ consortibus tuis.* b) Per eum autem Deus maxima et pretiosa nobis promissa donavit (2 Pet. I, 4), scil. Legem, gratiam, etc. c) Ipse, præterea, preces per totam vitam pro nobis nostroque nomine ad Patrem effudit. d) Maxime sacrificium Deo obtulit (cruentum in Cruce, incruentum in altari), quia *complacuit... per eum reconciliare omnia in ipsum per sanguinem crucis ejus, sive quæ in terris, sive quæ in cœlis sunt* (Coloss. I, 19-20). e) Unde et Deus refertur solemnni juramento tantum constituisse Pontificem: *Juravit Dominus... tu es sacerdos in æternum* (Ps. CIX, 4).

Conclusio 2^a. — CHRISTUS EST SACERDOS, SECUNDUM QUOD HOMO, scil. secundum quod est persona divina subsistens in humana natura (contra Arianos et Nestorianos).

Sane sacerdotium pertinet ad Christum mediatorem cœū proprium officium. Atqui *mediatio* est Christi-homilis tum ontologice, tum moraliter. *Ontologice* quidem: quia substantia illa, eaque tantum, divini suppositi subsistentis in humanitate, distat secundum medietatem quamdam ab utroque extremorum, scil. a Deo in natura, et ab hominibus in dignitate gratie et gloriæ; *moraliter* vero, quatenus ei sic convenit conjungere homines Deo, præcepta et dona Dei ad eos deferendo et pro eis satisfaciendo et interpellando ².

Conclusio 3^a. — RECTE SACERDOTIUM CHRISTI ESSE DICITUR SECUNDUM ORDINEM MELCHISEDECHI, prout Scriptura (Ps. CIX, 4; Heb. VI, 20) universaque traditione designari solet.—Quod intelligendum est, non quasi Christus sacerdotium suum a Melchisedech derivaverit, sed quia iste specialius quam reliqui sacerdotes V. L. Christum præfiguravit.

1.—Ad sacra munera significanda pontifex V. T. ferebat in pectoro inscripta verba ista: *Doctrina et Veritas* (in heb. lux et perfectio), aliaque hæc in fronte: *Sanctum Domino* (Exod. XXVIII, 30 et 36); quatenus sacerdos est apud homines authenticus veritatis divinitate interpres sanctitatisque administer.

2.—III, Q. XXVI, a. 2.

Revera 1º *Melchisedech*, rex *Salem*, idem sonat ac rex *jusitiae et pacis* (Heb. VII, 1-2): quod eminenter fuit Christus.—2º Sacerdos ille exhibetur *sine patre, sine matre, sine genealogia, neque initium dierum, neque finem vitæ habens* (*ibid.* 3), non quia istis caruerit, sed Scriptura contra morem silente. Unde per hoc *assimilatus* est *Filio Dei* (*ibid.*), cuius nec est in terris pater, nec in celis mater, nec initium vel finis secundum divinitatem.—3º Narratur Melchisedech, acceptis ab Abraham decimis, ipsi *benedixisse* simulque sacerdotibus legalibus in eo seminaliter existentibus; per quod jam præfigurabatur excellentia sacerdotii Christi super sacerdotium Aaronicum.—4º Tandem Melchisedech obtulit in sacrificium *panem et vinum* (Gen. XIV, 18); in quo non solum sacra Eucharistia, sed et fructus ecclesiastice unitatis per sacerdotium Christi inductæ, expressius significabatur quam in sacrificiis legalibus cruentis¹.

ARTICULUS IV.

De excellentia sacerdotii Christi.

(Art. 2-5)

Pauca *prænotentur*.—1º Sacerdotium multiplex recensetur, scil. *Patriarchale* sub lege naturæ², *Aaronicum* sub lege mosaica, *Christianum* sub lege nova, quod vel *formaliter* in ipso Christo vel *participative* in ejus ministris accipitur.—2º Insuper, sacerdotium Christi spectari potest vel *formaliter* seu secundum se, vel *objective* seu ratione hostiæ ad quam

1—Circa h. art. cf. Petavius. l. XII, c. 11; Suarez, Knoll, etc.

2—Docet D. Thomas (II-II^m, Q. LXXXV, a. 1 ad 1): “Oblatio sacrificiorum in communione est de lege *naturali*; et ideo in hoc omnes conveniunt; sed *determinatione* sacrificiorum est ex institutione *humana* vel *divina*: et ideo in hoc differunt.” Unde eruitur *sacerdotium*, correlative sacrificii, fusse de lege naturæ communiter, speciali vero hominum determinatione tempore patriarchali indiguisse.—Cf. Suarez, Disp. XLVI, S. 3.

immolandam præcipue ordinatur, vel *effective* seu quoad effectus suos, vel *finaliter* seu quoad durationem et effectum suorum consummationem.

Conclusio.—CHRISTI SACERDOTIUM EXCELLENTISSIME COM-MENDATUR RATIONE SÙI, DIVINÆ HOSTIÆ OBLATÆ, INFINITÆ EFFICACIÆ, ÆTERNAEQUE DURATIONIS.—Quatuor partes singu-latim declarandæ sunt.

1^a Pars.—Sacerdotium Christi imprimis præeminet quod-libet aliud secundum se :—1^o Ob *originem*. Non enim Christus deputatus est sacerdos electione hominum, nec successio-nis jure manante a tribu Levi et stirpe Aaronica (sunt quippe secundum humanitatem de tribu Juda, ut constat ex Heb. VII, 14), sed singularissima electione Dei per Unionem hypostaticam quasi per ineffabilem unctionem, ut appareat ex (Heb. X, 4-7).—2^o Ob sacerdotis *augustissimam personam*; Christus namque non est purus homo, sed simul verus Deus infinita perfectione et sanctitate præcellens; unde (Heb. VII, 26-27) : *Talis decebat ut nobis esset pontifex sanctus, inno-cens, impollutus, segregatus a peccatoribus et excelsior cœlis factus, qui non habet necessitatem quotidie, quemadmodum sacerdotes, prius pro suis delictis hostius offerre, deinde pro populi.*—3^o Ob plenitudinem potestatis, quæ in Christo viget, juxta illud (Matth. XXVIII, 18) : *Data est mihi omnis potestas in cœlo et in terra.* Christus enim nec su-pe-riorem habet sacerdotem a quo dependeat, nec æqualem quo-cum eamdem potestatem participet; sed omnis sacerdotalis potestas ad sacerdotium Christi refertur sive ut *præparatio* sive ut *derivatio*. “Christus, ait Auctor (hic, art. 4), est fons totius sacerdotii. Nam sacerdos legalis erat figura ipsius; sacerdos autem novæ legis in persona ipsius operatur.” Unde a sacerdotio Christi differt Aaronicum ut umbra a veritate, evangelicum vero ut participatum et particulare ab impar-ticipato et universali¹.

2^a Pars.—Excellentia sacerdotii Christi amplius pensanda est *ex parte hostiæ oblatæ*, quæ, secus ac in sacerdotio anti-quo, non alia est quam ipse offerens (Eph. V, 2):—Hinc 1^o dum sacerdotes Aaronici imperfectas victimas sæpius im-molabant (Heb. X, 1), *Christus semel oblatus est ad multo-*

1—Sylvius in h. loc.

rum exhaustienda peccata (*ibid.* IX, 28).—^{2º} Hæc hostia præstantissima eminenter præhabet quidquid virtutis est in omnibus aliis hostiis. Nam in V. L. triplex erat hostiarum genus: una *pro peccato*, conveniens statui *pænitentium*; altera *pacificus*, oblata Deo vel pro gratiarum actione vel pro offerentium salute, et conveniens statui *proficientium*; tertia *holocaustum* (quasi totum incensum) ad significandam plenissimam hominis subiectiorem, et conveniens statui *perfectorum*¹. Jamvero tria haec de humanitate Christi, Deo Patri oblata, praedicari possunt, quatenus per eam et peccata deleta sunt, et gratia confirmans accepta, et perfectio gloriæ comparata (art. 2).

^{3º} Pars.—Commendatur adhuc sacerdotium Christi ex *summa sua efficacia*:—Nam ^{1º} sacrificia V. L. non poterant *per se* a peccato mundare, siquidem *impossibile est sanguine taurorum et hircorum auferri peccata* (*Heb.* X, 4), sed erant tantum protestationes fidei in Christum venturum, cuius virtute homo justificabatur². E contra, sacerdotium Christi, *infinitam* vim ducens ex infinita offerentis et hostiæ dignitate, efficaciam habuit ad perfectam peccatorum emundationem (*Heb.* IX, 14), deleta per gratiam macula culpæ et reatu poenæ totius humani generis per plenariam satisfactiōnem sublatō (art. 3).—Verumtamen ^{2º} effectus tanti sacerdotii ad Christum non pertinet *simpliciter*, sed *secundum quid* tantum. Etenim alii sacerdotes proprium sacerdotii sui effectum participant, non ut sacerdotes, sed ut peccatores. Christus autem a peccato immunis fuit, etsi in carne possibili versaretur. Idcirco non indiguit sacrificio expiatorio, sed ex ipsa devotione, qua sacrificium crucis obtulit, gloriam resurrectionis consecutus est (art 4).

^{4º} Pars.—Reliquum est ut *eternitatem* sacerdotii Christi (in quo a sacerdotio antiquo distinguitur) adstruamus, juxta illud (*Ps. CIX*, 4): *Tu es sacerdos in eternum*:—Id asseritur triplici ex capite. ^{1º} Ratione personæ; Christus enim ita sacerdos est ut nec ipse cuiquam successerit, nec ipsi quisquam successurus sit, testante *Ap.* (*Heb. VII*, 23-24): *Alii quidem plures facti sunt sacerdotes, idcirco quod*

1—*Cf. I-II^m, Q. CII, a. 3 ad 8.*

2—*Ibid.*, Q. CIII, a. 2.

*morte prohiberentur permanere ; hic autem, eo quod
maneat in æternum, sempiternum habet sacerdotium.—
2º Ratione officii ; non solum enim semper vivit ad interpellan-
dum pro nobis (ibid. v. 25), sed jugiter pro nobis in-
cruente sacrificat per ministros seu vicarios suos, quippe est
“ idem nunc offerens sacerdotum ministerio, qui seipsum
tunc in cruce obtulit ” (Trid. Sess. XXII, cap. 2).—3º Ratione
effectus ; nobis enim æterna procuravit bona, quæ sunt sacri-
ficii consummatio, juxta illud (Heb. X, 14) : *Una oblatione
consummarit in sempiternum sanctificatos.* Scilicet, sicuti
olim pontifex legalis semel in anno cum hostiarum sanguine
intrabat in sancta sanctorum (Lev. XVI), ita (sed una per-
fecta oblatione) Christus cælum ingressus est, nobis per san-
guinem suum viam aperiens (art. 5)¹.*

1—De sacerdotio Christi leg. Monsabré, 42^e Conf., 1879.

QUÆSTIO SECUNDA

DE FILIATIONE ET PRÆDESTINATIONE CHRISTI

Consideranda nunc sunt quæ Christo convenient secundum habitudinem *Patris ad ipsum*; de quibus tria, duce Angelico, inquiremus: scil. an filatio *adoptiva* praedicari possit de Christo (art. 1), an saltem *prædestinationis* (art. 2), et quænam sit relatio *prædestinationis* Christi ad *prædestinationem nostram* (art. 3).

ARTICULUS I.

Utrum Christus, secundum quod homo, sit filius Dei adoptivus.

(Q. XXIII, a. 4)

1º Distinguere est duplēm *filiationem, naturalem* unam, *adoptivam* alteram. Illa quidem est relatio fundata in reali communicatione ejusdem naturæ; hæc vero, veluti prioris imitatio, definitur a juristis et theologis "personæ extraneæ in filium et hæredem gratuita assumptio¹."—Præsupponimus quod exploratum est, Christum ut *Deum esse Filium Dei naturalem*; itidem justos, gratia habituali ornatos, haberi tanquam filios Dei *adoptivos*. — At quæstio exsurgit num Christus, quatenus *homo*, filius Dei *adoptivus* denominari possit.

2º Id de Christo-*homine* praedicari posse, *Felix* Epus Urgellitanus et *Elipandus* Archpus Toletanus circa finem sæc. VIII contenderunt. Quæ opinio quam duplē sensu intelligi queat, scil. sensu Nestorii ponentis in Christo duas personas,

1—Vid. tract. nost. *de Gratia*, Disp. V, Q. I.

et sensu altero servante unitatem personæ probabilius; imo certum videtur (ut sentiunt *Petavius*, l. I, c. 22, *Suarez*, *Billuart*, etc.) Felicem et Elipandum docuisse Adoptianisnum veneno Nestoriano infectum.—*Durandus* vero aliique nonnulli opinati sunt posse, salva personali unitate Christi, admitti in eo rationem filii adoptivi secundum humanitatem.—Præterea, *Vasquez* et *Suarez*, et si cuicunque Adoptianismi formæ repugnarent, singularem tamen opinionem invexerunt circa filiationem Christi, dicendo Christum ut hominem esse filium Dei naturalem, non æterna generatione, sed *gratia unionis* naturaliter afferente sanctificationem humanitatis et jus ad hæreditatem cœlestem.

3º Subjiciam Adoptianismum, contra quem strenue pugnarunt *S. Paulinus Aquileiensis*, *Alcuinus* et *Agobardus*, pluribus in Synodis (juvante Carolo Magno) proscriptum fuisse, maxime in Synodo *Francofordensi* (a. 794) quæ ab *Adriano I* confirmata est.—Disputant quidem theologi de sensu proprio illius damnationis; at communior veriorque sententia est, Patres *Francof.* *directe* et per se reprobasse Adoptianismum Nestorianum quem in scriptis sibi subjectis serpentem prospiciebant, *indirecte* autem proscriptisssse quolibet Adoptianismi genus. Hinc opinio *Felicitis* et *Elipandi hæretica* censenda est, altera vero *Durandi*, sin hæretica, saltem indubitanter *falsa*.

Conclusio. — CHRISTUS, QUATENUS HOMO, NULLO MODO DICENDUS EST FILIUS DEI ADOPTIVUS, SED NATURALIS TANTUM SECUNDUM AETERNAM FILIATIONEM TEMPORALITER HUMANÆ NATURÆ COMMUNICATAM.

1º *Pars*, directa contra *Adoptianos*, sancita est in *Conc. Franc.* (Ep. ad Episc. Hisp.) hisce verbis: “Si Deus generatus est, nequaquam *adoptivus*, sed Filius; quia alia persona est proprii Filii, alia adoptivi filii servi;” etc.

1º Sane validum est *Scripture* argumentum.—*a)* Imprimis hic congruit observatio *S. Aug.* (l. cont. Secundinum Manich. c. 5): “Lege itaque Scripturas, nusquam invenies de Christo dictum, quod adoptione sit Filius Dei.”—*b)* Immo Christus, ut homo vel per humanitatem agens et patiens, nominatur *Filius Dei unigenitus et proprius*; v. g. (*Joan. I, 18*): *Deum nemo vidit unquam: unigenitus Filius, qui est in sinu Patris, ipse enarravit.* Et (*Rom. VIII, 32*): *Qui*

proprio Filio suo non pepercit, sed pro nobis omnibus tradidit illum. In quem locum ait S. Thomas (lect. 6) : “Cum autem supra de multis filiis mentionem fecisset (Apostolus), dicens : *Accepistis Spiritum adoptionis filiorum*, ab omnibus illis hunc filium separat, dicens : *Proprio filio suo*, i. e. non adoptato, ut haeretici mentiuntur, sed naturali et coeterno (1 Joan. V, 20) : *Ut simus in vero Filio ejus J. C.* de quo Pater dicit (Matth. III, 17) : *Hic est Filius meus dilectus.*”

2º *Traditionis* voces seu testimonia magna eruditione contulit Petavius (l. VII, c.2), “quæ dum in utraque natura unicum eumdemque verum esse Dei Filium asserunt Christiani, nullum in eo locum *adoptivo* minimeque naturali reliquum faciunt, quædam etiam *adoptivum* nominatim dici haberique prohibent.” Sic inter Gracos loquitur *Cyrillus Alex.* (De rect. Fid. ad Theod. n. 26) : “*Unus est Filius*, unus Dominus J.C., et ante carnem, et posteaquam homo apparuit. “Inter Latinos, S. *Augustinus* (Tract. VII in Joan. n. 4) : “Oportebat ergo ut ille baptizaret, qui est Filius Dei unicus, non adoptatus. Adoptati filii, ministri sunt Unici. Unicus habet potestatem, adoptati ministerium.”

3º Suppetunt *rationes* theologicæ.

a) Etenim Christus, etiam ut homo, est Filius Dei naturalis. Atqui Filius Dei *naturalis* nullo modo potest dici filius *adoptivus* : ergo. *Maj.* constat : quia filatio proprie et immediate convenit hypostasi vel personæ ceu enti completo¹, non autem naturæ ; nusquam enim natura appellari potest filia. Atqui in Christo non est alia persona vel hypostasis quam increata, cui convenit esse Filium per naturam. Ergo. *Min. prob.* Filiatio adoptionis est participata quædam similitudo filiationis naturalis. Atqui quod dicitur aliquid *per se* et naturaliter, nequit esse id ipsum *participative*. Ergo Christus nullo modo vocari potest Filius Dei *adoptivus*.—Ne detur in proposito cavillationis ansa, *advertendum* est Christum, etiam *quatenus* est homo, dici filium Dei naturalem, non quidem *reduplicative*, quasi hoc ab humanitate habeat tanquam a causa, sed *specificative* seu prouti subsistit in humana natura personaliter Verbo unita.

b) Præterea, adoptatio duo' necessario requirit, scil. quod persona adoptata (non natura tantum) sit adoptanti *extranea*, et quod ei desit *jus* ad optatam hæreditatem. Atqui Christus homo nec est secundum personam Deo extraneus, nec jure caret ad hæreditatem paternam. Ergo. Ad rem *D. Thomas* (3 S. D. X. Q. II, a. 2, sol. 3): "Christus nullo modo dicendus est filius adoptionis: quia ei competit ex sua natura, secundum quam æternaliter a Patre nascitur, habere jus in hæreditate paterna; quia omnia quæ habet Pater, sua sunt, ut dicitur *Joan. XVI*. Unde hoc *jus* non acquiritur ei per gratiam advenientem, ut possit dici filius adoptivus."

2^a Pars concl. ferit sententiam supra recitatam *Vasquezii* et *Suarezii*.

Prob. cum directe, tum indirecte.

1^o *Directe*.—Aliud est enim *conditio* requisita ad hoc ut filiatio naturalis homini-Christo conveniat, aliud *fundamentum* seu ratio propria qua filiatio illa intrinsece constituitur. Atqui gratia unionis, per quam alversarii vellent naturalem Christi filiationem, in quantum est homo, explicare, est quidem conditio omnino necessaria ut homo-Christus filius Dei naturalis dicatur; sed ratio seu fundamentum hujus proprietatis personalis optime reponitur in æterna generatione Verbi temporaliter communicata humanæ naturæ secundum unionem hypostaticam. Ergo.—*Conf. ex D. Thoma* (Q. XXXII, a. 3): "Illud quod de aliquo dicitur secundum perfectam rationem, non est dicendum de eo secundum rationem imperfectam... Christus autem est Filius Dei secundum *perfectam* rationem filiationis; unde quamvis secundum humanam naturam sit creatus et justificatus, non tamen debet dici Filius Dei neque ratione creationis, neque ratione justificationis, sed *solum ratione generationis æternæ*, secundum quam est filius Patris solius. Et ideo nullo modo debet dici Christus filius Sp. Sancti, nec etiam totius Trinitatis."

2^o *Indirecte*.—*Hurter* (th. 149), vestigis insistens celebriorum theologorum, e quibus *Gonet*, *Petavius*, *Franzelin*, paucis verbis complexus est præcipua inconvenientia oppositæ sententiæ. Ait enim: "His nonnulli theologi non contenti alias excogitarunt rationes, propter quas Christus, ut hic homo est, filius *naturalis* dici possit, sanctificationem scil. naturæ humanæ per substantivam cum Verbo unionem et

ius inde obortum ad hæreditatem Dei. Contra quam opinionem advertimus 1. eam esse *præter Ecclesiæ doctrinam*, quæ non novit aliud sui dogmatis fundamentum quam *personæ unitatem*; 2. in ea perverti filii *naturalis* notionem, cum *nova* quædam filiatio *naturalis* admittatur, quæ non fundatur in *generatione*; 3. ex ea sequi Christum, ut hic homo est, quodam vero sensu filium esse non solius Patris, sed totius *Trinitatis*; atqui a tali doctrina patres prorsus abhorrent. Denique 4. in ea theoria vix effugitur error, in Christo *duos esse* Filios, alterum *proprie* naturalem, alterum *analogice* naturalem, quod vix differt ab errore adoptianorum."

Solv. obj.—OBJ. 1.—*Hilarius*, de Christo loquens (l. II de Trin. n. 27), scribit: "Potestatis dignitas non amittitur, dum carnis humilitas *adoptatur*!" Alii nonnulli idem *adoptionis* nomen de Christo prædicant. Ergo.

RESP. *D. antec* :... et hæc sunt locutiones *propriae*, *N*; *impropriae* accipienda sunt pro unione humanæ naturæ ad personam Filii, *C*.—*Neg. conseq.*

OBJ. 2.—*Juxta Aug.* (l. de Pred. Sanct. c. 15), "eà gratia fit ab initio fidei suæ homo quicunque Christianus, quâ gratia homo ille ab iūtū factus est Christus." Atqui alii homines sunt Christiani per gratiam adoptionis. Ergo.

RESP. *D. M* :...et similitudo valet quantum ad principium, *C*; quantum ad terminum, *N*.—*D. m* :...quæ *adoption* est effectus formalis primarius gratiæ habituā, *s*, *N*; effectus secundarius in eo qui non sit jam filius Dei *naturalis*, *C*.—*Neg. conseq.*

Duo attendantur.—1º Comparatio S. Augustini intelligenda est *ex parte principii*, quia scil. sicut sine meritis quilibet homo fit Christianus, ita homo (qui Deus est) sine meritis habuit ut esset Christus; non vero *ex parte termini*, quippe Christus est Filius Dei *naturalis*, quicunque autem alias filius adoptivus.—2º Nec mirum est *gratiam habitualem* facere filium adoptivum in aliis, non in Christo. Hic enim effectus formalis gratiæ non est primarius, sed *secundarius* tantum et dependens a *conditione*: dummodo suppositum gratia ornatum sit capax filiationis adoptivæ; quod excluditur per

1.—Quidam tamen legunt "adoratur."

naturalem Christi filiationem, a qua gratia debito quodam procedit.

OBJ. 3.—Christus, secundum quod homo, est servus. Atque dignius est esse filium adoptivum quam servum. Ergo.

RESP. D. M:...ratione suppositi, N; ratione naturæ. C.—D.m:...caeteris paribus; C; dignius est esse filium adoptivum quam filium naturalem in natura serva, N.—Neg. consec.¹

ARTICULUS II.

Utrum Christo conveniat prædestinatum esse.

(Q. XXIV, a. 1-2)

Quæstio de prædestinatione Christi ortum sumpsisse videtur ex loco Ap. (Rom. I, 4), ubi (juxta Vulgatam) Christus dicitur *prædestinatus* esse Filius Dei; licet textus græcus ansam quibusdam præbuerit legendi quod Christus fuerit *demonstratus* vel *destinatus* filius Dei (Franzelin, th. 38).—Duo sub præs. articulo concludemus: *unum* de veritate prædestinationis Christi; *alterum* de ratione qua prædestinatio ipsi convenit.

Conclusio 1^a. — CHRISTO PROPRIE CONVENIT ESSE PRÆDESTINATUM.—Ut notat Cajetanus (in art. 1), prædestinatio hic accipitur absolute et *simpliciter*, prout respicit unum gratiam quæ in nobis quidem est beatitudo, in Christo vero *Unio personalis*, quain reliqua dona supernaturalia eeu proprietates consequuntur.

1^o Theologis omnibus annuentibus, *Incarnationis opus sub æterna Dei prædestinatione* utcumque cadere censendum est.—Ete^m, prædestinatio proprie intelligitur “divina quædam præordinatio ab æterno de his quæ per Dei gratiam futura sunt in tempore.” Atqui id in tempore per gratiam

1—Plures objectiones solutæ reperiuntur ap. Gonet, Billuart, Knoll, etc.

unionis divinitus factum est ut homo esset Deus et Deus homo; nec contendi potest, tantum opus divinæ æternæque præordinationis consilia effugisse. Ergo.

2º Quoad modum quo prædestinatio Christi in specie verificetur, lis est inter theologos, diversis diverse¹ exponentibus verba Paulina (Rom. I, 3-4): *Qui factus est ei ex semine David secundum carnem; qui prædestinatus est Filius Dei in virtute secundum spiritum sanctificationis ex resurrectione mortuorum J. C. D. N.*—Hæc nobis (ad mentem D. Thomæ) amplectenda probabiliter videntur.

a) *Primo, impropre tantum prædestinatio Filii Dei a nonnullis tribuitur naturæ humanæ: tum quia suppositi est (non naturæ) communiter prædestinari seu in finem salutis dirigi; tum quia filiatio divina nequit humanitati convenire, nisi per extortam expositionem istam: prædestinatum est ut humana natura uniretur Filio Dei in persona.*—
 b) *Secundo, prædestinatio magis tribuenda est personæ Christi, non quidem quatenus Deus est, sed quatenus homo seu subsistens in humana natura: nimirum, in sententia S. Pauli, subjectum prædestinationis describitur qui factus est ex semine etc, terminus vero Filius Dei in virtute seu Filius naturalis, utpote exercens ipsam virtutem Patris in opere sanctificationis et resurrectionis (Comm. S. Th. in h. loc.)².*—
 c) *Tertio salvatur duplex antecessio seu prioritas requisita ad prædestinationem. Nam 1º planum est prædestinationem ipsam antecedere prædestinato; quippe, licet persona Christi ab aeterno fuerit Filius Dei, id tamen non semper fuit quod subsistens in natura humana esset Filius Dei.* 2º *Nec deest prioritas (saltem intelligendi modo) prædestinati respectu gratiæ sibi collatae: siquidem (ut sentit Cajetanus in h. art.) prius concipitur Verbum habens carnem quam Verbum sic carni personaliter conjunctum ut sit Filius Dei. Aut, si mavis, (cum Joan. a S. Th. et Billuart) dicitur Christum ut exercentem munus subsistentiæ in natura humana esse subjectum prædestinationis ad filiationem sub munere relationis posterius conceptam.*

1—Cf. Joan. a S. Thoma, Disp. XX.

2—Fateor cl. Cornely (Comm. in Rom. I) huic explicationi non favere, aliterque verba D. Pauli interpretari.

Duo ex dictis colligemus.—^{1º} Christus ut homo prædestinatus est *principaliter* ad filiationem Dei naturalem, et *secundario* tantum seu consequenter ad visionem beatificam cæteraque dona supernaturalia.—^{2º} Magis est vera hæc prop: “Christus est prædestinatus Filius Dei” quam altera: “Christus est factus Filius Dei.” Ratio discriminis est, quia verbum *factus* imponitur ab eo quod est in re; secundum rem vero non convenit personæ Christi ut incepit esse Filius Dei. At verbum *prædestinatus* imponitur ab actu intellectus, in quo potest suppositum Christi prius accipi vague et *indeterminate*, postea vero *determinate* pro Filio Dei.

Conclusio 2^a.—VERA EST PROP: “CHRISTUS, SECUNDUM QUOD HOMO, EST PRÆDESTINATUS ESSE FILIUS DEI.”

Prob.—Hoc dicimus convenire alicui secundum quod homo, quod ei convenit ratione humanæ naturæ. Atqui prædestinationis Christo attribuitur *ratione humanæ naturæ*. Ergo. *Min. decl.*—Et primo aliquid potest convenire alicui ratione humanæ naturæ dupliciter: uno modo *causaliter* seu quatenus humana natura sit causa illius, et hic non est sensus præsentis argumenti; alio modo *specificative* tantum seu quatenus secundum humanam naturam aliquid suscipitur, et sic Christum dicimus prædestinatum ratione humanae nature.—*Secundo, a)* etenim *antecessio* prædestinationis respectu Verbi incarnati accipitur ex parte naturæ humanae, quatenus hæc non semper fuit Verbo unita. *b)* *Gratuitum* etiam *donum* a Deo prædestinante in tempore collatum ad eamdem humanitatem pertinet, in quantum hoc ei per gratiam largitum est ut Filio Dei personaliter conjungeretur. Ergo.

Cum Auctore *advertisimus* (art. 2, resp. ad 3):—*a)* utrumque posse concedi, scil. quod et filius hominis prædestinatus est esse Filius Dei, et Filius Dei prædestinatus sit esse homo.—*b)* Quia tamen Incarnatio in *gratiam* naturæ nostræ Deo uniendæ contigit, prædestinationis adeo gratuita magis proprie sub primo sensu quam sub altero prædicatur.

ARTICULUS III.

Utrum prædestinationis Christi sit nostra prædestinationis exemplar et causa.

(Art. 3-4)

Considerata Christi prædestinatione *absolute*, proximum est ut eam *relative* inspiciamus, scil. quoad causalitatis nexum quem habet cum prædestinatione nostra, sive per modum causæ *exemplaris*, sive per modum cause *finalis*, sive per modum causæ *efficientis*.—At notandum est prædestinationem hic sumi, non secundum prædestinantis *actum*, siquidem uno eodemque actu simplicissimo prædestinavit Deus nos et Christum, sed secundum prædestinationis *terminum* et habitudinem objectivam.

Conclusio.— PRÆDESTINATIO CHRISTI AD NOSTRAM SE HABET TANQUAM CAUSA EXEMPLARIS, FINALIS ET MORALIS.

1^a Pars :—1^o fundatur in (Rom. VIII, 29) : *Quos præscrivit et prædestinavit conformes fieri imaginis Filii sui*; ubi conformitas exemplati ad exemplar homogenea quidem censenda est respectu termini secundarii prædestinationis Christi (i. e. gratiæ et gloriæ), non tamen respectu termini primarii et singularissimi qui est filiatio naturalis.—Cousenant verba *Ang.* (de Præd. Sanct. c. 15, n. 30): “Est præclarissimum lumen (quasi exemplar directivum) prædestinationis et gratiæ ipse Salvator, ipse mediator Dei et hominum, homo Christus Jesus.”

2^o Duo in prædestinatione nostra attendenda sunt, nempe *bonum* ad quod prædestinamur et *modus* illud consequendi. Atqui utroque ex capite elucet exemplaritas prædestinationis Christi : siquidem a) ipse prædestinatus est ad hoc ut esset Filius Dei naturalis, nos autem prædestinamur ad filiationem adoptionis veluti participatam naturalis filiationis similitudinem ; b) in Christo quoque natura humana nullis suis precedentibus meritis Verbo copulata est, atque haud dispari lege nos citra operum merita de plenitudine Christi gratiam salutis acceperimus. Ergo.

2^a Pars est de causa *finali*, quam plane indigitat *Cone. Trid.* (Sess. VI, cap. 7) inquiens : “Hujus justificationis cause sunt, *finalis* quidem, gloria Dei et *Christi*,” etc.

1^o Eo pertinent verba Ap. (1 Cor. III, 22-23): *Omnia vestra sunt, vos autem Christi, Christus autem Dei.* Unde S. Thomas (3 S. D. X, Q. III, sol. 3) diserte agnoscit in prædestinatione Christi causam finalem prædestinationis nostræ, "in quantum nostra salus in ejus (Christi) gloriam redundat."—2^o *Ratio* est, quia congruit omnino ut inferiora ordinentur ad superiora tanquam ad finem. Atqui Christus prædestinatus est velut caput et Rex omnium prædestinatorum sibi multipliciter subiectorum. Ergo, licet humanum genus, ut redimendum, prius Christo in mente Dei fuerit secundum rationem finis *cui seu subjecti perficiendi*, Christus tamen est prædestinatus tanquam finis simpliciter *seu cuius gratia* reliqui prædestinati sunt.

3^o *Pars additur de causalitate morali* quæ aliqualiter reducitur ad causam *efficientem* (licet reapse magis se teneat ex parte cause *finalis*):—1^o Hoc causalitatis genus innuitur (Eph. I, 5): *Prædestinavit nos in adoptionem filiorum per Jesum Christum*; ubi Christus exhibetur tanquam "mediator alliciens" (S. Th. in h. l.) seu meritis inducens Deum ad prædestinandos filios adoptivos.—Sane 2^o id merito censeri debet causa moralis prædestinationis nostræ, *per quod* Deus præordinavit complendam nostram salutem. Atqui Deus ab æterno disposuit ut salus nostra per Christum completeretur: siquidem sub æterna prædestinatione cadit non solum futurus effectus, sed et effectio modus et ordo. Ergo.—Porro 3^o influxus ille intelligendus videtur non solum de prædestinatione justorum *in communi*, sed etiam *in individuo*, prout dignitas Christi-Regis exposcit et ipsa Scriptura non obscure docet (Eph. I, 3-4): *Benedixit nos in omni benedictione spirituali in celestibus in Christo. Sicut elegit nos in ipso ante mundi constitutionem etc.* Unde ipse Christus, alloquens discipulos, ait (Joan. XV, 16): *Non vos me elegistis, sed ego elegi vos.*

QUÆSTIO TERTIA

DE ADORATIONE CHRISTI

Progredimur ad considerandum *habitudinem Christi ad nos*, secundum quod cultu honoreque debito prosequendus est.—Christus autem spectari potest vel *in se*, vel in *sancatis suis*: unde duo inquisitionis capita.

Præsens quæstio instituitur de cultu seu adoratione Christi, atque quatuor sequentibus articulis absolvvi poterit. Nam cultus ille theologicæ subest disceptationi aut quoad *Christum ipsum* (art. 1), aut quoad *res Christo conjunctas*: quæ res sunt *humanitas cum suis partibus* (art. 2), *imagines* (art. 3), ac *instrumenta* (art. 4).

ARTICULUS I.

Utrum una et eadem adoratione sit adoranda divinitas Christi et ejus humanitas.

1º Agitur (ut monet *Cajet.*) de *unitate* aut *diversitate* adorationis homini-Deo deferendæ; nam Christum, ut *Deum*, cultu latreutico honorandum esse, nemo unus e christiana sobole inficiabitur.

2º Ad definiendum *adorationis* nomen lucemque universæ huic disquisitioni afferendam, nonnulla animadversu digna præstituemus.

a) Adoratio est religionis actus. Porro *religio*¹ (quæ et *pietas* respectu Dei-Patris et *latria* respectu Dei-Domini nominatur), sub genere *justitiae* existens, describi potest "virtus inclinans ad exhibendum Deo, in ejus excellentiæ reverentiam, cultum seu honorem² debitum." Ex quo comperitur

1—Cf. II-II^æ, Q. LXXXI et sqq.

2—*Honor*, ad quem concurrunt quæcumque exteriora signa, distinguitur a *laude*, in solis verbis posita. *Gloria* autem est effectus honoris et laudis, quia ex hoc quod testificamur de bonitate aliquius, ejus excellentia in notitia plurium clarescit: unde gloria dicitur "clara cum laude notitia" (II-II^æ, Q. CIII, a. 1 ad 3).

religionem distingui a virtutibus *theologicis*, in quantum non ipsum, Deum ultimum finem, pro objecto immediato habet, sed ea quæ ad finem illum sub specie cultus divini conducunt; quia vero, directe conferendo in Dei honorem, propinquius ad Deum accedit quam reliquæ virtutes *mores*, istis præeminere merito aestimatur.—*Actus* religionis duplicitis sunt generis: alii *interni* quasi principales et per se ad religionem spectantes, cujusmodi sunt devotio et oratio (saltē mentalis); alii *externi* veluti secundarii, inter quos numerant imprimis adorationem, dein sacrificium, oblationem et votum, juramentum et adjurationem, orationem vocalem et laudes divinas.—*Adoratio* presupponit quidem intelligendi actum quo Dei excellentia apprehendatur, sed secundum essentialē suum conceptum constat primario *actu voluntatis* se Deo subjicientis, consequenter vero quibusdam corporalibus humilitatis signis.

b) Atque, quemadmodum perfectio seu excellentia rite dispescitur in increatam et creatam, ita et honor excellentiæ congruens. Quam ob rem sub religione et in eodem justitiæ genere reperitur *dulia* (communiter sumpta) cuius est reverentiam cuicunque homini ratione cujuscumque præstantiæ exhibere, quæque sub se continet quasi species *pietatem* erga parentes ac patriam, *observantiam* erga personas in dignitate constitutas et quancumque hujusmodi virtutem honoriferam.—*Dulia* communis potissima species est *hyperdulia*, præstantiori creature reservata.—*Observantia* vero, pro diverso genere excellentiæ creatæ, dividitur in *sacram* et *civilem*.

c) Denique, quod ad *usum nominum* attinet, notare est *adorationis* vocem (maxime penes linguas originarias) ambiguum esse¹, ipsisque in Scripturis usurpari ad significandum honorem externum sive Deo, sive Angelis, hominibusque exhibutum. Attamen, tunc apud Grecos, tum apud Latinos Patres², ex antiquo deinceps mos obtinuit, magis magisque invalescens, ut nomen illud ad solam Dei Majestatem hono-

1—Cf. II-II^m, Q. LXXXIV, a. 1 ad 1.—Ipsi etiam exteriores actus, puta genuflexiones, communes sunt cultui Dei et hominum; “sed aliquid est quod soli Deo exhibetur, scil. sacrificium” (*ibid.*).

2—Cf. Petavius, l. XV, c. 2;—Knabenbauer in Matth. II, 11.

randam restringeretur.—Idem ferme notandum est de vocibus græcis *latrīa* et *dulīa* quæ originative non multum ab invicem in significanda servitute discreparunt, at postmodum ita a Patribus theologisque definitæ sunt ut *latrīa* cultum Dei, *dulīa* cultum sanctorum, *hyperdulīa* cultum B.V. Mariæ designaret.

3º De Christi adoratione perperam senserunt hæretici diversarum ætatum (*Perrone*, P. II, c. IV, a. 2). *Apollinaristæ* enim et *Eutychiani* docuerunt unam Christi adorationem fundatam in confusione naturarum; *Nestoriani* vero e principio duarum in Christo personarum duas intulerunt adorationes seorsim Verbo hominique adhibendas. *Wicleffus* Christum hominem etiam a Verbo sejunctum eadem, qua Verbum, adoratione colendum esse autunabat. Tandem *Sociniani* (qui negabant Christi divinitatem) divisi sunt in *adorantes* et *non adorantes*, prout vel affirmarent vel negarent cultu latrīæ Christum honorandum.

Conclusio.—**UNA SIMPLICITER EST HOMINIS-DEI ADORATIO SUB DUPLICI HONORIS CAUSA;** quod *de fide* est juxta *Conc. Ephes.* (can. 8) et *Conc. Cnptanum II* (can. 9) cuius haec verba sunt: “Si quis adorari in duabus naturis dicit Christum, ex quo duæ adorationes introducuntur semotim Deo Verbo et semotim homini... sed non *una adoratio* Deum Verbum incarnatum cum ejus carne adorat, juxta quod sanctæ Dei Ecclesiæ ab initio traditum est, talis anathema sit¹.”

Revera 1º testatur *Scriptura* quod Magi Christum puerum procidentes adoraverunt (*Math. II, 11*). Cæcus quoque natus interrogatus a Christo (*Joan. IX, 35*): *Tu credis in*

1.—In Bulla *Auctorem fidei* damnata est prop. 61^a Pistoriensium his verbis: “Propositio quæ asserit, *adorare directe humanitatem Christi, magis vero aliquam ejus partem, fore semper honorem divinum datum creature*, quatenus per hoc verbum *directe intendat reprobare adorationis cultum quem fideles dirigunt ad humanitatem Christi*, perinde ac si talis adoratio, qua humanitas ipsa et caro vivifica Christi adoratur non quidem propter se et tanquam nuda caro, sed prout unita divinitati, foret honor divinus impertitus creature, et non potius una eademque adoratio qua Verbum incarnatum cum propria ipsius carne adoratur, falsa, captiosa, pio no debito cultui humanitati Christi a fidelibus prestito ac priestando detrahens et injuriosa.”

Filiū Dei? respondit (v. 38): *Credo, Domine. Et procidens adoravit eum*¹. Pariter Ap. (Heb. I, 6) scribit: *Cum iterum introducit primogenitum in orbem terræ, dicit:*
Et adorent eum omnes Angeli Dei.

2^o Inter plures de ea re traditionis precones (quos refert Petavius, l. XV, c. 3) audiamus S. Athanasium dicentem (Epist. ad Adelphium). “Cum sciamus Verbum carnem factum esse, hoc ipsum etiam in carne positum Deum agnoscimus. Quis igitur ita desipit ut Domino dicat: Recede a corpore tuo, ut te adorem?” Et S. Epiphanium (in Ancorato): “Nemo sic insanit ut cum adorare velit Imperatorem in ipsius augustali, dicere huic audeat: Exi ab illo tuo augustali, ut te adorem. Sic igitur nemo Unigenito dixerit: Depone corpus ut adorem te. Quin potius ipsum adorat cum corpore Unigenitum, increatum cum templo sancto, quod veniens assumpsit.”

3^o *Ratio Auctoris* sic proponitur.—Proprie et simpliciter honor exhibetur personæ seu toti rei subsistenti ita ut ab ea unitatem recipiat, licet plures esse possint honoris causæ. Atqui in Christo una est tantum persona divina latreutico cultu digna, subsistens tamen in duabus naturis inæqualis excellentiæ. Ergo. *Maj. decl. a)* Et primum in eo qui honoratur duo possumus considerare, stil. *personam* honoratam et *causam* honoris. *b)* Porro *proprie* et *simpli-citer* honor defertur *personæ* que, quasi totum subsistens, *secundum se* honoratur, dum partes, puta manus vel pes, non secundum se, sed secundum *aliud in se* honorantur: in istis enim totum honoratur, sicut et aliquis honorari potest in veste, in imagine vel in nuntio. *c)* *Causa* autem honoris est excellētia, propter quam reverentia alicui exhibetur: que excellētia multiplex esse potest, puta prelatio, scientia, virtus. *d)* Sed, non obstante hac multiplicitate, unus præstatur honor pro una persona secundum id quod potius est in illa: non enim causa honoris, sed persona veneranda colitur uno cultu æquivalente omnibus titulis quibus honorabilis est. *Min.* constat ex tote tractatu de Incarnatione. Unde concludendum superest, Christo deberi unum simpliciter cultum latræ correspondente in primario et formaliter increatae ejus.

1—Cfr. Maldonatus, *Comm. in quatuor Evang.*, ad cit. loca.

excellentiae, secundario vero et virtualiter dignitati ejus creatae.

Solv. obj. — OBJ. 1. — Divinitas Christi adoranda est cultu communi Patri et Filio, juxta illud (Joan. V, 23): *Omnes honorificant Filium, sicut honorificant Patrem.* Atqui humanitas Christi non est communis Filio et Patri. Ergo.

RESP. *D. M.* : ... quantum ad causam *principalem* honoris, *C*; quantum ad causam *secundariam*, *N*. — *C.m.* — *Neg. conseq.*

OBJ. 2. — Honor praeium est virtutis et bonae operationis. Atqui in Christo duplex est operatio, divina et humana. Ergo.

RESP. *D. M.* : ... quatenus virtus vel operatio est *ratio honoris*, *C*; quasi sit id *quod honoratur*, *N*. — *C.m.* — *Neg. conseq.*

OBJ. 3. — Anima Christi, extra Verbi unionem, veneranda foret cultu proprio. Atqui nihil dignitatis ei per Unionem subtractum est. Ergo.

RESP. *C. M.* — *D.m.* : ... nec quidpiam ei accrevit, *N*; per hoc quod facta est anima personae divinæ, obtinuit ut coad- raretur in illa seu ut evaderet *objectum materiale partiale* ipsius adorationis Verbi cuius divinitas est *objectum formale*, *C*. — *Neg. conseq.*

ARTICULUS II.

Utrum humanitas Christi adoranda sit adoratione latriæ :—de cultu SS. Cordis Jesu.

In hoc art. doctrina præc. art. amplius evolvenda suscipitur, maxime secundum quod attinet *speciem* venerationis humanitati Christi debitæ; ex quo prono gressu devoteque animi illectu ducemur ad vindicandum cultum hodiernis temporibus efflorescentem *SS. Cordis Jesu*. — Duo ergo concludenda proponemus.

Conclusio 1^a. — **HUMANITAS CHRISTI, UT RES HONORATA, ADORANDA EST CULTU LATRIÆ; SED UT RATIO HONORIS, CULTU HYPERDULIÆ.**

ejus
cultu
mnes
Atqui
ro.
is, C;
nseq.
onis.
ana.

ono-
nseq.
anda
nem

per
ado-
tiale
for-

ne

cipi-
onis
que
rnis
con-

ATA,
LTU

1^a *Pars* constat; quia humanitatem Christi, ut rem, venerari nihil aliud est quam Verbum incarnatum seu humanatum adorare, sicut honorare vestem regis est ipsum regem, vestitum honorare.—Unde *Joan. Damasc.* (l. IV de Orth. Fid. c. 3): “Caro...cum incarnato Verbo adoratur, non quidem propter seipsam, sed propter Deum Verbum quod secundum hypostasim ipsi copulatum est.”

2^a *Pars* ostend. (contra paucos).—Quælibet excellentia potest esse ratio ob quam cultus proportionatus præstetur. Atqui in humanitate Christi, præter divinitatem ei conjunctam, reperitur excellentia inferior orta ex diverso gratiarum munere; nec inconveniens est ut mente quis secernat humanum a divino. Ergo sub hoc sensu, seu præeunte mentali hac divisione, absolute non repugnat quod uni personæ Christi deferetur cultus latræ propter divinitatem et cultus hyperdulicæ (hyperdulia debetur superiori excellentiæ) propter perfectionem humanitatis.—Attamen *de facto* cultus iste reapse non exhibetur, ne vergat in detrimentum alterius potioris in quo eminenter clauditur; nimurum eum “Ecclesia in mente retinet, non in usu, ad evitandos errores” (*Cajet.* in h. loc.).

Conclusio 2^a.—CULTUS SS. CORDIS JESU CUM VERUS TUM CONVENIENS AFFIRMANDUS EST¹.

Prænotanda.—1^o Cultus ille (prout nunc obtinet) vim præcipuam² duxit a triplici revelatione facta (1673-75) *B. Margarite Mariæ Alacoque*, cui “ante augustinum Eucharistiae Sacramentum fervidius oranti significatum est a Christo Domino, gratissimum sibi fore si cultus institueretur SS. sui Cordis humanum erga genus charitatis igne flagrantis, ac

1.—Historiam hujus cultus documentis fretam et veluti classicam reperiens penes Nic. Nilles, S. J., in opere: *De rationibus festorum sacratissimi Cordis Jesu et purissimi cordis Mariæ libri IV* (ed. 5, 1885).

2.—Dico *vim præcipuam*; nam negandum non est *P. Eudes* eidem cultui preevisse, tum directe, tum quoque indirecte per religionem erga purissimum Cor Mariæ, cuius apostolus fuit, quæque quasi aurora cultus Cordis Jesu preefusit: cf. *Les Sacrés Coeurs et le Vén. Jean Eudes*, par le R. P. Ange Le Doré, Sup. de la Cong. de Jésus et Marie.—P. Nilles (*op. cit.* t. I, p. 170), loquens de *Congr. Eudistarum et Societate Jesu*, notat utramque fuisse singulare ratione in partem propagationis cultus Smi Cordis Jesu vocatam.

velle se hujus rei curam ipsi demandatam" (Decr. Beatif. 1864).—Cultum hunc, mox in pluribus monasteriis et per plures præsertim Galliarum dioeceses vulgatum¹, S. Sedes maturo post examine orantibus Poloniæ episcopis et Archiconfraternitati Romanæ concessit publice constitui (1765); quem cum Syn. Pistoriensis prop. 62^a et 63^a tanquam illegitimum traduxisset, Pius VI ~~propositio~~ ^{propositio}nem illas una cum aliis damnavit (1794)²; tandem Pius IX cultum eundem ad universam Ecclesiam extendit.

2^o Ad naturam hujus devotionis rite intelligendam, juvat advertere Cor Jesu nobis ad colendum proponi, non solum quatenus est *symbolum* caritatis Christi, sed etiam et propriè quatenus est cor *carneum* personæ Verbi: id constat tum ex petitione Episcoporum Poloniæ quorum precibus S. R. Congregatio annuendum censuit (vid. *Franzelin*, th. 45), tum ex verbis Pii VI dominantis Pistorienses. — Ecclesiæ autem sensus est ipsum honorem *latrice*, quem Verbo incarnato adhibemus, SS. Cordi Jesu esse deferendum: quo in cultu Cor physice sumptum, seu secundum physicas *aptitudines* organicas vel symbolicas, se habet quasi objectum *materiale* (*profecto partiale*) honoris, divinitas autem Verbi cui conjunctum est quasi motivum *formale generale* quo cultus ille in genere latrice *verus* ac legitimus constituitur. Hoc autem motivum fundamentale excipiunt et circumambiant motiva *specialia* ac secundaria, nempe summa Christi caritas, debita ei reparatio, fovendi amoris nostri necessitas, etc,

1.—Festum SS. Cordis Jesu, acquiescente R^{mo} Epo de Saint-Vallier, Quebeci apud Ursulinas celebrari coepit an. 1700.

2.—“Doctrina, quæ devotionem erga SS. Cor Jesu rejicit inter devotiones quas notat velut novas, erroneas, aut saltem periculosas; intellecte de hac devotione, qualis est ab Ap. Sede probata; falsa, temeraria, perniciosa,piarum anrium offensiva, in Ap. Sedem injuriosa.—Item, in eo quod cultores Cordis Jesu hoc etiam nomine arguit, quod non advertant ss. carnem Christi aut ejus partem aliquam aut etiam humanitatem totam cum separatione aut præcisione a divinitate adorari non posse cultu latrice; quasi fideles Cor Jesu adorarent cum separatione vel præcisione a divinitate, dum illud adorant ut est Cor Jesu, Cor nempe personæ Verbi, cui inseparabiliter unitum est, ad eum modum quo exsangue corpus Christi in triduo mortis sine separatione aut præcisione a divinitate adorable fuit in sepulchro; captiosa, in fideles Cordis Christi cultores injuriosa” (Const. Auctorem Fidei).

quibus cultus cordis, præ cæteris partibus humanitatis Domini, *conveniens* efficitur.

3º In proposito nobis adversantur tum *Jansenistæ* qui cultum Cordis Jesu ceu erroneum aut periculorum acriter impugnarunt, tum *Rationalistæ* qui, calumniis, injuriis, irrisiōibus, catholicos quasi *cardiolatras* et superstitionis reos lacessere adamant.

1º *Pars concl.*, scil. *verum* esse præfatum cultum; ostend.

1º *Scripturæ* (missis iis quæ propheticæ de *corde Christi* prolata habentur (Ps. XXI, 15; XXXIX, 11, 17; LXVIII, 24 etc) aliquale fundamentum præbent. Nam a) Christus sæpe discipulos ad sui dilectionem provocavit, v. g. (Joan. XIV, 21): *Qui diligit me, diligetur a Patre meo*; dilectio autem maxime respicit ad cor tanquam ad amoris fontem vel symbolum.—b) Itidem Christus cor suum veluti virtutis exemplar colendum ac imitandum exhibuit (Matth. XI, 29): *Discite a me, quia mitis sum et humilis corde.*—c) Honoris erga Cor Jesu præsensio forte videbitur, quando Christus, corde motus ex morte Lazari ploratuque parentum et amicorum, (Joan. XI, 34-36) quæsivisse refertur: *Ubi posuistis eum?... et lacrymatus est;* unde dixerunt Judæi: *Ecce quomodo amat eum.* Nimirum (ut ait S. Th. Comm. in h. l.) Evangelista inducit Judæos admirantes cordis affectum quem Christus et verbis et lacrymis compatiens demonstravit.—d) Nec sine speciali consilio factum videtur quod legimus de Joanne (*ibid.* XIII, 23 sqq): *Erat ergo recumbens unus ex discipulis ejus in sinu Jesu, quem diligebat Jesus...* Cum recubuisse ille supra pectus Jesu, etc. Ibi enim præfigurabatur futurus Cordis Christi cultus, ad quem mens divinorum, puritatis munditia et fervor affectus (quæ in Joanne eminebant) animam disponunt. —e) Tandem, ut narratur (*ibid.* XIX, 34), *unus militum lancea latus ejus aperuit, et continuo exivit sanguis et aqua;* videlicet Christus ex alto crucis ligno Cor suum hominibus colendum reseravit.

2º Inter veteres non defuere qui devotioni Cordis Jesu præluderent.—*Implicite* saltem cultum illura agnoverunt quotquot Salvatoris *humanitatem* (cujus cor est optima pars) adoratione dignam professi sunt, vel *latus ejus lancea* perfoſsum, de quo scaturiere gratiæ salutis, vel flagrantissimum

ejus *amorem* erga homines celebrarunt.—*Explicita* vero suffragia plura sunt; nonnulla colligam (ex cl. Nilles, *op. cit.*). *S. Joan. Chrysostomus*, exponens verba D. Pauli: *Vivo autem, jam non ego, vivit vero in me Christus* (Gal. II, 20), subdit (Hom. 32 in Ep. Rom.): “*Cor* itaque Christi erat cor Pauli.” *S. Petr. Dam.* (Serm. 1 de S. Joan. Ap. et Evang.) pectus Christi nominat “*cœleste gazophylacium et ærarium.*” *S. Bernard.* (l. de Amore Dei, c. 1): “*Totus intrem usque ad ipsum Cor Jesu, in Sanctum Sanctorum, in Arcam Testamenti, ad urnam auream animæ nostræ humanitatis continentem intra se manna Divinitatis.*” Cf. Serm. 61 in Cant. Luculentius adhuc auctor Tract.¹ *de Passione Domini*, c. 3: “*Ego inveni Cor regis, fratri et amici benigni Jesu. Et numquid non adorabo?... Ad hoc enim perforatum est latus tuum ut nobis patescat introitus. Ad hoc vulneratum est Cor tuum ut in illo et in te ab exterioribus perturbationibus absoluti habitare possimus... Quis illud Cor tam vulneratum non diligit? Quis tam amans non redamet?*” Praetermitto testimonia *S. Bonaventuræ*, *S. Bernard. Senensis*, necnon servarum Dei *S. Gertrudis*, *S. Birgidae*, *S. Mechtildis*, etc, ut traditionis argumentum absolvam verbis *D. Thomæ* (Opusc. 57 de Venerab. Sacram. altaris, c. 28): “*Fudit sanguinem de vulnere lateris et cordis, ut discipulos in fide dubios et alias multos in fide et bonæ vitae stabilitate tentatos, et ideo frigidos, quasi mortuos calefaceret et revivificaret;*” unde, adductis exemplis pellicani rostro latus fodentis et cervæ vulneratæ, sic *Angelicus Christum* advocat: “*Curre coram nobis, ut fera corde vulnerata, et sanguine tuo cœlestem semitam nobis ostende.*”

3º Genericus cultus hujus *ratio* ex principiis jam constitutis eruitur.—Humanitas enim Christi, ut res, adorari debet cultu latræ, eo quod per unionem hypostaticam ipsius est Christi natura. Atqui unio illa hypostatica, sicuti totam humanitatem, ita et singulas ejus partes significat. Ergo. *Min.* patet; siquidem partes, cum essentiales, tum integrales, humanitatis Christi non quomodocumque Verbo copulantur, sed intime et secundum substantivam unionem, qua et subsistendi et existendi actum divinum sortiuntur.—*Conf. arg:* conceditur et

1—Hic tractatus reperitur ad opera *S. Bernardi* (*Patrol. Migne*).

probatur cultus latreuticus *quinque Vulnerum Christi Domini*. Ergo non est cur SS. ejus Cordis, pro nobis physice mysticeque vulnerati, cultum rejiciamus.

4º Summum subit ejusdem devotionis momentum, scil. expressa vox Christi: prima enim vice, cor suum flammeum, saucium, spinisque coronatum revelans, B. Margaritæ Mariæ significavit se velle *sui amoris ignem* ad salvandos homines manifestius pandere.—Altera vice, rursus se beatissimæ suæ famulæ demonstrans petit ut sibi *reparationis* cultus pro peccatis ingratorum hominum exhiberetur.—Tandem in tertia revelatione *festum* sui SS. Cordis (stata die qua nunc agitur) *publice institui* rogavit, promissâ suis cultoribus magna gratiarum copiâ¹.

2ª Pars concl. est de cultûs illius *convenientia*; quæ accipi debet tum absolute seu considerato corde in se, tum relative seu per respectum ad reliquas humanitatis partes necnon ad tempus quo laudata dævotio prodiit.

Prob. ex multiplice medio.

1º *Physiologice*.—Physiologia cum antiqua tum moderna² docet cor esse nobilissimum corporis musculum; qui, quum per sui compressionem ac dilatationem distribuendo in viventibus sanguini immediate deserviat, sanguinei seu irrigatori systematis centrum atque vitæ veluti principium existit. Ad rem S. Thomas (1 S. D. VIII, Q. V, a. 3 ad 3) qui, loquens de operatione vitali, ait: "Talem vitam influit (anima) primo in cor et postea in omnes alias partes. Et inde est quod læso corde perit operatio animæ in omnibus partibus corporis, et per consequens esse ipsarum partium quod conservatur per operationem animæ." Quam ob rem cor, quietis nescium, solet a physiologis (post Aristotelem) describi: "*Primum vivens et ultimum moriens*"³. Jam vero nonne appriue congruit ut principium vitæ specialiter colamus in eo qui nobilem suam vitam sponte pro nobis Patri obtulit?—Eo magis quia sic totam humanitatem colere censemur: cor enim "est

1—Paulo post (1689) Christus eidem B. Marg. Mariæ revelavit suum esse desiderium, ut Galliarum præses se gentemque suam SS. suo Cordi peculiari consecratione devoveret.

2—Cf. Claude Bernard, Conf. sur la Physiologie du cœur (1865)..

3—Id. loc. cit.

quasi quoddam animal separatum, in quantum est principium vitae; principium autem est *virtute totum*" (I-II^a, Q. XVII, a. 9 ad 3).

2^o *Psychologice*: qua sub ratione cor spectari potest tum realiter tum symbolice.—a) *Realiter* spectatum, cor intime connectitur cum affectionibus et passionibus humanis, imprimis cum passione amoris quae est ceterarum radix; adeo ut plures etiam nunc¹ (juxta veterum doctrinam) reponant in corde sensibilium affectionum sedem et organum. Ait S. Thom. (I-II^a, Q. XXIV, a. 2 ad 2): "In omni passione animae additur aliquid vel diminuitur a naturali motu cordis, in quantum cor intensius vel remissius movetur secundum systolen aut diastolen; et secundum hoc habet passionis rationem²." Sane in Scripturis pleraque passiones nomine cordis significantur, v. g. gaudium³, tristitia⁴, timor⁵ etc. Ergo cor fuit in Christo instrumentum amoris, sicut et compassionis erga hominem, juxta illud (Marc. VIII, 2): *Misereor super turbam*. Atqui passiones illae salutiferæ honoris, gratitudinis, ac reparationis cultum postulant. Ergo.

b) *Symbolice* quoque cor Christi sumendum est, quatenus significat vel increatum vel creatum Dei-hominis spiritualem affectum: siquidem communis invaluit usus ut ipse voluntatis actus ex caritate, pietate, liberalitate, cordis symbolo exprimeretur; quo sensu dicitur (Ps. LXXXIII, 3): *Cor meum et caro mea exultaverunt in Deum vivum*. Porro id

1—Ita, inter alios, Perrone, *de Incarn.* P. II, c. IV, a. 2, prop. 2;—Vallet, *La tête et le cœur*;—Urraburu, S. J., *Inst. phil.*, *Psych.* Disp. VI, c. II, a. 2 (1898). Hic auctor, relatis variis opinionibus expensis que recentiorum physiologorum plerumque adversantium dictis, probabilius adhuc habet quod cor sit præcipuum organum eliciti-vum appetitus sensitivi, idque fuse pertractat: num recte, alii viderint.

2—Notatum volo catholicos cultum SS. Cordis Jesu tueri independenter a quæstione physiologica de organo *proprio* passionum. Omnes enim, etiam si qui organum illud ponunt formaliter in cerebro, concedere tenentur cor esse *primum* quod recipit sensitivæ affectionis impulsione, ideoque passiones esse *in corde* saltem *executive* seu manifestative (cf. Cl. Bernard, *l. cit.*).

3—*Locutum est cor meum* (Ps. XV, 9).

4—*A verbis tuis formidavit cor meum* (Ps. CXVIII, 161).

5—*Multi gemitus mei et cor meum mœrens* (Thren. I, 22).

connaturale homini est ut signo quodam sensibili¹ se ad recolegendam personæ caræ memoriam eamque venerandam excitet. Ergo conveniens erat ut cultus institueretur quo possemus recolere, venerari, celebrare immensum illum Dei in nos amorem, omnium perfectissimum, tenerrimum, constanssum, cuius tria memoranda admirandaque sunt monumenta perennia, videlicet *Præsepe, Calvarium et Altare*.

3º Moraliter.—Nihil quippe efficacius videtur ad fovenendum in nobis Dei virtutumque cultum et amorem quam bonitatis Christi recordatio: “Hunc charitatis ignem ut magis incenderet, SS. sui Cordis venerationem cultumque institui in Ecclesia voluit ac promoveri. Equis enim tam durus ac ferreus sit, quin moveatur ad redamandum Cor illud suavissimum idcirco transfixum ac vulneratum lancea, ut animus ibi noster quoddam quasi latibulum ac perfugium habeat, quo se ab hostiis incursione insidiisque recipiat ac tueatur?” (Decr. Beatif. B. Marg. Mar.).

4º Historice.—Ut enim scite observat Hurter (th. 152, coroll.), “divina Providentia nutu factum est ut cultus ss. cordis Jesu speciali modo per Ecclesiam diffunderetur. Sicut enim impietas haereticorum negantur realem Christi in Eucharistia præsentiam occasio exstitit ut refloresceret et multiplici modo se proderet pietas et gratitudo fidelium erga hoc tam insigne divinæ bonitatis pignus; ita cum Janseniani suis erroribus impeterent Christi præsertim *bonitatem* et *amorem*, et cum jam instet tempus quo refrigescet caritas multorum, nil opportunius hoc cultu quo infinitam Christi prosequimur *bonitatem*, et quidem, quia homines sumus sensibilibus immersi iisque assueti, sub *visibili forma cordis*, ut hac via plana nobisque accommoda ignem divini amoris in nostris accendamus cordibus.”

1.—Apposite *D. Thomas* (II-II^a, Q. LXXXII, a. 3 ad 2): “Ea quæ sunt Divinitatis sunt secundum se maxime excitantia dilectionem, et per consequens devotionem, quia Deus est super omnia diligendus; sed ex debilitate mentis humanae est quod sicut indiget manuductione ad cognitionem divinorum, ita ad dilectionem per aliqua sensibilia nobis nota; inter quæ præcipuum est humanitas Christi... Et ideo ea quæ pertinent ad *humanitatem* Christi, per modum cuiusdam manuductionis, maxime devotionem excitant; cum tamen devotio principaliter circa ea quæ sunt Divinitatis consistat.”

Solv. obj. (cont. 2^{am} concl.).—OBJ. 1.—Una est adoratio Christo debita. Atqui cultus Cordis Jesu dividit et multiplicat Christi adorationem. Ergo.

RESP. C. M.—D.m:... ex parte motivi *formalis* saltem primarii, N; ex parte objecti *materialis*, S.d: quatenus adoratio *explicite* dirigitur ad cor tantum Christi, C; quasi nec *implicite* totum Christum includat, N.—Neg. conseq.

OBJ. 2.—Cavendum est a novis devotionibus. Atqui cultus Cordis Jesu recens prorsus est. Ergo.

RESP. D. M:... a devotionibus quae in *nova doctrina religiosa* fundantur, C; que veritati traditionali innixa sunt, novamque tantum *pietatis formam*, novis necessitatibus occurrentem, inducunt, N.—C.d.m.—Neg. conseq.¹

OBJ. 3.—Devotio praedicta ter a S. Rit. Congreg. rejecta est. Ergo etc.

RESP. D. antec:... i. e. improbata fuit *secundum se*, N; dilata est in tempus *concessio festi* auctorativa, donec, rematurius perpensa, opportuna solemnisque approbatio promulgaretur, C.—Neg. conseq.²

ARTICULUS III.

Utrum imago Christi sit adoranda adoratione latrīæ.

De cultu imaginum Christi mox tractaturi (nam de sanc torum imaginibus infra), nonnulla *præmittemus*. — Et 1^o quantum ad *nominis* significationem, advertere opus est contra hæreticos (ut doce tradit *Bellarminus*, de Eccl. triumph. l. II, c. 5) diserim interessu imaginem inter et idolum. *Imago* enim, dicta ab imitando, vera est rei similitudo; quo sensu Filius Dei vocatur in Scriptura *imago Patris*. *Idolum* vero, quasi forma inanis, est falsa similitudo,

1—A cultu SS. Cordis Jesu substantialiter non differt cultus Christi *cordis eucharistici*, per quem specialis manifestatio divini amoris celebratur (Raccolta, 1898).

2—Leg. Bongaud, *Hist. de la bienh. Marg. Marie et des origines de la dévotion au Coeur de Jésus*;—Monsabré, 39^e Conf: *Le Cœur de Jésus-Christ*; etc, etc.

repræsentans id quod non est, juxta illud (1 Cor. VIII, 4): *Scimus quia nihil est idolum in mundo; cui voci fere æquivalet simulacrum*, dictum a simulando.

2º Magna olim exarsit adversus imagines concertatio, *Iconomachicæ* nomine appellata; quæ, ab Hebræis et Mahomedanis profecta, auctore dein imp. *Leone Isaurico*, tum Orientalem tum Occidentalem Ecclesiam vehementer diuque exercuit (726-842). Scriptis vero suis præcipue *Joan. Damascenus* cultum sacrarum imaginum tuitus est. Quæ res, ad Conc. cœcum. VII (Nicænum II, 787) delata, occasionem præbuit solemnis in imaginum favorem definitionis, quam et Conc. cœcum. VIII (Cptanum IV) confirmavit.—Sopita jam controversia rursus excitata est operâ præsertim *Wiclefitarum* (sæc. XIV), *Hussitarum* (sæc. XV) et *Protestantium* (sæc. XVI), quorum stolida convicia contra catholicos ubique percrebuere. Recentiori tamen tempore e Protestantibus multi sunt qui quamdam imaginibus, maxime Christi, reverentiam exhibendam admittunt.

3º Aliud est pingi haberique, aliud coli imaginem.—Etsi quidam catholici, Calvinus consentientes, opinati sint nefas esse *Dei imagines* depingere, contrarium tamen pro certo tenendum est, dummodo (ut scite distinguit *Cajetanus* in h. art.) imagines fiant, non ad figurandum Deum ut in se est, sed vel ad exprimendas historicas Dei apparitiones, vel ad quamdam ejus notitiam metaphorice promendam. Sane a) non solum Ecclesiae usus tolerantiæ id suadet, sed verba *Conc. Trid.* (Sess. XXV) sat clare proxim illam confirmant. b) Nec inconveniens esse potest, Deum repræsentari sub iis speciebus corporeis in quibus apparuisse refertur, v. g. Patrem sub specie senis seu *antiqui dierum* (Dan. VII, 9)¹, Sp. Sanctum sub specie columbae (Matth. III, 16), etc. c) Verum cavendum est ne pictores audeant proprio marte novas Dei aut Trinitatis imagines configere, puta unum hominem cum tribus faciebus. d) Quæ autem *S. Thomas* hic habet (ad. 1), scil. quod “Deo, cum sit incorporeus, nulla imago corporalis poterat ponî” in V. Lege, accipienda sunt de imagine qua Dei natura figuraretur; cui periculo obnoxii erant Hebræi ad idololatriam proni (3 S. D. IX, Q. 1, a. 2, quæstiunc. 2 ad 1).

1—Cf. Catech. Trid. P. III, 1 Præc. Dec. n. 36.

e) At quia in N. L. Deus factus est homo, idem periculum metuendum non est¹.—De hujus *Hominis-Dei* imaginibus nunc præsertim quæritur, an et quomodo coli possint.

4º Itaque duo adstruenda sunt: unum de *liceitate* cultus imaginum, maxime Christi; aliud de *specie* honoris imaginibus illis debiti.

Conclusio 1a.—**LICITUS EST CULTUS IMAGINUM IN GENERE, ET IN SPECIE IMAGINUM CHRISTI:**—quod sancitum est verbis *Conc. oecum. VII*: “Si quis ergo non adorat iconam Salvatoris Christi, non videat formam ejus, quando veniet in gloria paterna glorificari et glorificare sanctos suos.” His consonat *Conc. Trid.* (Sess. XXV).

Revera 1º in V. L. jussit Deus fieri duos *Cherubim aureos et productiles facies ex utraque parte oraculi* (Ex. XXV, 18), et erigi serpentem æneum...quem cum percussi espicerent, sanabantur (Num. XXI, 9). Porro “venerabantur quondam Judæi sancta sanctorum, quia ibi erant cherubim et propitiatorium et area testamenti” etc., (Epist. Paulæ et Eust. sub directione S. Hieronymi ad Marcellam); serpens quoque æneus, quo Christus in cruce pendens figurabatur (Joan. III, 14), profecto colebatur aspectu quærentium salutem.—Perperam ergo *Protestantes* contendunt prohibitum absolute fuisse apud Judæos cultum imaginum.

2º Praesto sunt *antiquitatis monumenta*.—a) Et primum, neglectis iis quæ minus authentice probata videntur, ceu vera referenda est *imago Christi* linteo S. Veronicæ impressa quæ Romæ in Basilica S. Petri asservatur et inde ab ipso ordiente Christianismo in veneratione fuit². Nec præterire licet alias ejusdem Salvatoris effigies in *catacumbis* reperitas, quæ pariter cultum olim imaginibus adhibitum demonstrant.—b) *Symbola* autem Christi, primorum fidelium venerationi proposita, multa fuisse Archæologia sacra testatur³; modo enim ut Bonus *Pastor* (quem in calicibus depictum

1—Vid. plura ap. Bellarminum, *op. cit. l. II*, c. 8.

2—Cf. F. R. Salmon, *Hist. de l'Art Chrétien aux dix premiers siècles* (1891), ch. 4.

3—Id. *op. cit.*, ch. 2;—Cte Desbassayns de Richemont, *Nouv. étud. sur les catac. rom.*, *L'Art chrétien pendant les trois premiers siècles*: quo in opere summa quedam inventorum cl. de Rossi, ipso approbante, vulgatur.

Tertullianus in l. de Pudicitia, c. 10, refert), modo ut *Agnus* seu sacra victima, modo ut *Piscis* græcis litteris Salvatorem innuens, modo ut *Vitis* cuius palmites sumus, modo quoque ut *Orphæus* i. e. mysticus gentium domator, Christus figurabatur.

8º E *Patribus*, inter multa quæ recitat *Bellarminus* (l. II, c. 9 et 12), pauca proferam.—*S. Joan. Chrysost.* in Liturgia ait: “Sacerdos ad imaginem Christi caput inclinat.” *S. Ambrosius* (l. de Inc. Dom. sacram. c. 7): “Numquid, cum in Christo imaginem Dei crucemque veneramur, dividimus eum ?” *S. Hieronymus* (in vita Paulæ): “Prostrata ante Crucem, quasi pendente Dominum cerneret, adorabat.”—Addam verba *S. Paulini Nol.* (Ep. 32 ad Severum) sic desribentis imaginem Trinitatis in basilica expressam: “Pleno coruscat Trinitas mysterio. Stat Christus agno; vox Patris cœlo tonat; et per columbam Sp. Sanctus fluit.”

4º *Rationis* confirmatio peti potest triplici ex capite.—*a) Ex naturæ* voce. Sicuti imago in phantasia vel mente formata ordinatur ad objectum, puta Christum, repraesentandum, ita et imago vel simulaerum exterius perfectum. Atqui, natura ipsa docente, Christum pie debiteque veneramur secundum quod interius nobis apparet seu in imagine mentis oculis obversante. Ergo etiam etc.—*b) A simili.* Siquidem imago Christi eo modo (servata proportione) tractanda est, quo solet apud homines imago regis vel principis ejuscumque tractari. Atqui regias imagines frequenter pingi et honorifice tractari, inficiabitur nemo. Ergo.—*c) Ex effectibus;* ait enim *S. Thomas* (3 S. D. IX, Q. I, a. 2, quæstiunc. 2 ad 3): “Fuit triplex ratio institutionis imaginum in Ecclesia. Primo ad instructionem rudium, qui eis quasi quibusdam libris edocentur. Secundo ut Incarnationis mysterium et sanctorum exempla magis *in memoria* essent, dum quotidie oculis repraesentantur. Tertio ad excitandum *devotionis* affectum qui ex visis efficacius excitatur quam ex auditis.” Eosdem effectus indicate *Conc. Trid.* (Sess. XXV).

Conclusio 2º.—**IMAGO CHRISTI, UT RES QUÆDAM, NULLA VENERATIONE EST DIGNA ; UT RES SACRA ET IN ACTU PRIMO IMAGINIS, HONOREM, LATRIA TAMEN INFERIOREM, SIBI VINDICAT ; FORMALISSIME UT IMAGO SEU IN ACTU EXERCITO, CULTU RELATIVO LATRIÆ HONORANDA EST.**—Agitur, ut patet, de determi-

nanda *specie* cultus imaginibus Christi debiti.—Circa quod non levís *controversia* in scholis orta est, forsitan ob conceputum confusionem.—Hanc ergo ut caveamus, advertemus Christi imaginem spectari posse vel ut est *res quædam*, qualis in pinacotheca oculis objicitur, vel ut est *imago* in templo exposita : in qua duo accipere est, *deputationem* quædam ad cultum divinum et actum exercitum *repræsentationis*.

1^a *Pars* concl. probatione non eget ; liquet enim imaginem, ut est res, neque quoad *materiam* qua constat, neque quoad *formam* artis qua refulget, venerabilem esse, quamvis esse possit admiratione digna.

2^a *Pars* est de *imagine*, secundum quod *consecratione* quædam cultui divino deputatur; quo sensu *D. Thomas* (II-II^o, Q. XCIX, a. 3) imagines inter *res sacras* recenset.

Itaque 1^o contra *Durandum* aliosque tenemus imagines illas *proprie* et in se colendas esse, non improprie et abusive tantum quasi mera signa ad honorandum exemplar provocantia. a) Ratio est, quia secus non salvaretur vis verborum *CC. Nic. II* et *Trid.*, ubi definitur ipsis imaginibus debitum honorem et venerationem impertiendam esse. b) Nec repugnat, imo conveniens est res inanimatas in se coli, non propter se, sed propter personam quæ sit honoris ratio.

2^a Tamen spectatis Christi imaginibus modo prædicto, scil. quatenus sunt fini religioso addictæ, sic eis debet in dubiis taxat honor quem rebus sacris impendimus, quique (juxta *Bellarminum*, l. II, c. 25) latrâ inferior est ad eamque *analogiâ* attributionis reducitur.—Huc pertinent plura argumenta eo adducta ut cultus latræ imaginibus Christi abjudicetur.

3^a *Pars* respicit imaginem *formalissime* seu secundum quod *exercet* actum *repræsentationis*; et sensus est imagini Christi sic accepæ competere *latriam*, non quidem *absolutam* quæ solius Dei est, sed *relativam*, quatenus exemplar adoretur propter se, *imago* propter exemplar: unde ex imagine et exemplari (inaequali tamen ratione) integratur unum objectum totale adorationis.—Haec est vera *D. Thomæ* sententia, quam *Cajetanus*, *Billuart*, *Contenson*, aliique plures sequuntur.

Fundatur 1^o hæc sententia in dictis *Conc. Nic. II* (act. 4): “*Hoc sane rerum natura docet, quod honor imagini exhibitus ad ipsum fuit item primum referatur, quomodo etiam contu-*

melia"; neconon in *Conc. Trid.* (Sess. XXV): "Honos qui eis (imaginibus) exhibetur refertur ad prototypa quæ illæ repræsentant; ita ut per imagines quas osculamur, et coram quibus caput aperimus et procumbimus, Christum *adoremus*, et sanctos... *veneremur*." Ubi adoratio, distincta a simplici veneratione, imaginibus Christi tribuitur.

2º Inter Patres plura suppeditat *S. Joan. Damascenus* quæ in doctrinam nostram conferri possunt; ait enim (de Imag. Orat. III, n. 41, Migne): "Sic itaque imagines adoramus, ut non materiæ, sed illis quos repræsentant adorationem offeramus. Nam divinus *Basilius*¹ dicit imagini habitum honorem ad ipsum exemplar archetypum transire." Et inferiorius subdit de Christo verba *S. Anastasii* a S. Monte Sina (in 9 Dom. et in Th. Apost.): "Si divinam ejus pictura tantummodo deformatam effigiem conspiciamus, tanquam *ipse nos e calo intueatur* arbitramur, atque procedentes adoramus."—Quando autem *S. Doctor* latriam soli Deo debitam affirmat, procul dubio intelligit latriam *absolutam*, ut ipse insinuat (Orat. III, n. 40).

3º Efficax subit *D. Thomæ ratio*.—Motus animæ in imaginem, qua imago est seu actu repræsentat exemplar, idem est specifice, imo et numerice cum motu in rei repræsentatam. Atqui Christus adorandus est adoratione latræ. Ergo.— Ad cuius arg. evidentium notetur a) imaginem, qua imago est, formaliter et univoce repræsentare suum exemplar. b) Hinc qui movetur in imaginem formaliter sumptam nequit eam attingere, quin simul exemplar ipsum attingat. c) Quapropter una est, tum *specie*, tum *numero*, adoratio qua imaginem Christi et Christum in imagine prosequimur. d) Nec discriben est inter hanc latriam *respectivam* et latriam *absolute* sumptam, nisi penes *molum*: in prima enim cultus transit per imaginem quasi per *conditionem* qua honoretur exemplar. e) Igitur cultus relativus imaginum Christi dicendus est minor cultu absolute, non specifice, sed modaliter, eo modo scil. quo res in esse repræsentativo seu intelligibili differt a seipsa in esse naturali².

1—De Sp. Sancto. c. 18.

2—Ipsa Leibnitzius veritatem thomisticæ doctrine hac de re agnovit in *Syst. theolog.* p. 142 et sqq. (ap. Perrone, *De cultu Sanct.* c. V.).

4º Consequitur a) verba *Conc. Nic. II*, act. 7 (sicut et quorundam Patrum), quibus negatur cultum imaginum Christi esse latreuticum, accipienda esse de latria *absoluta* tantum (ne Concilium sibi contradicere videatur).—b) Quando vero eadem S. Synodus, act. 10, cultum imaginum Christi comparat honori quem vasis sacris impertimur, loqui censenda est de similitudine *generica* in cultu *relativo*: qui cultus aut *analogice* tantum (prout spectat ad vasa sacra et ipsas imagines modo rerum sacrarum acceptas), aut *univoce* (prout respicit easdem imagines propriissime) ad latriam pertinet¹.

Solv. obj.—OBJ. 1.—Præceptum est (Ex. XX, 4): *Non facies tibi sculptile, neque omnem similitudinem*. Ergo².

RESP. D. antec: ... et per hoc prohibetur facere *quamcumque* sculpturam vel similitudinem, N; vetantur imagines deorum quos *idololatriæ* venerabantur, ut patet ex contextu, C.—*Neg. consequ.*

OBJ. 2.—Abstinendum est ab operibus gentilium. Atqui gentiles in hoc præcipue culpantur quod *mutaverunt gloriam incorruptibilis Dei in similitudinem imaginis* (Rom. I, 23). Ergo.

RESP. D. M: ...ab operibus quibuscumque, N; ab operibus infructuosis et noxiis, C.—D. m: ... quod adoraverint *verum Deum* in *imagine*, N; quod adoraverint *imagines ob numina* quæ eis inesse putabant, vel *creaturas* quibus effigies illas statuebant, C.—*Neg. consequ.*

OBJ. 3.—Nihil videtur in cultu divine admittendum nisi quod a Deo institutum est. Atqui nulla invenitur traditio divina de adorandis Christi imaginibus. Ergo.

RESP. Trans. M.—D. m: ... in ipsis Sacris Litteris, C; in praxi Ecclesiae ab Apostolis statuta et per successionem fidelium servata, juxta illud (2 Thes. II, 15): *Tenete traditiones quas didicistis sive per sermonem, sive per epistolam nostram*, N.—*Neg. consequ.*³

1—Cfr. Cajetanus, in h. 1;—Suarez, Disp. LIV, S. 3-5;—Billuart, Diss. XXIII, n. 3, etc.

2—Arg. hoc usque ad nauseam replicant Protestantes; ita Ch. Hodge, *Systematic Theology*, P. III, c. 19.

3—Kraus, *Hist. de l'Eglise*, t. I, 1^e Ep., 1 Pér., ch. 1, censem Christi imaginem, quam tribuunt B. Lucæ, eo posteriorem esse.

ARTICULUS IV.

Utrum crux Christi sit adoranda adoratione latræ.

Titulus est de sola *cruce*, sed simul intentio fertur ad reliqua *instrumenta nostræ salutis*.—Crucis honori adversati sunt *Claudius Taurinensis, Pauliciani, Bogomili, Petrus-brusiani, Waldenses, Cathari, Wiccleffitæ, Lutherani et Calvinistæ*¹.

Conclusio.—CHRISTI VERÆ CRUCI CRUCIQUE EFFIGIATÆ NECNON RELIQUIS SALUTIS NOSTRÆ INSTRUMENTIS DEBETUR HONOR; QUI QUOMODO AD LATRIAM PERTINERE POSSIT, OSTENDITUR.

1^a Pars certitudine *fidei* constat ex *Conc. Nic. II* (act. 7) et *Conc. Trid.* (Sess. XXV).

1^b De *vera cruce*.—Crucis lignum venerandum esse demonstrant a) *Scripturae*, per quas edocemur Christiani sponte crucem elegisse quasi instrumentum liberationis humanae, aram in qua ipse immolaretur, tropæum et scalam triumphi.—b) *Traditionis* præco audiatur *S. Ambrosius* qui (*Orat in Theod.* n. 48), loquens de clavo inserto ab Helena galeæ imperatoris, ait: “Sapienter Helena quæ Crucem (particulam scil. crucis seu unum clavum) in capite regum locavit, ut crux Christi in regibus adoretur.” Consentit *S. Chrysostomus* (*Hom. 2 de Cruce et latr. n. 1*): “Crux prius condemnationis et supplicii nomen erat; nunc res est venerabilis et desiderabilis. Crux antea dedecoris et pœnæ argumentum erat; nunc gloriae et honoris occasio.”—c) Hinc divina providentiæ contigit ut veram erucem, quæ per tria secula latuerat, *S. Helena*, mater Constantini, divinis admonita visionibus, tunc quereret et inveniret, cum primum eam colere fas esset: eujus crucis veritatem et dignitatem illustria *miracula* attestata sunt.

2^b De *vere crucis effigie*.—Quantum imago hæc honorem sibi vindicet, a) *Scriptura* indicat (*Math. XXIV, 30*): *Tunc parebit signum Filii hominis in cœlo*; quibus ver-

1.—Bellarm., *de Eccl. triumph.*, l. II, c. 26;—Petavius, *de Incarn.*, l. XV, c. 7.

bis Crux, quasi gloriosum Christi vexillum, designatur.—
b) Primi *Apologetæ* venerationem cruci a christianis impensam contra ethnicorum calumnias defensarunt; quod hujus cultus antiquitatem convincit.—**c)** Idem ostendit venerabundus usus *signi crucis*, de quo celebre est testimonium *Tertulliani* (l. de Corona, c. 3): “Ad omnem progressum atque promotum, ad omnem aditum et exitum, ad vestitum, calceatum, ad lavacra, ad mensas, ad lumina, ad cubilia, ad sedilia, quæcumque nos conversatio exercet, frontem crucis signaculo terimus.” Similia habet *S. Joan. Chrysost.* (cont. Jud. et Gent: *Quod Ch. sit Deus*, n. 9).—**d)** Inter *mira-cula* quæ crucis imaginem honestarunt, eminet illud jure celebratum de *Constantino*; cui plane vigilanti crux apparuit cum verbis: *In hoc signo vinces*; unde *laburum*, nobilissimum victoriæ pignus, Imperatorem et in præliis præcessit et efficaci præsidio munivit.—**e)** Cæterum, crucis imago, in qua Redemptoris mysterium refulget, oculis objicit veluti *fidei* summam vitæque christianæ ac *virtutum*, quibus Christus claruit, memoriam et exemplar.

3º De reliquis *instrumentis* quæ Christo servierunt in operanda nostra salute, dubium non est quin honorēm mereantur, sicut arma liberatoris patriæ honorifica admiratione coluntur: sensu communī id patet.—*Hinc Joan. Damascenus* (de Fid. Orth. l. IV, c. 11): “Hoc pretiosum ac venerabile lignum, in quo se Christus pro nobis hostiam obtulit, uti sanctissimi corporis atque sanguinis tactu sanctificatum, jure debet adorari; clavique item, et lancea, et indumenta, et sacrae ejus mansiones, hoc est, præsepe, specus, salutaris Golgotha, vivificum sepulchrum”.—Reapse pleraque *festa* ab Ecclesia instituta sunt ad honorandas sacras illas Christi reliquias.

2º Pars est de *specie* cultus Crucis aliisque Redemptionis instrumentis debiti.

1º a) Cum honor seu reverentia non conveniat nisi intellec-tuali naturæ, creaturam inseusibilem honorari contingit, non ratione sui, sed ratione naturæ intelligentis, sive quod eam *repræsentet*, sive quod ei quocumque modo *conjugetur*: unde et imaginem et vestimentum regis homines venerantur *eadem veneratione* quam regi ipsi impertiuntur. Atqui *vera crux* Christi duplici illo venerabilitatis titulo commendatur:

siquidem et Christi crucifixi figuram nobis repræsentat, et contactu ejus membrorum ac pretiosissimo sanguine sanctificata est. Ergo veræ cruci debetur cultus *relativus latræ* qua Christum ipsum honoramus.

b) Si vero loquamur de *effigie* crucis Christi in quacumque materia, lapidis vel ligni, argenti vel auri, hæc effigies unum tantum honorabilitatis titulum præsefert, scil. rationem *imaginis*, quæ, si formalissime spectetur, exposcit (ut dictum est in art. præc.) adorationem *latrice* :—Id persuadetur *sensu Ecclesiæ et fidelium*; quippe, Ecclesia ipsa invitante, crucem effigiatam alloquimur et deprecamur quasi ipsum Crucifixum; unde, ut habet hymnus Passionis, in ea ponimus spem salutis cantentes: *O Crux, ave, spes unica!* — Accedit quod feria sexta Parasceves lignum crucis triplici prostratione cernui adoramus.

c) Licet autem crucem Christi veneremur in quacumque materia, non tamen imaginem aliorum passionis *instrumentorum*, quæ nequeunt Christi figuram repræsentare. Ea vero honoramus, etiam *latrid respectiva*, in illa materia quæ contactu membrorum Salvatoris sacrata est.

2º Si Christi reliquiæ considerentur velut *res sacrae* et præcisione facta ab ipso Christo (uti supra de imaginibus diximus), tunc fatendum est eis non deberi nisi cultum speciei inferioris qui analogice tantum ad latratiæ reducitur¹.

1.—Via plura ap. Petavium, l. XV, c. 7-10, necnon ap. Bellarmi-
num, l. II, c. 26-30, qui adversariorum objectiones refellit.

QUÆSTIO QUARTA

DE CULTU SANCTORUM

Cum Christus in sanctis suis ceu in templo hospitetur, honor Christo debitus indagandus remanet sub eo respectu quo ad sanctos multipli venerationis ratione defertur.— De his quæstionem movebimus, inquirentes de cultu *sanctorum* in genere (art. 1), de cultu speciali *invocationis* (art. 2), de cultu *reliquiarum* (art. 3), et de cultu *imaginum* (art. 4); quæ quidem breviori stylo expediemus, lectorem remittentes ad auctores theologiae polemicæ.

ARTICULUS I.

De cultu sanctorum in genere.

1º Prænotandum est ab honore *civili religiosum* honorem sive cultum secerni, prout unus naturales, alter vero supernaturales dotes respicit;—præterea, cultum religiosum alium esse *supremum* solique Deo proprium, alium *inferiorem* sanctisque exhibendum qui *dulicæ* ac *hyperdulicæ* vocibus usu ecclesiastico exprimi consuevit.

2º Cultus *dulicæ* (haud secus ac latræ) merito distinguitur in *absolutum* et *relativum*, quatenus aut personis dignitate sibi insita fruentibus aut rebus respectum dicentibus ad illas personas impenditur. Agitur nunc de sanctorum cultu *absoluto*; quem *internum* ac *externum* esse multisque se modis in medium producere, scil. festis, templis ac altaribus¹,

1.—Commemoranda sunt verba *Conc. Trid.* (Sess. XXII, a. 3): “Quamvis in honorem et memoriam sanctorum nonnullas interdum missas Ecclesia celebrare consueverit, non tamen *illis sacrificium offerri* docet, sed Deo soli, qui illos coronavit; unde nec sacerdos dicere solet, offero tibi sacrificium, Petre vel Paule; sed Deo de illorum victoriis gratias agens, eorum patrocinia implorat ut ipsi pro nobis intercedere dignentur in cœlis quorum memoriam facimus in terris.”

hymnis, invocationibus, processionibus, etc, probe novimus. Propositorum præs. articuli est cultum illum *in genere contra hæreticos vindicare.*

3º Fuit, teste *Bellarmino*, de *Eccl. triumph.* l. I, c. 11, antiqua hæresis *Eustachii* (apud Socratem), *Eunomii* et *Vigilantii* (apud Hieronymum), *Claudii Taurinensis* et *Wicleffi*, sanctos non esse colendos; qui error recruduit operâ *Calvinistarum* et *Lutheranorum* tenentium juxta suum systema de justificatione mere externa nihil honore dignum in sanctis reperiri.—Semper tamen fuerunt aliqui Protestantes moderatores qui sanctis beatæque Virgini M. debitum cultum profiterentur¹; quorum numerus ætate nostra, maxime in Anglicanorum cœtu, excrevit².—Alii recentiores, ut *C. Hodge*³, cum doctrinam catholicam refutare seu falsitatis arguere nequeant, catholicos saltem reprehendunt de praxi idolatria; quasi contradictio theoriā inter et praxim catholicam habeatur!

Conclusio.—LEGITIME SANCTIS UNA CUM CHRISTO REGNANTIBUS CULTUS DULIÆ EXHIBETUR.—Id fide constat ex *Conc. Trid.* (Sess. XXII et XXV).

1º Suffragatur *Scriptura* verbis et exemplis:—*a) verbis* quidem; nam legitur (1 Reg. II, 30): *Quicumque glorificaverit me, glorificabo eum.* (*Eccli. XLIV, 1*): *Laudemus viros gloriosos et parentes nostros in generatione sua;* unde in sequentibus paginis celebrantur laudes illustriorum Dei servorum V. T. Et (Joan. XII, 26): *Si quis mihi ministrauerit, honorificabit eum Pater meus.*—*b)* Accedunt exempla cultus religiosi exhibiti tum Angelis tum hominibus sanctioribus. Sic narratur de Josue (Jos. V, 13-15) quod, cum vidisset virum stantem evaginato gladio, dixit: *Noster es, an adversariorum?* Qui respondit: *Nequaquam; sed sum princeps exercitus Domini...* unde cecidit Josue pronus in terram ut eum honoraret. Item, quum Eliseus (4 Reg. II, 12-15), translato Elia, hujus pallio aquas percussisset ac divisisset, filii prophetarum...dixerunt: *Requievit spiritus*

1—Perrone, *Le Protestant et la Règle de Foi*, t. III, ch. XI, 1.

2—Delisle, *L'Anglicanisme et les Sectes dissidentes en 1892*, ch. IV, 1.

3—*Systematic theology*, P. III, c. XIX, 5.









IMAGE EVALUATION TEST TARGET (MT-3)



6"



Photographic
Sciences
Corporation

23 WEST MAIN STREET
WEBSTER, N.Y. 14580
(716) 872-4503



Elias super Elisaeum. Et venientes in occursum ejus, adoraverunt eum proni in terram.

2º Suppetit Ecclesiæ *praxis* perantiqua, quam *Petavium* (de Inc. l. XIV, c. 12) ad hæc capita redegit: "Sunt, ait, præcipua cultus illius (sanctorum) et honoris approbandi capita, et indicia ista: primum, quod post illorum obitum, veteris instituto Ecclesiæ, et a majoribus accepta et perpetua traditione, *memoria* est illorum insigni honore celebrata; necnon eorum *sepulchris* idem religiosæ observantiæ impensum est officium. Deinde, quod *altaria* super eorum reliquias erecta; necnon *basilicæ* sive *templa* magnifico sumptu et apparatu in eorumdem memoriam ac nomen Deo consecrata. Tertium, quod ad illos honorandos *festi* dies et conventus hilaritatesque ex antiquo christianis populis institutæ. Quartum, quod *sacrificia* Deo in eundem oblata sunt finem, ut illis ipsis honor haberetur. Postremum denique, quod eorum ad sepulcra, et utique interventoribus ac sequestribus iis, multa divinitus et ingentia, *miracula* facta sunt."—Inter vetustiora traditionis monumenta citantur *acta martyrii S. Ignatii*¹ a fidis comitibus conscripta, ubi (prope finem) dicitur: "Deum datorem bonorum laudavimus et Sanctum beatum diximus vobisque diem et tempus indicavimus ut, tempore ejus martyrii convenientes, athletæ et generoso Christi martyri communicemus, qui diabolum conculcavit" etc. His consonat ep. *Ecclesiæ Smyrnensis*² de martyrio *S. Polycarpi*, ubi legitur (2 loc., n. 18): "In exultatione et gaudio præbebit Dominus natalem martyrii ejus diem celebrare, tum in memoriam eorum qui certamina pertulerunt, tum in venturorum hominum exercitationem et alacritatem." Testimonia *Patrum* legantur ap. *Bellarminum* et *Petavium*.

3º *Ratio* in promptu est.—Etenim, ut docet *S. Thomas* (II-II^z, Q. CIII, a. 2), "honor semper debetur alicui propter aliquam excellentiam vel superioritatem," civilis propter civilem et naturalem, religiosus propter religiosam et supernaturalem; qui honor si cum submissione honorantis fiat, *cultus* nuncupatur. Atqui sancti ad celum progressi excellunt omnino virtute, sapientia, nobilitate, imo et potentia,

1—Ap. Ruinart, *Acta primorum martyrum sincera*.

2—Ibid.

juxta illud (Apoc. III, 21): *Qui vicerit, dabo ei sedere mecum in throno meo.* Ergo.—Hoc argumentum, in ipsa naturæ humanæ inclinatione fundatum, opportune urget Perrone (l. cit.) contra Protestantes et adversarios qui illustriorum virorum suorum et memoriam et sepulcrum honore afficiunt.—Accedit analogia inter cultum profanum ministris terreni regis et cultum sacrum ministris amicisque Regis supremi convenientem.

Solv. obj. (Calvini).—OBJ. 1.—Si quis honor sanctis deberetur, esset religionis cultus. Atqui cultus religionis soli Deo debetur; nam *soli Deo honor et gloria* (1 Tim. I, 17). Ergo.

RESP. D. M: ...cultus religionis primarius seu *latrīa, N*; cultus secundarius seu *dulīa, C.*—*C.d.m.*—*Neg. conseq.*

OBJ. 2.—Dulīa græce idem sonat ac servitus, unde plus dicit quam latrīa seu cultus. Atqui sancti non sunt latreutice honorandi. Ergo multo minus etc.

RESP. D. M: Reapse usu *profano* dulīa plus dicit quam latrīa, *N*; idem significat, ita ut tamen secundum usum *ecclesiasticum* summa et *perfecta servitus* conveniat cultui latrīe, *imperfecta* vero cultui dulīe qua quis utcumque dominanti obsequitur, *C.*—*C.m.*—*Neg. conseq.*

OBJ. 3.—Cum Cornelius centurio se ad pedes B. Petri prostravisset, prohibuit Petrus dicens: *Surge, et ego ipse homo sum* (Act. X, 25-26). Ergo.

RESP. D. antec: ...et hoc egit Petrus ex modestia vel ad corrigendum Cornelium existimantem divinum quidpiam in Petro inesse, *C*; ad negandum omnem honorem sanctis viris debitum, *N*.—*Neg. conseq.*

ARTICULUS II.

De invocatione sanctorum.

Potissima cultus sanctorum forma est *invocatio*.—Hanc 1º post *Vigilantium* oppugnarunt *Petrobrusiani* et *Henriciani*, *Waldenses*, *Cathari*, necnon *Wiceliffus* et *Thaborites*; quibus accesserunt *Lutherus*, *Melancthon* et *Calvinus* docen-

tes sanctos aut pro vivis non orare, aut, si orant, non nisi in genere orare, inutileque, imo illicitum esse ad eos preces dirigere. Hinc orta est magna illa Protestantium adversus cultum sanctorum concertatio quæ nondum sopita est; quamvis haud pauci jam antiqua præjudicia excutere videantur.

2º Cum *Bellarmino* (de Eccl. triumph. l. I, c. 17) nobis non ita a nobis sanctos invocari, quasi ipsi *per se* gratis auctores existant: id enim per calumniam catholicis exprobatur.—Nec putandum est sanctos esse apud Deum intercessores nostros *immediatos*; quippe per Christum, cu[m] per primum et necessarium Mediatorem, quidquid nobis a Deo impetrant, impetrare censendi sunt, juxta illud (Joan. XVI, 23): *Si quid petieritis Patrem in nomine meo, dabit vobis.*—At sancti ex meritis, quæ sibi in terris compararunt, id præmii consecuti sunt ut jam in celis Christo conviventes possent orationibus suis vivos juvare tum eorum preces ad Christum deferendo, tum Christi merita eis applicentur rogando (II-II^a, Q. LXXXIII, a. 11 ad 1).

3º Claritudinis causâ, duo distinctim discutiemus, *unum* de intercessione sanctorum apud Deum, *alterum* de sanctorum invocatione ex parte hominum.

Conclusio 1^a.—SANCTI PRO NOBIS ORANT CUM IN GENERE TUM IN SPECIE, SUMMA INTERCESSIONIS EFFICACIA.

1^a Pars firma fide asseritur ex *Conc. Trid.* (Sess. XXV)¹, nec perperam.

Nam 1º aperte favet *Scriptura*.—Judas Mach. (2 Mach. XV, 11-16) narrat se in *digno fide* somnio vidiisse Oniam pontificem et Jeremiam prophetam, qui jam obierant, orantes pro populo Iudeorum; quo testimonio pressus Calvinus negavit librum hunc esse canonicum. Legitur quoque (Apoc. V, 8): *Viginti quatuor seniores* (i. e. sancti utriusque Test.) *ceciderunt coram Agno, habentes singuli citharas et phialas aureas plenas odoramentorum, quæ sunt orationes sanctorum.*—Sanctos pro nobis orare etiam in parti-

1.—Decretum est “sanctos, una cum Christo regnantes, orationes suas pro hominibus Deo offerre, bonum atque utile esse suppliciter eos invocare, et ob beneficia impetranda a Deo per Filium ejus J. C. D. N., qui solus noster Redemptor et Salvator est, ad eorum orationes, opem, auxilium confugere” etc.

culari, ex eo colligitur, quia Angeli, teste Scriptura (cf. tract. de *Creatione*), singulorum hominum curam gerunt. Porro anime beatæ conjunctiores nobis sunt quam Angeli; neque carent directiva quadam in vivos potestate, secundum illud (Apoc. II, 26): *Qui vicerit et custodierit usque in finem opera mea, dabo illi potestatem super gentes*, etc. Ergo.

2º Traditionem sæque attestatur *Archæologia et Patrologia*. Speciminis gratiâ esto inter plures veteres inscriptiones Romæ repertas hæc invocatio: "Vincentia in Christo, petas pro Phœbe et pro Virginio e(jus)¹." Quibus verbis ostenditur persuasio quod sancti sint advocati nostri penes Deum.—*Pulchre S. Joan. Chrys.* (Serm. de Juventino et Maximino, n. 3): "Sicut milites vulnera iu præliis sibi inficta regi monstrantes fidenter loquuntur, ita et illi absecta capita gestantes et in medium efferentes, quæcumque voluerint apud Regem cœlorum impetrare possunt." Id ipsum sentiunt *Origenes, Cyprianus, Greg. Naz., Hieronymus, Augustinus*, etc.

3º *Ratio duplex afferri potest.*—a) In systemate christiano vera intimaque admittenda est conjunctio Ecclesiæ militantis et triumphantis sub uno capite Christo; quippe eo pertinet *communio sanctorum* in Scripturis fundata, a Patribus celebrata², jugique fidelium sensu in Symbolo professa. Atqui communio ista exigit ut sociata membra pro invicem sollicita sint et invicem se juvent. Ergo.—b) Præterea "habet hoc *divinus ordo* ut ex superiorum excellentia in inferiora effundatur, sicut ex claritate solis in aërem" (II-II^a, Q. LXXXIII, a. 11). Atqui sancti, qui sunt in patria, viatoribus excellunt perfectione caritatis ex qua oratio pro aliis facta radicem et vim desumit. Ergo concludamus cum *Hieronymo* (cont. Vigilantion, n. 6): "Si apostoli et martyres adhuc in corpore constituti possunt orare pro cæteris, quando pro se adhuc debent esse solliciti, quanto magis post coronas, victorias et triumphos."

2º *Pars de efficacia intercessionis sanctorum optime declaratur a D. Thoma* (Suppl. Q. LXXII, a. 3): "Sancti, ait, dicuntur duplíciter orare pro nobis: uno modo oratione ex-

1—Ap. Desbassayns de Richemont, *op. cit.*, p. 367.

2—Cf. Hurter, *de Deo consumm.*, Sect. III.

pressa, dum votis suis aures divinae clementiae pro nobis pulsant; alio modo oratione *interpretativa*, scil. per eorum merita quæ in conspectu Dei existentia non solum eis cedunt ad gloriam, sed sunt nobis etiam suffragia et orationes quædam, sicut etiam sanguis Christi pro nobis effusus dicitur veniam petere. Utroque autem modo sanctorum orationes sunt, quantum est in eis, efficaces ad impetrandum quod petunt.— Sed ex parte nostra potest esse *defectus* quod non consequamur fructum orationum ipsorum, secundum quod pro nobis orare dicuntur ex hoc quod merita eorum nobis proficiunt.—Sed secundum quod orant pro nobis, votis suis aliquid nobis postulando, *semper exaudiuntur*, quia non volunt nisi quod Deus vult, nec petunt nisi quod volunt fieri. Quod autem Deus vult, semper impletur; nisi loquamur de voluntate *antecedente*, secundum quam *vult omnes homines salvos fieri*, quæ non semper impletur. Unde nec est mirum, si etiam quod sancti volunt per hunc modum voluntatis interdum non impleatur."

Conclusio 2^a.—PIA AC UTILIS EST SANCTORUM INVOCATIO; QUAM IPSI PROCUL DUBIO DEPENDUNT.

1^a *Pars*, asserta olim a pluribus Conciliis, novum fidei robur accepit ex *Conc. Trid.* (Sess. XXV): sic probatur.

1^b Ex *Scriptura*.—Dicitur (*Job. V, 1*): *Voca, si est qui tibi respondeat et ad aliquem sanctorum (Angelorum) convertere*; quæ verba Eliphaz, amici Job, indicant tunc fuisse morem beatos spiritus invocandi: sancti enim homines nondum celum ingressi erant.—Insuper, sancti patriæ acceptiores Deo sunt quam in statu viæ. At sanctos viæ debeimus intercessores pro nobis ad Deum constituere, exemplo Ap. (*Rom. XV, 30*): *Obsecro vos...ut adjuvetis me in orationibus vestris pro me ad Deum*. Ergo inulta magis recurrentum est ad cælitum orationes.

2^a *Ex traditione*.—a) Sanctorum invocationem iude saltem a sæc. IV per totam Ecclesiam in usu fuisse, res est indubia (*Bellar. op. cit. l. I, c. 19*), idque ipsi Protestantes fassi sunt. At vero isti, ut defectionem suam tegerent, impudenter contenderunt praxim illam ex privatis monachorum devotionibus et vulgi persuasionibus, per quorundam Episcoporum sermones panegyricos, prefato circiter tempore inventam fuisse: quod gratis asseritur falsumque est. Quomodo enim

Christi Ecclesia, in *petra* divinarum promissionum fundata, potuisset universim a fide deflectere?—*b)* Verum nec desiderantur testimonia ætatis antecedentis; *Origenes* enim scribit (l. de Oratione, n. 14): “Obsecratio et postulatio et gratiarum actio non absurde potest et sartis offerri...nt adjuvent nos” etc. Testatur *Greg. Nazianz.* (Orat. XXIV, n. 9-11) *S. Justinum V.* quæ floruit sub fine sæc. III, tentatam a Cypriano pagano, Virginem Mariam suppliciter obsecrassæ “ut periclitanti virgini suppetias ferret.” Etiam *Eusebius Cæsar.* sæc. IV loquitur de sanctis invocandis tanquam de re in Ecclesia consueta; ait enim (de Præp. evang. l. XIII, c. 11): “Eorum sepulcra celebrare, et preces ibi votaque nuncupare, et beatas illorum animas venerari *consuevimus.*”—*c)* Amplius, certo constat ex *actis martyrum* (ap. *Perrone*, de Cult. Sanct. c. III) sub ipsis Ecclesiae primordiis fidem viguisse de intercessione sanctorum pro nobis; at intercessioni ex parte sanctorum æqua vice respondet invocatio ex parte nostra.—*d)* Item, recole argumentum paulo superius indicatum planeque irrefragabile desumptum ex sepulcralibus *inscriptionibus* quas eruditæ in catacumbis reperiæ, quæque communem sæc. II et III præxim de invocatione sanctorum, una cum suasione de eorum vi intercessiva, lapideo stylo traducunt¹.—*e)* His addiderim *liturgiarum* auctoritatem, quæ, etsi sæc. tantum IV exaratæ sint, publicam tamen de ea re Ecclesiae fidem anterius vigentem exhibent, cum ex primo traditionis fonte quasi rivuli dimanaverint (*Perrone, loc. cit.*).

^{3º} *Ratione*, quam sic ex *D. Thoma* (Suppl. Q. LXII, a. 2) conficimus.—Iste ordo divinitus est in rebus institutus ut extrema per media in Deum reducantur; ex quo fit ut sancti, qui propinquissime Dei throno adsistunt, *mediatione* quadam fungantur inter Deum et homines. Atqui cœlestium illorum mediatorum dignitas et officium postulat ut eis vota, desideria, necessitates nostras obsequenti animo significemus, prout fieri solet in mediationibus hujus mundi. Ergo, quamvis nihil prohibeat immediate Deum invocari, omnino tamen congruit ut divina beneficia per sanctos petamus. — Hoc

1—Vid. Mgr Gerbet, *Esquisse de Rome Chrétienne*, c. IX, n. 6, aliosve plures rerum archæolog. tractatores.

postremo confirmat consuetudo Ecclesiae *litanias sanctorum* adhibentis fidelibusque recitandas proponentis.

2^a. *Pars* subjicitur ad occurrentem objectioni Protestantium; verba proferam *S. Thomae* (*l. cit. a. 1*) qui, postquam notaverat sanctos Dei essentiam non comprehendere, subdit: "Unusquisque beatus tantum de aliis rebus necessarium est ut in essentia divina videat, quantum perfectio suæ beatitudinis requirit. Hoc enim ad perfectionem beatitudinis requiritur ut homo habeat quidquid velit, nec aliquid inordinate velit. Hoc autem recta voluntate quilibet vult, ut ea quæ ad ipsum pertinent cognoscat. Unde cum nulla rectitudo sanctis desit, volunt cognoscere ea quæ ad ipsos pertinent; et ideo oportet quod illa in Verbo cognoscant. Hoc autem ad eorum gloriam pertinet quod auxilium indigentibus præstent ad salutem; sic enim Dei cooperatores efficiuntur, quo nihil divinius... Unde patet quod sancti habent cognitionem eorum quæ ad hoc requiruntur. Et sic manifestum est quod in Verbo cognoscunt *rota*, et devotiones, et orationes hominum qui ad eorum auxilium configunt."

Notanda.—1^o "Quamvis sancti superiores sint magis Deo accepti quam inferiores, utile tamen est etiam *minores sanctos* interdum orare. Et hoc propter quinque rationes: *primo*, ex hoc quod quandoque aliquis habet majorem devotionem ad minorem sanctum quam ad sanctum majorem; ex devotione autem maxime dependet orationis effectus. *Secundo*, propter fastidium tollendum, quia assiduitas unius rei fastidium parit; per hoc autem quod diversos sanctos oramus, quasi in singulis novus fervor devotionis excitatur. *Tertio*, quia quibusdam sanctis datum est in aliquibus specialibus causis præcipue patrocinari... *Quarto*, ut omnibus honor debitus exhibeatur a nobis. *Quinto*, quia plurimum orationibus quandoque impetratur quod unius oratione non impetraretur" (*Suppl. Q. cit. a. 2 ad 2*).

2^o "Animæ sanctorum habent voluntatem plenarie conformem divinæ voluntati etiam in volito. Et ideo quamvis affectum charitatis ad proximum retineant, non tamen eis aliter auxilium ferunt quam secundum divinam justitiam vident esse dispositum. Et tamen credendum est quod *multum proximos juvent* pro eis apud Deum intercedendo" (*ibid. a. 1 ad 3*).

Solv. obj.—Plura quidem a Protestantibus tum antiquis. tum modernis¹ objiciuntur, quorum nos præcipua tantum hic attingemus².

OBJ. 1.—Quod dignitati Christi Mediatoris derogat rejicendum est. Atqui hujusmodi est invocatio sanctorum quasi mediatorum, nam est *unus mediator Dei et hominum, homo. Christus Jesus* (1 Tim. II, 5). Ergo.

RESP. C. M.—N.m.—D. prob : Unus est Mediator perfectus et *simpliciter, C*; ad exclusionem mediatorum imperfectorum et *secundum quid, N.—Neg. conseq.*

Christus unus est perfectus Mediator noster, *a) tum ratione naturæ*, quippe est Deus-homo; *b) tum ratione officii*, quatenus *dedit redemptionem semetipsum pro omnibus* (1 Tim. II, 6) et morte sua humanum genus Deo reconciliavit; *c) tum ratione independentiæ*, qua fit ut ipse nullo mediatore indigeat: quæ tria soli Christo convenient. — “Nihil tamen prohibet aliquos *secundum quid* dici media-tores inter Deum et homines, prout scil. cooperantur ad unionem hominum cum Deo *dispositive vel ministerialiter*” (III, Q. XXVI, a. 1).

OBJ. 2.—Nullus amicos alicujus interpellat ad orandum pro se, nisi quia credit se facilius apud eos gratiam obtinere posse. Atqui Deus est longe misericordior et liberalior quolibet sancto. Ergo.

RESP. C. M.—D.m ...ea misericordia et liberalitate quæ omnem imperfectionem abhorret, C; quæ nullo medianter exercetur, N.—Neg. conseq.

“Sicut non est propter defectum divinæ potentiarum quod mediantibus secundis causis agentibus operatur, sed est ad complementum ordinis universi, ut ejus bonitas multiplicius diffundatur in res, dum res ab eo non solum suscipiant bonitates proprias, sed insuper quod aliis causa bonitatis existant; ita etiam *non est propter defectum misericordiæ ipsius quod oporteat ejus clementiam per orationes sanctorum pulsare*, sed est ad hoc ut *ordo prædictus servetur in rebus*” (Suppl. Q. LXXII, a. 2 ad 1).

1—Specimen habes in alias citato Hodge, *Systematic Theology*, P. III, c. 10.

2—Quoad reliqua cfr. Bellarminus, *de Eccl. triumph. l. I, c. 22*; — Petavius, *de Inc. XIV, c. 15-18*; — Perrone, *l. cit.*

OBJ. 3.—Plures veteres prohibuere invocationem sanctorum, puta Clemens Alex. et Irenæus, Origenes, patres Syn. Laodicenæ, S. Joan. Chrysostomus. Ergo.

RESP : 1^o Clementem Alex. et Irenæum prohibuisse recursum ad inanes gentilium deos, scil. ad dæmones et æones;—2^o Origenem ac Syn. Laodicenam soli Deo vindicasse, ad exclusionem aliorum, supremum invocationem quæ Auctor omnium bonorum reservanda est;—3^o Joan. Chrysostomum id tantum asseruisse, quod verissimum est, non ita absolute ac præfracte tuendam esse sanctorum implorationem quasi ea sola confidendum sit aut quisque non possit sine interprete Deum adire.

ARTICULUS III.

De cultu reliquiarum.

(III, Q. XXV, a. 6)

An quove modo sanctorum personæ honorandæ sint, definivimus; nunc dicendum de honore impertiendo rebus ad sanctos spectantibus.—Et 1^o sit sermo de reliquiarum cultu; quarum nomine intelligimus strictius quidem sanctorum corpora horumque partes, latius vero quidquid ipsi, dum vivebant, usu ac contactu sacraverint.

3^o Cultui ss. reliquiarum repugnarunt Eunomius et Vigilius (hic reliquiarum cultores cinerarios appellabat), Constantinus Copronymus, Claudius Taurinensis, Albigenses; quibus Protestantes, quum negarent sanctis intrinsecam præstantiam et sanctitatem, sui coherentia systematis assentiri suadebat.

3^o a) Ut cuique patet, reliquiarum veneratio relativa est, scil. ad sanctos, quorum reliquiae sunt, refertur potestque per analogiam reduci ad genus cultus quo sancti ipsi honorantur.—b) Quod vero ad proxim pertinet, Conc. Trid. (Sess. XXV) decrevit non esse “novas reliquias recipiendas, nisi recognoscente et approbante episcopo” etc.—c) Tametsi vero maxima

Ecclesiæ sollicitudo in secernendis veris reliquiis a falsis decipi quandoque possit, id certe rarius et accidentaliter tantum evenit, nec veritati cultus illius absolute et *formaliter* sumpti præjudicat.

Conclusio.—**RELIQUIIS SANCTORUM JURE MERITOQUE CULTUS RELIGIOSUS DEFERTUR;**—quod, in pluribus jam anteactis Synodis decretum, a *Conc. Trid.* (Sess. XXV)¹ confirmatum est.

Revera 1^o favent *exempla Scripturarum*.—In V. T. Moyses, discessurus cum populo ex Ægypto, ossa *S. Joseph* honorifice secum tulit in terram promissam (Exod. XIII, 19). Item *corpus Mosei* Deus ipse honoravit opera Angelorum sepi- liendo; cuius tamen sepulchrum occultatum est, ne Judæi ad idolatriam proclives divino cultu illud prosequerentur (Deut. XXXIV, 6). Rursus, *osse Elisei*, cum mortuum quemdam hominem tetigissent, continuo illum ad vitam revo- carunt (4 Reg. XIII, 21).—In N. T. mulier Hæmorrhioissa, tacta fimbriâ vestimenti Salvatoris, illico sanata est (Matth. IX, 20-22). Narratur populos certatim ad *S. Petrum* occur- risse, ut saltem umbra illius obumbraret quemquam illo- rum et liberarentur ab infirmitatibus suis (Act. V, 15); pariter, *B. Pauli suaria et semicinctia* ad ægrotos delata esse, et recedebant ab eis languores (*ibid.* XIX, 12).

2^o *Traditio* testimoniis abundat.—a) Cum *S. Ignatius M.* scripsisset ad Romanos: “Frumentum sum Dei et per fera- rum dentes molar ut mihi sepulchrum fiant,” eo emortuo, desiderium ejus impletum est; unde “solæ duriores sancta- rum ejus reliquiarum partes relictæ sunt, quæ Antiochiam delatae sunt et in sudario depositæ, thesaurus sane inæstimabili” etc (Act. martyrii² *S. Ign.* n. 5). Plura ad rem deponi possent ex actis aliorum martyrum et Patrum panegyricis.—b) Eloquenter *Hieronymus* (l. cont. Vigilantium, n. 5) *proxim Ecclesiæ vindicat*: “Ergo sacrilegi sumus, quando

1—Statuit Concilium “sanctorum quoque martyrum, et aliorum cum Christo viventium sancta corpora, quæ viva membra fuerunt Christi, et templum Sp. Sancti (1 Cor. III et VI), ab ipso ad æter- nam vitam suscitanda et glorificanda, a fidelibus veneranda esse: per quæ multa beneficia a Deo hominibus præstantur.”

2—Ap. Ruinart, *op. cit.*

Apostolorum basilicas ingredimur? Sacrilegus fuit Constantinus Imp., qui sanctas reliquias *Andreæ, Lucae et Timothei* transtulit Constantinopolim, apud quas dæmones rugiunt, et inhabitatores Vigilantii illorum se sentire præsentiam confitentur? Sacrilegus dicendus est et nunc Augustus Arcadius, qui ossa *B. Samuelis* longo post tempore de Judæa transtulit in Thraciam¹?"

3º Validissimum argumentum præbent *miracula*, quæ opera Dei sunt, nec nisi veram doctrinam comprobare possunt. Porro innumera facta ejusmodi evenisse narratur², tum quæ ad sanctorum reliquias earumque contactu patrata sunt, tum quæ in ipsis mortuis corporibus apparuerunt, puta quod corpora diu post mortem conspicerentur integra, incorrupta, odoribus fragrantia.

4º *Ratione* sic proceditur.—Qui habet affectum ad aliquem, etiam ea quæ de ipso post mortem relinquuntur, tum corpus corporisque partes, tum quoque alia exteriora, ut vestes, intimo ultroneoque sensu veneratur: morem hunc universæ hominum generationes sacrarunt. Atqui Dei sanctos in veneratione habendos esse manifestum est, quatenus sunt membra Christi, Dei filii et amici, nostrisque intercessores. Ergo eorum reliquias qualescumque honore congruo afficere debemus.— Id vero præcipuo quadam jure de ss. *corporibus* accipendum est: siquidem *a)* fuerunt templa Sp. Sancti; *b)* organa et instrumenta Dei animaque operantis; *c)* pignora sunt patronorum; *d)* exuviae carissimorum; *e)* tropæa triumphantium; *f)* eaque demum corpori Christi gloriosa resurrectione configurabuntur. — Omittimus *utilitates* illius cultus, quo vigente vividissima virtutum omnium recordatio supernæque gloriæ repræsentatio animum efficaciter movent ad sanctos imitandos.

Solv. obj. — OBJ. 1.—Non est aliiquid faciendum quod possit esse occasio erroris. Atqui venerari mortuorum reliquias videtur ad errorem gentilium pertinere qui mortuos quasi Deos colebant. Ergo.

1—Alia quam plurima Patrum effata habentur ap. Bellarminum, *op. cit.* l. II, c. 3, et Petavium, *de Inc.* l. XIV, c. 11–13.

2—Bellam. *l. cit.*—Apud nos in sanctuario *S. Annae* (*de Beaupre*) plura prodigia portenta, quibus veritas cultus reliquiarum et sanctorum invictè demonstratur.

RESP. *D. M* :...occasio erroris *ex se, C*; *per accidens* tan-
tum, *N.—D.m*: venerari reliquias per modum latreuticæ
adorationis...C; honorem quemdam servis impendere qui
redundet ad Dominum, *N.—Neg. conseq.*

OBJ. 2.—Stultum videtur rem insensibilem venerari. Atqui
ss. reliquiae sunt insensibilia corpora. Ergo.

RESP. *D. M* :...venerari *absolute* et propter seipsam, *C*;
relative seu propter aliud in se honorabile, *N.—C.d.m* :...et
honorantur propter se ipsa, *N*; ob relationem ad animas
beatas et ad Deum, *C.—Neg. conseq.*

OBJ. 3.—Reliquiarum cultus supponit identitatem corporis
vivi et mortui. Atqui corpus mortuum idem non est ac vivum.
Ergo.

RESP. *D. M* :... identitatem *simpliciter, N*; identitatem
materiae, quæ iterum est suæ formæ unienda, *C.—C.d.m.—*
Neg. conseq.

ARTICULUS IV.

De imaginibus Sanctorum.

1º Jam supra (Q. præc. a. 3) legitimitatem cultus imaginum
in genere tetigimus, pluraque protulimus quæ in præsentem
materiam conferri queant: modo expresse, etsi breviter, de
sanctorum imaginibus agendum est.—2º Quinam *adversarii*
ss. imagines impugnaverint ac etiam nunc impugnant, ibidem
accepimus. Doctrina protestantica a nonnullis derelicta est;
plures tamen adhuc eadem præjudiciorum caliginæ tenet¹.—
3º Cum imagines sanctorum considerari possint vel ut res
sacræ vel quatenus actum repræsentandi exercent, contendimus
eis deberi sub primo respectu duliam *analogice* dictam:

1.—Scribit Hodge, *op. cit.* P. III, c. 19, n. 6: "As the Bible pronounces and denounces idolatry not only the worship of false gods, but also the worship of images, the bowing down to them and serving them, it is clear that the Roman Church is as wholly given to idolatry as was Athens when visited by Paul."

tantum, sub altero autem respectu duliam *univoce* acceptam cum solo discrimine secundum modum.

Conclusio.—SANCTORUM IMAGINES JURE OPTIMO A CATHOLICIS HABENTUR VENERANTERQUE COLUNTUR;—id explicite sancitum est tum a *Conc. œcum. VII* et *VIII*, tum a *Conc. Trid.* (Sess. XXV) cuius decretum præclaris verbis totius doctrine catholicæ veluti compendium ea de re exhibet.

1^o In V. T. constat nec usum nec cultum imaginum, saltem Angelorum, defuisse (Ex. XXV, 18) et (3 Reg. VI, 32); vetabat tamen Judæorum ad idolatriam pronitas quominus praxis illa vulgari sineretur.—Libri N. T., qui de forma cultus externi generatim silent, nihil de imaginibus præscribunt: at quemadmodum Scripturæ nuncupantur Litteræ *sacrae* (2 Tim. III, 15) non solum quia sunt a Deo, sed etiam quia res sacras significant, unde eas venerari consuevimus; ita imagines, sanctorum repræsentativæ, velut sacrae venerabilesque habendæ sunt.

2^o a) Idololatriæ periculum, quod ethnicis recens conversis timebatur, causa fuit eur initio ss. imagines non tam frequenti usu, saltem publico, a Christianis colerentur.—b) Nihilominus *Archæologiae* inventa demonstrant perantiquum fuisse morem, inde a prima Ecclesiæ aetate, imagines sanctorum, præsertim B. M. Virginis et Apostolorum Petri et Pauli, in subterraneis Catacumbarum oratoriis pingere vel etiam sculpere, imo iconibus illis sanctiora loca, quibus divina mysteria celebrabantur, exornare¹; quod argumentum est religiosæ venerationis.—c) Cæterum traditionis hac super re testes theoretici existunt, e quibus fratres illi tum sanguine tum doctrina cognati, scil. SS. *Basilius* et *Gregorius Nyss.* Hæc scribit *Basilius* (Ep. 360): “Characteres sacrarum imaginum honoro et exoscular eximie, cum *haec traditæ sint a S. Apostolis* nec sint prohibitæ, imo in omnibus ecclesiis nostris depictæ.” *Greg. Nyssenus* idem docet (in S. Theodor. M.); ubi, descriptis initio templi christiani magnificentiis, subdit: “Solet etiam pictura tacens in pariete loqui, maximeque prodesse.”

3^o *Ratio* efficax colendis ss. imaginibus adhiberi potest.—Etenim homo sic anima corporaque constitutus est, ut in

1—Cf. auctores Arch. Sacrae, quos citant Perrone, *de Cult. SS.*, c. V, prop. 2, et Kraus, *Hist. de l'Égl.* t. I, Prolég., 4, *Sciences théol.* E.

exercenda fovendaque vita sua intellectuali et morali multiplici indigeat sensuum ministerio rerumque sensibilium ope; qua de causa externus cultus cultui interno legitima institutione associatur¹. Jamvero *a)* ad hanc explendam naturæ humanæ velut exigentiam ac necessitatem ss. imagines, documentis plenæ exemplaque secundæ, aptissimæ sunt. *b)* Ex quo fit ut non una tantum vel altera, sed cunctæ hominis vires tum spirituales tum sensitivæ, proprio cujusque motu ac impulsu, in bonum ac profectum humanum conspirent. *c)* Inde etiam colligitur religiohem catholicam (contra ac mentiuntur increduli) apprime favere liberalium artium culturæ, quibus quasi instrumentis utitur ad finem humanæ salutis promovendum².

Solv. obj.—OBJ. 1.³—Legitur in *Conc. Illiberitano* (a. 300) can. 26: "Placuit picturas in ecclesia esse non debere, ne quod colitur et adoratur in parietibus depingatur." Ergo.

RESP. *D. antec.*: Vetuit Synodus picturas fieri in ecclesiis pro temporum illorum ratione, cum nempe sœviret dirissima persecutio, *C*; quasi picturas *per se* illicitas esse judicaverit, *N*.—*Neg. conseq.*

OBJ. 2.—Concilio Nicæno II seu cœcum. VII decernenti imaginum cultum restitut *Synodus Francofordiensis* (a. 794) ex toto ferme Occidente congregata. Ergo.

RESP. *D. antec.*: ...ex errore facti, *C*; ex mente cuicunque imaginum cultui opposita, *N*.—*Neg. conseq.*

1.—"Est duplex *cultus Dei*, *interior* et *exterior*. Cum enim homo sit compositus ex anima et corpore, utrumque debet applicari ad colendum Deum; ut soi. anima colat interiori cultu, et corpus exteriori; unde dicitur (Ps. LXXXIII, 3): *Cor meum et caro mea exultaverunt in Deum vivum*. Et sicut corpus ordinatur in Deum per animam, ita cultus exterior ordinatur ad interiore cultum" (I-II^m, Q. CI, a. 2).

2.—Sapienter *Conc. Trid.* (Sess. XXV) præscripsit tollendos a cultu imaginum *abusus*, ita ut 1° nullæ falsi dogmatis imagines et rudibus erroris occasionem præbentes statuantur; 2° nec procaci venustate, ad lasciviam provocante, pingantur; amplius 3° nemini licere ullam insolitam ponere vel ponendam curare imaginem, nisi ab Episcopo approbatæ fuerit.

3.—Pauca tantum Protestantium argumenta solvenda proponimus: reliqua videre est ap. ol. Bellarminum, *op. cit.* l. II, c. 13-19; Perrone, *de Cult. Sanct.* c. V; Knoll, P. V, S. II, c. III, a. 6; etc.

Error in eo fuit quod, definitionis œcumenicæ mala versione accepta, Synodus putaverit Nicænos Patres decrevisse cultum *latreuticum* unique Deo proprium imaginibus esse impertendum: quo errore detecto, galli germanique Nicænam fidem admiserunt¹.

OBJ. 3.—Cultus, quo una imago præ aliis, etiam suscepta peregrinatione, frequentatur, superstitione laborat. Atqui hujus generis est cultus imaginum apud catholicos. Ergo.

RESP. D. M.:...quo una imago præ aliis frequentatur ob vim intimam quæ ipsi imagini inesse existimetur, C; ob causas quasdam extrinsecas, præsertim ob miracula quæ Deus occulto consilio penes unam imaginem potius quam penes aliam patraverit, N.—C.d.m.—Neg. conseq.²

1.—De hac quæstione vid. plura ap. historicos et controversistas.

2.—Circa cultum Sanctorum legatur egregium opus theologi nostratis, *Le Culte catholique*, par l'abbé L. Naz. Bégin.

DISPUTATIO SEXTA

MARIALOGIA

Expleta Incarnationis tractatione sub adspectu stricte dogmatico et ut jam partem alteram *dogmatico-historicam* ab initiis ordiamur, suave nobis gratumque admodum incumbit officium sermocinandi de beata illa muliere quæ, sicuti in Redemptionis opere, ita et in theologorum laude sejungi a Christo nequaquam potest, scil. de Deipara Virgine Maria. Auspicabimur a *Suarezii* verbis (Præf. in III, Q. XXVII, n. 2): "Ego post ipsius Dei et Christi cognitionem nullam aut utiliorem aut viro theologo digniorem esse existimo"; quippe nihil præstantia, nobilitate, sanctitate, propinquius ad Deum accessit aut accedere potest quam ipsa Dei genitrix. Huic sane creaturæ angustissimæ, per tot sæculorum spatia tam altis encomiis celebratæ, accommodare congruit quæ regius Psaltes de Christi Ecclesia gestienti ore cecinit (Ps. LXXXVI, 2): *Gloriosa dicta sunt de te, civitas Dei.*

Permulta equidem de B. V. Maria disputanda se objiciunt; quæ elogetæ, mystici, oratores fuse eloqui solent. Nos, juxta morem, et ne præsentis operis limites ultra modum dilatentur, pleraque Scripturarum, Patrum scriptorumque catholiconrum effata in compendium redigere conabimur, prout ipse *D. Thomas* exemplum præbuit.—Propositorum est ea cuncta ad Mariam spectantia, que Redemptionem humanam sive præcesserunt sive subsecuta sunt, sub uno doctrinarum capite colligere, unde lectori præsto sit quasi in tabula quadam integra de Virgine Matre tractatio.

Octo poterunt institui questiones eoque pacto distribui ut dignitas *Maternitatis* divinæ media preemineat tanquam summa ratio gratiarum et privilegiorum quæ Mariam ad tantam celsitudinem disposuerunt necnon gloriæ et munerum quæ inde quasi consecataria fluxerunt. Hoc itaque ordine procedemus, successive agentes de B. V. M. sanctificatione (Q. I), de ejus Virginitate et Desponsatione (Q. II), de Annuntia-

tione (Q. III), de Maternitate divina (Q. IV), de perfectione B. M. V. (Q. V), de ejus Assumptione et gloria (Q. VI), de ejus Mediacione (Q. VII), de cultu ei debito (Q. VIII).

QUÆSTIO PRIMA

DE B. V. MARIAE SANCTIFICATIONE

Cœlestia munera, quibus B. Virgo ditata fuit mirumque in modum sanctificata, duo summatim important, scil. immunitatem *a peccato* (art. 1-2) et plenitudinem gratiæ *ex qua boni* perfectio dependet (art. 3). Peccatum vero a Virgine removendum tum *originale*, tum *actuale* est: en materia trium articulorum.

ARTICULUS I.

Utrum B. Virgo fuerit sanctificata in conceptione sua.

(Q. XXVII, a. 1-2).

Plura præmittere juverit.—Et 1^o supponimus, quod infra (Q. IV) secundum executionis ordinem reapse contigisse probabitur, B. Virg. Mariam fuisse prima Dei intentione in *Christi matrem* singulariter electam, ideoque (vi illius intentionis) *prædestinatam*, in tantum gratiæ gradum quantum sublimis illa dignitas requireret. Quæ electio ac prædestination, “ uno eodemque decreto cum divinae Sapientie incarnatione præstituta” (Const. *Ineffabilis Deus*)¹, ex eo amplius commendatur, quod Maria prima extiterit inter prædestinatas creaturas, omniumque justorum electioni nobili influxu fuerit æternaliter associata.

2^o a) Certum est lectissimam illam virginem humano more de carnali parentum commercio procreatam fuisse; quamvis

1—Cf. Aug. Nicolas, *La Vierge Marie et le Plan divin*

ob senescentis Annae sterilitatem, *non sine miraculo* optatae sobolis conceptio evenerit, nec sine Dei revelatione factum esse credatur ut nomen *Maria* (Hebraice et Syriace *domina* necnon *stella maris*¹ juxta Patrum interpretationem) ei imponeretur².—*b*) Quanta vero fuerit Mariæ *naturalis* perfectio animæ et corporis, evidenter colligitur tum ex traditionis voce, tum ex tanta Matris cognatione cum perfectissimo pulcherrimoque Filio³. At pulchritudo Mariæ singulari castitatis gratia referta erat, unde “quamvis esset pulchra corpore, a nullo unquam concupisci potuit” (3 S. D. III, Q. I, a. 2, quæstiunc. 2 ad 4).

3º Omnia ab antiquis temporibus persuasio fuit, B. V. Mariam *in utero* matris suæ sanctificatam fuisse⁴; quod *D. Thomas* (art. 1) verum esse duplum demonstrat: *a) primo*, quia Ecclesia jamdudum celebrat nativitatem B. Virginis; non autem celebratur festum in Ecclesia nisi pro aliquo sancto. *b) Secundo*, quia “rationabiliter creditur quod illa quæ genuit *Unigenitum a Patre, plenum gratiæ et veritatis*, præ omnibus aliis majora privilegia gratiæ acceperit” (S. Th., *l. cit.*). Porro compertum est privilegium sanctificationis in utero quibusdam aliis fuisse concessum, scil. Jeremiæ (Jerem. I, 5) et Joan. Baptistæ (Luc. I, 15). Ergo a fortiori etc.—Verum dubitatum est num sanctificatio B. Mariæ in ipso *conceptionis instanti* contigerit.

4º Prioribus Ecclesiæ sæculis, fides in immaculatum B. M. Virg. conceptum, tametsi *vera* et *realis*, implicita tantum vel *confusa* ratione fidelium mentibus communiter inerat.—Sæc. XII, instituto a Canonicis Lugdun. Conceptionis Mariæ festo, *S. Bernardus* id reprobavit; ex quo magna cœpit controversia agitari, adeo ut sæc. XIII non pauci theologi in sententiam privilegio V. Deiparæ oppositam declinarent. At mox Doctor subtilis, *J. Duns Scotus*, privilegium illud exitu
1275-1308

1—“Convenit ei nomen *Maria*, quæ interpretatur *stella maris*; quia sicut per stellam maris navigantes diriguntur ad portum, ita christiani diriguntur per Mariam ad gloriam” (S. Th., *Exp. in Sal. Ang. Opuso. VIII*, ed. Vivès).

2—*Suarez*, *De Mysteriis Christi*, Disp. II, S. I.

3—*Id., l. cit.*

4—*Cf. Passaglia*, *De Immaculato Deiparæ semper Virginis conceptu*, S. VII, c. I, a. 4.

nam felici propugnauit ut ejus sententiam Acad. Parisiensis cæteræque dein Academæ amplexarentur.—Pia illa abhinc sententia, non obstante *Novatorum* contradictione, magis magisque invaluit, accedente præsertim a Sixto IV (sæc. XV) deinceps RR. PP. favore qui variis decretis sese per singulas ætates explicuit usque ad definitionem dogmaticam¹ (1854) tam opportune sæculo nostro voluntario reservatam².

Jam ad conclusionem intentam pergimus.

^{THESE} **Conclusio.**—FIDE TENENDUM EST “ BEATISSIMAM V. MARIAM IN PRIMO INSTANTI SUÆ CONCEPTIONIS FUISSE SINGULARI OMNIPOTENTIS DEI GRATIA ET PRIVILEGIO, INTUITU MERITORUM CHRISTI JESU SALVATORIS HUMANI GENERIS, AB OMNI ORIGINALIS CULPÆ LABE PRÆSERVATAM IMMUNEM ” (Const. Pii IX *Ineffabilis Deus*).

Thesis decl.—*a)* In primis agitur non de conceptione activa seu ex parte parentum, sed de conceptione passiva seu ex parte proli; quæ quidem accipitur non *inchoative* tantum secundum initia corporeæ organizationis, sed *adæquate* secundum animæ rationalis infusionem. Unde simul tempore seu eodem *primo temporis instanti* Deus censendus est *creasse*, corpori *infusisse* et *sanctificasse* animam B. M. V.—*b)* Id autem factum est singulari *privilegio*, vi cuius Deipara, communi debito in Adam subdita, universalem ruiuam effugit; in quo ejus sanctitas a sanctitate Christi veluti naturali plane discriminatur.—*c)* Additur *intuitu meritorum Christi* (cujus gratia non redempti, sed Redemptoris fuit) privilegium illibatae conceptionis Marie obtigisse; facileque comperitur redemptionem hanc fuisse *præservativam* a culpa imminentे, non *reparativam* culpæ existentis.—*d)* Tandem, cum peccatum originis formaliter consistat in privatione gratiæ et justitiæ, *præservatio ab omni originalis culpæ labo* nec debet nec potest sine gratia sanctificante intelligi.

Thesis prob:—^{1º} ex *Scriptura*.

1—Anthimus VII, patriarcha Coptanus, in responso Ecclesiæ schismatice ad Leonem XIII (*Litt. encycl. patriarch. et Synod.*, 1895) hanc definitionem reprehendit, quasi Ecclesia Romana “ novum dogma, veteribus ignotum, et a spectatissimis Papatus theologis vehementer oppugnatum ” ediderit.

2—Cf. Malou, *L'Imm. Conception de la B. V. Marie considérée comme dogme de foi*, o. III.

a) Ea primum referam quæ *sensu litterali* ad rem pertinent. Legitur (Gen. III, 15): *Inimicitias ponam inter te et mulierem, et semen tuum et semen illius: ipsa conteret caput tuum, et tu insidiaberis calcaneo ejus.* Quo in textu (qui *protoevangelium* dictus est, utpote annuntians futuræ reparationis opus destructionis operi oppositum) quinque notare est¹: scil. sub serpentis nomine *diabolus*, Evæ deceptor, minis a Deo premitur; *diaboli semen* peccatum peccantiumve turmam exprimit; *semen mulieris* aliud non est quam Christus de Virgine natus et Satanæ debellator; unde ipsa *mulier Maria* Virgo agnoscenda est; demum *inimicitiae*, de quibus est sermo, sitæ sunt in aversione a diabolo, i. e. a peccato. Jamvero utraque pars recitati textus immaculatum B. M. V. conceptum ostendit. 1^a pars quidem; nam iis verbis significantur inimicitiae Virginis contra diabolum ejusque semen pares inimicitiis Christi, ideoque absolutæ, perpetuae, peccato originali, quod est peccatorum fons, quam maxime adversæ. 2^a pars vim habet, sive legatur *ipsa* ut in Vulgata latina, sive *ipsum* aut *ipse* ut in plerisque vetustioribus textibus²: si enim *ipsa*, sensus est mulierem virtute sui seminis, seu Christi, plene de diabolo triumphaturam; sin vero *ipse* aut *ipsum*, triumphus ille ad Christum referendus est, non tamen sine participatione matris æque diabolo infensa. In utroque casu, plenitudo triumphi consistere nequit cum hypothesi quod Maria, vel uno instanti, servituti diabolice subjacuisse³.—Alterum suppetit propheticum oraculum (Is. XI, 1): *Egredietur virga de radice Jesse, et flos de radice ejus ascendet*; ubi vocabulo *virgæ* (auctoribus multis Patribus ac interpretibus) accipienda est virgo Maria, e qua, velut flos divinus, Christus effloruit. Porro indigna fuisset divino illo fœtu virga vitiata; unde hanc Christiana ac liturgica interpretatio multis in locis talem intellexit atque

1.—Cf. Mazzella, *De Deo creante*, Disp. V, a. 9.

2.—Dogma catholicum de Imm. Conc. non esse essentialiter innixum versioni *ipsa*, argute eruditę contra doctorem anglicanum Kingdon nuper probavit R. F. Quigley (St John, N. B.) in egregio opere: *Mary, the Mother of Christ, in prophecy and its fulfilment*.

3.—Cf. Patrizi, *De imm. Mariæ orig. a Deo præd. disquisitio*;—Passaglia, *op. cit.*, S. V, c. 1.

expressit quæ ab omni nævo immunis foret¹.—Succedit illud in N. T. pernotum (Luc. I, 28); *Ave, gratia plena; Dominus tecum, benedicta tu in mulieribus*; quæ salutatio, nova ac inaudita, tria præsertim notatu digna ad mentem Patrum continet. Videlicet Maria salutatur *plena simpliciter* thesauris gratiæ; *Dominō arctissime conjuncta* ab eoque veluti indissociabilis; *benedicta* inter mulieres benedictione opposita maledicto primæ Evæ. Hæc autem tria culpæ originali repugnant².

b) Vi sensus mystici arg. probabile duci potest ex lib. Esther. Etenim, juxta principium Ap. (1 Cor. X, 11) *Omnia in figura contingebant illis*, historia liberatae per Mardochæum gentis Hebræorum legitime existinatur imago Christianæ liberationis, ita ut sibi respondeant Aman et serpens, Mardochæus et Christus, Esther et Maria. Unde sicut Esther a reliquo discreta populo nunquam Assueri inimicitiam experta est, ita B. V. nunquam Deo non placuit; quod est, communi damnatione soluta semper fuit secundum illud (Esth. XV, 13): *Non morieris; non enim pro te, sed pro omnibus hæc lex constituta est*³.—Huc etiam spectant verba (Cant. IV, 7): *Tota pulchra es amica mea, et macula non est in te*; quæ, de Ecclesia Christi allegorice prolata, sensu secundo optime ad Mariam, Ecclesiæ decus, extenduntur (S. Thom. hic, a. 4).—Pleraque tamen⁴ ex libris sacris de-

1—Passaglia, *op. cit.*, S. V, c. 2.—Hoc argumentum, ut patet, mediate tantum biblicum est; et insuper sola probabilitate gaudet; nam (teste Knabenbauer, *Curs. Scrip. sac.*, *Comm. in Is.*) plures præsertim e recentioribus *virgam* Christum esse censem.

2—Cf. Passaglia, *op. cit.*, S. V, c. 4.

3—Id., *op. cit.*, S. V, c. 3, a. 3.

4—Hujusmodi esse videntur quæ legimus (Const. *Ineffabilis Deus*): “*Virginis... ab omni peccati labे integratam...* Patres viderunt tum in *arca* illa Noe. quæ divinitus constituta a communī totius mundi naufragio plane salva et incolumis evasit; tum in *scala* illa, quam de terra ad cœlum usque pertingere vidit Jacob, cuius gradibus Angeli Dei ascendebant et descendebant, cujusque vertici ipse innitebatur Dominus; tum in *rubo* illo, quem in loco sancto Moyses undique ardere, ac inter crepitantes ignis flamas non jam comburi aut jacturam vel minimam pati, sed pulchre virescere ac florescere conspexit; tum in illa inexpugnabili *turri*

sumpta potius sensu *accommodato* Mariæ *immaculatæ* conveniunt, ideoque probandi vim non tam ex se quam ex ecclesiastico usu seu consensu obtinent¹.

2º Ex traditione ecclesiastica.

a) *Liturgia* imprimis merito advocatur.—Constat enim *festum* *Conceptionis* B. Virginis in Occidente non minus quam in Oriente sæc. XII fuisse universale; ejusdem autem primordia in Oriente ad sæc. V, in Occidente vero ad sæc. usque VII tuto revocari posse: ² porro nihil nisi sanctum ab Ecclesia celebratur.—Antiquissimæ *liturgiæ*, quales sunt *S. Jacobi*, *S. Marci*, *S. Basili*, titulis “immaculate,” “intemeratae,” “modis omnibus irreprehensibilis” Virginem Deiparam condecorant.—Maxime huc pertinet *hymnologia grecæ*, quæ saltem ad sæc. V ascendit; ubi Virgo præconiis effertur veluti “purissima,” “immunis ab omni corruptione,” “omni puritate referta;” ito ejus *Conceptio immaculata* inibi nominatur³.

b) Cæterum de *Patrum* ac majorum mente dubium esse nequit.—Sunt enim qui *expressis* quasi verbis Imm. Deiparæ *Conceptum* prædicant, puta *S. Ephrem* (*Or. ad SS. Dei Genitricem*) a quo B. V. dicitur “ab *omni* sorde ac labe peccati alienissima,” *S. Maximus Taurin.* (*Hom. 5 ante Nat. Dom.*) a quo appellatur “idoneum plane habitaculum, non pro habitu corporis, sed pro gratia *originali*,” *S. Augustinus* (*de Nat. et Gr. c. 36*) qui ait: “Excepta S. V. Maria, de qua propter honorem Domini *nullam* prorsus, cum de peccato agitur, haberi volo quæstionem; inde enim scimus, quod ei plus gratiae collatum fuerit ad vincendum *omni ex parte* peccatum, quæ concipere ac parere meruit quem constat nul-

a facie inimici, ex qua mille clypei pendent, omnisque armatura fortium; tum in *horto* illo concluso qui nescit violari, neque corrumpi ullis insidiarum fraudibus; tum in corusca illa *Dei civitate*, cuius fundamenta in montibus sanctis; tum in *augustissimo* illo *Dei templo*, quod divinis refulgens splendoribus plenum est gloria Domini.”

1—Passaglia, *op. cit.*, S. III-IV.

2—Id., *op. cit.*, S. VII, c. 1.—Ab ipsis Ecclesia Canadensis initiiis viguit fides in Imm. B. V. M. *Conceptionem* (vid. *Mandements des Ev. de Québec*, Vol. I, pp. 66-67).

3—Cf. *De Imm. Deiparæ Conc. hymnologia Græcorum*, auctoribus Toscani et Cozza, 1862.

lum habuisse peccatum.¹—Alii plures *æquivalentibus* sententias loquuntur: apud quos B. Virgo nuncupatur “sacratissima” (Modest. Hieros.), “speciosissima” (Hildegph.), “penitus immaculata” (Andreas Cret.), “penitus inculpata” (German. Cptan.), “penitus incorrupta” (Theod. Stud.), “penitus intemerata” (Theophan.), “supercelestis” (Petr. Venerab.), “superinnocens,” “omni puritate purior”, “sola sine macula” (Joan. Damasc.), “omni ex parte sancta” (Method.), “Angelis sanctior” (Joseph. Conf.), “vas intactum” (Cyrill. Alex.), “impollutum tabernaculum” (Sophron. Hieros.), “purissimum lilyum” (Philot. patriarch.), “lilyum inter medias spinas germinans” (Theod. Ancyrr.) etc, etc. Hæc, præsertim si collective sumantur, haud sfernendum argumentum subministrant².

c) Traditionis vim infringere non valent quæ ex S. Bernardo et medii ævi doctoribus oggeruntur.—Quod enim ad *S. Bernardum* attinet, ipse (si reapse sit auctor ep. ad Canon. Lugdun.) festum Conceptionis Mariæ ideo improbavit, quod *inconsulta sede Apost.* adoptata fuisset. Ibi vero (ut plerique explicant et contextus suadet) sanctam fuisse conceptionem negat non passivam adæquatam, sed *activam* et *passivam inchoatam*. Alio loco (Serm. 2 in Assumpt.) *hypothetice* tantum maculam originalem in Maria supponit. Tandem nec admittere pigeat, forte S. Doctorem haud plene firmoque assensu germanam catholici dogmatis rationem (de quo nihil hactenus ab Ecclesia statutum erat) esse assecutum.—Ab ætate S. Bernardi ad Conc. usque Tridentinum non pauci theologi, faventibus ambiguis priscorum scholasticorum sententiis, in opinionem Imm. Conceptioni adversam declinare visi sunt. At ii cuncti tanquam *doctores privati* locuti sunt, non quasi traditionis testes, nec etiam quasi universæ Scholæ sensus interpres: siquidem singulis illis sæculis docti plures Mariæ privilegium nobiliter defensarunt.

3º De *D. Thoma* quid opinabimur?—Hæc consideranti

1—Cf. Perrone, *De Imm. B. V. M. Conc. disquis. theol.*, P. I, o. 10-11; P. II, c. 6, n. 4;—Palmieri, *de Deo creante et elevante*, th. 85.

2—Vid. plura fereque innumera quæ eruditissimus Passaglia e veterum scriptis collegit, *op. cit.*, S. II.

non solum verba, sed et sensum verborum S. Doctoris, probanda aut certe non improbanda videbuntur.

Primo, Angelicus *explicite* nonnusquam docuit Imm. B. V. Conceptionem, puta (1 S. D. XLIV, Q. I, a. 3 ad 3) : “ Puritas intenditur per recessum a contrario ; et ideo potest aliquid creatum inveniri quo nihil purius esse potest in rebus creatis, si nulla contagione peccati inquinatum sit ; et talis fuit puritas B. Virginis, quæ a peccato *originali* et actuali *immunis* fuit¹. ” — *Secundo*, principia asseruit Angelicus quæ *implicite* prefatum dogma continent; sic ait (hic, Q. XXVII, a. 2 ad 2) : “ Sub Christo...maxima fuit B. Virg. puritas.” Et (4 S. D. XXX, Q. II, a. 1, sol. 1) : “ In B. Virgine debuit apparere omne illud quod *perfectionis* fuit². ”

— *Tertio*, textibus qui objiciuntur, v. g. “ B. Virgo in peccato originali fuit concepta ” (3 S. D. III, Q. I, a. 1, sol. 1) et hic (a. 2) passim, nonnulli tum antiqui tum moderni occurrunt contendendo loca illa fuisse corrupta. — *Quarto*, quidquid sit de hac opinione, ea non indigemus ad salvandam thomisticæ doctrinæ conformitatem cum definitione dogmatica Ecclesiæ. Sane a) in objectis locis vox *conceptio* accipienda est eo sensu qui apud veteres scholasticos obtinebat, scil. *active* vel *passive-inchoate*; quod eruitur ex ipsis verbis D. Thomæ (hic, a. 2 ad 4) : “ B. Virgo peccatum originale contraxit, cum fuerit concepta secundum carnis concupiscentiam ex commixtione maris et feminae³. ” b) Qua in sententia, sicuti in aliis similibus, peccatum sumitur non formaliter, sed *virtuiter* tantum seu ea ratione qua carni embryonis nondum spiru rationali informatæ inesse intelligitur. c) Nec nos commovere debet quod Auctor (a. 2) dicat B. Virginem sanctificatam fuisse “ post animationem. ” Propositum enim est ostendere, sanctificationem Mariæ non fuisse animationi præviā, tum quia ante infusionem animæ rationalis nondum extebat

1—Cf. 1 S. D. XVII, Q. II, a. 4 ad fin; *Exp. in Orat. Dom. pet. 5*, et in *Ps. XVIII*, 6; necnon *Exp. in Sul. Ang.* (juxta quosdam codices) et *Comm.* in *Ep. ad Gal. III*, l. 6.

2—Cf. I-II^o, Q. LXXXII, a. 5 ad 3; III, Q. XXVII, a. 4; etc.

3—Hinc supra (Q. XIV, a. 3 ad 1) dicitur : “ Caro Virginis concepta fuit in originali peccato.” — Quo posito conceptionis intellectu, mirum non est quod S. Doctor festo Conceptionis haud faverit (Q. XXVII, a. 2 ad 3).

gratiae subjectum, tum quia secus B. Virgo non contraxisset peccati originalis *debitum* nec redemptione proprie sumpta indiguisse. Ex quo logica fluit conclusio, sanctificationem contigisse *post animationem* ordine, non temporis, sed *naturae*¹. d) Eadem videtur solutio adhibenda loco difficiliori (3 S. D. III, Q. I, a. 1, sol. 2); ubi sanctificatio "in ipso instanti infusionis" animæ eatenus fieri potuisse negatur, quatenus retroactione quadam debitum peccati delere censeretur, quod absurdum est: non tamen collatio gratiae tunc primum justificantis excluditur. e) Demum, quando S. Thomas dicit "B. Virgo in originali est concepta, sed non nata" (Exp. in Salut. Ang.), verba ejus merito accipiuntur, per oppositionem ad conceptionem initialem, de nativitate intrauterina seu de animationis rationalis ortu, juxta illud (Matth. I, 20): *Quod in ea natum est, de Sp. S. est.*²

4^o *Rationibus* modo arguere licebit.

a) *Primo*, ex *relatione Mariæ ad Trinitatem*. "Decebat omnino ut... ab ipsa originalis culpæ labे plane immunis amplissimum de antiquo serpente triumphum referret tam venerabilis mater, cui Deus Pater unicum Filium suum... ita dare dispositus ut naturaliter esset unus idemque communis et Patris et Virginis Filius, et quam ipse *Filius* substantialiter facere sibi matrem elegit, et de qua *Sp. S.* voluit et operatus est ut conciperetur et nasceretur ille de quo ipse procedit" (Const. *Ineffabilis Deus*).—b) *Secundo*, ex *Redemptionis perfectione*. Sanctificatio Mariæ, tam singulariter Deo conjunctæ, ita præcellens fuisse credenda est, ut Mediatoris perfectissimi, scil. Christi, actus perfectissimus extiterit. Atqui perfectissimus actus mediationis Christi seu Redemptionis is est qui non solum intensivam, sed et *extensivam* sanctitatis perfectionem adducit præservando alicujus animam ab *omni culpa*. Ergo.—c) *Tertio*, ex *Mariæ ad Evam comparatione*. Mirus viget parallelismus inter ordinem humanæ ruinæ humanaeque reparationis processum, quatenus angelo tenebrarum angelus lucis Gabriel, primæ Evæ altera Eva Maria, Adamo

1—Ipse Cajetanus (in h. loc.) concedit explicationem hanc probabiliter consonare menti S. Thomæ.

2—De toto argumento vid. plura ap. F. Morgott, *Marialogie de S. Thomas d'Aquin*, chap. IV, a. 2; ubi etiam referuntur plerique alii D. Thomæ defensores.

Christus, funestæ arboris pomo fructus Crucis e regione opponitur. Itaque utraque Eva in ordine spirituali se habent quasi duo contraria principia, ad perniciem una, ad salutem influente altera. Atqui principia inter se contrarie opposita, qua talia, omnino sunt ab invicem independentia. Ergo repugnat ut Mariam, vel uno momento, filiarum Evæ corruptio attigerit.—d) Quarto, ex *sensu fidelium*, qui omnium rationum effectus et summa est. Quod est communis hominum sensus in ordine naturæ, id secundum analogiam quamdam in re supernaturali esse dicitur sensus fidelium generalis, firmus, privatus ac publicus. Porro sensum hujusmodi, obstantibus licet quibusdam theologis, in Ecclesia tum Orientali tum Occidentali, penes doctos et indoctos, pastores et oves, de Imm. V. Conceptione prævaluisse, compertissimum est. Ergo efficax inde veritatis criterium depromitur.

Demonstrationem nostram ipsa concludat B. Virgo ea voce quam (a. 1858) prope oppidum *Lourdes*, acclamante mox universo orbe catholico, cœlesti ore effata est: "Nominor *Conceptio Immaculata*!"

Solv. obj. — OBJ. 1.—Legitur (Rom. III, 23): *Omnes peccaverunt et egent gloria Dei*; cf. *ibid.* V, 12 et 18; 1 Cor. XV, 22; 2 Cor. V, 14-15. Ergo.

RESP. D. antec:... et haec intelligenda sunt de peccati debito per originem ex Adam contracto, C; de macula ipsa peccati formalis, S.d: secundum communitatem legis, cui omnes, scil. tum Judæi tum Gentiles, subjiciuntur, C; absque facta exceptione pro Virgine illa quæ sub Christo singularissimum locum tenuit totque privilegiis ornata fuit. N.—*Neg. conseq.*

OBJ. 2.—Antiqui Patres de Imm. Conceptione siluerunt, imo plerique posteriores (ap. Perrone, *op. cit.* P. I, c. 6) expresse docuerunt carnem B. Virginis fuisse *carnem peccati*. Ergo.

RESP. ad 1^m. Silentium veterum nequit legitime contra nos invocari, tum quia fides posteriorum ætatum priorum fidem theologicæ supponit; tum quia nec desunt trium primorum sæculorum scripta quæ *implicite* saltem Immaculatam Matris Dei Conceptionem significant¹.—Ad 2^m dicendum, Patrum

1.—Cf. Passaglia, *op. cit.* passim.

illorum effata nihil aliud significare nisi quod B. Virgo carnem traxerit de corrupto Adami fonte ex quo peccatum transit in posteros. b) Unde *vi conceptionis et proxime* (non remote tantum, ut quidam distinguunt)¹ debitum originalis peccati contraxit velut servitutis prænuntium, a qua, redemptione præveniente, in instanti infusionis animæ custodita fuit. c) Cæterum, quid concedere vetat unum alterumve Patrem paululum a vero deflexisse?

OBJ. 3.—Qui poenitentias sustinet peccati reus censeri debet. Atqui B. Virgo obnoxia fuit poenitentibus naturæ lapsæ, v. g. siti, dolori, imo et morti. Ergo.

RESP. D. M: Qui poenitentias sustinet expiationis causâ... *Trans*; perfectionis spiritualis gratiâ, N.—D.m:...obnoxia fuit *omnibus* naturæ lapsæ poenitentibus, N; miseriis pure physicis ac turpitudine parentibus, per quas patienti morientique Christo conformaretur, C.—*Neg. conseq*².

OBJ. 4.—In religione Christiana, doctrinæ novitas signum erroris est. Atqui dogma Imm. Conc. novum est in Ecclesia. Ergo.

RESP. D. M:...novitas *inventionis*... C: novitas *explicationis* ac *propositionis*, N.—C.d.m:...noviter inventum est neque *actu*, licet minus expresse, in revelationis deposito continetur, N; datis circumstantiis, et quibusdam contradicentibus, noviter explicatum est donec solemni promulgatione sanctificetur, eo ferme modo quo serenum cœlum coalescentibus nubibus partim obtenebratur, at mox agente sole lucidius splendescit, C.—*Neg. conseq*.

1—Cf. Palmieri, *De Deo creante et elevante*, th. 89.

2—Damnata est seq. Baii prop. 73: "Nemo præter Christum est absque peccato originali; hinc B. Virgo mortua est propter peccatum ex Adamo contractum, omnesque ejus afflictiones in hac vita, sicut et aliorum justorum, fuerunt ultiones peccati actualis vel originalis."

ARTICULUS II.

*Utrum per sanctificationem Maria consecuta sit
immunitatem a fomite peccati et a
quovis peccato.*

(Art. 3-4)

Remota a B. Virgine originis macula, proximum est ut ab ea quemlibet alium nævum, sive *peccatum ipsum*, sive *ad peccandum pronitatem*, pio animi studio arceamus.— Statum hunc singularissimum, quem Deiparæ vindicandum suscipimus, confundat nemo cum statu *originalis justitiae* primorum parentum; cui etsi in pluribus ac precipuis consonet, certe tamen dissonat i. aliis, puta quod Maria caruerit impossibilitate ac immortalitate.—Duo distinctim, pro ratione propositi tituli, concludendo enucleabimus.

Conclusio 1^a.—B. VIRGINI IN ORIGINALI SUA SANCTIFICATIONE PECCATI FOMES SUBLATUS EST NON SOLUM PER LIGATIONEM, SED (probabilius) PER EXTINCTIONEM.

1^a *Pars*, scil. quod B. Virgo fuerit immunis saltem per ligationem ab *actu* fomitis, *certa* voce ab omnibus conceditur.

Sane 1^o exploratum omnibus est nullam in Maria maculam fuisse, sed puritatem “qua major sub Deo nequit intelligi” (S. Anselm.). Atqui peccati fomes, nempe inordinata concupiscentia sensibilis appetitus, *ad maculam pertinet*, saltem carnis. Ergo.—Hinc S. Leo M. (Serm. 22 in Nat. Dom. II): “Inviolata virginitas concupiscentiam nescivit¹.”

2^o Concupiscentie motus *ad peccatum ducunt*, ita ut eorum sit miserias istas perpetui qui humanae fragilitati succumbunt. Atqui mox ostensuri sumus Virginem Deiparæ nec tenuissimam peccati labem in se admisisse. Ergo.—Objicientibus verba Ap. (2 Cor. XII, 9): *Virtus in infirmitate perficitur*, apte respondet Angelicus (a. 3 ad 2): “Infirmitas carnis ad fomitem pertinens est quidem in sanctis viris perfectæ virtutis occasio, non tamen causa sine qua perfectio haberi non possit. Sufficit autem in B. Virgine ponere perfectam virtutem ex abundantia gratiae; nec oportet in ea ponere omnem occasionem perfectionis.”

1.—Vid. plura Patrum suffragia ap. Passaglia, *op. cit.*, S. VI, c. 6, a. 3.

3^o Concludamus augustissimam Mariæ personam tanta puritate fuisse refertam ut et ipsa expers concupiscentiæ foret, et *alios* suæ munditiæ participes quodammodo efficeret; quod expresse docet *D. Thomas* (3 S. D. III, Q. I, a. 2 ad 4): “*Gratia sanctificationis non tantum repressit in ipsa motus illicitos, sed etiam in aliis efficaciam habuit.*”

2^a *Pars* versatur circa modum quo fomes ab actu prohibitus fuerit: quidam enim cum Auctore tenent illum initio *ligatum* tantum, postmodum vero in conceptione Christi totallyer sublatum fuisse; alii, quod *communius* et *probabilius* docetur, totalem *extinctionem* a prima Mariæ sanctificatione repetunt.

Re quidem vera, donum hoc integritatis etiam habitualis a principio collatum esse *protoparentibus*, res est indubitata: quorsum futura Dei Mater non eodem privilegio donata fuisse? — Num ad salvandam Christi præminentiam? Hæc profecto optime salvatur ex eo quod omnis gratia, Mariæ largita, intuitu *meritorum Christi* ei obtigerit. — Accedit *Suarezii* argumentum (in h. loc.), quia magis consentaneum est Providentiae divinæ ut rationis imperium supra vires inferiores confirmet non tam externis præsidiis quam *internis* gratiæ virtutumque infusarum auxiliis: ex quo jam extinctio fomitis consequitur.

Conclusio 2^a. — **ALTERA MARIE PRÆROGATIVA FUIT, QUOD A QUOVIS PECCATO, MORTALI AC VENIALI, JUGITER IMMUNIS EXTITERIT.** — Ubi notatum velim *B. Virgini impeccantiam* tribui, non quæ absolutam peccandi possibilitatem sustulerit sicuti in Christo, sed quæ tum ex carentia fomitis, tum ex inclinatione gratiæ, tum ex custodia divinæ Providentiae, ab omni peccato infallibiliter præservabat¹. — Concl. innititur *Conc. Trid.* (Sess. VI, c. 23): “*Si quis hominem semel justificatum dixerit... posse in tota vita peccata omnia, etiam venialia, vitare nisi ex speciali privilegio, quemadmodum de B. Virgine tenet Ecclesia, A. S.*”

1^o In promptu sunt pleraque ex Scripturis Patribusque adducta (art. præc.), quibus immaculatam Mariæ innocentiam probavimus. — Subjicere libet, quasi traditionis epilogum, verba *D. Thomæ* (*Opusc. LX, De dilect. Dei et proximi*, c. 27,

in fin.) : " Fecit summus artifex in ostentationem plenioram artis suæ speculum unum clarissimo clarius, Seraphim tersius et purius, et tante puritatis ut *purius intelligi non posset*, nisi Deus esset, personam scil. gloriosissimæ Virginis."

2º Sic cum eodem Angelico arguimus.—Illos quos Deus ad aliquid eligit ita præparat et disponit ut muneri implendo idonei ipveniantur, juxta illud (2 Cor. III, 6) : *Idoneos nos fecit ministros N. T.* Atqui B. Virgo electa divinitus ac prædestinata fuit ut esset mater Dei. Ergo dubitandum non est quin Deus per suam gratiam eam tantæ dignitati aptaverit, testificante Angelo (Luc. I, 30-31) : *Invenisti gratiam apud Deum : ecce concipies*, etc. Porro non apta, non idonea mater Dei fuisse, quæ vel minimum peccatum commisisset; et hoc propter tria¹: a) *primo*, quia sicuti honor parentum redundat in prolem secundum illud (Prov. XVII, 6) : *Gloria filiorum patres eorum*, ita per oppositum parentum ignominia filios dedecorat; b) *secundo*, quia B. Virgo singulari affinitate Christo sociata est qui ab ea carnem sumpsit: porro quæ conventio Christi ad Belial? (2 Cor. VI, 15); c) *tertio*, quia Dei Verbum et Sapientia tum in anima tum in utero Virginis quasi in tabernaculo habitavit; sed *in malevolum animam non introibit sapientia, nec habitabit in corpore subdito peccatis* (Sap. I, 4). Ergo.

3º Nonnulla e Patribus objiciuntur, quatenus vel ambitionis (Jo. Chrysost.) vel iudebitæ dubitationis (Basil. et Cyr. Alex.) V. Mariam insimularunt (ap. Petavium, *de Incarn.* l. XIV, c. 1). At auctores isti procul dubio excesserunt.—Quæ enim leguntur (Joan. II, 4) *quid mihi et tibi est, mulier?* et (Matth XII, 48) *que est mater mea, et qui sunt fratres mei*, nou reprobationem Marie continent, sed utilem circumstantibus *instructionem*, ne existinarent divina Christi opera pro naturali affectu vel respectu disponenda aut intermitenda esse.—Item, si quæ dubitatio mentem B. V. in morte Domini subierit, non fuit dubitatio infidelitatis, sed *admirationis* fluctuantis inter præsentia tam abjecta et præterita tam sublimia.

1—Nota quam vere hæc D. Thomæ argumenta *Imm. Conceptionis dogma adstruant.*

ARTICULUS III.

Utrum B. Virgo per primam sanctificationem adeptā fuerit plenitudinem omnium gratiarum.

Gratiæ plenitudo hic accipienda est cum omnibus virtutibus et donis supernaturalibus quæ (uti constat ex tract. de Gratia et Virtutibus) gratiam indissolubili nexu concomitantur.—Duo breviter tractabimus: *unum* de usu liberi arbitrii per modum dispositionis in Virgine primo sanctificata; *aliud* de gratiæ sanctificantis plenitudine hujusque plenitudinis distinctione.

Conclusio 1^a.—**V**ALDE PROBABLE EST B. VIRGINEM AB IPSO CONCEPTIONIS ET SANCTIFICATIONIS INITIO HABUISSÆ LIBERI ARBITRII USUM SALTEM TRANSEUNTEM.—Dico saltem transeuntem ad gerendum morem quibusdam theologis negantibus Mariæ permanentem usum rationis in utero, quasi id speciale Christi privilegium habendum sit. Contradicunt tamen plerique moderni, ut Suarez, S. Alph. de Ligorio, etc.

1^o Concl. *ratio* petitur ex eo quod privilegium gratiæ alicui puro homini concessum, verisimile non est B. Virginis fuisse negatum. Atqui probabilissimum videtur Joan. Baptistam tempore sanctificationis in utero divinitus accepisse rationis usum; siquidem, audita salutatione Mariæ ad Elisabeth, *exultavit infans in utero ejus* (Luc. I, 41) utique præ gaudio rationali (cf. Cajet. in art. 6). Ergo.—2^o Recte creditur (Suarez, Disp. IV, S. 7) cognitionem illam, qua B. Virginem in prima sanctificatione donatam dicimus, præcipue circa Deum et Christum, salutis auctorem, versatam esse.—Unde 3^o consequitur eam, Angelorum primorumque parentum ad instar, libero potuisse voluntatis usu gratiæ sanctificanti consentire seu ad gratiam immediate se disponere.

Conclusio 2^a.—**B.** VIRGO MAJOREM PRÆ CÆTERIS GRATIÆ PLENITUDINEM, TRIPLICI PRÆSERTIM PROGRESSIONE, CONSECUTA EST;—quod sane intelligi debet non de plenitudine *absoluta*, Dei-hominis propria, sed de plenitudine *respectiva*.

Prob.—Quanto aliquid magis ad principium in aliquo genere accedit, tanto magis effectum illius principii participat. Atqui ex una parte Christus est principium gratiæ, secundum divinitatem quidem auctoritative, secundum humanitatem

vero instrumentaliter; ex altera parte B. Virgo propinquissima Christo fuit tum *physice* ob carnem quam ei subministravit, tum *moraliter* ob summam Deiparæ dignitatem sibi ab æterno præstitutam. Ergo omnes justos, etiam Angelos, in sua sanctificatione superasse censenda est.—*Evolv. arg. ex D. Th. (Exp. in Sal. Ang., opusc. VIII)*: “B. Virgo excessit angelos...in plenitudine gratiæ quæ magis est in B. V. quam in aliquo angelo, et ideo ad insinuandum hoc angelus ei reverentiam exhibuit dicens: *Gratia plena*, quasi diceret: Ideo exhibeo tibi reverentiam, quia me excellis in plenitudine gratiæ. Dicitur autem B. V. plena gratia quantum ad tria. *Primo* quantum ad animam, in qua habuit omnem plenitudinem gratiæ. Nam gratia Dei datur ad duo, sc. ad bonum operandum et ad vitandum malum, et quantum ad ista duo perfectissimam gratiam habuit b. Virgo. Nam ipsa *omne peccatum vitavit* magis quam aliquis sanctus post Christum... Ipsa etiam *omnium virtutum opera* exercuit, alii autem sancti specialia quedam, quia aliis fuit humilis, aliis castus, aliis misericors, et ideo ipsi dantur in exemplum specialium virtutum... Sed B. V. in exemplum omnium virtutum, quia in ea reperis exemplum humilitatis (*Luc. I*): *Ecce ancilla*, et post: *Respxit humilitatem ancillæ sue*. Castitatis, *quoniam virum non cognosco...* Secundo plena fuit gratia quantum ad redundantiam animæ ad carnem vel corpus. Nam magnum est in sanctis habere tantum de gratia quod sanctificet animam, sed anima B. V. ita fuit plena, quod ex ea refudit gratiam in carnem, ut de ipsa conciperet Filium Dei... Tertio quantum ad refusionem in omnes homines, etc.”

Dixi in concl. *triplici progressionem*.—Triplex namque in B. V. gratiæ perfectio distingui potest, una gratiæ *nascentis*, altera gratiæ *crescentis*, tertia gratiæ *consummatæ* (quod alii nominant plenitudinem *sufficientiæ*, *abundantiæ* et *singularis excellentiæ*). Ratio est, quia in naturalibus aliud est perfectio dispositionis ad formam, aliud perfectio ipsius formæ, aliud tandem perfectio finis quo res completur. Simili progressus lege perfectio gratiæ Marianæ dispergitur, prout eam accipimus vel in originali sanctificatione qua B. Virgo *disponenda* erat ad insigne Maternitatis officium, vel in conceptione Filii Dei ex cuius praesentia fortius in bono *confirmata* est, vel tandem in glorificatione coelesti quæ *consummatam* beatitudinis gratiam ei suffecit (art. 5 resp. ad 2).

QUÆSTIO SECUNDA

DE VIRGINITATE ET DESPONSEATIONE B. MARIAE

Spatium non est heic inquirendi in ea quæ ad pueritiam et adolescentiam B. M. V. pertinent, quæque, vel traditioni vel privatis revelationibus innixa, non omnia nec eadem certitudine constant. Sat esto cursim commemorare (quod ex festo *Præsentationis* patet) Mariam adhuc juvenem fuisse in templo præsentatam, ubi, mox emissæ castitatis voto, se Deo dicavit, vitamque, orationi, meditationi, SS. Litterarum lectioni vacans, usque ad despunctionem suam transegit (cf. *Suarez*, Disp. VII).

Quæ *D. Thomas* (Qq. XXVIII-XXIX) pluribus distinctis articulis disputat, nos brevitatis studio, ad tria reducemos, quærentes de B. M. *virginitate* (art. 1), de ejus *virginitatis voto* (art. 2), deque ejus *desponsatione* (art. 3).

ARTICULUS I.

Utrum B. Maria virgo extiterit ante partum, in partu et post partum.

(Q. XXVIII, a. 1-3)

1º Inter privilegia, q̄t has Dei Genitrix insignita fuit, emicat quasi gemma perpetua ejus virginitas; quam adeo excellenter prætulit ut meruerit nuncupari atque invocari *Regina Virginum*¹.

2º Fatendum est fuisse hæreticos qui gemmam illam, auro nitidorem, impia manu tentarent de Mariæ diademe eri-

1—“ B. Virgo fuit excellens in virginitate, imo *Regina virginum*; et ouia excellenter habuit de virore virginitatis, ideo fructum fecit mirabilem ” (S. Thom. *Serm. de Nat. B. Virg.* ed. Uccelli).

pere.—*a)* Etenim *Carpocrates*, *Ebionitas* et *Cerinthus* Christum de utroque sexu natum olim fabulati sunt.—*b)* Sensit *Jovinianus* Christi matrem in partu virginitatem amisisse; quem postea sequi non puduit *Lochardinos* (sæc. XIV) pluresque Protestantium, inter quos *Buccerus* et *Molinæus*.—*c)* Tandem *Helvidius* (contra quem dimicavit S. Hieronymus) posuit B. Virginem, enato jam Christo, alias ex Josepho filios peperisse; cui impietati consenserunt post Wicleffum multi e *Novatoribus* eorumque sequacibus¹.

Conclusio 1^a.—CHRISTI MATER VIRGO FUIT ANTE PARTUM.—*Fide* id constat ex *Symbolis* et *Conciliis*.

1^a) Insignis est locus propheticus (Is. VII, 14): *Propter hoc dabit Dominus ipse vobis signum. Ecce virgo concipiet et pariet filium, et vocabitur nomen ejus Emmanuel*; quo ex vaticinio sic argumentamur. Certum est textum illum esse messianum; quod patet tum ex singulare ratione vocis *Emmanuel* (nobiscum Deus) et iis quæ (Is. VIII, 8; IX, 6) mirabilis illius filii propria prædicantur, tum ex universa traditione, tum quoque ex authentica interpretatione (Matth. I, 22-23) ubi descripta Christi conceptio sic confirmatur: *Hoc autem totum factum est ut adimpleretur quod dictum est a Domino per prophetam dicentem: Ecce Virgo in utero habebit, et pariet filium, et vocabunt nomen ejus Emmanuel*. Atqui in recitato vaticinio dubium non est quin *virgo* (hebraice cum articulo, ideoque per eminentiam) significet, ex usu vocis necnon ex interpretum etiam protestantium² sensu, puellam innuptam omninoque a re uxoria alienam; imo virginitas accipienda est in sensu *composito*, ut aiunt, seu pro ipsa Emmanuelis conceptione, in qua ideo *signum*³ agnoscitur, quia virginea est. Ergo.—*b)* Predictioni apprime respondit eventus, prout legitur apud Mathæum et Lucam; quorum unus expresse excludit a Christi conceptione mari-

1—Triplicem hanc erroris formam perculit *Conc. Later.* sub *Martino I a.* 64^a (can. 3): “Si quis... non confitetur proprie et secundum veritatem Dei genitricem sanctam semperque virginem immaculatam... abaque semine concepisse ex Sp. S. et incorruptibiliter eam genuisse, indissolubili permanente et post partum ejusdem virginitate, condemnatus sit.”

2—Cf. Knabenbauer, *Curs. Scrip. sac.*, *Comm.* in Is. VII; ubi totus locus eruditissime expenditur.

3—Cf. S. Thom. *Exp.* in Is. VII.

talem operam : *Antequam convenientirent, inventa est in utero habens de Sp. Sancto* (Matth. I, 18), alter eam his terminis Deo adscribit: *Sp. Sanctus superveniet in te et Virtus altissimi obumbrabit tibi* (Luc. I, 35).—*c)* Cogor silentio præterire *Patrum* eloquia, a cl. Petavio (l. XIV, c. 3-7) enarrata ; quibus fac conjugas veterem populorum etiam gentilium persuasionem de Liberatore e *Virgine* orituro.¹

2º D. Thomas plures affer *rationes congruentiae*, breviter assignandas :—nimirum *a) ex parte Dei Patris*; cum enim Christus sit verus et naturalis Dei Filius, congruebat eum sic nasci ut unum cœlestem Patrem, excluso patre terrestri, haberet, ne paterna Dei dignitas ad creaturam transferri vide-retur: unde *S. Joseph* pater Christi dicitur *estimatione et officio*, non generatione.—*b) Ex parte ipsius Filii*; conve-niens namque erat ut in ipsa generatione humana Verbi Dei aliqua proprietas divinæ ejus generationis reluceret. Atqui Verbum, secundum quod e paterno sinu procedit, nedum cor-ruptionem, magis Patri dicenti affer perfectionis plenitudi-nem. Ergo congruebat ut Verbum illud, illæsa manente matris integritate, humanitus conciperetur.—*c) Ex parte humanitatis Christi*; hæc enim citra quemvis peccati nævum oriri debuit, per quam peccata mundi delenda erant. Porro fieri non poterat ut in natura jam corrupta caro ex concubitu nasceretur absque debito saltem peccati originalis. Ergo.—*d) Ex parte finis Incarnationis*; eo enim fine Ver-bum incarnatum est ut homines in filios Dei renascerentur *neque ex voluntate carnis, neque ex voluntate viri, sed ex Deo*. Porro hujus conceptionis spiritualis certe decuit ex-emplar in ipsa Christi conceptione apparere.

Conclusio 2^a.—MATER DEI FUIT VIRGO IN PARTU ; prout sancitum est in *CC. Chalced.* et *Cptano III.*

Revera 1^º *a)* “ propheta non solum dicit : *Ecce virgo con-cipiet* ; sed etiam addit : *et pariet filium*, Is. VII, 14 ” (*S. Thom. a. 2*) ; scil. hæc verba sicuti quoad conceptionem (ut supra notatum est), ita et quoad partum sensu *composito* intelligi debent ac reapse a Patribus tum græcis tum latinis intellecta sunt (cf. *Suarez*, Disp. V, S. 2, n. 3).—*b)* Expen-

1—Cf. Aug. Nicolas, *Etud. phil. sur le Christ.*, P. I, l. 2, ch. 4, parag. 3.

dens de ea re Patrum sententias, observat *Franzelin* (De Verb. inc. th. 15) frequentissimam recurrere apud plerosque PP. comparationem cum resurrectione Christi: "Sicut obsignato sepulchro resurrexit, sicut per portas clausas ingressus est ad discipulos, ita nascendo inviolatis sigillis virginitatis et inconcussis foras prosiluit."—*c)* Nec difficultatem facessit quod legitur apud quosdam (puta ap. Basilium et Ambrosium), Christum *aperuisse vulvam matris*: quippe post D. Thomam (resp. ad 1) scite monet *Petavius* (l. XI. V, c. 5) voces illas sub eorum auctorum calamo nihil aliud significare quam nasci seu materno ex utero prodire; a qua tamen benigna interpretatione excipit *Tertullianum* et *Origenem*.

2º Tria *rationum* momenta proferri possunt.—*a)* *Primum ex divinitate Christi*; quam ut ipse una cum veritate sui corporis declararet, "permiscuit mira humilibus" (resp. ad 2). Unde, gratia demonstrandæ humanitatis, nascitur ex muliere (intellige ex femina); gratia vero ostendendæ Divinitatis, nascitur ex virgine.—*b)* *Secundum ex proprietate Verbi*; quia enim Verbum non solum in corde illæso concipitur, sed etiam ex corde incorrupto progreditur, conveniebat ut Christi corpus, simili incorruptionis lege de virginis utero procedens, proprium Verbi Dei characterem quodammodo referret. —*c)* *Tertium ex effectu Incarnationis*; ad hoc enim venit Christus ut corruptionem nostram tolleret, nos puritatem edoceret, nobis parentes honorandos præciperet, etc: quæ cuncta vetabant ne virginitatem matris nascendo defloraret.

3º Nonnulla *consecaria* subjiciam.—*a)* Et imprimis B. V. Mariæ partus, non doti corporum gloriosorum, sed singulare adscribi debet *miraculo* quo factum est ut, præter communem claustræ virginæ reserationem, Christus de utero matris egredetur. Quamvis enim impenetrabilitas sit *naturæ* proprietas corporum, divinitus tamen seu per miraculum effici non repugnat quod, suspensa quantitate *extrinseca* et distributiva partium in loco, duo corpora eundem locum occupent et tamen distincta maneant secundum *intrinsecam* partium extensionem¹.—*b)* Hinc, cum Virgo-Mater nullam

1—Cf. Suppl. Q. LXXXIII, a. 3 et Quodl. I, a. 22.—Cl. Lorenzelli (*Phil. theor. inst.*, *Phil. nat. in comm.* P. III, l. 3) ita exponit doctrinam Angelici: "Impossibilitas naturalis hujus rei procedit ex hoc

pariendo violentiam experta sit, "in illo partu nullus fuit dolor, sicut nec aliqua corruptio; sed fuit ibi maxima jucunditas ex hoc quod homo Deus est natus in mundum, secundum illud (Is. XXXV, 2): *Germinans germinabit, et exultabit letabunda et laudans*" (III, Q. XXXV, a. 6).—c) Itidem B. Virgo, immunditiae expers, non erat (stricte loquendo) *purificationis* legi adstricta; at vero sponte observavit illam implevit tum ad præbendum humilitatis obedientiaeque exemplum, tum ad approbandam legem et tollendam Judæis calumniæ occasionem (Q. XXXVII, a. 4).

Conclusio 3^a.—MATER DEI VIRGO PERMANSIT POST PARTUM.—Hoc quoque de fide est juxta CC. cœcum. V, VI et VII.
 • 1^a) Non immerito invocatur hæc sententia (Ezech. XLIV, 2): *Porta hæc clausa erit; non aperietur, et vir non transibit per eam, quoniam Dominus Deus Israël ingressus est per eam;* quæ verba, litteraliter dicta de quadam porta templi, implicite saltem seu *sensu consequente*¹ ex paritate rationis (si, non allegorice) ostendunt aulam virginalem matris Messiae inviolatam manere debuisse. Unde hoc testimonio in re præsenti Patres scriptoresque ecclesiastici frequenter usi sunt.—b) Perpetuae virginitatis Mariæ negatio, quam Hieronymus (l. cont. Helvidium) "scelus ac blasphemiam" appellat, teste eodem Doctore contrariatur toti antiquitati; patet enim (Franzelin, th. 15) in symbolis fidei, in liturgiis, in prædicatione Patrum, proprium et insigne nomen Dei matris continuo fuisse nomen *virginis et semper virginis*.

quod unumquodque conservatur in se unum, in quantum remanet *divisum ab aliis*, et omne corpus remanet *divisum* per hoc quod conservat *dimensiones suas a dimensionibus aliorum distinctas*. Distinctio autem dimensionum conservatur per distinctum *situm* aut per distinctam positionem *in loco*. Hinc sicuti omne corpus naturaliter tendit ad conservandum seipsum, ita naturaliter excludit aliud ab occupando simul eodem particulari loco per impenetrabilitatem. Sed prima ratio unitatis non consistit in *divisione ab aliis*; divisio ab aliis consequitur potius *unitatem* quæ principaliter consistit in *indivisione in se*. Igitur per divinam omnipotentiam poterit salvare unitas respectiva propria duorum corporum, sine *divisione* utriusque quantum *ad locum*, seu remota etiam causa secunda conservativa hujus distinctionis, scil. remota distinctione quantum ad *situm*; quia Deus, qui est *causa prima*, potest conservare effectus in esse sine *causis proximis*."

1—Knabenbauer, *op. cit.*, *Comm.* in Ezech. XLIV.

2º Juverit doctrinam illam *rationibus* et verbis limpidissimis Angelici illustrare; loquens de errore Helvidii (art. 3) ait: "a) Hoc primo derogat *Christi perfectioni*; qui sicut secundum divinam naturam unigenitus est Patris, tanquam perfectus per omnia filius ejus, ita decuit ut esset unigenitus matris, tanquam perfectissimum germen ejus.—b) Secundo hic error injuriam facit *Sp. Sancto*, cuius sacrarium fuit uterus virginalis, in quo carnem Christi formavit. Unde non decebat quod de cætero violaretur per commixtionem virilem.—c) Tertio derogat dignitati et sanctitati *matris Dei*, quæ ingratissima videretur, si tanto Filio contenta non esset, et si virginitatem, quæ in ea miraculose conservata fuerat, sponte perdere vellet per carnis concubitum.—d) Quarto etiam *ipso Joseph* esset ad maximam presumptionem imputandum, si eam quam revelante angelo de *Sp. S. Deum* concepisse cognoverat, polluere attentaret."

Solv. obj.—OBJ. 1 (cont. 1^{am} concl.).—Quæ sunt ejusdem speciei, euindem generationis modum habent. Atqui Christus fuit ejusdem speciei cum aliis hominibus. Ergo.

RESP. D. M:...secundum quod procedunt in esse per viam naturæ, C; quasi divina virtus, cui naturæ leges cunctaque creata obediunt, non possit illi processui supernaturaliter derogare, N.—C.m.—Neg. conseq.

OBJ. 2 (cont. 3^{am} concl.).—Legitur (Matth. I, 18): *Antequam convenirent, inventa est in utero* etc;—ibid. (v. 20): *Noli timere accipere Mariam conjugem tuam*;—rursus (v. 25): *Non cognoscebat eam, donec peperit* etc. Quæ tria, *antequam, conjux, donec, carnalem copulam* Mariam inter et Joseph subsecutam esse ostendunt. Ergo.

RESP. ad 1^{am}, illud *antequam convenientire* ab Evangelista poni, non quia postea convenerint, sed quia, dum viderentur *convenire*, prævenit conceptio per *Sp. Sanctum* prohibens ne ulterius convenientire.—Ad 2^{am} dico *conjugem* vocari Mariam ex initi connubii veritate, non ex consummata carnaliter unione.—Ad 3^{am} subnoto adverbium *donec* (et hanc explicationem confirmat usus) signare quod erat minus evidens, scil. matrem Dei non esse a viro cognitam ante partum, 'subauditio eo quod facilius intelligitur, nempe eam non fuisse cognitam post partum.

OBJ. 3.—*Christus (Matth. I, 25) nominatur filius Mariæ primogenitus; — imo expresse dicitur habuisse fratres (Joan. II, 12): Descendit Capharnaum ipse, et mater ejus, et fratres ejus. Ergo.*

RESP:—1º Apud Judeos vocabatur *primogenitus* non solum is quem fratres sequebantur, sed omnis filius *ante quem nullus esset natus*.—2º De *fratribus Domini* a) difficultas a quibuedam Patribus solvitur, quatenus fratres illi censeantur filii S. Joseph, non ex B. Virgine, sed ex alia uxore oriundi. At hæc opinio adversarios nacta est penes plures alias Patres, præsertim penes Augustinum et Hieronymum, communique consensu rejicitur; ad rem *S. Thomas (Comm. in Gal. I, 19)*: “Hoc est falsum, quia si Dominus matrem virginem noluit nisi virginem commendare custodiendam, quomodo sustinuissest sponsum ejus virginem non fuisse¹? ” b) Itaque, ut aliam sententiam promamus, quatuor modis in Scripturis *fratres* appellantur, scil. natura, gente, cognatione et affectu. Hinc qui dicti sunt fratres Domini (Jacobus Min., Judas, Joseph et Simon) merito aestimantur *consobrini* Christi, tum quia eorum genitor Cleophas frater creditur S. Joseph ideoque patruus Domini eo titulo quo S. Joseph erat ejus pater, tum quia Maria, uxor Cleophæ, fuit B. M. Virginis soror (Joan. XIX, 25) aut germana aut consobrina.

ARTICULUS II.

Utrum mater Dei virginitatem voverit.

Hactenus de virginitate B. M. diximus quantum ad elementum materiale; nunc inquirendum subit de eo quod *formale* est in ipsa, scil. de proposito et voto eam servandi. *Calvinus*, *Beza* aliquique hæretici, quibus castitas præsertim voto nuncupata exosum quid visa fuit, non sunt veriti exquisitum illum Marianæ virginitatis florem detrectare; at inani conatu.

1—Cf. Suarez, Disp. V, S. 4.

Conclusio 1^a.—PRO CERTO HABENDUM EST B. V. MARIAM ANTE ANNUNIATIONEM ABSOLUTE VIRGINITATEM VOVISSE.—Res, inquam, certa est ex theologorum sensu, etsi non de fide.

Prob.—1^o *auctoritate*; *Augustinus* enim (l. de S. Virg. c. 4), relato Mariæ ad Angelum annuntiantem responso: *Quomodo fieri istud, quoniam virum non cognosco* (Luc. I, 34), subdit: “Quod profecto non diceret, nisi Deo virginem se ante vovisset.” Idem jam expresserat *Greg. Nyss.* (Or. de Nat. Dom.); quibus subscriptis *Beda*, *Anselmus*, *Rupertus*, *Bernardus*.

2^o *Ratione*.—*a*) Perfectionis opera laudabiliora sunt, si ex voto celebrentur: quandoquidem per votum homo altiori ex virtute operatur, majori sui abnegatione Deo subjicitur, et immobilius in bono firmatur¹. Jamvero virginitas in matre Dei debuit præcipua quadam excellentia præfulgere, ita ut, nedum impar esset illius sublimitati, e contra decore suo Dei Verbum quodammodo attraheret. Ergo.—*b*) Præterea Maria, pro sua dignitatis gradu sanctitatisque primatu, destinabatur purissimum omnium virginum exemplar et implendorum consiliorum veluti initiatrix juxta illud (Ps. XLIV, 15): *Adducantur Regi virginē post eam*; unde *Ambros.* (l. de Inst. Virg. c. 5): “Egregia Maria, quæ signum sacræ virginitatis extulit, et intemeratae virginitatis pium Christo vexillum levavit.” Ergo aut prima tempore fuit quæ virginitatem Deo voveret (contrarium historiâ minime constat), aut saltem perfectione voti cunctas creaturas superavit².

Conclusio 2^a.—PROBABLE EST DEIPARAM INDE AB INITIO VIRGINITATEM VOVISSE SUB CONDITIONE, I.E. NISI DEUS ALIUD ORDINARET; POSTQUAM VERO EI MOX DESPONSATÆ INNOTUIT HOC ESSE DEO ACCEPTUM, ABSOLUTE VOVIT.—Ita *D. Thomas*, quem plures sequuntur; quamvis *alii* etiam magni nominis theologi opinentur B. Mariam votum absolutum emisisse ante matrimonium, imo a prima deliberatione (cf. *Suarez*, Disp. VI).

1^o *a*) In B. Virgine apparere oportuit omne illud quod ejus perfectionem secundum temporis congruentiam commen-

1.—II-II^æ, Q. LXXXVIII, a. 6.

2.—Cf. *Suarez*, Disp. VI, Sect. 3.

daret. Atqui, quamvis virginitas in se esset optima, tamen *pro tempore illo* et ex mente Legis matrimonium ei præferebatur: tum quia secundum carnis originem cultus Dei propagabatur; tum quia benedictum semen a Deo promissum per viam originis proventurum erat. Ergo “B. Virgo vovit virginitatem tanquam optimum et sibi acceptissimum, non tamen simpliciter, sed sub conditione honestissima, hac scil. nisi Deus aliter ordinaret: nec istam conditionem apposuit ut dubitaret an vellet virgo permanere, sed an deberet” (4 S. D. XXX, Q. II, a. 1, sol. 1).—*b)* Accedit quod “B. Virgo fuit confinium Veteris et Novae Legis, sicut aurora diei et noctis; et ideo votum ejus sapuit novam legem, in quantum virginitatem vovit, et veterem, in quantum conditionem apposuit” (*ibid. ad 1.*).—*c)* Tandem (juxta D. Thomam) absolutum continentiae votum contrarium esset substantiæ matrimonii; ait enim (*ibid. quæstiunc. 2 ad 2.*): “Talis conditio, cum sit contra matrimonii bonum, scil. prolem procreandam, matrimonium tolleret.”

2º Accepto sponso prouti mores illius temporis exigebant, Mariæ mox per revelationem innotuit votum virginitatis *absolutum* fore Deo gratum; quod ideo una cum S. Joseph, communi voluntatis assensione, emisit.—Ne vero desponsatio B. Virginis ægre cum proposito etiam conditionato servandæ virginitatis conciliari videatur, sequentibus attendas D. Thomœ verbis (*loc. cit., ad 2 et 3.*): “B. Virgo, antequam contraheret cum Joseph, fuit certificata divinitus quod *Joseph in simili proposito* erat; et ideo non se commisit periculo nubens... Copula carnalis cecidit implicite sub consensu B. Virginis, sicut actus implicite continetur in potentia. *Potentia* autem ad carnalem copulam non contrariatur virginitati, nec diminuit aliquid de puritate ipsius nisi ratione *actus*; qui quidem nunquam fuit in proposito b. Virginis, sed erat jam certificata quod actus nunquam sequi deberet.”

ARTICULUS III.

De matris Dei desponsatione.

(Q. XXIX, c. 1.2)

Doctrinam de virginitate B. Mariæ proxime excipit quæstio de ejus *desponsatione*, sub cuius velamine intacta manens Fructum salutis mundo edidit.—Duo post D. Thomam investiganda sunt, scil. num desponsatio illa fuerit *conveniens* (an sit), et utrum veram *matrimonii rationem* haberet (quid sit).

Conclusio 1^a.—CONVENIENS FUIT CHRISTUM DE DESPONATA VIRGINE NASCI.—Hanc desponsationem, quæcumque demum fuerit, attestantur SS. *Littere* luculentissimo sermone; unde sola nunc *convenientia* probanda est: quam probationem triplici ex capite ducemus.

1^o *Ex parte Christi*; quo sub respectu quatuor argumenta desponsationi Deiparæ suffragantur: a) *unum* nempe, ne Christus ab infidelibus tanquam illegitime natus abjiceretur; b) *aliud*, ut consueto modo ejus genealogia per virum describeretur; c) *tertium*, ut partus ejus (nondum instantे tempore persecutionum quas pati disposuerat) sive diabolo sive diabolicis potestatis celaretur sub hymenæi pallio: nec enim diabolus permittebatur modum divini illius partus scrutari; d) *quartum*, ut a Joseph sustentaretur, qui propterea pater ejus *nutritius* dictus est.

2^o *Ex parte Virginis*: siquidem per hoc a) immunis reddita est a pena *lapidationis* qua mulier peccatrix, sive jam nupta, sive virgo nuptura, penes Judæos plectebatur; b) ab *infanticis* dedecore liberata fuit; c) item in sponso Joseph *custodem* et *administrum* sibi devotissimum invenit.

3^o *Ex parte nostra*: sic enim a) indubitato Joseph testimonio comprobatum est Christum ex Virgine natum; quod nisi verum foret, sane sponsus ille opprobrium sibi illatum vindicasset; b) ipsum quoque testimonium B. M. de sua virginitate eo credibilius nobis appetet, quod jam desponsata nullam mentiendi seu occultandæ prægnationis suæ causam

habuerit; c) præterea, tollitur excusatio virginibus, quæ propter suam incautelam infamiam non vitant; d) mystice significatur virginea conjunctio Ecclesiæ cum Christo; e) tandem, exemplo sponsæ virginis tum virginitas tum matrimonium contra hæreticos alterutri detrahentes defendit et honoratur.

Conclusio 2^a.—VERUM INTERFUIT MARIAM INTER ET JOSEPH MATRIMONII VINCULUM.—Hanc veritatem esse *de fide* docent omnes theologi (teste Suarez, Disp. VII, S. 1).

Prob. 1^o ex *Scriptura*.—Nam (Math. I, 16 et 19) Joseph vocatur *vir Mariæ* et ratione hujus unionis (Luc. II, 48) *pater Christi*; Maria vicissim *conjux* (Matth. I, 24) et *uxor* (Luc. II, 5) Joseph appellatur: quæ omnia vinculum matrimoniale indubie designant.

2^o Ex *Patribus* et *Doctoribus*, inter quos nominare est *Basilium*, *J. Chrysost.*, *Ambrosium*, *Hieronymum*, *Augustinum*, *Alphonsum de Lig.* etc. Ait Aug. (c. Faust. I. XXIII, c. 8) de S. Joseph: “Neque quia concubitus non permixtus, ideo non maritus, cum ipse Mathæus narret ab angelo Mariam conjugem ipsius appellatam.”—Plurimum Patrum prolata ratio est, quia, nisi intercessisset verum matrimonium, non esset sufficienter famæ B. Virginis provisum.

3^o Ex ipsa *rei natura*.—Matrimonium seu conjugium verum dicitur ex eo quod perfectionem suam assequitur. Atqui conjunctio inter Mariam et Joseph matrimonii perfectionem tum primam et essentialiem, tum (saltem ex parte) secundam et accidentalem attigit. Ergo. *Min. ostend.* Duplex est rei perfectio, *prima* quidem et *essentialis* consistens in forma ex qua speciem sortitur, *secunda* vero et *accidentalis* posita in consecutione finis. Forma vero matrimonii residet in quadam indivisibili viri uxorisque fidem sibi spoudentium conjunctione, dum finis est proles copula carnali generanda variisque operibus educanda. Jamvero a) certum est (prout appellations biblice superius recitatæ attestantur) Mariam et Joseph consensisse in *societatem conjugalem*; quin tamen copulæ carnali aliter assenserint quam in *præparatione animi beneplacito divino subdit*. b) Item, nunquam *generandæ* proli operam dederunt; ex quo datur intelligi Patres, qui nuptias excludere visi sunt, solum hunc nuptialem concubitum profecto rejecisse. c) At vero matrimonium illud, etsi gene-

rationis actu carens, finem tamen prolis *educandæ* perfectissima ratione assecutum est. Ergo etc.

Notanda quædam supersunt. — 1º Quando Angelus ad Mariam missus est ut ei Incarnationis mysterium nuntiaret, certe B. Virgo fuerat *desponsata* eo unionis genere quod penes Judæos jura secum ferebat matrimonialia, scil. *nuptiæ* erat, ut modo loquendi evangelico satis declaratur. — Verum 2º non tam liquido constat an propter hanc desponsationis fidem, priusquam nuptiæ solemnî pompa celebrarentur, sponsa jam in *sponsi domo* habitat: multi id affirmant (art. 2 ad 3); alii¹ negativam sententiam probabiliorem censem, qui ideo dicunt tunc Joseph Mariam in domum suam adduxisse nuptiasque solemnies celebrasse, quum monitus est *accipere Mariam conjugem suam*. — 3º Solent auctores inquirere *quæcavitate* Joseph et Maria matrimonium contraferint; cui tamen dubio nulla certa responsio adhiberi potest. Verisimile videatur (quod sentit *Suarez*², Disp. VII, Sect. 3) Joseph fuisse virum triginta vel quadraginta annorum, qui nempe maturitate quadam ætatis et prudentiae polleret. Circa B. Virginem fluctuant opiniones ab anno decimo quarto ad decimum nonum, imo ad vigesimum quartum annum.

1—Cf. Knobenbauer, *Curs. Scrip. Sac., Comm.*, in Matth. I.

2—Plura ap. Exim. Doct. (Disp. VIII) de statu, dignitate et sanctitate S. Joseph pia eruditeque disputata reperies, in quibus haud vacat immorari. — Cf. quoque Decret. Pii IX (1870) de constituendo S. Joseph Patrono Eccl. Cath., necnon Encycl. *Quanquam pluries* Leonis XIII (1889).

QUÆSTIO TERTIA

DE B. M. VIRGINIS ANNUNTIATIONE

Jam se indagandam perhibet insignis prorsus, imo (vere dixerim) incomparabilis legatio illa, in qua maximus est qui mittit, magnus qui mittitur, magna et præcellens ea ad quam legatus venit, magnum et momentosum negotium de quo tractatur (Knabenbauer in Lyc. I).—Cum factum ipsum plane e Scripturis compertum sit, id unum theologæ disquisitioni objicitur, utrum fuerit annuntiatio *conveniens*: quæ convenientia sumi potest vel ex parte *annuntiationis* ipsius (art. 1), vel ex parte *angeli* annuntiantis (art. 2).

ARTICULUS I.

*Utrum necessarium fuerit annuntiari B. Virgini
quod in ea erat generandum.*

(Q. XXX, a. 1 et 4)

Necessarium hic intelligitur non de necessitate absoluta; sed de necessitate *conveniencie*.—Porro annuntiatio, quam convenientem fuisse ostendere intendimus, potest spectari tum *in communi*, tum *in specie* seu secundum ea quibus perfecta est: utrumque unius propositionis ambitu claudetur.

Conclusio.—**ANNUNTIATIO B. VIRGINIS, SIVE COMMUNITER, SIVE SPECIALITER INSPECTA, CONVENIENTISSIMA FUIT.**

1^a *Pars* decl:—1^o ex *ordine conjunctionis* ad Deum. Cum enim mens vicinior Deo sit quam corpus, decebat ut Christus non prius uterum Virginis inhabitaret quam ejus intellectum sapientiae radio perfunderet. Unde *Aug.* (l. de S. Virg. c. 3): “Beatior Maria percipiendo fidem Christi quam concipiendo carnem Christi;” et *Leo M.* (Serm. 1 de

Nat. Dom.) : " Virgo regia Davidicæ stirpis eligitur, quæ sacro gravidanda fœtu, divinam humanamque prolem *prius conciperet mente quam corpore*." —^{2º} Ex *Incarnationis testificatione*. Congruebat enim ut B. Virgo testis certissima¹ inusitatæ conceptionis existeret; quod divinam de tanto mysterio instructionem petebat.—^{3º} Ex *Virginis obsequentia*. Deus non coacta, sed voluntaria diligit obsequii munera et ministeria. Porro B. Virgo singulariter eligebatur in Dei ministerium quem utero portaret, lacte aleret, brachiis bajularet. Itaque conveniens fuit ut de hoc eruditetur; ad quod se promptam obtulit dicens: *Ecce ancilla Domini*.—^{4º} Ex *Virginis mediatione*. Etenim in Incarnatione spirituale quoddam instituebatur connubium inter Filium Dei et humanam naturam. Atqui contractus hujusmodi mutua voluntate efficitur. Ergo congruenter "per annuntiationem expectabatur *consensus Virginis loco totius humanæ naturæ*" (S. Th., art. 1).

^{2º} Pars est de annuntiatione *in specie* seu de sermone quem cœlestis nuncius ad Mariam habuit (Luc. I).

Hunc autem sermonem convenientissimum fuisse exinde suadetur:—quia 1º oportebat mentem Virginis *attentam reddere* ad mysterii nuntiandi considerationem. Porro huic proposito apprime congruebat nova illa ac insolita salutatio, qua et idoneitas Mariæ ad conceptum, *gratia plena*, et futurus ex divino favore conceptus, *Dominus tecum*, et honor consequens, *benedicta tu etc*, significabatur, queque eo magis attentionem Virginis erigere valebat quo minus prævisa laude ejus humilitatem commoveret.—^{2º} Oportebat illam *instruere* de mysterio Incarnationis in ea implendo; id autem optime egit nuntius prænuntiando conceptum et partum, *ecce concipies etc*, ostendendo prolis conceptæ dignitatem, *hic erit magnus etc*, et demonstrando miranti ac interroganti Virginis singularem conceptionis modum, *Sp. Sanctus superveniet in te etc*.—^{3º} Cum *consensus* Mariæ requireretur, ad eum præstandum inducenda erat: quod factum est tum *exemplo* sterilis Elisabeth divinitus fecundate, tum *ratione* ex omnipotencia Dei desumpta.

1—Cf. Aug. Nicolas, *La Vierge Marie dans l'Evangile*, ch. 21: *Marie, au Cénacle, témoin fondamental de la foi chrétienne*.

Unde statim ut prompto obedientique animo assentiens¹ Maria protulit *fiat* Redemptionis, eo solemnī momento Verbum Dei concepsisse creditur (*Suarez*, Disp. IX, S. 4).

Solv. obj. (cont. 1st p. concl.).—OBJ. 1.—Annuntiationis motivum assignatur consensus a B. V. præstandus. Atqui prædestinatio rerum divinarum completur sine consensu nostro. Ergo.

RESP. C. M.—*D.m* :...i. e. sine arbitrio nostro principaliter causante, *C*; sine arbitrio nostro libere cooperante, *N*.—*Neg. conseq.*

OBJ. 2.—B. Virgo jam Incarnationis fidem, sine qua nulla salus, habebat. Atqui de eo quod certa fide creditur superflua est ulterior instructio. Ergo.

RESP. D. M :...habebat fidem Incarnationis futuræ *absolute*, *C*; futuræ *ex Maria*, quasi humilis Virgo tam alta de se saperet, *N*.—*Trans. m.*—*Neg. conseq.*

OBJ. 3.—Similitudo est inter corporalem Christi conceptionem in utero Virginis et spiritualem conceptionem in anima justa. Atqui iis qui spiritualiter Christum concepturi sunt, conceptio hæc non annuntiatur. Ergo.

RESP. D. M : Similitudo univoca... *N*; analogica, *C*.—*D.m* :...non annuntiatur sub ratione fidei quam quis veram esse sciat, *N*; sub ratione *gratiae* quam quis certo se habere noscat, *C*.—*Neg. conseq.*

ARTICULUS II.

*Utrum annuntiatio fieri debuerit per Angelum
visibiliter apparentem.*

(Art. 2-3)

Evangelica constat narratione (Luc. I, 26) *Gabrielem* angelum fuisse Incarnationis nuntium.—De quo solent theologi inquirere, num pertineret ad supremum angelorum ordi-

1—Cf. *ea hoc consensu quæ pulchre eloquitur S. Bernardus* Hom. IV in Luc. I, n. 8.

nem, vel potius ad ordinem Archangelorum. Verior sententia est (quam tuetur *D. Thom.* a. 2 ad 4), Gabrielem fuisse non de supremo ordine, sed *supremum in ordine Archangelorum*, quoniam (teste *S. Greg.*) archangeli sunt qui summa annuntiant, nec quidpiam majus annuntiadum occurrit quam Incarnationis mysterium. Ecclesia passim Gabrielem nominat *archangelum*.—Modo discutiendum subit, an *conveniens* fuerit annuntiationem fieri per *angelum*, et quidem sub specie corporea.

Conclusio.—OMNINO CONGRUEBAT UT MATRI DEI INCARNATIO NUNTIARETUR PER ANGELUM, VISIBILITER APPARENTEM.

1^a *Pars* ostendit:—1^o ex generali *ordine Providentiae*, juxta quem mediantibus Angelis divina ad homines pervenient: ab hac enim lege nec Dei Mater exinenda erat, quæ, quanquam gratia et dignitate præeminebat cunctis creaturis etiam spiritualibus, tamen quantum ad *statum presentis* *vite* inferior erat angelis.—2^o Ex *ordine humanae reparationis*: quemadmodum enim humana perditio iritum sumpsit ex eo quod diabolus sub serpentis specie primam Eam allocutus est ac decepit; ita congruebat ut naturæ nostræ restauratio exordium duceret ab Angelo Virginem ceu secundam Eam alloquente ac instruente.—3^o Ex *virginitate Matris Dei*; arcta quippe cognatio viget inter puritatem angelicam et puritatem virgineam: idcirco decebat Angelum ad eam mitti quæ, in carne præter carnem vivens, angelicum sectabatur morem.

2^a *Pars* est de adstruenda apparitionis angelicæ convenientia sub *corporali specie*; quod quidem triplici ratione evincitur:—1^o ex *annuntiationis objecto*. a) Venerat enim Angelus nuntiare invisibilis Dei incarnationem, per quam visibilis fieret; ergo conveniens fuit ut ad hujus rei declarationem invisibilis nuntius visibili sub forma appareret. b) Eo magis, quia omnes apparitiones V. T. ad hanc præordinabantur manifestationem, qua Filius Dei in carne visus est.—2^o Ex *dignitate Deiparæ* cui nuncium allatum est; a) quia enim B. Virgo non solum mente, sed et corpore Dei Filium susceptura erat, congruebat ut utroque revelationis genere honestaretur, scil. tum mentali tanti mysterii declaratione, tum sensibili ejus manifestatione per corporalem Angeli visionem. b) Neque huic rationi officit *turbatio* quam

Virgo primum experta est (Luc. I, 29). Hanc enim turbationem et timorem, non ex corporeo Angeli adspectu, sed ex summa Virginis humilitate insolitaque salutatione prodidisseverius statuant plerique S. Scripturæ expositores (*Knobenbauer* in h. l.); quippe "Evangelista non dicit quod turbata fuerit in visione angeli, sed *in sermone ejus*" (S. Th. art. 3. ad 3).—^{3º} Ex rei nuntiatæ certitudine; ea enim quæ simul oculo mentis oculoque corporis nobis innotescunt, certius percipimus quam ea quæ nuda intellectio vel imaginaria visione apprehendimus. Hinc S. Joseph, cui angelus in somnis apparuit, non ita excellentem apparitionem habuit sicut B. Virgo.

QUÆSTIO QUARTA

DE MATERNITATE DIVINA

Non sine proprii diffidentia ingenii (qua se motos ipsi sacri Doctores fassi sunt) contemplandam advehimur præcipuam illam ac eminentissimam omnium prærogativam, veluti Marianæ dignitatis apicem, cujus cætera quæque Virginis munera aut præludia sunt aut accidentia atque consectaria.

Ad tria præcipua capita, totidem articulis pertractanda, doctrinam D. Thomæ revocabimus: neinpe primum dicemus de principio *activo* conceptionis Christi (art. 1); quo consti-tuto, mox gradiemur ad determinandum principium *passi-vum* ejusdem conceptionis secundum quod B. Virgo asseritur tum mater *Christi* (art. 2), tum mater *Dei* (art. 3).

ARTICULUS I.

Utrum et quomodo Sp. Sanctus fuerit principium activum conceptionis Christi.

(Q. XXXII)

In generatione humana distingui solet duplex principium, *passivum* nempe quod subministrat materiam et se tenet ex parte matris, *activum* vero quod materiam illam transmutat, fecundat, determinat et se tenet ex parte patris.—Conceptio activa Christi ita Spiritui S. tribuenda suscipitur ut ei quidem per *appropriationem*, at reapse toti Trinitati, haud secus ac reliqua opera ad extra, conveniat.—Duo in questionem vocantur, *an* et *qua ratione* Sp. Sanctus in Christi conceptione partes activas expleverit.

Conclusio 1^a.—MERITO CONCEPTIO ACTIVA CHRISTI ATTRIBUITUR SPIRITU SANCTO, secundum id quod in *symbolis fidei* legimus.

Nam 1^a expresse id *Scriptura* docet (Luc. I, 35): *Sp. S. superveniet in te* (loco viri quem virgo non cognoscis), *et virtus Altissimi obumbrabit tibi* (sc. Dei omnipotentia, a qua tantum opus dependet, quasi de cœlesti nube occultim te fecundabit.)

2^b Plures præsto sunt *rationes* convenientiæ (quas ex D. Thoma exposuit Leo XIII in *Encycl. Divinum*).—*a*) Harum prima ducitur ex *causa Incarnationis*: Sp. S. est amor subsistens Patris et Filii. Atqui hoc ex maximo Dei amore provenit ut Filius Dei sibi carnem in utero virginali assumeret; nam *sic Deus dilexit mundum ut Filium suum unigenitum daret* (Joan. III, 16). Ergo.—*b*) Item ex *gratitudo assumptionis naturæ arguitur*; quia non ex meritis suis, sed ex solo gratiæ beneficio natura humana in unitatem personæ divinæ assumpta est. Jamvero gratia Spiritui S. attribuitur (1 Cor. XII, 4): *Divisiones gratarum sunt, idem autem Spiritus*.—*c*) Rursus ex *termino Incarnationis* rati sumitur; quia ad hoc terminata est Incarnatio ut conceptus homo esset sanctus et Filius Dei. Porro tum sanctificatio, tum filiatio divina ex Sp. S. repeti solet (Rom. I, 4; Gal. IV, 6). Inde est quod Angelus, nuntiato Sp. Sancti interventu, sub-

dit: *Ideoque et quod nascetur ex te Sanctum, vocabitur Filius Dei.* — d) Tandem *analogia* quædam accedit; quatenus, sicuti penes hominem verbum mentis corde spirituque influente vocaliter se prodit, ita Verbum Dei mediante Sp. Sancto sensibiliter in carne apparuit (C. G. IV, 46). Ergo, licet conceptio Christi *auctoritative* tribuatur Patri mitenti Filium, *terminative* vero sit Filii assumptoris naturam, tamen *in se* seu secundum corporis formationem recte appropriatur Sp. Sancto.

Conclusio 2^a. — SP. SANCTUS IN CONCEPTIONE CHRISTI VIRILEM SUPPLEVIT VICEM, QUIN (probabilius) B. VIRGO QUIDPIAM ACTIVE IN EA EGERIT.

1^a *Pars* ostend. ex D. Th. (C. G. IV, 45): “Manifestum est enim, quum virtus divina infinita sit, et per eam omnes cause virtutem producendi effectum sortiantur, quod quicunque effectus per quamcumque causam productus, potest per Deum absque illius causæ adminiculo produci ejusdem speciei et naturæ. Sicut igitur virtus naturalis quæ est in humano semine producit hominem verum, speciem et humanam naturam habentem, ita virtus divina, quæ tam virtutem semini dedit, absque hujusmodi virtute potest effectus illius virtutis producere, constituendo verum hominem, speciem et naturam humanam habentem.”

2^a *Pars* ut declaretur, præscindendum ducimus a quæstione physiologica de præcisum munere materni limitibus in communi generatione hominum. At (post D. Thom., Cajet., Suarez) tenendum probabilius censemus B. Virginem, etsi ante conceptionem active cooperata sit in præparanda materia quæ foret apta conceptui, tamen in ipso conceptionis actu concursum mere passivum præstisset. *Ratio* est, quia sic *ex una parte* plene salvari videtur essentia maternitatis quæ a paternitate secernitur pro ipsa distinctione passivi et activi principii; *ex altera parte*, melius consultur insigni Deiparae virginitati quæ vel tenuissimam integratatis læsionem abhorret¹.

Adnotanda. — 1^o Ex dictis *falso quis inferret* Christum dici posse *filiū Sp. Sancti*. Etenim id quod de aliquo prædicatur secundum perfectam rationem non est ei tribuen-

1—Vid. ampliora ap. Suarez, Disp. X, Sect. 2.

dum secundum rationem imperfectam. Jam vero Christus est Filius Dei secundum perfectam filiationis rationem; non autem de Sp. S. conceptus et ortus est secundum similitudinem speciei quæ ad perfectam filiationem requiritur. Itaque, licet secundum humanam naturam formatus et justificatus fuerit a Sp. Sancto, non tamen his de causis dici potest filius Sp. Sancti vel etiam Trinitatis.

2º Evidem ex parte materiae conceptio Christi naturalis quodammodo fuit; verum, ex parte principii activi et *simpli*citer loquendo, dici debet miraculosa et *supernaturalis* (Q. XXXIII, a. 4): quæ quidem a Sp. Santo *tria privilegia* obtinuit, nempe quod esset virginalis, peccati debitique originis expers, necnon ad Hominem - Deum terminata (Q. XXXII, a. 4 ad 1).

ARTICULUS II.

Utrum secundum temporalem Christi nativitatem B. Virgo possit dici mater ejus.

(Q. XXXI, 4-5: Q. XXXV, a. 1-3 et 5)

Manichei seu *Phantasiastæ*, *Gnosti* cum *Valentino* et *Apollinaristæ*, quia humanam Christi naturam commentis suis corrumpebant, eadem opinionum perversitate *Mariam Christi matrem* prædicari posse inficiati sunt.—Dogma hoc catholicum tribus veluti doctrinæ gradibus, Angelico duce, confirmabimus.

Conclusio 1º.—APPRISE DEQUIT UT FILIUS DEI DE FEMINA CARNEM ACCIPERET.

Tria id suadent:—1º *nobilitanda tota humanitas*. Hæc enim ex utroque conflatur sexu. Porro præminentia sexus masculini exigebat ut Christus in sexu illo homo appareret. Ne ergo sexus fœmineus, tam turpi dejectione penes ethnicos oppressus, diutius contemneretur, congruum fuit ut de fœmina Messias nasceretur.—2º *Adstruenda Incarn. veritas*, quæ non parum firmatur per ortum ex fœmina maternis legibus

subjecta. Unde *Augustinus* (Ep. 137, al. 3, ad Volusianum, c. 3), conjuncta in Christo divinitatis et humanitatis signa perspiciens, ait: "Ita inter Deum et homines Mediator apparuit, ut in unitate personæ copulans utramque naturam, et solita sublimaret insolitis, et insolita solutis temperaret".—
3º Complenda generationis diversitas. Namque "primus homo productus erat ex limo terræ sine viro et fœmina; Eva vero producta est ex viro sine fœmina. Alii vero nascuntur ex viro et fœmina. Unde hoc quartum quasi Christo proprium relinquebatur, ut produceretur ex fœmina sine viro" (Q. XXXI, a. 4).

Conclusio 2º.—CHRISTO TRIBUENDA EST, PRÆTER AETERNAM, TEMPORALIS QUOQUE NATIVITAS; adeo ut bis natus dici possit.—Est *de fide* secundum *Conc. oecum. V et VI.*

1º Huc spectant sequentes Scripturæ textus (Matth. I, 16 et 20): *De qua natus est Jesus, qui vocatur Christus, et: Quod in ea natum est de Sp. Sancto est.*—Unde *Jo. Damasc.* (III Orth. Fid. c. 7) confitetur "duas Christi nativitates: unam, quæ est ex Patre, aeternam; alteram, quæ est in ultimis temporibus, propter nos."

2º Sic ratiocinabimur.—Licet nativitas proprie attribuatur persone tanquam *subjecto* nascenti, tamen ad naturam comparatur, velut motus et via ad *terminum*. Atqui motus diversificantur secundum diversitatem terminorum. Ergo ubi dari possit in uno subjecto dualitas naturarum generatione acceptarum, ibi duplex nativitas concedenda est. Atqui in Christo duæ sunt naturæ, divina scilicet et humana, quarum unam accepit ab aeterno a Patre, alteram a matre temporaliter sortitus est. Ergo necesse est attribuere Christo duas nativitates, aeternam unam, temporalem alteram.

Conclusio 3º.—B. VIRGO VERE EST MATER CHRISTI.
Prob. 1º ex *Scriptura*.—Expresse enim dicitur Maria mater Jesu (Joan. II, 1), *mater Domini* (Luc. I, 43), *mater pueri* (Matth. I, 20) etc; his autem verbis matrem naturalem significari facile intelligitur ex *conceptionis partusque* vocibus (Luc. I, 31) quæ ad veram maternitatem pertinent.—*Conf.* ex appellationibus *filius hominis* (Matth. VIII, 20; IX, 6), *semen Abrahæ et David* (Gal. III, 16; Heb. II, 16; 2 Tim. II, 8) Christo attributis, quæ correlative involvunt ex parte Mariæ sincerum matris titulum.

2º Ex *Patribus* qui passim hanc veritatem declarant vel indigitant; ita *S. Ambrosius* (de Inst. Virg. l. un. c. 7, n. 48): “Testatur de Cruce Dominus Jesus, et paulisper publicam differt salutem ne matrem inhonoram relinquat.”—Neque obstant *Damasc.* verba (III Orth. Fid. c. 12): “S. Virginem neutiquam *Christiparam* nuncupamus;” quippe sermonem hunc repudiat *Damascenus* non absolute, sed propter *Nestorii* perfidiam qui, *Christi* vocabulo abutens purumque hominem intelligens, volebat B. Virginem sic vocandam *Christiparam* ut nou diceretur Deipara.

3º Ex *matris ratione*.—*a)* Enim vero ea proprie mater alicujus dici solet de qua iste *natus* prædicatur. Atqui ex præc. concl. compertum habemus Christum de Virgine Maria natum esse. Ergo.—*b)* Amplius, ad rationem matris hæc essentialiter pertinent et sufficiunt, nempe ut ministret materiam conceptioni congruam, alvum idoneum, nutrimentum fœtui conveniens, donec conceptam prolem edat in lucem. Atqui “non solum materiam præstitit B. Virgo ad conceptionem Christi, sed materiam convenientem ad producendum aliquid simile in specie, et locum convenientem, et nutrimentum conveniens conceptioni fœtus” (3 S. D. IV, Q. II, a. 1 ad 1)¹. Ergo. *Min.* elucet ex eo quod corpus Christi non est de cœlo allatum, ut *Valentinus* posuit (vid. Disp. II, Q. III, a. 3), sed de Virgine sumptum et ex castissima ejus substantia seu purissimo sanguine, qui potentia caro est, formatum, juxta illud *Damasc.* (III Orth. Fid. c. 2): “Dei Filius...ex castis purissimisque illius (Virginis) sanguinibus carnem anima rationali et intelligentiæ animataam...ipse sibi compegit.” (Q. XXXI, a. 5).

Solv. obj..—OBJ. 1.—Dixit Jesus Mariæ (Joan. II, 4): *Quid mihi et tibi est, mulier?* perinde ac si nihil commune fuerit inter ipsos. Ergo.

RESP. *D. antec*:....i. e. quasi Christus nihil acceperit a Maria, *N*; quatenus normam suarum actionum repeteret, nou a consilio matris terrenæ, sed a suo sibique a Patre data missione, *C*.—*Neg. conseq.*

OBJ. 2.—B. Virgo materiam tantum in generatione Christi ministravit. Atqui hoc nequaquam importat rationem matris; secus lignum esset mater scanni. Ergo.

1—Cf. 3 S. D. III, Q. II, a. 1.

RESP. C. M.—*D.m* :...in productione rerum inanimatarum,
C; etiam in generatione viventium, *N*.—*Neg. consequ.*

OBJ. 3.—Christus ex B. V. miraculose natus est. Atqui miraculosa generatio non sufficit ad habendam maternitatem vel filiationem; non enim dicimus Evat filiam Adæ. Ergo.

RESP. D. M :...omni ex parte, *N*; ex parte principii activi,
C.—*C.d.m*.—*Neg. consequ.*

ARTICULUS III.

Utrum B. Virgo debet dici mater Dei.

(Art. 4-5)

1º Neminem fugit hujus argumenti momentum et gravitas; de quo apposite *S. Thomas* (3 S. D. IV, Q. II, a. 2): "Humanitas Christi et maternitas Virginis adeo sibi connexa sunt, ut qui circa unum erraverit, oporteat etiam circa aliud errare."

2º Hinc "quia *Nestorius* circa humanitatem errabat, aliam esse asserens in Christo humanitatis et divinitatis personam, oportebat quod diceret Virginem non matrem Dei, sed hominis (non *Theotocon*, sed *Christotocon*): quia secundum eum, Deus et homo non est unus Christus. *Quidam* vero moderni errantes dicunt, non posse Virginem dici matrem Dei, ne mater Patris et Sp. S. intelligatur; concedunt tamen eam esse matrem Filii Dei. Sed hi trepidant timore, ubi non est timor" (*ibid.*).—*Nestorianæ* pesti inferto animo restitut *Cyrillus Alex.*, qui duodecim anathematibus in *Conc. Ephes.* sancitis errorem retudit et disjectit¹.

3º Duo nobis præstanda occurunt, unum de *veritate* Maternitatis divinæ, aliud de *pæalta* ejus *excellētia*.

1—Protestantes, etiam dum profitentur Divinitatem Christi, abhorrent titulum *matris Dei* B. Virginis collatum; unde Ch. Hodge, *Syst. Theol.* P. III, ch. 19, hæc scribit: "The deification of the Virgin Mary in the Church of Rome was a slow process. The first step was the assertion of her perpetual virginity... The second step was the assertion that the birth, as well as the conception of our Lord, was supernatural. The third was the solemn, authoritative decision by the ecumenical council of Ephesus, A. D. 431, that the Virgin Mary was the *Mother of God*."—Ab uno disce omnes.

Conclusio 1^a.—B. VIRGO PROPRIE PRÆDICATUR DEI MATER SEU GENITRIX.←Est fidei dogma acceptum non solum ex supradicto *Conc. Ephes.*, sed et ex *Cptano II* de tribus Capitulis (can. 6), ubi legitur: “Si quis abusive et non vere Dei genitricem dicit S. gloriosam semper Virginem Mariam,... aut si quis hominis genitricem vocat eam aut Christi genitricem...et non specialiter et secundum veritatem Dei genitricem eamdem confitetur...A. S.”

1^o Ipsa *Sacra Eloquia*, quidquid contenderit Nestorius, dogma illud exhibent.—Nam “licet non inveniatur expresse in Scriptura dictum quod B. Virgo sit mater Dei, invenitur tamen expresse in Script. quod *J. C. est verus Deus*, ut patet 1 Joan. ult., et quod B. Virgo est mater J. C., ut patet Matth. I (cf. art. præc.). Unde sequitur ex necessitate ex verbis Script. quod sit mater Dei” (a. 4 ad 1).—“Dicitur etiam Rom. IX, 5, quod ex Judæis est secundum carnem Christus, qui est super omnia Deus benedictus in sæcula. Non autem est ex Judæis nisi mediante B. Virgine. Unde ille, qui est super omnia Deus benedictus in sæcula, est vere natus ex B. V. sicut ex sua matre” (*ibid.*).—Item *D. Thomas* (*Comm.*, in Gal. IV, 4) errorem Nestorianum confutat “ex hoc quod dicit Ap. hic, quod *misit Deus filium suum factum¹ ex muliere*; qui enim fit ex muliere, est filius ejus. Si ergo filius Dei est factus ex muliere, scil. ex B. Virgine, manifestum est quod B. Virgo est mater filii Dei” seu Dei ipsius.

2^o Quod ad *traditionem* pertinet, inde a tempore *S. Cyrilli*, Nestorianæ hæreseos debellatori, tam evidens est Ecclesiæ sensus ut supervacaneum foret e scriptis monumentis sententias congerere.—Ipse vero *Cyrillus* (l. De rect. fide) provocat ad quosdam vetustiores ejusdem veritatis testes; quibus addendi sunt *Origenes*, *Dionys.*, *Alex.*, *Methodius*, *Alexander Alex.*, *Athanasius*, *Eusebius*, *Basilius*, *Greg. Naz.*, penes quos (referente *Petavio*, l. V, c. 15) expressa *Dei genitricis* appellatio frequentatur.—Imo ab ipsa ætate apostolica *agivalentia* habemus testimonia, puta *S. Ignatii*, *Justini*, *Irenæi*, *Tertulliani* (ap. *Petavium*, l. cit. vel *Frauzelin*,

1.—Non dicitur *Filius Dei natus, ex muliere, sed factus, ad indicandum principium activum exterius quod est Sp. Sanctus* (*S. Thom. ibid.*).

th. 37); en verba *Ignatii M.* (Ep. ad Ephes. n. 18): "Deus noster J. C. in utero gestatus est a Maria, *juxta dispensationem Dei, ex semine quidem Davidis, Spiritu autem Sancto; qui natus est et baptizatus*" etc.

3º *Ratio invictum argumentum subministrat.*—Ex hoc enim dicitur aliqua mulier alicujus mater, quod eum concepit ac genuit. Atqui vere affirmari potest Deum esse conceptum et natum de Virgine. Ergo. *Min. ostend.* Ex quæstione de communicatione idiomatum (Disp. IV) tria hæc facile colligimus: nempe omne nomen significans in concreto naturam aliquam posse supponere pro qualibet hypostasi illius naturæ; idcirco nomen *Deus*, post Incarnationis unionem factam in persona, posse supponere pro hypostasi Verbi subsistentis in humana divinaque natura; tandem quidquid convenit divinæ humanæve naturæ posse attribui personæ illi sive Dei sive hominis voce significatæ. Atqui, ex una parte, concipi et nasci habent quidein pro *termino formalí* naturam *in qua* quis concipitur et nascitur, at veluti *terminum completum* et subsistentem vindicant personam seu subjectum *quod* concipitur et nascitur; ex altera parte, certum est in ipso conceptionis Christi principio humanitatem fuisse a Verbo assumptam (III, Q. XXXIII, a. 3). Ergo conceptum natumque esse legitime Deo attribuitur, ideoque etc.

Conf.—1º Eatenus negari posset B. Virginem esse matrem Dei, quatenus vel humanitas prius tempore fuisset subjecta conceptioni et nativitati quam homo ille fuisset Filius Dei, ut *Photinus* posuit; vel humanitas non fuisset assumpta in unitatem personæ Verbi divini, ut docuit *Nestorius*. Atqui utrumque erroneum est, prout constat ex dictis (Disp. II, Q. I, a. 2). Ergo.—2º Non repugnat, imo fide traditum est naturam humanam, post Incarnationem, *vere esse Filii Dei naturam*. Ergo nec major repugnantia est quod Deus propter naturam illam assumptam de Virgine matre natus dicatur (cf. *S. Th. Opusc. III, Decl. c. Greccos etc, c. 6*).

Conclusio 2a.—DIGNITAS ET EXCELLENTIA "MATRIS DEI"
QUANTA SIT, TUM ABSOLUTE TUM RESPECTIVE DECLARATUR.

1º *Absolute.*—B. Virgo, utpote Christi genitrix, realem habuit ac inodo retinet *maternitatis relationem* ad Filium Dei unigenitum.—Hac de causa ejus dignitas non inmerito

ad ipsum *ordinem unionis hypostaticæ*, qua Deus factus est homo pertinere censetur; quod *Cajetanus* (*Comm. in II-II*, Q. CIII, a. 4 ad 2) æquivalenter expressit: "Sola (B. Virgo) *ad fines deitatis* propria operatione naturali *attigit*, dum Deum concepit, peperit, genuit et lacte proprio pavit."—Item consequitur maternitatem B. M. V. assurgere usque ad *infinitatem*, uti docet *S. Thomas* (1 S. D. XLIV, Q. I, a. 3): *I, q. 25, a. 6, ad 4^m*. "Dignitas creaturæ, ait, recipit quandam infinitatē ex infinito cui comparatur, sicut humana natura in quantum est unita Deo, et B. Virgo in quantum est mater Dei... et sic humana natura in Christo nobilissima est, quia per unionem comparatur ad Deum et post B. Virgo, de cuius utero caro divinitati unita assumpta est." Hinc *Leo XIII* (*Encycl. Quanquam pluries*, 1829): "Certe matris Dei tam in excelso dignitas est, ut *nihil fieri majus queat*;" sicuti nihil melius Deo, cuius mater est, dari potest.—Amplius colligitur ex mente *D. Thomæ*, prout exponit a Cajet. (l. sup. cit.), Mariam esse *consanguineam* Christo seu Deo ut subsistenti in humanitate ideoque *affinitatem* habere cum Deo ut subsistente in divinitate.—Colligitur quoque ex eodem *Angelico* (*Serm. fest., serm. 33*) B. Virginem novas induisse mirasque *relationes cum Personarum divinarum Trinitate*, nempe cum Patre quocum in eodem Filio communicat, cum Filio cuius dignum facta est habitaculum, cum Sp. Sancto cuius operatione Salvatorem mundi genuit.

2º *Respective*.—a) Imprimis excellentia honoris et dignitatis B. Mariæ tribuenda est præ ipsis Angelis omnibusque justis. Ad rem *D. Thomas* (III, Q. XXX, a. 2 ad 1): "Mater Dei superior erat angelis quantum ad dignitatem, ad quam divinitus eligebatur¹." Idecirco *Leo XIII* (*Encycl. Augustiss. Virginis*, 1897) hæc eloquitur: "Eam ab æterno ordinavit ut Mater Verbi fieret humanam carnem assumpturi; ideoque inter omnia, quæ essent in triplici ordine naturæ, gratiae gloriæque pulcherrima, ita distinxit, ut merito eidem Ecclesia verba illa tribuerit: *Ego ex ore Altissimi prodivi primogenita ante omnem creaturam*²."—b) Praeterea excellentiam

1—Cf. *S. Th. Opusc. VIII, Exp. in Sal. Ang.*

2—*Ecclesiasticus* XXIV, 5.

quamdam *juris et potestatis*, cui Christus secundum humanam naturam aliqualiter¹ saltem fuerit subjectus, liquet in Dei matre esse agnoscendam ex (Luc. II, 51) : *Et erat subditus illis*. Sane cum *Leo P.* (Encycl. *Quanquam pluries*) doceat quod “Verbum Dei Josepho modeste subbesset, dictoque esset obediens, omnemque adhiberet honorem, quem liberi adhibeant parenti suo necesse est,” id non impari motivo de Virgine-Matre intelligendum est. Unide legitur (Encycl. *Octobri mense*, 1891) : “Talem facto suo Jesus Christus ostendit, quum Marie subesse et obtemperare ut matri filius sponte voluit.” — c) Addunt theologi B. Mariae *dominium* competere in universum *mundum*, cuius et domina et regina predicitur. Verba referant *S. Alph. de Ligor.* (Glor. Mar., P. I, c. I, 1) : “Si Christus est Rex universi, Maria etiam totius universi est regina, teste *Ruperto abbate* : Regina cœlorum, totum jure possidens Filii regnum². Et *S. Bernardinus* ait : Tot creaturæ serviunt gloriose Virgini, quot serviunt Trinitati ; omnes nempe creaturæ, sive Angeli, sive homines, et omnia quæ sunt in cœlo et in terra, quia omnia sunt divino imperio subjuncta, gloriose Virgini sunt subjecta³.”

Concludamus igitur titulo *Matris Dei*, præter quem Scriptura pauca admodum de Maria efferunt, mire contineri totam Virginis gloriam, omnium privilegiorum et gratiarum fontem, omnium laudum et elogiorum epitomen⁴.

Solv. obj. — OBJ. 1. — Christus dicitur Deus secundum divinam naturam. Atqui divina natura non accepit initium essendi ex Virgine. Ergo.

RESP. D. M. : ... præcise qua est Deus, C; qua est Deus incarnatus, N. — D. m. : ... nec Deus subsistere incœpit in humana natura, N; ex Virgine corpus traxit in quo subsisteret. C. — *Neg. consequ.*

Tria notentur. — 1^o Ut mulier *vere mater* alicujus dicatur, necesse non est ut totum quod in ipso est, ex se conferat, sed sufficit ex ea *corpus sumi*, prouti patet in generatione hominis, non anima, sed carne tantum ex matre prodeuntis ; in Christo

1—Dico *aliqualiter*, quod est, *de facto* et secundum obsequium *spontaneæ voluntatis*; nam repugnare videtur quod homo-Christus, super omnes creaturas elevatus, creature *stricto jure* subjacuerit.

2—In Cant. l. III.

3—Pro Fest. V. M., S. 5, c. 6.

4—Cf. Contenson, *Theol. mentis et cordis*, l. X, Diss. VI, c. 2, spec. 2.

autem corpus realiter ex B. Virgine processit¹.—^{2º} Nec ad salvandam Virginis maternitatem requiritur ut ipsa unionem hypostaticam effecerit, sed in hoc situm fuit nobile ejus ministerium quod suppeditando materiam naturæ humanæ hanc ad assumptionem veluti deferret.—^{3º} Plane congruit formula D. Thomæ (a. 4 ad 2): “B. Virgo dicitur mater Dei, non quia sit mater Divinitatis, sed quia personæ habentis divinitatem et humanitatem est mater secundum humanitatem.”

OBJ. 2.—Nomen *Deus* communiter prædicatur de Patre, Filio et Sp. S. Atqui B. Virgo non nominatur mater neque Patris neque Sp. S. Ergo.

RESP. *D. M* :...quoniam tamen quandoque supponat pro una persona tantum, *N*; et quandoque ad hunc sensum determinatum trahitur, v. g. cum dicitur “B. Virgo est mater Dei” supponit pro sola persona Filii incarnata, *C*.—*C.m.*.—*Neg. conseq.*

OBJ. 3.—Maternitas et filiatio sunt duo correlativa. Atqui in Christo non datur filiatio temporalis realis, sed rationis tantum. Ergo.

RESP. *D. M* :... quatenus maternitati filiatio utcumque respondeat necesse est, *C*; quasi haec filiatio semper sit realis, *N*.—*D.m.* :... quia suppositum increatum, homo-Deus, non est capax realis relationis ad creaturam, *C*; nec Christus realiter est filius Mariæ, *N*.—*Neg. conseq.*

^{1º} Discrimen est inter nativitatem et filiationem, quod illa, importans quoddam fieri (unde ponitur in prædicamento *passionis*), attribuitur tum personæ *quæ* nascitur, tum naturæ *secundum quam* nascitur; haec vero, scil. filiatio, supponens rem factam ac completam (quam refert ad aliam, prout est in prædicamento *relationis*), directe respicit solam personam. Porro omnis relatio quæ de Deo dicitur ex tempore et per habitudinem ad creaturas, propter eminentiam divini esse, rationis est tantum, non realis². Itaque, licet nativitas temporalis realiter possit tribui Christo, temporalis tamen filiatio nequit in eo esse realis.—^{2º} Attamen id minime vetat quominus vere realiterque Christus asseratur filius Mariæ; quandoquidem realiter corpus a Virgine-matre sortitus est (vid. Q. XXXV, a. 5).

1—S. Thom. Opusc. II, *Compend. theolog.*, c. 222.

2—Cf. *Traict. de Deo*, Disp. III, Q. III, a. 4.

QUÆSTIO QUINTA

DE SUMMA B. VIRGINIS PERFECTIONE

Perfectio hominis, qua homo est et præstat animantibus, duplex recensetur, nempe *intellectualis* et *moralis*: sub utroque adspectu de perfectione Matris Dei in duobus seq. articulis sermocinabimur.

ARTICULUS I.

Quanta fuerit¹ B. M. Virginis sapientia.

Sapientia B. Virginis considerari potest vel quoad *cognitionis perfectionem*, vel quoad *acquisitionis modum*: unde duarum conclusionum materia exponenda offertur.

Conclusio 1^a.—V. MARIA DITISSIMO COGNITIONUM SUPER-NATURALIUM THESAURO ORNATA FUIT, TAMEN PRO TEMPORIS ET STATUS INDOLE AC PROGRESSU.—Dico *cognitionum supernaturalium*; nam non est cur Virgini scientiam pure naturalem concedamus ampliorem ea quæ ad fidei notitiam agendive rationem expediret.

1^a *Pars* nititur testimonio ipso Ecclesiæ (Encycl. *Adjutricem populi*, 1895) Deiparam salutantis ceu *sapientiae divinae Sedem*.

Et vere 1^o præeminentia sapientiae summaque sacrarum doctrinarum ubertas apprime congruebat matri Ejus qui est Dei Verbum Deique sapientia.—Item 2^o fidei scientiæque divinae perfectio intime connectitur cum sanctitate, qua B. Virginem secundum altissimum gradum in terris floruisse mox demonstrabimus: siquidem quo melius Deus divinaque percipiuntur, eo pluris aestimantur majorique caritatis fervore diligi possunt.—Quare 3^o Suarez (Disp. XIX, S. 1), Patrum

sententiis innixus, concludit B. Virginem in Dei cognitione ita profecisse ut Apostolos et theologos omnes superaverit. a) Id a vero minime dissonare convincit *Leo XIII (Encycl. cit.)*, dum ait de Virgine quod fuerit "verissime mater Ecclesiae atque magistra et regina Apostolorum, quibus largita etiam est de divinis oraculis que conservabat in corde suo." b) Nec ferme aliud significat præclara illa appellatio qua penes Patres ipsamque Ecclesiam B. Maria nuncupatur, sc. omnium heresum interemptrix; quippe hoc accipiendum est non solum quatenus Auctorem veritatis generat sanctisque doctoribus sit singulis atque opitulata, verum etiam quod initio præcipua fidei magistra extiterit ipsosque Apostolos, Evangelii præcones, instruxerit.

2^a Pars vix ulla declaratione eget: siquidem, quanquam decebat B. Virginem a principio mysteria fidei quoad substantiam explicite cognoscere, erat quoque humani progressus evolutioni consentaneum ut, quemadmodum in gratia, ita et in sapientia pro tempore et conditione sua proficeret.

Conclusio 2^a. — **MULTIS MODIS B. VIRGO LAUDEM SAPIENTIALEM CONSECUITA EST, NEMPE FIDE DONISQUE INFUSIS, REVELATIONE AC ILLUMINATIONE, CHRISTI COLLOQUIIS, LECTIONE, MEDITATIONE, EXPERIENTIA.** — Singula raptim lustremus.

1^o Nemo negaverit quin Deipara *fidei* perfectissimam *donaque* omnia, gratiæ sanctificanti inseparabiliter sociata, auctore Deo acceperit. — 2^a) Quidquid sit de ejus raptu seu elevatione transitoria usque ad intuendum divinam essentiam (quod interdum contigisse pie credi potest), pro certo habendum est ex doctrina Patrum (ap. *Suarez, l. cit. S. 4*) eam sæpe in vita, ab ipsis pueritiae annis in templo transactis, Angelorum vocibus ac *revelationibus* honestatam fuisse. b) Atque verisimile est mentem ejus ita fuisse supernis *illustrationibus* perfusam ut ipsam scientiam theologicam cum variis conclusionibus in ea contentis miro Dei influxu addisceret. — 3^o Cæterum nemo non videt quantum lucis, sapientiæ, consilii, B. Virgo, aptissimo intellectu instructa totisque viribus intenta, ex diurna *conversatione cum Filio Dei* mutuari potuerit. Nec omittendum quod plures sentiunt, ipsam a Christo jam cœlis potito frequenter ante mortem invisam fuisse. — 4^o In apertis est B. Virginem etiam in sapientia crevisse ex assidua *lectione* ac *meditatione* SS. Scrip-

turarum divinorumque mysteriorum contemplatione; quod his verbis testificatur *Origenes* (Hom. 6 in *Luc.*): "Habebat legis scientiam, et Prophetarum vaticinia quotidiana meditatione cognoverat¹."—^{5^o} Tandem Matri Dei suppeditebat personalis *experiencia* tum *externa* tum *interna*, qua multos effectus, aliis inexploratos, visibles ac invisibles, perciperet plurimumque notitiam, Deo præsertim illuminante, certissimam colligeret.

ARTICULUS II.

Quantus fuerit B. Virginis in sanctitate projectus.

Gratia, qua constat vel fulget sanctitas, alia est *gratum faciens*, alia *gratis data*; gratia quoque *gratum faciens* spectari potest vel *in se* vel *in virtutibus* quorum est radix. Hæ distinctiones opportunitatem præbent trium conclusionum.

Conclusio 1^a. — B. VIRGINIS GRATIA ULTRA CALCULUM CREVIT TUM EX OPERE OPERANTIS, TUM EX OPERE OPERATO.— *Prænotandum* est quod "anima, quantum plus recipit de bonitate divina et lumine gratiae ipsius, tanto capacior efficitur ad recipiendum, et ideo quanto plus recipit, tanto plus potest recipere" (1 S. D. XVII, Q. II, a. 4 in sol.) ad instar fluminis cuius alveus crescentibus undis dilatatur.

1^a *Pars ostend.* — Gratia *ex opere operantis* augetur per modum meriti. Atqui merita B. M. V. perfectissima ac abundantissima fuerunt. Ergo. *Min. prob.*: excellentia meritorum ex tribus dependet, nempe ex bonitate substanciali operum, ex perfectione motivi seu caritatis, et ex frequentia actuum. a) Porro *in primis* B. Virgo utriusque *vite*, tum *contemplativæ*, tum *activæ* perfectionem² assecutus est:

1—Cl. Patrizi (*de Evang.* l. III, diss. 11) varia V. T. loca collegit, quæ B. Virgo in memoria habuisse videtur quando canticum *Magnificat* protulit.

2—Cf. II-II^a, Qq. CLXXXIX-CLXXXII.

quippe et altissimæ contemplationi, nullis unquam passionum motibus impeditæ, operam dedit, et nobilissima opera exercuit circa Dei cultum, Christum educandum, et nascentem Ecclesiam. b) Secundo quanta fuerit ejus, qua ducebatur in singulis actionibus, caritatis excellentia, satis colligitur tum ex gratiæ plenitudine quam initio acceperat, tum ex singulari ejus conjunctione cum amoris Fonte, scil Christo; unde illud Angeli (Luc I, 28): *Dominus tecum.* c) Tertio, B. Maria, cum singulos actus suos in Deum ordinaret, *singulis quoque novum gratiæ gloriæque augmentum meruit,* eoque perfectius quo frequentiores ac flagrantiores divini amoris affectus totam ejus vitam veluti incendebant, pervadebant, sublimabant.

2^a Pars decl.—“Quod B. Virgo magnum gratiæ augmentum *ex opere operato* fuerit consecuta, dubitari non potest, quia non fuit pejoris conditionis quam alii justi, nec sacramenta fuerunt in illa minus efficacia; imo, eo quidem magis quo meliori dispositione illis utebatur” (*Suarez, Disp. XVIII, S. 3, n. 1*). Theologi ut certum tradunt Mariam suscepisse *Baptismum* et *Eucharistiam*, et hanc quidem frequentissime, prout mos erat apud fideles primitivæ Ecclesiæ (Act. II).

Conclusio 2^a.—B. VIRGO VIRTUTES SUMMO GRADU COLUIT.
 1^o “Quamvis in evangelica narratione non multa de Deiparae virtutibus scripta inveniamus, attamen, per hoc quod Maria prædicatur *plena gratiæ*¹, eam omnes virtutes, et quidem in gradu heroico, habuisse sufficienter edocemur” (*S. Alph. Lig., Glor. Mar. P. II, de Virt. Mariæ*).—Sane virtutes infusæ ex gratia veluti e radice prodeunt, ita ut, crescente meritis gratia, virtutes eadem proportione augeantur necesse est: ergo, pro jugi summaque meritorum Virginis progressione, maxima itidem virtutum perfectio in ea agnoscenda est.—Praeclare *S. Alphonsus* (*l. cit.*) de singulis Mariæ virtutibus edisserit, scil. de mirifica ejus *humilitate*, de ejus *caritate* ardentissima in Deum et proximum, de ejus *fide* et *spe* inconcussa, de ejus *castitate*, *paupertate*, *obedientia*, de ejus *patientia* ac *orationis spiritu*.

1—Vid. *supra*, Disp. VI, Q. I, a. 3.

2º Huc pertinent quæ *Leo XIII* solita styli elegantia de *Rosario Mariali* scripsit (*Eneycl. Magnæ Dei Matris*, 1892):
 " Ne ad exempla quæ Christus, homo idemque Deus, de se exhibit sanc quam maxima, nativæ nos imbecillitatis conscientia absterriti deficiamus, una cum mysteriis ejus mysteria Matris sanctissimæ habemus oculis mentis ad contemplandum oblata.—E regia Davidis stirpe est ea quidem progenita, cui tamen nihil jam est reliquum de majorum vel opibus vel amplitudine; quæ vitam in obscuo agit, humili in oppido, humiliore in tecto, recessu ipso et rei familiaris tenuitate econtenta magis quod liberiore potest animo se tollere ad Deum eidemque summo desideratissimo bono penitus adhaerere. Atqui est cum ipsa Dominus, quam complet et beata gratia sua; ipsaque, allato cœlesti nuntio, designatur, ex qua, virtute agente Sp. Sancti, expectatus ille Servator gentium nostra in humanitate sit proditus. Celsissimum dignitatis gradum quanto plus ea miratur et muneri tribuit potenti misericordique Deo, tanto se, nullius sibi conscientia virtutis, deprimit humilius, seque Dei ancillam, ejus dum fit mater, prompto animo edicit et devovet. Quod autem pollicita sancte est, id alacris sancte præstat, jam tum perpetua cum Jesu filio, ad gaudia, ad lacrimas, communione vitæ instituta. Sic tale fastigium gloriæ, ut nemo alias nec homo nec angelus, obtinebit, quia cum ipsa nemo erit virtutum promeritis conferendus; sic eam superi et mundani regni manet corona, quod invicta futura sit *regina martyrum*; sic in cœlesti Dei civitate per æternitatem omnem coronata assidebit ad Filium, quod constanter per omnem vitam, constantissime in Calvaria, redundantem tristitia calicem sit cum illo exhaustura.—Ecce autem in *Maria virtutis omnis* exemplar vere bonus et providens Deus constituit nobis aptissimum "etc.

Conclusio 3º.—QUANAM RATIONE GRATIAE GRATIS DATÆ B. VIRGINI COMPETIVERINT, BREVITER APERITUR.

Uterur verbis *D. Thomæ* (Q. XXVII, a. 5 ad 3): " Non est dubitandum, ait, quin B. Virgo acceperit excellenter donum sapientiæ, et gratiam virtutum, et etiam gratiam prophetiæ, non tamen accepit ut haberet omnes usus harum et similium gratiarum sicut habuit Christus, sed secundum quod conveniebat conditioni ipsius.—a) Sapientiæ enim usum habuit in contemplando, secundum illud (Luc. II, 19): *Maria autem*

conservabat omnia verba hæc, conferens in corde suo; non autem habuit usum sapientiæ quantum ad docendum (i. e. publice, siquidem haud excluditur instructio familiaris), quia hoc non conveniebat sexui muliebri, secundum illud (1 Tim. II, 12): Docere autem mulieri non permitto.—b) Miraculorum autem usus ei non competebat, dum viveret, quia tunc temporis confirmanda erat doctrina Christi miraculis. Et ideo soli Christo, et ejus discipulis, qui erant bajuli doctrinæ Christi, conveniebat miracula facere. Propter quod etiam de Jo. Baptista dicitur (Joan. X, 41) quod signum fecit nullum, ut sc. omnes Christo intenderent.—c) Usum autem propheticæ habuit, ut patet in Cantico quod fecit: Magnificat anima mea Dominum, etc (Luc. I, 46 sqq.). ”

QUÆSTIO SEXTA

DE ASSUMPTIONE ET GLORIA B. M. VIRGINIS

Præsentis instituti non est historiam Virginis Mariæ contextere singulaque ad eam spectantia commemorare : idcirco, pro theologorum dogmaticorum more, statim pergimus ad ea quibus Matris Dei terrestre curriculum absolutum aëterneque coronatum est, nempe ad ejus *assumptionem* (art. 1) et cœlestem *gloriam* (art. 2).

ARTICULUS I.

Utrum B. Virgo paulo post mortem surrexerit et assumpta in cælum fuerit.

1^o Præsupponimus uti certum B. V. Mariam *mortem* obiisse :—*a*) quod imprimis persuadetur ex lege generali qua statutum est *hominibus semel mori* (Heb. IX, 27), quin ullus sit *qui vivet et non videbit mortem* (Ps. LXXXVIII, 49).—*b*) Sane, quanquam olim *S. Epiphanius* (Hær. 78, n. 11) de ea re dubitaverit, communis tamen est *Ecclesiæ sensus*, tum *Liturgiae* (Miss. Assumpt. in secreta), tum *Patrum scriptorum* antiquorum (Andr. Cretens., Joan. Damasc., etc), tum *Doctorum* (S. Thom., Suarez, S. Alph. etc) sententiis significatus, B. Virginem non fuisse exemptam a mortis lege.—*c*) Id autem congruentia non caret; siquidem decebat ut Dei mater Filio insonti, pro nobis emortuo, in hoc ipso debito naturæ persolvendo conformaretur.

2^o Præscindimus a disquisitione anni et *loci*¹ quo Deipara

1—Num *Ephesi*, num *Jerosolymis* (quod probabilius dicunt), acriter disputatur.

obierit; de quibus incertitudo eruditorum aciem exercet.— Unum cum *Suarezio* (Disp. XXI, S. 1, n. 3-4) subjiciendum volumus, vid. quod B. Virgo non tam ex morbo corporali quam *vi divini amoris* vehementisque desiderii rerum cœlestium mortem sustinuerit; quippe fieri potest ut mens tanta efficacia et intensione in his actibus occupetur ut corpus, veluti destitutum, deficiat et impotens fiat retinendæ animæ.

3^o Quæstio est num Virgo Maria, paulo post mortem, surrexit et non solum animâ (Virginis enim animam, mox ubi a corpore discessit, beatam fuisse liquidissime constat), verum etiam corpore ad cœlum migraverit: quod *Novatores* quidam negasse feruntur.

Conclusio.—TENENDUM EST B. MARIAM ANIMA CORPOREQUE FUISSE IN CŒLUM ASSUMPTAM.—Id quidem nec solemniter ab Ecclesia definitum, nec sufficienter *uti dogma* ordinario magisterio propositum habetur; unde nou est de fide; at ex *Suarezio*, Melch. Cano aliisque *Benedictus XIV* (de Festis B. M. V. c. VIII, n. 18) ita certam hanc sententiam affirmat, ut qui eam negaverit temeritatis summe sit notandus.

1^o Arg. probabile sumitur ex verbis *Leonis XIII* (Encycl. *Jucunda semper*, 1894), ubi de Virgine ait: “Cumulato perpetuoque munere causam nostram exoratura est, ad sæculum imminortale progressa. Scil. ex lacrymosa valle in civitatem sanctam Jerusalem evectam suspicimus, choris circumfusis angelicis; colimusque in Sanctorum gloria sublimem, quæ *stellanti diadema* a Filio Dei aucta, apud ipsum sedet regina et domina universorum”: quæ postrema sententia obvio sensu gloriam *corpoream* designat.

2^o Scripturæ nullus est decretorins textus ad corpoream Virginis assumptionem adstruendam; plures tamen (Damasc., S. Thom., S. Alph. etc) huic proposito accominodant illud (Ps. CXXXI, 8): *Surge, Domine, in requiem tuam, tu et arca sanctificationis tuæ*; quasi his verbis prænuntietur resurrectio gloriosa Christi et ejus Matris, quæ fuit Arca N. L.—Nonnulli eidem veritati suadendæ adaptant promissum Christi (Joan. XII, 26): *Ubi sum ego, illuc et minister meus erit*; cum enim B. Virgo officio prorsus singulari

Christo ministraverit, in ea jam promissio illa per assumptionem ipsius corporis completa reputatur.

3º Potior probatio ex traditione ducitur :—*a)* quam primum accipimus ex usu liturgico. Festum enim *Assumptionis*, universe nunc celebratum, ab ipsa antiquitate¹ ortum repetit. Porro non solum secundum animam, sed et secundum *corpus assumptionem* celebrari colligitur ex *Sacramentario S. Greg. M.*,² ex *Joun. Damasc. orat. 2 de Dormitione B. Mariæ* quam Ecclesia breviarii lectionibus inseruit, necnon ex *assumptionis* voce neutiquam adhibita uni animarum gloriæ designandæ.—*b)* Probe scimus nonnullos fuisse veteres qui de assumptione corporeæ Virginis dubitarent, forte ob apocryphas quasdam fabulas circa B. Mariæ obitum sparsas; at gravissimi *Patres* et scriptores tum græci tum latini³ sententiam affirmativam expresse tradunt, e quibus audiatur *Greg. Turonensis* (*Mirac. l. I, de gloria martyrum*, c. 4) : “ Dominus, inquit, susceptum Virginis corpus sacratissimum in paradisum deferri jussit, ubi nunc resumpta anima cum electis ejus exultans æternitatis bonis nullo occasuris fine perfruitur.” *Joan. Damasc.* (*loc. cit.*) plures circa mortem et resurrectionem Deiparae refert circumstantias, traditione acceptas; ex quibus manifeste colligitur suasionem de assumpta in corpore Virgine jam saltem seculo V obtinuisse, quasi a veteribus transmissam. Antiquiora nonnulla citantur testimonia, puta *Athanasi*, *Augustini*, etc., quorum tamen genuinitas a criticis aut negatur aut in dubium vocatur.—*c)* Communis hæc est *Scholarum* doctrina a media aetate ad nostra usque descendens tempora; ait *D. Thomas* (4 S. D. XII, Q. I, a. 3, sol. 3) : “ Quidam (sunt) in plena participatione beatitudinis; et hoc est corpus Christi, quod jam surrexit, sicut ipse Christus, et *B. Virgo*, et hi significantur per partem in calice missam, quia illi inebriantur ab ubertate domus Dei.” Cf. III, Q. XXVII, a. 1.—*d)* Demum, in utra-

1—*Benedict. XIV, op. et l. cit. n. 29.*

2—In *Miss. Assumpt.* occurrit hec oratio: “ Veneranda nobis, Domine, hujus est diei festivitas, in qua S. Dei Genitrix mortem subiit temporalem, nec tamen mortis uxibus deprimi potuit, quæ Filium tuum de se genuit incarnatum.”

3—Vid. *Passaglia, De imm. Deiparae Conc.*, P. III, S. VI, c. VI, a. 1; ubi eruditus auctor testium agmen producit a Modesto Hierosolymitano (sæc. VII) inter Græcos et Gregorio Turonensi (sæc. VI) inter Latinos inde porro.

que, tum Occidentali tum Orientali Ecclesia, *sensus* tum *pastorum*, tum *fidelium*, id ipsum confirmat¹.

4º Succurrunt pleræque *rationes* convenientiæ.—a) Enim vero novimus predestinationem B. Virginis fuisse *prædestinationi Christi intime connexam*; nec ullum ferme est Christi mysterium in quo non habeat Matrem sibi peculiarter sociatam. Atqui mors est velut vitæ resonantia vel echo. Igitur decebat ut in finali exitu ac triumpho Maria Filio per assumptionem conjunctissima maneret.—b) Amplius, corruptio corporis post mortem *pœna* est peccati. Atqui Maria immaculata neque actualis neque etiam originalis peccati labem incurrit. Ergo etc; hanc rationem proiert *D. Thomas* (*Exp. in Salut. Ang.*): “Tertia (pœna) fuit communis viris et mulieribus, scil. ut in pulverem reverterentur. Et ab hoc immunis fuit B. Virgo, quia cum corpore assunta est in cœlum. Credimus enim quod post mortem resuscitata fuerit, et portata in cœlum.”—c) Præterea per Incarnationem hæc Virginis ad Christum habitudo constituta est ut, Filio Dei in ejus alvum recepto, caro Mariæ *Jesu caro* quodammodo evaderet. Atqui sacrosancta caro Jesu, citra omnem corruptionis nævum, resurrectionis et ascensionis gloriam brevi consecuta est. Ergo et caro Virginis etc.—d) Rursus, Christus passione sua triumphum de morte exaltationemque promeruit: ergo et B. Virgo, merito *compassionis* in cruce, assumptionem post Filium sibi comparasse censenda est.—c) Tandem (uno verbo dicam) gloria corporeæ assumptionis Deiparam apprime decebat, ne quidpiam ejus gratiarum et privilegiorum *plenitudini* deesset².

Mirum igitur non est quod nusquam terrarum ulla pars virginei corporis Mariæ fidelium venerationi proposita habeatur.

1—Fere bis centum patres *Conc. Vaticanani* postularunt ut assumptione corporeæ B. M. V. solemniter definiretur. Inter alia, dicebant: “Nisi firmissima Ecclesiæ fides quoad B. Virginis assumptionem dici velit levis nimis credulitas, quod vel cogitare impium est, procul dubio eam a traditione divino-apostolica, i. e. a revelatione ortum habere firmissime tenendum” (*Collect. Lac. VII*, 868; ap. C. Pesch, de B. V. M.).

2—Vid. plura egregie exposita ab Aug. Nicolas in op., *La Vierge Marie d'après l'Evangile*, ch. 22.

ARTICULUS II.

Quanta sit gloria Deiparæ in cælis.

Gloria cœlum ita distingui solet ut una *essentialis*, altera vero *accidentalis* dicatur.—*Essentialiter* sumpta, beatitudo reponitur in actuali divinæ essentiae contemplatione, quam amor, delectatio vel quietatio in Summo Bono quasi proprietas *essentialis* consequitur, eaque ex animæ conjunctione cum corpore gloriose majorem perfectionem obtinet. Ad hanc *essentialē* gloriam animæ Christo desponsatae tres veluti *dotes* per modum ornatuum ac dispositionum concurrunt, nempe dos *visionis* seu gloriæ lumen disponens ad videndum, dos *comprehensionis* seu idem lumen prout viam parat Deo possidendo, dos *fruitionis* seu habitus charitatis patriæ (cf. I-II^a, Q. IV; Suppl. Q XCV).—Gloria *accidentalis* ex iis constare intelligitur quæ, quamvis non sint de necessitate beatitudinis, eam tamen quadantenus perficiunt, cuiusmodi sunt quædam revelationes et gaudia, aureolæ, peculiaris corporis decor et bona externa.

Conclusio 1^a.—GLORIA ESSENTIALIS B. M. VIRGINIS GLO-
RIAM OMNIUM BEATORUM, SIVE HOMINUM, SIVE ANGELORUM,
LONGISSIME EXCEDIT.

1^o *Prob. concl.:—a) auctoritate.* *S. Thomas*, commen-
tans Ps. XLIV, 11, *Astitit Regina a dextris tuis in vestitu
deaurato*, ait: “Potest exponi totum hoc de B. Virgine, quæ
regina et mater regis est, quæ astat super omnes choros in
vestitu deaurato, i. e. deaurata divinitate; non quod sit Deus,
sed quia est mater Dei.”—*Praeclara* sunt verba *S. Anselmi*
(*De excell. Virg. M. c. 8*): “Quid amplius dicere possum,
Domina? immensitatem quippe gratiæ et gloriae et felicitatis
tuae considerare incipienti, et sensus deficit et lingua fatiscit.”
Et *S. Bernard.* (*Serm. 1 in Assumpt. n. 4*): “Quantum
gratiæ in terris adepta est *præ cæteris*, tantum et in cœlis
obtinet *gloriæ singularis*... Felix plane Maria, et multipliciter
felix, sive cum excipit Salvatorem, sive cum a Salvatore
suscipitur.” Plures omitto (ut *S. Ephr.*, *S. Andr. Cret.*,
S. Pet. Dam., *B. Alb. Magn.* etc) qui docent Mariam, ceu
solem inter astra, *incomparabiliter* reliquos sanctos gloriæ
antecellere¹.

1—Cf. *Suarez*, Disp. XVIII, S. 4 et Disp. XXI, S. 3;—*S. Alph. Lig. Glor. Mar.*, Disc. VIII, P. 2.

b) Ratione. Gloria cœlestis cum perfectioni gratiæ, tum quoque quantitati meritorum commensuratur, secundum illud (Rom. II, 6): *Reddet unicuique secundum opera ejus.* Atqui, sicuti plenitudine gratiæ, ita et meritorum prægrandi ac indefinito progressu usque ad consummatam sanctitatem B. Virgo eminuit. Ergo.—*Arg. conf.* ex D. Thoma (Serm. 58 in Assumpt.): “Fuit exaltata super choros angelorum et super omnes sanctos, nec mirum si est exaltata sicut angeli, patriarchæ, etc; *a)* habuit enim meritum angelorum, angelice vivendo. *Tieronymus*: In carne preter carnem vivere, non terrena vita est, sed cœlestis. Idem: Virginitas soror est angelorum. *b)* Habuit etiam meritum prophetæ, prophetando. Luc. I: *Beatam me dicent omnes generationes;* vidit enim spiritu propheticō, et prophetavit quod debebat beatificari ab omnibus gentibus, et quod omnes gentes debebant recipere Filium Dei et suum. *c)* Habuit meritum apostolorum et evangelistarum, docēn̄do. Multa enim scripta sunt et prædicata, quæ non potuerunt sancti nisi per revelationem ejus scire, sicut de ingressu angeli in conceptione, et aliis pluribus. *d)* Habuit meritum martyris, mortem crucis cum Filio patiendo. Luc. II: *Et tuam ipsius animam pertransibit gladius.* *e)* Habuit meritum confessorum, devote Domino confitendo. Luc. I: *Magnificat anima mea Dominum.* *f)* Habuit meritum virginum, inchoando virginitatem et conservando. Luc. I: *Ingressus est angelus Gabriel ad Mariam Virginem.* Et sicut habuit meritum omnium et amplius, ita congruum fuit ut super omnes ponatur.”

2º Decl. concl:—Quod enim ad *intensivam* gloriæ Marianæ perfectionem attinet, B. Virgo clarius Deum resque in Deo videt, ferventius eum diligit, abundantius eo fruitur quam quilibet sanctus.—Quantum ad perfectionem *extensivam*, *a)* non solum pro objecto beatifice visionis habet quæ sunt omnibus beatis communia, ut mysteria fidei rerumque naturalium genera et species; *b)* at quoque *multo plura* attingit tum *possibilita*, tum *realia*: siquidem quanto intensius supremam omnium causam, nempe Deum, perscrutatur, tanto plures effectus pluraque scibilia inibi contenta deprehendit, ita ut ad extrema usque veritatis confinia quodammodo pertingat.

Conclusio 2º.—ETIAM GLORIA ACCIDENTALIS B. M. VIRGINIS PRÆCELLENTISSIMUM GRADUM SIBI VINDICAT.

Inductione procedamus.—1º Cum Maria in Redemptionis opere Christi adjutrix sit mundique regina, quidquid ad hominum salutem in utroque ordine naturæ et gratiæ utrumque referatur, id contueri censenda est, vel in Verbo, vel extra Verbum, quatenus pro opportunitate sui ministerii varias *revelationes* de contingentibus ac liberis a Christo accipiat (cf. Suppl. Q. XCII, a. 3); ex quibus profecto nova *gaudia* enascuntur.

2º Non immerito ei tribuuntur tres *aureolæ*, scil. *Virgini*, *Doctorum*, ac *Martyrum*, correspondentes tribus hominum statibus, in quibus maxime contra carnem, diabolum et mundum decertatur (Suppl. Q. XCVI). Hæ enim aureolæ sunt accidentalia ac privilegiata quedam premia seu gaudia de operibus excellentioribus, acceptis secundum *genus operum* et victoriam de tribus præcipuis hostibus reportatam. Porro ex superius dictis compertum habemus Dei Matrem fuisse et intemeratum virginitatis florem, et præcipuam fidei magistram (saltem *privatam*); imo nec ei defuit corona *martyrii eminenter*¹ sumpti, in quantum poenas pro Christo Filio toleravit ipsa morte acerbiores.

3º Nihil dubii est quin *corpus* Deiparae, præter communes corporum gloriosorum dotes, peculiari quodam ac *ineffabili splendore* refulgeat; ad quod significandum sequentia Scripturæ verba usurpari solent (Apoc. XII, 1): *Signum magnum apparuit in cœlo: Mulier amicta sole, et luna sub pedibus ejus, et in capite ejus corona stellarum duodecim.*

4º Prædictis adjungenda sunt *bona externa* quibus B. Virgo excellenter fruitur: scil. *honor* et *laus* tum in electorum societate tum in militante Ecclesia ei impensa, juxta textum allegoricum qui de ea canitur: *Tu gloria Jerusalem, tu latitia Israël, tu honorificentia populi nostri* (Judith. XV, 10); imperium seu *principatus*, quo potitur in universas creaturas; etc, etc.

1—Intellige *eminenter virtualiter*; nam ad martyrium *formaliter* acceptum S. Thomas (II-II^o, Q. CXXIV, a. 4) mortem requirit; unde sibi objectis quibusdam sententiis, puta Hieronymi: "Recte dixerim quod Dei Genitrix virgo et martyr fuit, quamvis in pace vitam finiverit," respondeat has auctoritates aliasque similares loqui de martyrio per similitudinem.

QUÆSTIO SEPTIMA

DE MEDIATIONE B. M. VIRGINIS

Sermonem de gratiis ac privilegiis Dei Matris, quantum sinebant instituti nostri limites, absolvimus; proximum est ut officia ei erga homines maternitatis titulo devoluta disquiramus, quæ communi *mediationis* voce significantur.

Hoc quidem sublime munus ita B. Virgo exercuit ut "quæ sacramenti humanæ redēptionis patrandi administra fuerat, eadem gratiæ ex illo in omne tempus derivanda esset pariter administra, permissa ei poene immensa potestate" (Leo XIII, Encycl. *Adjutricem populi*, 1895). Quocirca Mediatrix nostra opportune spectabitur primo ut *Coredemptrix* (art. 1), dein ut efficax in dispensandis gratiis *Conciliatrix* (act. 2).

ARTICULUS I.

Utrum B. Virgo cooperata sit humanæ redēptioni.

In quæstionis limine cavendum ne confusio fiat; quæritur enim, non an B. Virgo fuerit causa *efficiens immediata* gratiæ et redēptionis nostræ (quod solius Dei ac Christi est), sed utrum aliqualiter, saltem mediate, vel morali modo, humanae sit redēptioni cooperata.

Conclusio.—VIRGO DEIPARA ABSQUE DUBIO COOPERATA EST REDEMPCTIONI HUMANI GENERIS, ITA UT JURE "COREDEMPTRIX" NUNCUPETUR;—id tum generaliter tum specialiter manifestum fiet.

Prob. generaliter.

Et 1^o "certissime, ait Leo XIII (Encycl. *Fidentem piumque*, 1896), perfecti Conciliatoris nomen et partes alii nulli conveniunt quam Christo, quippe qui unus, homo idem et Deus, humanum genus summo Patri in gratiam restituerit... At vero si nihil prohibet, ut docet Angelicus (III, Q. XXVI,

a. 1), *aliquos alios secundum quid dici mediatores...cujusmodi sunt angeli sanctique cælites, prophetæ et utriusque Test. sacerdotes, profecto ejusdem gloriæ decus Virgini excelsæ cumulatius convenit. Nemo etenim unus cogitari quidem potest qui reconciliandis Deo hominibus parem atque illa operam vel unquam contulerit vel aliquando sit collaturus.”*— Ideo 2^o traditionis ore celebratur quasi *origo salutis, renovatio humani figmenti, salutaris omnium expiatio, maledicti solutio et condemnationis expultria, veneni medicina, Satanae et peccati victrix, communis redemptrix*¹.—3^o Id congruebat, ut quemadmodum Eva fuerat humæni casus principium, ita Maria nostræ reparationis exordium ac causa quadtantenus existeret, juxta illud *Innoc. III* (Serm. 2 in Ass.): “Quod damnavit Eva, salvavit Maria.”

Prob. specialiter.

Sane 1^o donando hominibus *Redemptori* Maria operam dedit: a) tum *precibus*, quibus adventum Messiae impetravit atque quodammodo acceleravit (S. Alph., *Glor. Mar.*, Disc. III, p. 2); b) tum *consensu* quem Incarnationi adhibuit; nam “ipsa ad homines in sempiternum ruentes exitium Servatorem adduxit, jam tum scil. quum pacifici sacramenti nuntium, ab Angelo in terras allatum, admirabili assensu, loco totius humanæ naturæ², exceptit: ipsa est de qua natus est Jesus, vera scil. ejus Mater, ob eamque causam digna et peraccepta ad *Mediatorem Mediatrix*” (Leo XIII, *l. cit.*); c) tum denique geniti *Fili lactatione* et educatione.

2^o Ipsi *perpetrandæ Redemptioni* Maria adsociata est. a) Quod ita declarat *Leo XIII* (Encycl. *Jucunda semper*, 1894): “Quum se Deo vel ancillam ad matris officium exhibuit vel totam cum Filio in templo devovit, utroque ex facto jam tum *consors* cum eo extitit laboriosæ pro humano genere *expiationis*; ex quo etiam, in acerbissimis Filii angoribus et cruciamentis, maxime animo condoluisse dubitandum non est. Ceterum, præsente ipsa et spectante, divinum illud sacrificium erat conficiendum, cui victimam de se generosa aluerat; quod in eisdem mysteriis postremum flebiliusque observatur:

1—Ap. Passaglia, *De imm. Deiparae V. conc.*, S. VI, c. IV, a. 4.—
Cf. Petavius, *de Incarn.*, l. XIV, c. 9.

2—S. Th. III, Q. XXX, a. 1.

*stabat juxta crucem Jesu Maria Mater ejus, quæ tacta in nos caritate immensa ut susciperet filios, Filium ipsa suum ultrò obtulit justitiae divinæ, cum eo commoriens corde doloris gladio transfixa^{1.}"—b) Accedit quod Maria, *præsuppositis* jam condignis Christi meritis (quibus nobiscum redempta est), "ipsa sua merita (scil. congrua) Deo pro salute omnium hominum obtulit, et Deus ea ex benevolentia conjunctim cum meritis Christi acceptavit" (S. Alph., Disc. II, p. 1).*

3º Fundandæ Ecclesiæ B. Virgo partes non mediocres adhibuit, ac reapse velut Coremptrix hominum se gessit: "hujus singularis muneris et laboriosi partes ea suscepit oblitusque magnanima, consecratis in Cenaculo auspicis. Christianæ gentis primitias jam tum sanctimonia exempli, auctoritate consilii, solatii suavitate, efficacitate sanctorum precum admirabiliter fovit; verissime quidem *mater Ecclesiæ* atque magistra et regina Apostolorum" etc (Encycl. *Adjutricem populi*).

ARTICULUS II.

Utrum B. Virgo vices Conciliatricis in procuranda hominum salute impleat.

Redemption humana spectari potest vel *in se* et absolute, vel relative et secundum actualem meritorum Christi *applicationem*.—Art. præc. diximus de eo quod Virgo Maria ad hominum salutem absolute inspectam præstiterit; modo indaga venit ejus cooperatio in applicandis Redemptions fructibus: quod quidem facili negotio efficiemus, ostendendo Deiparæ erga homines competere generosæ *matris* affectum divinæque *thesaurariae* potestatem.

1.—Septem numerantur B. Virginis *dolores* quos Ecclesia festo celebrat, nempe *prophetia Simeonis, fuga in Ægyptum, amissio Jesu in templo, conspectus Filii ad mortem gradientis, mors ipsa Christi, perforatio lateris a lancea corporisque de Cruce susceptio, demum tanti Filii sepultura*; de quibus pie disserit S. Alph. Lig. (*Glor. Mar.*, P. II).—Cf. quoque Aug. Nicolas, *La V. Marie d'après l'Evang.*, ch. XIX: *Marie au pied de la croix*.

Conclusio 1^a.—JURE OPTIMO MARIA VIRGO MATER CHRISTIANORUM, ET QUIDEM AMANTISSIMA, PRÆDICATUR.—Profecto non agitur nisi de maternitate *spirituali* et *analogica*, quæ tamen veræ similitudinis fundamento nititur.

1^a *Pars 1^o* suadetur *auctoritate Leonis XIII.*—*a)* Etenim (Encycl. *Adjutricem populi*) Mariam matrem esse nostram ex titulo *donationis* legula sic adstruit: “Eximiae in nos caritatis Christi mysterium ex eo luculenter proditur, quod moriens Matrem ille secundum Joannui discipulo matrem voluit relictam, testamento memori: *Hoc filius tuus*¹. In Joanne autem, quod perpetuo sensit Ecclesia, designavit Christus personam humani generis, eorum in primis qui sibi ex fide adhaerescerent.”—*b)* Id ipsum (Encycl. *Quanquam pluries*) ex titulo *generationis* duplice ratione evincitur: “Virgo sanctissima quemadmodum J. C. genitrix, ita omnium est christianorum mater, quippe quos ad Calvariæ montem *inter supremos Redemptoris cruciatus generavit*; itemque J. C. tanquam primogenitus est christianorum, qui ei sunt adoptione ac redēptione *fratres*.”—*c)* Unde accipimus tertium maternitatis Mariae titulum, scil. titulum *spontaneæ adoptionis* ex qua nos immenso amore ceu filios fovet (Encycl. *Magnæ Dei Matris*): “Quando natura ipsa nomen matris fecit dulcissimum, in eaque exemplar quasi statuit amoris teneri et providentis, lingua quidem haud satis eloqui potest, at probe sentiunt piorum animi quanta in Maria insidiat benevolentis actuosæque *caritatis flamma*, in ea nimur quæ nobis, non humanitus, sed a Christo est mater.”

2^o *Ratione conf.* proposita veritas; quia illa mulier, per analogiam, hominum veluti mater habenda est quæ eis præstítit *vitam spiritualem*, hancque vitam jugiter alit ac defensit. Atqui Christi genitrix, pariendo Auctorem gratiæ eumque Deo Patri ad hominum salutem offerendo, causa fuit quamobrem humanum genus vitam supernaturalem consequeretur, atque (ut ait *S. Thom.* III, Q. XXVII, a. 5 ad 1) “quodammodo gratiam ad omnes derivavit;” quam vitam et gratiam in fidelium cordibus multiplici ac efficaci influxu auget, fovet, tuetur (ut in concl. seq. patebit). Ergo.

2^a *Pars* cursim indicabitur; quam *S. Alphonsus* (Glor. Mar., c. I, 3) egregie declarat, assignans *a priori quatuor motiva* præcipua vehementissimi Mariæ amoris in homines:—1^{um} est immensa ejus caritas erga Deum; nam *hoc mandatum habemus a Deo, ut qui diligit Deum, diligat et fratrem suum* (1 Joan. IV, 21);—2^{um} est Christi voluntas ac veluti testamentum quo de summo crucis nos ceu filios tantæ matris sollicitudini commisit;—3^{um} est maxima dolorum intensitas, inter quas, Filio compatiens, nos genuit;—4^{um} tandem in eo situm est, quod Maria apprime novit Filiū pientissimum ideo sanguinem suum effudisse ut homines a perditionis via revocaret.

Brevitatis causa, prætermittimus arg. *a posteriori* seu desumptum *ex historia maternorum beneficiorum quibus B Virgo sumnum erga homines amorem, per tot jam sæculorum spatia, tam præclare demonstravit: quis nostrum non posset grato commotoque animo effari quasi sua Leonis XIII veritatis* (Encycl. Mag. Dei Matris): “Ejus bonitatis in Nos beneficentiaeque complura et splendida testimonia, quæ summa cum gratia nec sine lacrimis recordamur, eamdem in nobis pietatem et foverunt amplius et vehementius incendunt”?

Conclusio 2^a.—B. VIRGO HABENDA EST TANQUAM UNIVERSALIS GRATIARUM DEI THESAURARIA AC DISPENSATRIX; CUJUS INFLUXUS IN OMNES, ETIAM DESPERATOS, HOMINES EFFICACISSIMUS EST.

Prænotetur a) Mariam dici thesaurarium gratiarum, non ex virtute propria, sed ex *divino beneplacito*.—*b)* Hoc autem sibi commissum munus exercet per modum *intercessionis*, cui et ipsæ aliorum sanctorum intercessiones subordinantur; non vero ex se gratiam efficit aut efficere creditur.—*c)* Itaque intercessio Mariæ ad salutem *necessaria* profitenda est, non absolute, sed *hypothetice* et moraliter, seu supposita *lege* quam Deus liberrime in honorem Deipara constituit.

1^a *Pars* concl. prob:—1^o *auctoritate Ecclesiæ*. *a)* Sic enim loquitur Leo XIII (Encycl. Octobri Mense): “Ex quo (sc. consensu Virginis in Incarnationem) non minus vere proprieque affirmare licet *nihil prorsus* de permagno illo omnis gratiæ thesauro, quem attulit Dominus, siquidem *gratia et veritas per J. C. facta est* (Joan. I, 17), *nihil nobis, nisi per Mariam, Deo sic volente, impertiri*; ut, quo modo ad summum Patrem,

TIB.

nisi per Filium, nemo potest accedere, ita fere, nisi per Mariam, accedere nemo possit ad Christum."—*b*) "Id quoque S. Ecclésia nobis manifestare ostendit (ait S. Alph. Disc. II, p. 1), quando divinam Matrem honorat applicando ipsi verba (Eccli. XXIV, 25): *In me gratia omnis viæ et veritatis.* Dicitur *viæ*, quia viatoribus omnes gratiæ per Mariam dispensantur; *veritatis*, quia per Mariam lux veritatis diffunditur. *In me omnis spes vitæ et virtutis;* *vitæ*, quia in terris vitam gratiæ et in cœlis vitam gloriæ per Mariam nos esse adepturos speramus; *virtutis*, quia per Mariam virtutes acquiruntur, speciatim virtutes theologieæ, quæ sunt SS. virtutes præcipuae. *Ego mater pulchræ dilectionis, et timoris, et agnitionis, et sanctæ spei* (*ibid.* 24); scil. Maria sua intercessione dona divini amoris, sancti timoris, cœlestis lucis et sanctæ fiduciae servis suis impetrat." Recole *liturgica* pleraque de Virgine eloquia.

^{2º} Traditione sanctorum.—In primis succurrit S. Ephrem¹ Mariam ita compellans (Serm. de V. M. laudibus): "Ave Dei et hominum mediatrix optima. Ave totius terrarum orbis conciliatrix efficacissima ... Ave porta cœlorum et scala ascensusque omnium. Ave portarum cœlestis paradisi reseramentum. Ave nostra consolatrix... Ave portus tutissime in hac vita navigantium. Ave animæ nostræ spes fida et optima" etc. Item S. Germanus Cptanus (Or. 2 in Dormit. B. M.V.): "Nemo est, o sanctissima, qui Dei cognitione repleatur, nisi per te; nemo est qui salvetur, nisi per te, o Deipara; nemo qui donum ex misericordia consequatur, nisi per te." Et S. Bernardinus Sen. (Pro fest. B. M. V., S. VI, de Annunc. a. 1, c. 2): "Omnis gratia quæ huic sæculo communicatur tripli-cem habet processum. Nam a Deo in Christum, a Christo in Virginem, a Virgine in nos ordinatissime dispeusatur." Consentient SS. Basil. Seleuc., Augustinus, Petrus Dam., Bernardus, etc².—Huc spectant verba Angelici (Opusc. VIII, *Exp. in Sal. Ang.*): "Magnum est in quolibet sancto, quando habet tantum de gratia quod sufficit ad salutem multorum; sed quando haberet tantum quod sufficeret ad salutem omnium hominum de mundo, hoc esset maximum, et hoc est in Christo et in B. Virgine."

1—*Opera omnia*, t. III (ed. Vossii).

2—Cfr. Petavius, *de Incarn.* l. XIV, c. 9.

3º Ratione.—*a)* Quoddam enim veluti *præludium* muneris, quo B. Virgo ad dispensandas gratias condecorata est, perhibetur ex historia evangelica. “Nam et dum privatam in terris vitam egit (Christus), ipsam adscivit *utriusque prodigiæ administratam*, quæ tunc primum patravit: alterum *gratiæ*, quod ad Mariæ salutationem exultavit infans in utero Elisabeth; alterum *naturæ*, quo aquam in vinum convertit ad Canæ nuptias” (Leo XIII, Encycl. *Augustissimæ V. M.*).—*b)* Ex *Deiparæ* et *Coredemptricis* titulis plana colligitur congruentia quod B. Virgo in bona Filii ac merita Redemptoris summam quamdam, etsi subalternam, jurisdictionem exerceret. “Revera, ait Leo XIII (Encycl. *Supremi Apostolatus*, 1883), primævæ labis expers Virgo, adlecta *Dei Mater*, et hoc ipso servandi hominum generis consors facta, tanta apud Filium gratia et potestate valet, ut majorem nec humana nec angelica natura assecuta unquam sit, aut assequi possit.”

4º Praxi liturgiæ et artis.—*a)* Vix enim fideles ulla ex se Ecclesiæ ore preces ad Deum effundunt quin eis Mariæ invocationem adsocient, ut patet ex *Salutatione Angelica* tam arcta Orationi Dominicæ annexa.—*b)* Similiter *opera artis sacræ*; Sculpturæ, Picturæ, Architecturæ, Deipara in Filio fere inseparabiliter conjunctam exhibent; quo symbolo non obscure significatur veritas de universali Mariæ mediatione.

2º Pars concl. ex eo collustratur quod Maria *scit, vult, potest* quidquid ex Dei consiliis hominum saluti expediat.—*1º* De ejus *scientia* testatur laudatus Pontifex (Encycl. *Magnæ Dei Matris*): “Multo illa magis nostra omnia habet cognita et perspecta; quibus ad vitam indigeamus præsidiis, quæ impendeant publice privatim pericula, quibus in angustiis, in malis versemur, quam in primis sit acris cum accrimis hostibus de salute animæ dimicatio; in his autem aliisve asperitatibus vitae, multo ipsa potest largius et vehementius exoptat solatium, robur, auxilia omne genus carissimis filiis afferre.” (Cf. quæst. præc. art. 2).

2º Salutiferam Virginis *voluntatem* et misericordiam plura demonstrant.—*a)* *Mater* est hominum affectuissima: eequid eis non providebit?—*b)* *Regina misericordiæ traditionis* voce appellatur (ap. S. Alph., *Glor. Mar. P. I.*, c. 1). Apposite S. Thomas (Exp. in sept. Ep. can., præf.): “Virgo

T.B.

B... quando Filium Dei in utero concepit et postmodum peperit... dimidiā partem regni Dei impetravit, ut ipsa sit *regina misericordiæ*, cuius filius est *rex justitiae*.”—c) *Eofine Mediatrix* Deum inter hominesque constituta est ut, Christi justitiam metuentes, ad Matrem benevolam peccatores etiam *desperati* confidentius accederent (cf. Encycl. *Octobri Mense*).—d) *S. Alphonsus* (*op. cit. P. I.*), commentans *Salve regina*, fuse eruditeque, collectis plenisque Patrum et Sanctorum sententiis, maternam B. V. clementiam et sollicititudinem maxime erga peccatores describit; ad quod Alphonsianum opus lectorem remittimus.

3º *Potestas* Mariæ tanta est ut merito *omnipotentia supplex* nuncupetur secundum illum versiculum: “Quod Deus imperio, tu prece, Virgo, potes.”—a) *Luculenta* sunt traditionis suffragia: *Eadmerus*, monachus Cantuar. (De excell. V. M., c. 12): “Tantummodo velis salutem nostram, clamat ad Virginem, et vere nequaquam salvi esse non poterimus.” *S. Petr. Dam.* (In Nativ. B. M., S. 1): “Nihil tibi impossibile, cui possibile est *desperatos* in spem beatitudinis relevare.” Et *S. Bernard. Sen.* (P. fest. V. M., S. V, de Nativ. c. 6): “Imperio Virginis omnia famulantur, etiam Deus¹.”—b) Ratio tantæ auctoritatis posita est in dignitate *Dei Matris et Mediatrixis* gratissimæ; quod perspicue tradit *Leo XIII* (Encycl. *Jucunda semper*): “Eam, ait, *Matrem Dei* invocamus; ex qua dignitate excelsa quid non *pro nobis peccatoribus* certissime exposcat, quid non speremus in omni vita et in agone spiritus ultimo?” (*Ibid.*, in princ.): “Quod Mariæ præsidium orando quærimus, hoc sane, tanquam in fundamento, in munere nititur *conciliandæ* nobis *divinæ gratiæ*, quo ipsa continenter fungitur apud Deum, dignitate et meritis acceptissima, longeque cœlitibus sanctis omnibus potentia antecellens.”

1—Id sane intelligendum est, quatenus unum Mariæ desiderium. *imperi* efficaciam penes Deum sortitur.

QUÆSTIO OCTAVA

DE CULTU B. VIRGINIS MARLÆ

Extremæ huic quæstioni præfatio detur a Leone XIII sic exordiente Encycl. 1892 de Rosario: "Magnæ Dei matris amorem et cultum quoties ex occasione liceat excitare in christiano populo et augere, toties Nos mirifica voluptate et lætitia perfundimur, tanquam de ea re quæ non solum per se ipsa præstantissima est multisque modis frugifera, sed etiam cum intimo animi Nostri sensu suavissime concinit. Sancta nimirum erga Mariam pietas, semel ut pene cum lacte suximus, crescente ætate, succrevit alacris valuitque in animo firmius: eo namque illustrius menti apparebat quanto illa esset et amore et honore digna, quam Deus ipse amavit et dilexit primus," etc.

Duo tractabimus: *an et qualiter Maria colenda sit.*

Conclusiones

ARTICULUS I.

Utrum cultus aliquis sit B. M. Virgini exhibendus.

Tria sub hoc titulo investiganda latent, nempe *legitimitas*, *necessitas* saltem aliqualis, atque *efficacitas* cultus Marialis.

Conclusio 1^a.—CULTUS DEI MATRIS OMNINO LEGITIMUS EST.

1^o Id plane comperitur ex demonstrata liceitate cultus sanctorum *in genere* (Disp. V, Q. IV). Si enim sanctos quoilibet, *a fortiori* electissimum illum sanctitatis florem honorare fas erit.

2^o a) Archæologorum studio repertæ sunt *imagines* Deiparæ quæ ad III et II usque saeculum ascendunt¹, quæque

1—De Rossi, *Imagini scelte della B. V. M.* (Roma, 1863).

non tam artis quam honoris causa depictæ sunt.—*b)* Jam ab antiquitate exstabant *templa* in honorem B. M. Virginis erecta, v. g. tempore Liberii R. P. (sec. IV) ecclesia S. Mariae Majoris.—*c)* Vetustiores *liturgiae* multa ac illustria exhibent cultus Marialis monumenta (ap. Knoll, *de Deo consumm.* 3. II, c. III, a. 4, n. 804).—*d)* Inter Patres antiquos que Mariæ præcones eminet S. Ephrem qui (*op. cit.*) sæc. IV amplissimis verbis Peiparam celebravit, eam salutando, reverendo, apprecoandoque. Consentit sæc. V S. Basil. Seleuc. (Orat. 39) inquiens: “Quis ingentem Deiparæ potentiam non miretur? Quis non miretur quantopere supereminat quotquot honoramus sanctos?” *Damascenus* (De imag. Orat.) cultum Virginis ante se obtinuisse luculentter testatur¹.

3º Quid hoc cultu rationabilius? *a)* Deus ipse, Virginem in matrem eligens, summo eam honore insignivit. *b)* Porro “matri regi non debetur æqualis honor honori qui debetur regi; debetur tamen ei quidam honor consimilis, ratione eujusdam excellentie” (III, Q. XXV, a. 5 ad 1). *c)* Nec ullus vir cordatus inficiari poterit hominum *Coredemptricem* et *Matrem, Dominum et Reginam* totius mundi, præcipuam quamdam venerationem, sub Deo et Christo, sibi vindicare.

Conclusio 2º.—**CULTUS B. VIRGINIS QUODAMmodo NECES-SARIUS DICI DEBET.**—Dico *quodammodo* necessarius: ubi notetur *a)* necessitatem istam non esse accipiendam quoad eos qui *invincibiliter* Mariam ignorant, sed *b)* quoad illos qui Dei Matrem sibi agnитam aut *contemnunt* aut honorare atque *invocare omnino negligunt*². *c)* Horum enim salus, etsi *absolute* possibilis, *de facto* tamen ac moraliter *impossibilis* fere videtur.

Revera *1º Ecclesia* non desistit Mariæ cultum instantissime commendare; quem præ primis urget *Leo XIII* (v. g.

1—Cf. Petavius, l. XIV, c. 8.9;—Passaglia, *De imm. V. Conc.* passim.

2—Non tamen exigitur Mariæ invocatio in *singulis* necessitatibus. “Enim vero quum precando confugimus ad Mariam, ad Matrem misericordie confugimus ita in nos affectam, ut qualieumque necessitate, ad immortalis præsertim vita adhesionem, premamur, illico nobis et *ultra*, ne vocata quidem, *presto sit semper* atque de thesauro largiatur illius gratia qua inde ab initio donata est plena copia a Deo” (Encycl. *Magnæ Dei Matris*.—Ipsa certa prima gratia, pata orationis, per Mariam nondum invocatam nobis obvenire merito judicatur).

Encycl. *Adjutricem populi*): "Mariæ fidendum, Mariæ supplicandum." — 2º Hoc ipsum infertur ex *Mediationis* officio quod Deus Virgini constituit, juxta verba S. Bernardi (Serm. in Nat. B. V. M. n. 7): "Totis ergo medullis cordium, totis præcordiorum affectibus, et votis omnibus Mariam hanc veneremur; quia *sic est voluntas Ejus, qui totum nos habere voluit per Mariam*. Hæc, inquam, voluntas ejus est, sed pro nobis." — Hinc 3º sicuti sincera erga Mariam devotio haberi solet tanquam *prædestinationis signum*¹, ita, ex opposito, aversio ab illa quasi sinistrum augurium de perditione prænuntiat; vere clamat S. *Anselmus* (Orat. 47 ad S. V. M.): "Nihil sum, inquit, et ad nihilum me venturum scio, nisi digneris me adjuvare." Similia loquuntur, inter alios, S. *Bonaventura*, S. *Antoninus*, neconon S. *Alph. Lig.*, penes quem (*op. cit. c. VIII, 1*) plura magni ponderis testimonio reperire est.

Conclusio 3^a. — CULTUS VIRG. DEIPARÆ UBERRIMIS FRUCTIBUS ABUNDAT.

Prob : — 1º *a priori* ex maxima efficacia qua Mariæ mediationem certo pollere superius demonstravimus. — Huc spectant verba *Angelici* (Exp. in Sal. Ang.): "In omni periculo potes salutem obtinere ab ipsa Virgine gloriosa. Unde (Cantic. IV) : *Mille clypei*, i. e. remedia contra pericula, *pendent ex ea*, etc. Item in omni opere virtutis potes eam habere in adjutorium."

2º *A posteriori*; quantus enim fuerit atque sit Mariæ influxus *doctrinalis, moralis ac socialis*, testatur historia, contestatur experientia.

a) *Doctrinalem* quidem Virg. influxum summatim describit Leo XIII in suis de Rosario Litteris (præsertim in Encycl. *Adjutricem populi*). Ubi docet Mariam non solum sceptrum *orthodoxæ fidei* præstisset, sed et confirmasse; quatenus fidei per Apostolos diffusio, ejus per Patres Doctoresque expositio ac declaratio, frequens adversus hæreticos propugnatio (v. g. contra Albigenses agente S. Dominico), solemnis dogmatum definitio, unitatis religiosæ constitutio, demum jugis apud fideles veritatis conservatio, magnam partem (auctore Deo) ex Deiparæ patrocinio repetenda est. — Nec prætereundum quod *objective* se tenet, nempe mysterium Vir-

1—S. *Alph. Lig.*, *Glor. Mar.*, P. I, c. VIII, 3.

ginis-Matris ita esse *Dei-Hominis* mysterio sociatum ut uno corruente, aliud corruat, consistente uno, aliud consistat necesse est.

b) *Moralis* quoque Deiparæ influxus haud impar exercetur secundum rationem causæ *intercessoriæ* et *exemplarisi*.— Sicuti euim doctores suam sapientiam, ita et sancti, Ecclesiæ duces, pontifices, pastores, ne dicam singulos fideles, virtutem animi, robur, consilium, se a Dei matre accepisse fassi sunt; inter quos eminet *Leo XIII* inquiens (*Encycl. Lætitiae Sanctæ*): “Cœlestis Reginæ vox ipsa exaudiri videtur Nos benigne tum erigentis in asperrимis Ecclesiæ temporibus, tum consilii copiâ ad instituta communis salutis proposita adjuvantis, tum etiam admonentis ut pietatem omuēmque virtutis cultum in christiano populo excitemus.”— Mariam quasi virtutum omnium exemplar perpetuo habuerunt et imitari conati sunt tum ii qui communem *preceptorum* implendorum perfectionem prosecuti sunt, tum ii qui sanctiorem vitam secundum evangeliæ consilia instituerunt. Mirandum sanc est, quot religiosi cœtus, præeunte Deiparæ nomine ac favore, orti sint et efflorescant!

c) Tandem *socialia* Mariæ beneficia quis enarrabit?— In ejus similitudinem formata mulier, deque turpi, in qua jacebat, conditione reducta, regenerata est, et per mulierem domestica societas; Sacrae Familiae typus ad imitandum propositus; populus christianus singulari presidio a Regina mundi protectus, quam ideo “catholice gentes christianorum Auxiliatricem, Opiferam, Solatricem, bellorum Potentem, Victricem, Paciferam consularunt” (*Encycl. Supremi Apostolatus*); litteræ, pulchrae artes, ut sculptura, pictura, Mariali cultu afflatae, ditatae, nobilitatæ; etc., etc.— Reliqua bene multa silentio præterimus¹.

1— Cf. Aug. Nicolas, *Marie vivant dans l'Eglise*.

ARTICULUS II.

Quinam cultus Mariæ impertiendus est.

Frequens est in Protestantium ore calumnia, quod catholici Mariæ Virgini cultum impendunt latreuticum seu *mariolatriam* quamdam Deo injuriosam exercent. Illorum quidem non pauci ideo cultum Mariæ veluti illicitum aut *exaggeratum* traducunt, quia Christum, non quasi Hominem-Deum, sed quasi hominem Deo conjunctum considerant, cuius mater nequit proprie dici Dei Genitrix.

Propositum est duo breviter adstruere, scil. *speciem* cultus Marialis, neconon elementa seu rationes quibus in sua specie *constituitur* vel *integratur*.

Conclusio 1^a.—B. V. MARIÆ DEBETUR, NON ADORATIO LATRIÆ, SED HYPERDULIAE VENERATIO. (III, Q. XXV, a. 5)

1^a *Pars* ostend.—Etenim adoratio latriæ aut est absoluta, aut relativa. Atqui neutra Mariæ debetur: ergo. a) Non latria *absoluta*: siquidem hæc, ut patet, soli Deo convenit; Deipara vero, quantumvis naturæ gratiæque muneribus perfecta, pura creatura est. b) Non latria *relativa* (qualis exhibetur Cruci): que enim creatura secundum se venerabilis est, eam non expedit colere cultu latreutico relativo seu ut imaginem Dei, ne occasio creaturam, qua talem, adorandi praebatur. Atqui creatura rationalis, secus ac creature insensibiles, maximeque Dei genitrix *secundum se* venerabilis est. Ergo.

2^a *Pars* uno verbo expeditur: nam *hyperdulia* theologicu usu nuncupatur honor dulie præstitus eminentiori objecto, reliqua excedente. Atqui B. Virgo, utpote Mater Dei, maximam sane propriissimamque dignitatem præ cunctis creaturis sibi vindicat. Ergo.

Conclusio 2^a.—FACTA DISTINCTIONE INTER DEVOTIONEM IMPERFECTAM ET PERFECTAM ERGA B. V. MARIAM, QUID UTRIQUE FERAT VEL EXIGAT DETERMINATUR.

Devotio erga B. V. Mariam duplex est, imperfecta et perfecta: *imperfecta* quidem, si nonnulla sincera obsequia, aliis tamen haud mediocribus neglectis, B. Virgini impendat; *perfecta* vero, si cuncta vel pleraque Dei Matri grata vel honorifica exhibeat.

1^a *Pars* esto de devotione *imperfecta* (quæ cum *falsa*¹ non est confundenda).—**1^o** Devotio *imperfecta* vel inchoata id saltem exigit, nempe ut quis *veneratione affectuque* internum mentis et cordis obsequium B. Virgini deferat; ex quo externæ quædam interni animi significationes certis ritibus vel precandi formulis promantur.—**2^o** Etiam *peccatores*, quos ipsa hortatur Ecclesia ut Mariam invocent tanquam *refugium peccatorum*, devotionem illam habere ac exerere possunt, dummodo tamen vere ac sincere compescendis suis vitiis vires intendant ad eumque finem Deipare patrocinium implorent.

2^a *Pars* sequitur de devotione *perfecta*; que tribus constare videtur, scil. cultu *honoris*, *imitationis* ac *invocationis*².

1^o a) Ad *honoris* cultum pertinet quicquid mentis, oris, vel operis, tale sit quod summam Dei Genitricis excellentiam, bonitatem, potentiam commendet: v. g. ejus privilegia meditari, laudes celebrare, templa vel imagines frequentare, con-sociationes ingredi, etc.

1.—B. Grignon de Montfort, *Traité de la vraie dévotion à la Ste Vierge* (1 P., II, 1°), in septem classes distribuit falsos cultores Mariæ, recensens “les dévots critiques, qui ne croient rien et critiquent tout; les dévots scrupuleux, qui craignent d’être trop dévots à la Ste Vierge, par respect pour J.-C; les dévots extérieurs, qui font consister toute leur dévotion en des pratiques extérieures; les dévots presomptueux, qui, sous prétexte de leur fausse dévotion à la Ste Vierge, croupissent dans leurs péchés; les dévots inconstans, qui, par légèreté, changent leurs pratiques de dévotion, ou les quittent tout à fait à la moindre tentation; les dévots hypocrites, qui se mettent des confréries et portent les livrées de la Ste Vierge afin de passer pour bons; et enfin les dévots intéressés, qui n’ont recours à la Ste Vierge que pour être délivrés des maux du corps ou obtenir des biens temporels.”

2.—Juxta B. Grignon de Montfort (*op. cit.*), perfecta illa devotio hoc assequi debet ut quis se totum Mariæ devoveat; unde per Mariam Deo offeratur. *Hec quidem totalis sui oblatio immediate facta Mariæ et per Mariam Christo nihil habet quod non adamus-sim consonet officio *Mediatricis apud Mediátorem*.*—Attamen, ne detur hereticis cavillandi locus, aut ne supremum Dei dominium reapse in Mariam transferri videatur, satius ducimus abstinere ab illâ vocibus, *esclaves, esclavage de Marie*, quos prefatus Mariæ laudebat in designatione sua devotione passim adhibuit; eo magis quia Ecclesia reprobavit societas quæ, sub titulo *S. Mancipatus* (*Saint Esclavage*) Mariæ catenulas deferendas membris injungunt (cf. Mauri, *Le chrétien éclairé sur la nature et l'usage des Indulgences*, 2^e p., art. V, n. 85).

b) *Cultus imitationis*, ut patet, in eo est quod Mariæ virtutes (omnibus enim omnium ætatum ac conditionum hominibus aptissimum se præbet exemplar) imitari studeamus; nam “ eam oculis et cogitatione intuentes, non animos, quasi divini Numinis fulgore perstrieti, despondemus, sed ex ipsa affecti communis propinquitate naturæ, fidentius ad imitationem enitimus. Cui studio si nos, ea maxime adjuvante, totos dediderimus, licebit profecto virtutis tantæ sanctitatisque linea-menta saltem exprimere ” (Encycl. *Magnæ Dei Matris*).

c) *Accedit cultus invocationis* (cui maxime Protestantes adversantur).—Ad hunc cultum suadendum referuntur quæ supra (Disp. V, Q. IV, a. 2) de *invocatione sanctorum* gene-ratim disputavimus. Explicite vero Mariam invocarunt aut invocandam docuerunt non solum Doctores moderni, sed et antiqui *Patres et scriptores*, puta *S. Irenæus* (cont. *Hær.* I, V, c. 19), *S. Ephrem* (Serm. de V. M. laud. et Or. ad SS. Dei Genit.)¹, *S. Gregorius Naz.* (Orat. XXIV, n. 11), *S. Proclus* (Orat. 6), etc., etc.—Sane, ostensum est Mariam esse Mediatrixem nostram apud Deum ideoque pro nobis inter-cedere; quod plures e Protestantibus concedunt. Jamvero ex illo posito aliud sponte consequitur, scil. quod congruit B. Virginem rogare ut nobis præstet suæ mediationis beneficium. Nec enim hoc dignitatem Christi offuscat, sed magis illustrat: siquidem a) potestatem invocatae Virginis quasi irradiationem potestatis Christi et Dei agnoscimus; b) petimus ab ea ut ipsa nobis Christi gratiam deprecetur; c) vis autem petitionis nostræ fructus est meritorum Christi Mediatoris.

1.—Libet initium vetustæ illius ac locupletissimæ *orationis* (*Op. omn.*, t. III) recitare: “ Immaculata et intemerata, incorrupta et prorsus pudica, atque ab omni sorde ac labे peccati alienissima, Virgo Dei Spōsa ac Domina nostra; quæ Deum et hominem mundo-mirifica ac gloria conceptione tua peperisti, Deumque Verbum hominibus miro modo conciliasti et rebellem humani nostri generis naturam ecclœstibus consociasti; unica spes desperantium, oppressorum auxilium, et ad te recurrentium præsentancum sublevamen, omniumque denique Christianorum firmum præsidium; me maximum peccatorem enormibusque meis cogitationibus, verbis ac factis effectum vilissimum, atque adeo fallaces voluptatum illecebras animo plane servi atque abjecto amplexatum, ne averseris, obæcro: quin potius, sicut mitissimi ac clementissimi Dei mater es, ita me peccatorem benignissime suscipe ” etc.

3º Trinam illam cultus Marialis formam, scil. honorem, imitationem, invocationem, collatam reperimus in *Rosarii* religione, quam Leo XIII iteratis Litteris euvixissime inculcavit. *a)* Quod enim Mariæ cultor Rosarii coronam die noctuque secum teneat, res est Deiparæ *perhonorifica*. *b)* Item, quod ille mentem intendat in meditandis mysteriis, quibus vita Christi ejusque SS. Matris expressa continetur, fieri non potest quin cor ad *imitandum* salubria illa exempla mox provocetur. *c)* Tandem (ut passim docet S. Pontifex) nulla est *precandi* formula B. Virgini gratior, aptiorque ad demerendum ejus auxilium, quam Rosarium Mariale.

Placet suavem hunc de Maria tractatum claudere verbis Pontificiis (Encycl. *Adjutricem populi*) : "Vox valeat nostra, ad extremum spiritum clamans: *Monstra te esse Matrem* ¹."

1.—Inter opera polemica recentioris ævi de Immaculata Virg. Maria commendatum volumus jam laudatum opus *Mary, the Mother of Christ*, etc., by R. F. Quigley (2 ed.); ubi egregius scriptor non solum dogma Iuris Conceptionis eruditè vindicat, sed ulterius cultum Dei Matri, exhibitis otiam Anglicanorum sententiis, solide confirmat, variasque Protestantium objectiones, puta quæ petuntur ex S. Alph. Lig., peremptorie refellit.

DISPUTATIO SEPTIMA

DE INGRESSU CHRISTI IN MUNDUM

Exactis iis quæ ad Christi Matrem pertinent, mox reducimur in Christum ipsum considerandum secundum ea quæ in humana natura sibi unita gessit vel passus est, quæque D. Thomas tam concinni lucrurbationibus descriptis. — Primum de *ingressu* ejus in mundum sermocinabimur. Circa quod quatuor quæstiones declarandæ occurrunt: *prima* de conceptione Christi; *secunda* de ejus nativitate; *tertia* de legalibus circa eum servatis; *quarta* de ejus baptismo.

QUÆSTIO PRIMA

DE CONCEPTIONE CHRISTI

Christi conceptio, pro præsentis quæstionis exigentia, dupliter spectari potest, nempe vel quoad *materiam corporis concepti* (art. 1), vel quoad conceptionis modum seu *ordinem* (art. 2); quandoquidem jam in anteactis disputationibus de principio *activo* conceptionis Christi prolixique conceptæ *perfectione* sufficienter diximus.

ARTICULUS I.

De materia conceptionis Christi hujusque genealogia.

(Q. XXXI)

Titulus ipse satis per se indicat duo sub propositum præsentis articuli cadere, scil. carnalem Christi procreationem ejusque humanam genealogiam; — quæ summatim tractabimus.

Conclusio 1^a. — CHRISTUS, DE GENERE ADAMICO ORIUNDUS, SPECIALITER DICENDUS EST FILIUS ABRAHÆ ET DAVID; IN IIS VERO ALIISQUE PATRIBUS FUIT EJUS CORPUS, NON SECUNDUM ALIQUID SIGNATUM, SED SECUNDUM ORIGINEM. — Carnem Christi, jureque merito, fuisse de *Adamo* sumptam, alibi (Disp. II, Q. III, a. 2) sufficienter patefecimus: reliqua in conclusione enunciata singillatim attingamus.

1^a) Multiplici Scripturarum testimonio constat Christum secundum carnem ab Adam descendisse per *Abraham* et *David*. Quid inculentius textu Ap. (Rom. I, 3): *Qui factus est ei ex semine David secundum carnem?* — Ex quo colligimus *V. Mariam*, per quam tantum Christus humanam generationem sortitus est, fuisse de stirpe Davidica. — Id ulterius confirunt communis, quam efferunt, traditio, scil. Joseph, qui erat de tribu Juda et familia David (Matth. I; Luc. I-II), Mariam uxorem duxisse, propterea quod hæc, utpote hæres, lege tenebatur *agnato* viro nubere¹.

b) Quare vero Christus *filius Abrahæ* et *David* speciatim nominetur, tria evincere videntur: 1^{um} est quod illi Patres, præ aliis, divinas de Christo promissiones acceperunt; — 2^{um}, quod munere regio, prophetico ac sacerdotali, expressius præfigurarunt Eum qui futurus erat rex, propheta et sacerdos; — 3^{um}, quia per Abraham primo circumcisum et David manifestissime a Deo electum ostenditur Christum, utriusque filium, in salutem esse et Iudeis et Gentilibus (art. 2).

2^o Tenendum est (contra *Galatinum* aliasque veteres) corpus Christi non esse formatum ex *designata* incorruptaque *materia portione* transfusa successive ab Adam usque ad

1— Cf. Knabenbauer, *Comm. in Matth. I*, p. 41-42.

B. Virginem¹.—*Ratio* est, *a)* quia corpus Christi non referatur ad Adam aliosque patres nisi mediante corpore matris ejus. Porro corpus Deiparæ non fuit in patribus secundum materiam signatam, sicut nec corpora aliorum hominum. *b)* Item, materia corporis Christi fuit sanguis B. Virginis; materiale autem principium sanguinis non provenit a parentibus, sed ex alimentorum transmutatione. *c)* Tandem sequeretur Christum non esse filium David aliorumque majorum, sed solius Adami: quod falsum est (art. 6).

^{3º} Itaque concludimus Christum fuisse in Adam virtuiter et *secundum originem*, quatenus scil. per virtutem generativam Adæ aliorumque patrum factum est ut materia corporis Christi ad conceptum in sinu Virginis *præpararetur*, non tamen *fœcundaretur* (quod fuit Sp. Sancti); unde dicitur fuisse in Adam secundum *corpulentam substantiam*, non secundum *seminalem rationem* (art. 6 ad 1).—Qua de causa, ex vi et ratione conceptus, peccatum Adæ, seminali ratione propagatum, nullo modo ad Christum devenire debuit (art. 7).

Conclusio 2^a.—CONVENIENTER GENEALOGIA CHRISTI AB EVANGELISTIS CONTEXTUA EST.—Hac de re (quæ proprius ad *biblicam* provinciam pertinet) pauca tantum, quasi summa quæstionis lineamenta, proponemus.

^{1º} Uterque evangelista, Matthæus et Lucas, ordinem generationis Christi, *non per Mariam*, sed per putativum patrem, *Joseph*, deducunt. Quod factum videtur triplici ex motivo: *a)* scil. quia non est Scripturarum usus ut mulierum in generationibus ordo texatur; *b)* quia, cum Maria esset ex familia David viroque propinquia, omnes fere Josephi majores Mariæ quoque ac Christi majores existebant; *c)* demum, quia, posito vero conjugio inter Mariam et Joseph, hic magis fuit pater Christi quam sit pater adoptans filii adoptati, prolemque conjugis pro *sua* quodammodo habebat².

^{2º} Fatendum est Matthæum inter et Lucam apparentes antilogias observari, eamque imprimis quod apud Matthæum (I, 16) Joseph ponitur filius *Jacob*, apud Lucam

1.—Huic errori consonat doctrina Rosminii de Immaculata Conceptione Mariæ (prop. 34^a inter prop. *damnatas*).

2.—Cf. Knabenbauer, *l. cit.*

vero (III, 23) filius *Heli*. Communior responsio est quam ipse *Angelicus* adhibet (art. 3 ad 2), videlicet Jacob et Heli fuisse fratres uterinos (ab eadem matre), ita ut ille per patrem a Salomone descenderet, iste vero a Nathan, alio filio David¹. Cum vero alteruter sine liberis decessisset, ex lege leviratus frater superstes defuncti uxorem duxit, de qua natus est Joseph; qui idecirco et naturalem et legalem patrem habuit.—Uter vero naturalis pater fuerit, Jacob vel Heli, res est satis dubia quam prosequi et definire nostrum non est.—Cæterum ex plurim sententia colligitur² Matthæum recitasse generationem Christi *regiam*, Lucam autem *sacerdotalem*. Unde Matthæus descendendo ab Abraham usque ad Joseph generationes enumerat, in Messia veluti demonstrans regiae potestatis divinarumque promissionum hæredem quo nostra natura suscepta est gratiaque nobis de cœlo allata; Lucas vero (post baptismum Christi) hujus genealogiam ascendendo a Joseph ad Deum usque reducit, quasi volens ostendere nos munere Summi Sacerdotis mundari a peccatis Deoque reconciliari (art. 3 ad 3).

ARTICULUS II.

De modo et ordine conceptionis Christi.

(Q. XXXIII)

Quæstio est physiologico-philosophica non parum controversa, utrum statim a fecundationis tempore humanus fœtus rationaliter animetur (quod plerique moderni sentiunt), aut potius ex vi generantis impressa in semine processus embryonis fiat per quasdam formas intermedias usque ad definitivum formationis stadium seu infusionem animæ rationalis (prout Aristoteles et S. Thomas instituerunt).—Quidquid sit

1—Id., *Comm. in Luc. III*, p. 170.

2—Ibid., p. 173–175.

de conceptione aliorum hominum¹, ad præsens vindicandum Homini-Deo suscipimus conceptionis modum seu ordinem quem ipsa Incarnationis ratio exigere videtur: tria concludemus.

Conclusio 1^a.—CORPUS CHRISTI FORMATUM SEU ORGANIZATUM FUIT IN PRIMO CONCEPTIONIS INSTANTI (art. 1).—Hanc sententiam Suarez (Disp. XI, S. 2), prolatis plurimis auctoritatibus, ita certam esse statuit ut eam negare temerarium ac erroneum sit.

Sane, in conceptione corporis Christi tria est considerare: unum *præambulare*, quod est motus localis sanguinis ad locum generationis; aliud *principale*, quod est formatio corporis ex tali materia; tertium *consequens*, scil. augmentum usque ad perfectam quantitatem. Atqui licet primum et tertium aliquod temporis spatium admiserint, ipsa tamen formatio corporis, in qua præcipue conceptio consistit, facta est *in instanti*: quod triplici ratione suadetur. a) *Primo*, quia tanto aliquod agens citius potest materiam disponere, quanto majoris virtutis est. Porro principium activum conceptionis Christi fuit agens infinite virtutis, scil. ipse Sp. Sanctus. Ergo etc. b) *Secundo*, quia juxta verba Symboli, *Qui conceptus est de Sp. Sancto, tota corporis conceptio Filio Dei attribui debet*. Atqui congruum non erat ut divina persona corpus nondum perfecte formatum assumeret. Ergo formatio vel organizatio ista subito, non successive, contigit. c) *Tertio* accedit differentia inter conceptionem et augmentum corporis Christi (resp. ad 4). Augmentum enim fetus jam formati fit per ipsius vim augmentativam, formatio vero per vim generantis. Porro Christi corpus informabatur animâ specie conformi animabus nostris; unde mirum non est quod, secundum vim illius animæ, et in ostensionem veritatis humanae nature, legem ordinarii progressus augmentativi secutum sit. At ipso Sp. Sancto in viri generantis locum agente, oportuit ut formationis opus statim suam perfectionem assequeretur.

Conclusio 2^a.—IN PRIMO EODEM CONCEPTIONIS INSTANTI CORPUS CHRISTI ANIMATUM EST ANIMA RATIONALI (art. 2).

1^o Id expresse docet Joan. Damascenus (Orth. Fid. I. III,

1—Sententiam thomisticam egregie exponit ac tuetur Illmus Lorenzelli, *Phil. theor. instit., Psych. intell. P. III, l. 3: De humano fetus animatione.*










IMAGE EVALUATION TEST TARGET (MT-3)



6"



Photographic
Sciences
Corporation

23 WEST MAIN STREET
WEBSTER, N.Y. 14580
(716) 872-4503

0
1.0
1.5
2.0
2.5
3.0
3.5
4.0
4.5
5.0
5.5
6.0
6.5
7.0
7.5
8.0
8.5
9.0
9.5
10.0

0.1
0.2
0.3
0.4
0.5
0.6
0.7
0.8
0.9
1.0
1.1
1.2
1.3
1.4
1.5
1.6
1.7
1.8
1.9
2.0
2.1
2.2
2.3
2.4
2.5
2.6
2.7
2.8
2.9
3.0
3.1
3.2
3.3
3.4
3.5
3.6
3.7
3.8
3.9
4.0
4.1
4.2
4.3
4.4
4.5
4.6
4.7
4.8
4.9
5.0
5.1
5.2
5.3
5.4
5.5
5.6
5.7
5.8
5.9
6.0
6.1
6.2
6.3
6.4
6.5
6.6
6.7
6.8
6.9
7.0
7.1
7.2
7.3
7.4
7.5
7.6
7.7
7.8
7.9
8.0
8.1
8.2
8.3
8.4
8.5
8.6
8.7
8.8
8.9
9.0
9.1
9.2
9.3
9.4
9.5
9.6
9.7
9.8
9.9
10.0

c. 2) inquiens: "Simul atque caro exstitit, simul quoque Dei Verbi exstitit caro, simul caro animata, rationis particeps et intelligentiae."

2º Hoc ipsum *ratione* evincitur.—*a)* Constat enim ex *Symboli* verbis supra citatis (quibus conceptio de Filio Dei prædicatur) corpus Christi, dum conciperetur, fuisse a Verbo Dei assumptum. Atqui Verbum Dei (uti ostensum est Disp. II, Q. III, a. 5) corpus assumpsit mediante anima, animam vero mediante spiritu seu gradu intellectivo. Ergo.—*b)* Nec obstabat infusioni animæ rationalis *exigua* prorsus *quantitas* embryonis mox formati. Quamvis enim anima requirat in materia cui infunditur debitam quantitatem, hæc non caret aliqua latitudine, intra cujus limites ratio hominis salvari potest. Sufficiens itaque fuit, etsi satis parva, dimensio corporis Christi, cui informando statim ab initio anima rationalis accessit (resp. ad 2).

Conclusio 3a.—CARO CHRISTI SIMUL CONCEPTA EST ATQUE A VERBO ASSUMPTA (art. 3).—Id *de fide* est, prout eruitur ex *Conc. Ephesino* aliisque Conc. generalibus (ap. Suarez, in Q. VI, Disp. XVI, S. 1).

Sane præter ea quæ jam ex *Symbolo* (in concl. præc.) observavimus, 1º præsto est *Patrum* auctoritas, e quibus audiatur magnus *Augustinus* (Cont. serm. Arianorum, c. 8): "Nec sic assumptus est (hominis filius) ut prius creatus post assumeretur, sed ut ipsa assumptione crearetur."—2º Etenim alibi (Disp. IV, Q. I, a. 3) determinavimus propriam esse hanc propositionem "Deus factus est homo," non autem aliam "homo factus est Deus;" quod ideo prohibetur, quia id quod est hominis non præexistit assumptioni quasi per se subsistens.—3º Si caro Christi fuisset prius concepta quam assumpta, habuisset aliquando aliquam hypostasim præter hypostasim Verbi, et sic aut unio Incarnationis non contigisset in unitate personæ (quod contrariatur fidei), aut delecta fuisset propria carnis hypostasis in assumptione (quod valde inconveniens est). Ergo.

QUE ex Dei rbo est ma, rgo. sus ma hæc nis en- ma

QUE tur rez, ec.) ous 3): tus — ro- on ur, asi ota im on ut ne

QUÆSTIO SECUNDA

DE NATIVITATE CHRISTI

Jam in asserenda Deiparae Virginis maternitate nonnulla circa Filii Dei temporalem nativitatem tetigimus; quibus nunc succedunt considerandæ *circumstantiae* natalium (art. 1) natique Filii *manifestatio*. Hæc vero sub triplici respectu inquirenda est, quatenus dubitatur quibus hominibus (art. 2), per quæ media (art. 3), quove ordine et modo (art. 4) Christum manifestari oportuerit.

ARTICULUS I.

De loco et tempore nativitatis Christi.

(Q. XXXV, a. 7-8)

Præfari licebit verbis *D. Bernardi* (Vig. Nativ. Dom. Serm. 1): "Quid annuntiari dulcius poterat? quid delectabilius commendari? Quid tale unquam auditum est, aut quid simile aliquando mundus accepit? *J. C., Filius Dei, nascitur in Bethlehem Judæ.*"—Pro circumstantiis loci et temporis illorum natalium, a Matth. II et Luc. II enarratis, duo distinctim concludenda erunt.

Conclusio 1^a.—CONVENIENTISSIME CHRISTUS IN BETHLEHEM NASCI VOLUIT.

Dupliciter hoc probabimus, *absolute* et *comparative*.

1^o *Absolute*.—*a)* Ex nominis congruentia. Apud Hieronymum (Ep. ad Eustochium, *Epitaph. matris*) leguntur verba S. Paulæ ingredientis specum Domini: "Salve, Bethlehem, *domus panis*, in qua natus est ille panis qui de cœlo descendit. Salve, Ephrata, regio uberrima atque *fructifera*, cuius fertilitas Deus est. De te quondam Michæas (V, 2)

vaticinatus est: *Et tu Bethlehem, domus Ephrata, non minima es in milibus Iuda. Ex te mihi egredietur qui sit princeps in Israël.*"—*b)* Ex indole civitatis. Christus enim secundum carnem erat ex semine David, cui de Messia specialis facta fuerat re promissio. Jam vero David natus erat in Bethlehem (1 Reg. XVI, 18). Itaque, ut ex ipso nativitatis loco persona Messiae et promissionis impletio ostenderetur, in eadem urbe Christus nasci voluit.

2º Comparative.—*a)* Licet enim Christus *Jerusalem* consummandæ suæ in issione elegerit, convenienter tamen Bethlehem ad nascendum prætulit; nam "per hoc hominum gloriam confutavit qui gloriantur de hoc quod ex civitatibus nobilibus origine dicunt, in quibus etiam præcipue volunt honorari. Christus autem e converso in civitate ignobili nasci voluit, et in civitate nobili pati opprobrium" (art. 7 ad 1). —*b)* Hinc nec *Romam* pro patria elegit, ne transformatio humanae societatis potestati vel nomini tantæ Urbis, non Deo, tribueretur. At, ut suam demonstraret potestatem et in signum perfectæ victoriae, in ea civitate, quæ caput mundi erat, caput suæ Ecclesie dominanter constituit (resp. ad 3)¹.

Conclusio 2a.—CHRISTUS CONGRUO ADMODUM TEMPORE NATUS EST.

Prob.—*1º Generaliter.* Hæc inter Christum aliosque homines existit differentia quod isti nascuntur subjecti necessitati temporis, Christus vero, tanquam omnium temporum dominus, nascendi tempus, sicut et matrem et locum, sibi elegit. Atqui quæ a Deo sunt, ordinata sunt apteque disposita. Ergo.

2º Specialiter.—*a)* Sane sub *Augusti regno*, quo totus orbis in pacem cœlatus unius principis imperio subdebatur, congruebat Eum nasci qui est *pax nostra* (Eph. II, 14) qui que suos in unum congregaturus erat ut esset *unum ovile et unus pastor* (Joan. X, 16).—*b)* Pariter decebat Salvatorem nostrum in lucem edi *tempore census*, quo, præcipiente Cæsare

1.—Christum eo usque demissionis et humilitatis amore protulisse ut in *presepio* natus reclinaretur, fides nos edocet (Luo. II, 7).—Antiqua vero, plurimumque suffulta Patrum testimonio, traditio habet, Puerum Deum inter *duo animalia*, bovem scil. et asinum, jacuisse (vid. Suarez, in Q. XXXV, Disp. XIII, S. 3, n. 10).

Augusto, universus orbis veluti tributarius describeretur: tum ut Romana archivia publico suffragio nativitatem tanti Regis promerent; tum quia Rex iste, mortalitate ac servitute suscepta, nos erat ad vitam libertatemque reducturus.—c) Tandem Christus “asperitatem *hiemis* elegit ad nativitatem, ut ex tunc carnis afflictionem pateretur pro nobis” (art. 8 ad 3).

ARTICULUS II.

De iis quibus Christi nativitas manifestata est.

(Q. XXXVI, a. 1-3)

Manifestatio Christi nati primum spectanda vénit quoad eos quibus facta est; de qua re duo in dubium vocantur, scil. num *aliquibus tantum fieri* debuerit, numque *ii privilegiati testes convenienter electi* sint.

Conclusio 1^a.—NON OMNIBUS, SED TANTUM QUIBUS DAM, CHRISTI NATIVITATEM MANIFESTARI CONGRUUM FUIT.—Agitur profecto non de manifestatione per intrinsecam visionem mysterii Incarnationis, sed de Christi nati portentosa *attestatione*, qualem pastores et Magi admirati sunt.

1^a *Pars concl. negativa* est, et suadetur triplici ratione:—1^a est, quia communis manifestatio probabilius prohibuisset humanam *redemptionem* in Cruce peractam, scribente Apostolo (1 Cor. II, 8): *Si cognovissent, nunquam Dominum gloriae crucifixissent.*—2^a est, quia, fulgidis signis de Christo nato onnium oculos percellentibus, plerique forte non tam ex auctoritate Dei quam ex motivis illis externis credidissent: quod aut sustulisset aut certe minuisset fidei meritum.—3^a est, quia obscuritas pueri fere incogniti, cæterorum puerorum ad instar, favebat demonstrandæ veritati humanitatis Christi.

2^a *Pars affirmat* fuisse conveniens ut *aliquibus* saltem Christi nativitas innotesceret.—Et sane 1^a pertinet ad divinæ sapientiæ ordinem ut Dei dona, secreta, consilia, non immediate ad omnes, sed quorundam ministerio ad alios gradatim

deveniant.—Porro 2º *Maria* quidem et *Joseph* jure fuerant de proxima Christi nativitate instructi, unde possent sive in utero sive in præsepio divinæ Proli reverentiam exhibere. At eorum testimonium de Filio, utpote domesticum, non omnem suspicionem effugisset, ideoque oportuit eventum illum aliis extraneis manifestari (art. 2 ad 2).—Nec 3º thesi officit *turbatio* subsecuta ex illa manifestatione: quippe id potius commendabat summam Christi dignitatem et potestatem, quod eo mox nato, terræ rex infernique princeps infremerent (*ibid.* ad 3).

Conclusio 2º.—CONVENIENTER ELECTI SUNT ILLI QUIBUS CHRISTI NATIVITAS MANIFESTATA EST.

Etenim salus, quæ futura erat per Christum, ad omnem spectabat hominum diversitatem, juxta illud (Coloss. III, 11): *Non est Gentilis et Judæus... Barbarus et Scytha, servus et liber, sed omnia et in omnibus Christus.* Atqui id in ipso Christianismi ortu optime est præsignatum per hoc quod Christus hominibus omnium conditionum revelatus est:—*a)* innouit enim Judæis et Gentilibus, scil. pastoribus et Magis ab Oriente¹ profectis. *b)* Illi proximi erant, isti a distantia regione venerunt. *c)* Magi fuerunt sapientes et potentes, pastores vero simplices et viles. *d)* Inter nobilis eventus testes alii justi erant, scil. Simeon et Anna, alii peccatores, quos, si in Magos, saltem pastores non temere dixeris. *e)* Tandem utriusque sexui, ut patet ex eisdem Simeone et Anna, manifestatio præfata contigit².

1.—Probabilius est Magos vel ab Arabia (Ubaldi, *Intr. in S. Script.* ed. 3, p. 327) vel a Perside (Fouard, *La Vie de N. S. J. C.*; Knabenbauer in *Math.* II) venisse.—Eos fuisse viros probos, nobiles, rerum naturalium sideraliumque peritos, communius conceditur. Num autem reges etiam extiterint, dubitatur (affirmat Suarez ex plurimum sensu in Q. XXXVI, Disp. XIV, S. 2; negat Knabenbauer, *l. cit.*)

2.—“Credibile est (notat *S. Thomas*) etiam in aliis partibus mundi aliqua indicia nativitatis Christi apparuisse, sicut Romæ fluxit oleum, et in Hispania apparuerunt tres soles paulatim in unum coeuntes” (art. 3 ad 3).—Cf. *Sylvius* in h. 1; *Suarez* in Q. XXXVI, Disp. XIV, S. 1.

ARTICULUS III.

De mediis per quæ nascens Christus innotuit.

(Art. 4-5)

Sub hoc titulo inquirendum proponitur quibus *mediis* seu nuntiis conveniens fuerit Christum electis personis supra memoratis manifestari: de quo argumento unum prævia oratione negabimus, ut via prior affirmandæ veritati steratur.

Conclusio 1^a.—NON DECUIT CHRISTUM SUAM PER SEIPSUM NATIVITATEM COMPERTAM FACERE.

Summa ratio est, quia, fide divinitatem humanitatemque Christi simul confite, oportebat ita Christum natum innotescere, ut demonstratio ejus divinitatis fidei humanitatis non præjudicaret. Atqui hoc factum esse videamus, dum ex una parte Christus, a patrandis miraculis abstinens seseque more aliorum infantium gerens, nativitatem infirmitati humanæ similem exhibuit, ex altera vero parte per Dei creaturas divinitatis virtutem in se monstravit. Ergo.—Qua in re, nedum ostenderit se frustra scientiam a conceptionis instanti accepisse, maximam e contrario sapientiam declaravit: quid enim sapientius, quod quis congruo tempore lateat, tempore autem congruo se ipsum manifestet, juxta illud (Eccli. XX, 6): *Est tacens non habens sensum loquelæ, et est tacens sciens tempus aptum* (a. 4 ad 2)?

Conclusio 2^a.—DECENTER CHRISTI NATIVITAS PER ANGELOS ET STELLAM MANIFESTATA EST.

1^o Audiatur *Angelicus* graphice, ut assolet, rem exponens (art. 5): “Sicut manifestatio syllogistica fit per ea quæ sunt magis nota ei cui est aliquid manifestandum, ita manifestatio quæ fit per signa debet fieri per ea quæ sunt familiaria illis quibus manifestatur. Manifestum est autem quod viris justis est familiare et consuetum interiori Sp. Sancti instinctu edoceri absque signorum sensibilium demonstratione, scil. per spiritum prophetiæ. Alii vero, corporalibus rebus dediti, per sensibilia ad intelligibilia adducuntur. Judæi autem consueti erant divina responsa per angelos accipere, per quos etiam legem acceperant, secundum illud (Act. VII, 53):

*Accepistis legem in dispositione Angelorum. Gentiles vero, et maxime astrologi, consueti sunt stellarum cursus inspicere. Et ideo justis, scil. Simeoni et Annae, manifestata est Christi nativitas per *interiorem instinctum Sp. S.*, secundum illud (Luc. II, 26) : *Responsum acceperat a Sp. S., non visurum se mortem, nisi prius videret Christum Domini.* Pastoribus autem et Magis, tanquam rebus corporalibus deditis, manifestata est Christi nativitas per visibiles apparitiones. Et quia nativitas non erat pure terrena, sed quodammodo cœlestis, ideo per signa cœlestia utrisque Christi nativitas revelatur... Rationabiliter autem *pastoribus*, tanquam Judæis, apud quos frequenter factæ sunt apparitiones angelorum, revelata est nativitas Christi per *Angelos*; *Magis* autem assuetis in consideratione cœlestium corporum manifestata est per signum *stelle*."*

2º *Qua ratione* signum illud sidereum Magis Christum natum revelaverit, ex duobus colligi potest (resp. ad 4) :—
a) Primo namque nou solum expectatio Messiae inter Hellenistas gentesque per Orientem, ex Judæorum dispersione, Danielis prophetia, oraculis sibyllinis, etc, sparsa erat (*Knabenbauer* in Matth. II, p. 83), verum, ut plures sentiunt, vaticinium *Balaam, orientur stella ex Jacob* (Num. XXIV, 17). late diffusum poterat inentes ad agnoscendum in nova stella promissum Regem excitare.—*b)* Dein suppetebat *illustratio interna* gratiæ et fidei, juxta illud *S. Leonis M.* (Serm. 34, in Epiph. IV, c. 3) : "Præter illam stellæ speciem quæ corporeum incitavit obtutum. fulgentior veritatis radius eorum corda perdocuit."

ARTICULUS IV.

De ordine et modo manifestationis Christi.

(Art. 6-5)

Quæ Christi infantiam ejusque manifestationem attinent, sicut et quælibet vitæ Salvatoris mysteria, non sine speciali Dei providentis consilio evenisse credenda sunt. Ea motu ratione, Angelicus Doctor diligenter exquisivit tuum ordinem

diversarum manifestationum Christi, tum *indolem* stellæ Magorum istòrumque itineris religiosi.

Conclusio 1^a. — CHRISTI NATIVITAS CONVENIENTI ORDINE MANIFESTATA EST.

Enim vero haec manifestatio ita facta est, ut primo et ipsa nativitatis nocte *pastores* ad Christum natum convocaret (Luc. II); secundo, ut ad eundem Christum adorandum *Magos* appelleret, qui (probabiliter) advenerunt circa tertiam decimam diem nativitatis, quo tempore festum Epiphaniæ celebratur¹; tertio, ut quadragesimo die a nativitate *Simeonis* et *Annae* animos præsentia pueri in templo oblati lœticaret. Jamvero orde ille trium manifestationum conveniens fuisse deprehenditur ex figurali et propheticō significatu *vocationis ad fidem*, quam Apostolus (Rom. XI) primo ad electos Judæos, postea ad plenitudinem gentium, ultimo seu finaliter ad plenitudinem populi Israël pervenientem ostendit. Nam “per pastores significantur Apostoli et alii credentes ex Judæis quibus primo manifestata est fides Christi, inter quos non fuerunt *multi potentes*, nec *multi nobiles* (1 Cor. I, 26). Secundo autem fides Christi pervenit ad plenitudinem gentium, quæ est præfigurata per Magos. Tertio autem pervenit ad plenitudinem Judæorum, quæ est præfigurata per justos; unde et in templo Judæorum est eis Christus manifestatus” (art. 6).

Conclusio 2^a. — PRÆJACTIS QUIBUSDAM CIRCA NATURAM STELLÆ MAGORUM, STATUITUR MAGOS CONGRUE AD CHRISTUM ADORANDUM VENISSE.

1^a *Pars de natura stellæ decl.* — Et 1^o licet non omnibus constet stellam istam in Oriente visam Magos per totum iter ceu comitem duxisse (quod plures præsertim recentiores negant), pro certo habendum est eam, ad aliquem eventum signandum specialiter ordinatam, non fuisse de stellis communiter apparentibus, sed quidpiam miraculosum secum tulisse. — 2^o a) Celebris est Kepleri sententia de *conjunctione planetarum* quam ipse, sicuti tempore suo, ita et tempore

1.—Haec opinio de adventu Magorum sua certe probabilitate non caret; de qua vid. Ubaldi, *Introd. in Sac. Script.*, Vol. I, th. 10.—Contradicunt tamen Cornely (Introd. III, p. 203), Knabenbauer (in Matth. II, p. 72), aliique ponentes Magorum adventum post purificationem B. M. V.

nativitatis Christi accidisse doctis calculis reputavit; ex quo Magorum attentio excitari potuit. At (fatente ipso Keplero, ap. *Knabenbauer* in Matth. II, p. 85-86) hypothesis illa de se sufficiens ad propositum dici nequit nisi adjuncta supponatur *stella* quæ primo in Oriente mire apparuerit, et rursus, se in aërem vicinum terræ demittens, steterit supra ubi erat puer (Matth. II, 9). b) Satius est, juxta communem traditionis sensum¹, stellam intelligere *divinitus formatam*, nempe phænomenon stellæ simile docileque divinae voluntati, prout tradit *S. August.* (Cont. Faustum, l. II, c. 5): "Non ex illis erat hæc stellis, quæ ab initio creaturæ itinerum suorum ordinem sub Creatoris lege custodiunt; sed novo Virginis partu *novum sidus* apparuit."

2^a *Pars* concl. suadetur triplici ex capite:—1^o Ex *motivo* impellente et finali Magorum. a) Ipse enim *Sp. Sanctus Magos*, quasi primitias gentium in Christum credentium, efficaci inspiratione fidei et devotionis impulit ad debitam reverentiam Salvatori exhibendam. b) Illi autem, divinæ voci obsequentes, non *regem terrenum* colendum quæsierunt, sed *cœlestem*, in quo adorando se salutem, quæ secundum Deum est, consecuturos minime dubitarunt.—2^o Ex Magorum *processu*. Divino enim nutu factum est quod Magi, deficiente stellæ *adspicere*, Regem natum inquirent in Jerusalem: tum ut in civitate regia primo Christi nativitas publice annuntiaretur; tum ut Judæi suum testimonium de Messia nascituro in *Bethlehem Iudæ* (Matth. II, 4) perhiberent, similes fabris arcæ Noë qui aliis, ubi evaderent, præstiterunt, at diluvio perierunt, aut lapidibus milliariis qui viam ostendunt, nec ambulant. — 3^o Ex *muneribus* adorando Christo oblatis. Communis enim sententia est (*Knabenbauer*, in Matth. II, p. 93-94) Magos adoratione latræ puerulum esse prosecutos, ideoque ei obtulisse *aurum* quasi supremo Regi; thus, pertinens ad divina sacrificia, quasi vero Deo; *myrrham* vero, in honorandis defunctorum corporibus adhibitam, quasi Victimæ pro nobis morituræ².

1—Hunc sequitur Fouard, *La vie de N. S. J. C.*, t. I, app. IV.

2—De *moralī* horum munerum interpretatione, prout fidelium interest, cf. S. Thom. Opusc. LIX, *de Humanitate J. C. D. N.*, c. 7.

QUÆSTIO TERTIA

DE LEGALIBUS CIRCA PUERUM JESUM SERVATIS

Legalia circa Jesum impleta ad duo reduci possunt, scil. ad circumcisionem cum nominis impositione (art. 1) et ad oblationem in templo (art. 2).

ARTICULUS I.

De Christi circumcisione et nominatione.

(Q. XXXVII, a. 1-2)

Mos erat apud Judæos, ex Abrahæ exemplo (Gen. XVII) ortus, ut ipso *circumcisionis* die *nomina* pueris imponerentur, quasi hactenus perfectum esse non habuissent; quod et nunc in baptismo observatur.—De utroque Legis dispositu in ordine ad Christum sub uno articulo opportune dissertabitur.

Conclusio 1^a.—OMNINO DECUIT UT PUER CHRISTUS CIRCUMCIDERETUR.

1^o Factum ipsum *fide* certificatur (Luc. II, 21): *Postquam consummati sunt dies octo ut circumcidetur puer, etc.*—At, cum satis constet Hominem-Deum, etsi moralibus non nullisque positivis sui Patris præceptis subjectum, haud tamen *fuisse legi puris hominibus præscriptæ obnoxium* (art. 4), inquirendum restat num et quare circumcisione in eo conveniens fuerit.

2^o Igitur dico pluribus de causis Christum debuisse circumcidi:—*a) Primo*, ut ostenderet contra Manichæum alios que hæreticos veritatem humani sui terrenique corporis;—*b) secundo*, ut approbaret circumcisionis ritum, quem Deus olim in signum initi foederis cum suo populo instituerat;—*c) tertio*, ut suaderet se esse de genere Abrahæ qui primus circumcisionem suscepérat quasi signaculum justitiae et fidei

in Christum venturum ;—*d) quarto*, ut Judæis, qui forte eum
ceu incircumcisum repudiare vellent, excusationem tolleret ;—
e) quinto, ut nobis tum obedientiam in implendis iis quæ
nostro tempore præcepta sunt¹, tum humilitatem et mortifi-
cationem seu spiritualem circumcisionem suo commendaret
exemplo ;—*f) sexto*, ut factus in similitudinem carnis peccati,
quamvis peccati expers, remedium ac cauterium, quo infecta
caro mundari consueverat, non respueret, sed personâ pecca-
toris veluti indutus jam ab infantia primitias sui sanguinis
pro nobis funderet ;—*g) septimo*, ut legis onus in se susti-
nens, alias a legis onere liberaret, secundum illud (Gal. IV,
4-5) : *Misit Deus Filium suum...fuctum sub lege, ut eos*
qui sub lege erant redimeret.

Conclusio 2^a.—CONVENIENTER CHRISTO IMPOSITUM EST
NOMEN “ JESUS ” (Luc. II, 21).—Id quadrupliciter probatur.

1^o Ex nominis *auctore*.—Licet enim præfatum nomen con-
junctim a B. Virgine (Luc. I, 31) et S. Joseph (Matth. I, 25)
puerulo divino fuerit impositum, tamen Scriptura etiam tradit
illud *de caelo* per Angelum fuisse allatum ideoque divinitus
inditum : quod sane requirebat personæ nominandæ dignitas.

2^o Ex nominis *proprietate*.—Nomina enim debent rebus
nominandis respondere. Unde vel propriam rei naturam
designant, ut in generibus et speciebus ; vel, si siut nomina
singularium hominum, imponuntur ab aliqua speciali cir-
cumstantia, puta temporis, cognationis, eventus, qualitatis ;
nomina autem divinitus imposita semper significant aliquod
donum gratuito a Deo collatum, ut patet de Abram quem
Deus *Abraham* seu *patrem multarum gentium* appellavit
(Gen. XVII, 5), et de Simone qui *Petrus*, quasi *Ecclesiæ*
fundamentum, dictus est (Matth. XVI, 18). Atqui ex una
parte hoc Christo gratiæ munus singularissimum contigit ut
per ipsum omnes spiritualiter salvarentur ; ex altera parte,
nomen *Jesus* idem sonat ac *Salvator* (cf. Knabenbauer in
Matth. I, p. 62). Ergo.

1.—Christus circumcisionem suscepit eo tempore quo erat sub
præcepto ; at sublata per ejus passionem vetustate primi hominis,
cujus spoliationem figurabat ritus ille, jam a morte Christi legalis
circumcisio amplius non permittitur, prout definitivit *Conc. Flo-*
rent. sub Eug. IV (cf. I-II^a, Q. CIII, a. 4, necnon Cajet. in III,
Q. XXXVII, a. 1).

3º Ex nominis comprehensione.—Ad illud enim nomen commode reduci possunt omnia Christi nomina, sive metaphorica, sive propria. *a) Metaphorica* quidem, ut *pastor*, *ostium*, *via*; quippe hæc aliaque similia eatenus Christo convenient quatenus est hominum *Salvator*. *b) Propria* vero, ut *Emmanuel*, *Admirabilis*, *Princeps pacis*, etc.; nam *Emmanuel* (nobiscum Deus) designat causam salutis quæ est unio divine humanæque naturæ in persona Verbi, *Admirabilis* significat vere miram ac efficacissimam viam qua salutem assequimur, *Princeps pacis* demonstrat Christum datorem beatitudinis qua salvati homines pacifice fruuntur (art. 2 ad 1): quæ cuncta pertinent ad *Salvatorem*.—Ipsa vox *Christus* non tam proprie Messiae convenit quam *Jesus*, quandoquidem vi suæ significationis communis est iis qui uncti sunt regali, sacerdotali vel spirituali oleo gratiæ, nec nisi per derivationem antonomasiae filio Mariae deputata est.

4º Ex nominis virtute.—Est enim appellatio *Jesus*, præcunctis aliis, suave quiddam, spirans misericordiam animisque sponte ingerens amorem ac fiduciam. Eleganter *S. Thomas* (*Opusc. LIX*, a. 6): “*Sciendum*, ait, quod hoc nomen *Jesus* est magnæ et multæ virtutis. Est enim pœnitentibus in refugium, ægrotantibus in remedium, pugnantibus in subsidium, orantibus in suffragium, quia confert veniam a peccatis, gratiam sanitatis, victoriam tentatis, virtutem et fiduciam impenetranda salutis. De primo dicitur (*1 Joan. II, 12*): *Scribo vobis, filioli, quoniam remittuntur vobis peccata propter nomen ejus...* De secundo dicitur (*Cant. I, 2*): *Oleum effusum nomen tuum*. Oleum enim levamen est doloris, sic et hoc nomen *Jesus*... De tertio dicitur (*Prov. XVIII, 10*): *Turris fortissima nomen Domini...* De quarto dicitur (*Joan. XIV, 13*): *Quocumque petieritis Patrem in nomine meo, hoc faciam.*”

ARTICULUS II.

De oblatione Christi in templo.

Certe Christus (*ut jam monuimus*) nulli observantiae legali-
de jure subjectus erat, ideoque non magis lege oblationis in
templo quam circumcisio*n*is ritu tenebatur.—Quæstio est:
num debuerit se sinere in templo offerri, reliquorum puerorum ad instar.

Conclusio. —CONVENIENTER CHRISTUS IN TEMPLO A PARENTIBUS OBLATUS EST.

1º Etenim apprime decuit Christum sub lege fieri, ut, legis observantias in seipso terminans, *eos qui sub lege erant redimeret et obedientiæ exemplo fideles instrueret atque ædificaret*. Porro de prole genita duplex in lege præceptum vigebat: unum quidem *generale* quoad omnes, ut scil. completis diebus purificationis matris aliquid offerretur tum in sacrificium *expiatorium* peccati in quo proles erat concepta et nata¹, tum in holocaustum veluti prolis *consecratorium*. (Lev. XII); aliud vero *speciale* de primogenitis (masculis), quæ Deus sibi deputaverat et potissimo jure reservaverat in ejus memoriam quod olim percutiendo primogenita Ægypti pepercera*t* primogenitus Israël (Ex. XIII): unde primogeniti hominum (sicut et quorundam animalium) quinque siclis redimendi erant (Num. XVIII, 15-16). Atqui Christus ex muliere natus erat quasi unus nostrum et primogenitus. Ergo merito recitata præcepta, speciale scil. et communc, circa Christum observata fuisse Evangelista testatur (Luc. II, 22-24): *Tulerunt illum in Jerusalem ut sisterent eum Domino* etc. etc.

2º Convenientia oblationis Christi in templo ulterius eruitur ex *speciali significatione mystica*.—a) Nam “sicut Filius Dei non propter seipsum factus est homo et circumcisus in carne, sed ut nos per gratiam faceret déos, et ut spiritualiter circumcidamus; sic propter nos sistitur Domino, ut discamus *Deo præsentare nosmetipsos*; et hoc post cir-

1—Cf. Cajet. in h. l;—Suarez in Q. XXXVII, Disp. XVI, S. 1, n. 9.

cumcisionem ejus factum est ut ostendat neminem, nisi circumcisum vitio, dignum esse divinis conspectibus" (art. 3 ad 2).—*b)* Præterea "Levit. XII præcipitur ut qui possent, agnum pro filio aut filia, simul et turturem sive columbam offerrent; qui vero non sufficerent ad offerendum agnum, duos turtures vel duos columbarum pullos offerrent. Dominus ergo, qui cum dives esset, propter nos egenus factus est, ut illius inopia divites essemus (2 Cor. VIII, 9), pro se pauperum hostiam voluit offerri, sicut et in ipsa nativitate panis involvitur et reclinatur in præsepio" (*ibid.* ad 4).

iae legali-
tionis in-
testio est
i puer-

A PAREN-

ut, legis
nt redi-
ne ædifi-
um vige-
completis
n sacrifici-
cepta et
atorium.
masculis),
averat in
Ægypti
primo-
quinque
Christus
ogenitus.
ne, circa
Luc. II,
ent eum

us erui-
" sicut
circum-
s, et ut
Domino,
ost cir-

S. I, n. 9..

QUÆSTIO QUARTA

DE BAPTIZATIONE CHRISTI

Reliqua, quæ infantiam, adolescentiam et vitam Christi attinent usque ad baptismum, proprie spectant sive ad *Commentatores S. Scripturæ* sive ad *Hagiographos*, ideoque eis describenda linquuntur.—Auctoris vestigia sectando mox properabimus ad *baptizationem Christi* quæ tripliciter considerari potest, nempe vel in *præparatione* per baptismum Joannis (art. 1), vel *in se* suisque circumstantiis (art. 2), vel in cœlestibus *signis* quibus honestata est (art. 3).

ARTICULUS I.

De baptismo Joannis.

(Q. XXXVIII)

Erat baptismus ille non quidein sacramentum, sed “quod-dam sacramentale disponens ad baptismum Christi” (art. 1 ad 1); unde aliqualiter seu dispositio pertinebat ad Legem Novam.—Præadmissa facti veritate, quam omnes Evangelistæ declarant, totam quæstionem a D. Thoma expositam intra unius articuli limites comprehendemus hoc conclusio-num ordine ut primo dicamus de *ipso baptismo* Joannis, secundo de ejus *causa et effectu*, tertio de ejus *subjecto*.

Conclusio 1^a.—CONVENIENS FUIT JOANNEM BAPTIZARE.—Agitur de convenientia, non de necessitate.

Hoc quadruplici ratione evincitur:—1^o Ut, Christum aliosque baptizando, præcursor¹ ritu quodam medio V. Testa-

1—De persona *Præcursoris* ejusque officio vid. plura ap. Suarez, in Q. XXXVIII, Disp. XXIV-XXV.

mentum clauderet Novumque aperiret; unde *S. Thomas* (resp. ad 2): "Joannes non solum fuit propheta, sed plus quam propheta" (*Matth. XI, 9*). Fuit enim terminus legis et initium Evangelii."—^{2º} Ut concurrentibus turbis ad baptismum Christum manifestaret, juxta verba ipsius *J. B.* (*Joan. I, 31*): *Ut manifestetur in Israël, propterea veni ego in aqua baptizans.*—^{3º} Ut suo baptismo homines ad Christi baptismum assuefaceret.—^{4º} Ut, poenitentiam prædicans, rectas dispositiones ad suscipiendum baptismum Christi induceret.

Conclusio 2a.—*BAPTISMUS JOANNIS NON ITA ERAT A DEO, UT GRATIAM DE SE CONFERRE POSSET* (art. 2-3).

^{1º} *Pars* esto de *auctore* baptismi Johannici:—ubi duo distinguamus oportet, nempe *ritum* baptizandi et *baptismi effectum*.

^{1º} *Ritus*, ut liquet ex *Joan. I, 33*, non ab hominibus institutus est, sed *a Deo*, qui familiari Sp. Sancti revelatione Joannem ad baptizandum misit.—Huic equidem datum non esse ut *ullum signum faceret*, res est in Scripturis testata (*Joan. X, 41*) eoque suffulta motivo quod secus homines ex seculo Joanni et Christo attendissent; at se *S. Præcursor* suamque divinam missionem satis commendavit tum austerritate vitae, tum prophetice auctoritate (*Is. XL, 3*): *Vox clamantis in deserto: Parate viam Domini*, etc.

^{2º} *Effectus* illius baptismi fuit *ab homine*; quippe per eum corpus solum aquâ mundabatur, juxta illud, (*Matth. III, 11*): *Ego baptizo vos in aqua... ipse vos baptizabit in Sp. Sancto*. Unde baptismus ille dicitur *Joannis*, quasi vim a Joanne derivans.

^{2º} *Pars* jam facili negotio suadetur.

Etenim tota Joannis doctrina et operatio præparatoria erat ad Christum, eo modo quo ministerium inferioris artificis consistit in præparanda materia ad formam a principali artifice inducendam. Atqui gratia dispensanda erat hominibus per Christum, secundum illud (*Joan. I, 17*): *Gratia et veritas per J. C. facta est*. Ergo baptismus Joannis gratiam de se non conferebat, sed solum ad Christi gratiam recipiendam disponebat triplici initiatione, scil. *doctrinali*, *rituali* et *moralis*.—Neque asserto nostro contradicit sententia illa (*Marc. I, 4*): *Fuit Joannes in deserto baptizans et predi-*

cans baptismum pœnitentia in remissionem peccatorum, nec etiam altera (Matth. III, 6): Baptizabantur... confitentes peccata sua; siquidem ex his id unum colligitur, baptismum Joannis fuisse signum quoddam inducens ad pœnitentiam et protestationem immutationis animi qua baptizati poterant peccatorum veniam consequi.

Conclusio 3^a.—OPORTUIT E JUDÆIS ALIOS PRÆTER CHRISTUM a JOANNE BAPTIZAPI, TUM ANTE TUM POST CHRISTI BAPTIZATIONEM, QUIN ILLE PRIMUS BAPTISMUS BAPTISMUS CHRISTIANI LOCUM SUPPLERE POSSET (art. 4-6).

1^a. *Pars* in compertis est, tum quia secus potuisset dici Joannis baptismum, soli Christo collatum, dignorem esse baptismu Christi quo alii baptizantur; tum quia (ut dictum est) utile erat Judæos ad baptismum Christi prævio ritu disponi.—Dico *Judæos*; nam aperire gentilibus viam salutis Ei reservabatur qui est *exspectatio gentium* (Gen. XLIX, 10).

2^a. *Pars* uno verbo suadetur; quippe baptismus Joannis præparatorius erat non solum ad hoc quod Christus baptizaretur, sed etiam ad hoc quod alii ad Christi baptismum accederent: quod nondum fuit impletum, Christo baptizato.

3^a. *Pars* denique evincitur Scriptura et ratione:—*a)* *Scriptura* quidem; nam Baptista ait (Marc. I, 8): *Ego baptizavi vos aqua; ille vero baptizabit vos Sp. Sancto;* quibus verbis significatur eosdem illos a Christo fuisse baptizandos. Unde D. Paulus id fieri jussit (Act. XIX). *b)* *Ratione* vero; quia baptismus Joannis neque gratiam neque characterem producere valebat.—Ex quo rationabiliter infertur et *Apostolos* et ipsum *Joan. Baptistum* fuisse baptismu Christi baptizatos.

ARTICULUS II.

De baptismatione Christi.

(Q. XXXIX, a. 1-4)

Venit Jesus a Galilæa in Jordanem ad Joannem ut baptizaretur ab eo (Matth. III, 13).—Quod reapse Christus suscepit baptismus, res est extra omne dubium posita, sed convenientia nunc inquiritur et inspici potest tripliciter, tum quoad factum ipsum, tum quoad tempus, tum quoad locum. Unde tria concludenda occurunt.

Conclusio 1^a.—CONVENIENS FUIT CHRISTUM BAPTIZARI, NON PROPRIO SED JOHANNICO BAPTISMATE (art. 1-2).

1^a *Pars ex tribus colligitur:—1^o quia sic Christus tactu mundissimæ sue carnis aquas sanctificavit, i. e. destinavit ad sacramentale ministerium Christiani baptismi.—2^o Quia, quamvis ipse non esset peccator, corpus tamen assumpsit de natura peccatrice et baptismi lavacro indigente.—3^o Quia voluit exemplo externæ ablutionis suadere baptismum gratiæ quem omnibus suspicendum imperavit.*

2^a *Pars decl.*—Etenim primum movens in aliquo genere immobile est secundum illum motum: ergo institutor Christiani baptismatis non erat hoc baptismi genere baptizandus.—Præterea baptismus est quoddam spirituale remedium; quanto autem aliquid perfectius est, tanto minori remedio indiget. Jam vero Christus, ab ipsa conceptione gratiæ repletus, maxima in se perfectione gaudebat, adeoque nequaquam instrumento gratiæ effectivo propter se egebat. Igitur remanet ut baptismum initialem Joannis suscepit in aliorum bonum et exemplum.

Conclusio 2^a.—CHRISTUS CONGRUE FUIT TRIGESIMO CIRCITER AETATIS SUÆ ANNO BAPTIZATUS; prouti evenisse constat ex Luc. III, 21-23.

Sane 1^o Christus manifestatione sui baptismatis publicum docendi agendique munus inauguraravit. Atqui, secundum legem communem, ad auspicandum vitæ publicæ munera requiritur *cetas perfecta*, qualis est *triginta* circiter annorum: quod exemplo Josephi præsidis Agypti (Gen. XLI, 46), Davidis regis (2 Reg. V, 4), et Ezechielis prophetæ (Ezech. I, 1)

confirmari potest. Ergo.—^{2º} “ *Utilitas*, quæ a Christo pro-
venit hominibus, præcipue est per fidem et humilitatēm ; ad
quorum utrumque valet quod Christus in pueritia vel adoles-
centia non cœpit docere, sed in perfecta ætate. Ad fidem
quidem, quia per hoc apparet in eo vera natura humanitatis,
quod per temporum incrementa corporaliter profecit ; et ne-
hujusmodi profectus putaretur phantasticus, noluit sapientiam
suam vel virtutem manifestare ante perfectam corporis æta-
tem. Ad humilitatem vero, ue ante perfectam ætatem aliquis
præsumptuose prælationis gradum et docendi officium assu-
mat ” (art. 3 ad 2).

Conclusio 3^a.—CONVENIENTER CHRISTUS ELEGIT BAPTI-
ZARI IN JORDANE.

Ratio est (etsi mystica tantum), quia baptismus Christi,
quem præsignabat baptismus Joannis, hunc effectum habet.
ut homines in Dei regnum introducat. Atqui *a*) fluvius Jor-
danis fuit per quem filii Israël terram promissam, regni Dei
figurativam, ingressi sunt ; *b*) Elias quoque pallio divisit
aquas Jordanis, quando in curru igneo, quo ignis Sp. Sancti
significatur, jamjam erat in cœlum rapiendus (4 Reg. II).
Ergo.

ARTICULUS III.

De signis cœlestibus in baptismatione Christi proditis.

(Art. 5-8)

Recensenda supersunt signa seu *prodigia* quæ, teste
Evangelio, baptismationem Christi comitata sunt quæque eam
divino veluti charactere sigillarunt :—hæc tria fuerunt, scil.
apertio cœlorum, Sp. Sancti sub specie columbae descensio, et
paternæ vocis auditio.

Conclusio 1^a.—CONGRUE FACTUM EST UT CHRISTO BAPTI-
ZATO CELI APERIRENTUR, PER MODUM INSOLITÆ VISIONIS.

1^a *Pars de convenientia* apertioris cœlorum tribus per-
suadetur.—1^º Cum Christus facto recepti baptismi voluerit

baptismum nostrum consecrare, ea in illo baptizando demonstrari debuerunt quæ pertinent ad efficaciam baptismi nostri. Atqui hæc tria habentur, nempe *vis principalis* qua baptismus agit, *fides* de divinis, et *jus consequens* ad *supernam felicitatem*; quæ tria plane sunt cœlestia seu ad cœlum spectantia. Ergo non immerito significari censentur per *cœlos baptizato Christo apertos*. —^{2º} Signanter quoque apertio illa facta refertur Jesu orante (Luc. III, 21): ex una enim parte, homini baptizato necessaria est jngis oratio ad hoc quod cœlum introeat; ex altera parte, salus per baptismum non parum dependet ex virtute orationis Christi. —^{3º} Non diffiteor cœlorum aditum nobis reclusum esse per Christi *passionem*, velut per causam communem et totalem; at ideo in ejus *baptismo* cœli aperti describuntur, quia ostendendum erat baptismum esse primum vie gradum quo, applicatis patientis Christi meritis, homines ad cœlum pergere debent.

^{2º} *Pars* additur de modo quo cœli aperti sunt. —Qua in re tenendum existimamus non reseratione elementorum seu corporum cœlestium rupturâ id factum esse, sed *sensibili quadam* et *insolita apparitione*, sive (ut probabilius est) splendor in superiore aëris regione quasi hiatus et cœli aertura visus fuerit, sive in imaginatione Christi species divinitus formatæ sint quibus aperti cœli spiritualis per baptismum designaretur (art. 5 ad 2).

Conclusio 2º. — CONVENIENS FUIT UT IN CHRISTUM BAPTIZATUM SP. SANCTUS SUB SPECIE COLUMBÆ DESCENDERET.

^{1º} Concl. evincitur ratione *generali*; quippe congruum erat Sp. Sanctum sic in Christum visibiliter delabi, non sane ad eum sanctificandum qui jam sanctissimus erat, sed ut postea in omnes baptizatos invisibiliter descendere credetur. — Licet vero, ad significandum fervorem Apostolorum inter pressuras prædicantium, idem Spiritus in *igneis linguis* apparuerit, merito tamen in *specie columbæ* super Christum baptizatum descendisse refertur; quod per respectum ad baptismum christianum quadrupliciter ostenditur: *a) primo* ex simplicitate columbæ, qua exprimitur cordis sinceritas requisita in baptizatis. *b) Secundo* ex columbæ mansuetudine cui datum est ferre “ramum olivæ”; unde significatur effectus baptismi reconciliantis peccatorem cum Deo. *c) Tertio* ex gregali seu amicabili columbæ indole, qua alter baptismi

effectus, scil. ecclesiastica unitas, designatur. *d) Quartam rationem* repetit. *S. Thomas ex septem columbae proprietatis, quasi significativis septem donorum Sp. Sancti, quæ gratia baptismi secum adducit*¹.

2º Concl. expl.—a) Disputant theologi, num columba, in qua apparuit Sp. Sanctus, fuerit verum animal. Post quosdam veteres *affirmat* hic *D. Thomas* (art. 7), tum quia per facile erat Deo omnipotenti veram columbam formare; tum quia, sicuti missio visibilis Filii fuit in vero corpore, ita et missio visibilis Sp. S. contigisse non incongrue judicatur. Attamen perspicienti differentiam finis inter utramque missionem parum cogens ratio allata videbitur. Unde ipse *Angelicus* (1 S. D. XVI, Q. un., a. 3 ad 3) contrariam sententiam docuerat, quam Cajetanus, Suarez, Billuart, aliquique multi sequuntur: satis enim superque erat ad apparitionem mere *repræsentativam imago* corporea columbae oculis adstantium objecta.—*b)* Atque, quando dicitur Sp. Sanctus visibiliter in Christum descendisse, id intelligendum nou est quasi columbam *in unitatem personæ* assumpserit (quod minime requirebatur); sed hoc accipitur ratione *repræsentationis*, in quantum scil. columba dotibus suis, puritate, amore, fecunditate, etc, figurabat Sp. Sanctum vel ejus dona, eaque demonstrabat jam tunc fuisse in Christo ac fore dein in animas baptizatorum effundenda.

Conclusio 5º —CONVENIENTER, CHRISTO BAPTIZATO, VOX PATRIS FILIUM PROTESTANTIS PERSONUIT, NEMPE "HIC EST

1—“Columba enim *secus fluenta habitat*, ut inde, viso accepitre, mergat se et evadat: quod pertinet ad donum *sapientiae*, per quam sancti *secus Scripturæ divinæ fluenta resident*, ut incursum diaboli evadant.—Item columba *meliora grana eligit*: quod pertinet ad donum *scientiae*, qua sancti sententias sanas, quibus pascantur, eligunt.—Item columba *alienos pullos nutrit*: quod pertinet ad donum *consilii*, qua sancti eos homines, qui fuerunt pulli i. e. imitatores diaboli, doctrinâ nutrunt et exemplo.—Item columba *non lacerat rostro*: quod pertinet ad donum *intellectus*, quo sancti bonas sententias lacerando non pervertunt, hæreticorum more.—Item columba *felle caret*: quod pertinet ad donum *pietatis*, per quem sancti ira irrationali carent.—Item columba *in cavernis petrae nidificat*: quod pertinet ad donum *fortitudinis*, qua sancti in plagiis mortis Christi, qui est petra firma, nidum ponunt, i. e. suum refugium et spem.—Item columba *gemitum pro cantu habet*: quod pertinet ad donum *timoris*, quo sancti delectantur in gemitu pro peccatis” (art. 6 ad 4).

FILIUS MEUS DILECTUS, IN QUO MIHI COMPLACUI" (Matth. III, 17).

Dico *a) vox Patris*; quia licet sonus ille a tota sit Trinitate formatus, solus tamen Pater in ea declaratus est ut prolator creatæ vocis et testis Verbi increati.—Dico *b) quoque personuit*; quatenns vox illa fuit sonus realis, omnibus audibilis, prout clare insinuat Scriptura dicens (Luc. III, 22): *Vox de cœlo facta est.*

Conclusionis *ratio* sic assignari potest. In baptismo Christi, quasi exemplari, demonstrari debuit id quod in baptismo nostro perficitur. Atqui baptismus noster consecratur invocatione et virtute Trinitatis (Matth. XXVIII, 19). Ergo, ut in Christo baptizando totius Trinitatis mysterium demonstretur, congruum fuit, præter Christum baptizatum et Sp. Sanctum in specie columbae descendenter, Patris personam voce declarari.—*Conf.* hoc ipsum ex (art. 8 ad 3). Scil. decebat Christi *divinitatem*, attestante Patre, in *baptismo* manifestari, tum quia tunc Christus publicum officium exequi auspicabatur, tum quia filii Dei adoptivi ad similitudinem Filii naturalis instituuntur in *baptismo* cuius Christi baptizatio signum fuit.

DISPUTATIO OCTAVA

DE PROGRESSU CHRISTI IN MUNDO

Sub hoc disputationis capite inquirenda veniunt quæ, a baptismo in Jordane usque ad passionem, publicum Christi ministerium comprehendunt; ad quæ pertinent tum ejus *exempla* in more vivendi tentationesque propulsandi, tum ejus *doctrina* ac *miracula* sive in genere sive in specie spectata.—Hinc disseremus *primo* de modo conversationis Christi; *secundo* de ejus temptatione; *tertio* de ejus doctrina; *quarto* de ejus miraculis generatim sumptis; *quinto* de miraculo Transfigurationis.

QUÆSTIO PRIMA

DE MODO CONVERSATIONIS CHRISTI

Christi vita in terris considerari potest aut secundum quod *socialis* fuerit (art. 1), aut secundum *modum* quem *in societate humana* tenuerit (art. 2).

ARTICULUS I.

De conversatione Christi inter homines.

1º Præsupponimus Christum haud duxisse vitam *religiosam*, qualis ex emissione trium votorum, scil. obedientiæ, virginitatis et paupertatis, efflorescit; ait enim *D. Thomas* (II-II^a, Q. LXXXVIII, a. 4 ad 3): “Christo secundura se non competebat *vovere*, tum quia Deus erat, tum etiam quia, in quantum homo, habebat firmatam voluntatem in bono, quasi comprehensor existens.”—At 2º suboriri dubium potest, quid convenientius Christo fuerit, *solitariam* ac *eremiticam*, aut *socialem* vitam inter homines degere; cui dubio responsum mox offertur.

Conclusio.—CONGRUE CHRISTUS ELEGIT INTER HOMINES CONVERSARI; LICET QUANDOQUE NON MINUS CONGRUE SOLITUDINEM QUÆSIERIT.

1^a *Pars* est de *ordinaria* Christi vita, et suadetur dupliciter:

1^o Ex *vitæ genere*.—Quamvis enim vita contemplativa, se juntaque ab hominum tumultu, simpliciter sit melior quam ea activa vita quæ totaliter in occupatione exteriori consistit (II-II*, Q. CLXXXII, a. 1); tamen vitæ activæ opus ex plenitudine contemplationis consequens, ut doctrina et prædicatione, præeminet simplici contemplationi, sicut majus est illuminare quam lucere solum (*ibid.* Q. CLXXXVIII, a. 6). Talem vitam Christus, comprehensor simul et doctor, elegit.

2^o Ex *Incarnationis fine*.—a) Primo enim venit Christus in mundum ut *testimonium perhiberet veritati* (Joan. XVIII, 37); qua de causa ipsum oportebat, non se in solitudine occultare, sed potius in publicum procedere vitamque socialem agere.—b) Secundo venit etiam ad hoc ut homines *a peccato liberaret* (1 Tim. I, 15); pastor autem ovem perditam requirit, medicus ed infirmum accedit.—c) Tertio venit Christus ut per ipsum habeamus *accessum ad Deum* (Rom. V, 1-2); de quo cœlesti introitu congruebat fiduciam hominibus ingenerari per familiarem Domini conversationem.

2^a *Pars* eruitur ex verbis *D. Thomæ* (Q. XL, a. 1 ad 3): “Dicendum quod actio Christi fuit nostra instructio. Et ideo ut daret *exemplum præparatoribus*, quod non semper sedarent in publicum, quandoque Dominus se a turbis retraxit. Quod quidem legitur fecisse propter tria: a) quandoque quidem propter *corporalem quietem*; unde (Marc. VI, 31) dicitur quod Dominus dixit discipulis: *Venite seorsum in deserto locum, et requiescite pusillum...* b) Quandoque vero causa *orationis*; unde dicitur (Luc. VI, 12): *Factum est in illis diebus exiit in montem orare, et erat pernoctans in oratione Dei...* c) Quandoque vero, ut doceret *favorum humanum vitare*.”—Nota, lector, postremam hanc Salvatoris instructionem eamque animo commendata.

ARTICULUS II.

De vivendi more Christi Domini.

(Q. XL, art. 2-4)

Peccata, quibus homines indulgent, ad tres præcipuos fontes reduci possunt, prout instituit B. Joannes (1 Ep. II, 16) : *Omne quod est in mundo concupiscentia carnis est, et concupiscentia ocolorum, et superbia vitæ* : quibus designantur *voluptatum amor, divitiarum cupiditas, et effrena elatio*. Tale igitur vitæ genus Christus suscipere debuit, quo efficacius homines a triplici illa ad peccandum pronitatem contineret: inde habes trium conclusionum sequentium rationem et nexus.

Conclusio 1^a.—CONVENIENTER CHRISTUS NEC AUSTERAM, NEC MOLLEM, SED TEMPERATAM VITAM COMMUNIUS DUCENDAM ELEGIT.

1^o Legitur (Matth. XI, 18-19): *Venit Joannes neque manducans, neque bibens... Venit Filius hominis manducans et bibens*; ex quibus colligitur Christum, ut homines ad bonum converteret, duplicum iniisse viam, scil. magnæ austeritatis per præcursorem Joannem, per se vero moderatæ temperantiaæ.—2^o Sane Salvator noster non solitarie vixit, sed socialiter inter homines versatus est. Porro qui cum aliquibus conversatur, maxime si eos ad se attrahere velit, convenientissimum est ut se eis in vivendi genere conformet, juxta illud Ap. (1 Cor. IX, 22): *Omnibus omnia factus sum*. Ergo Christus, communī more vivens, medium quoddam inter nimiam corporis castigationem et voluptuosam mollitiem tenere debuit.—3^o Id *conf.*, quia Christus in sua conversatione exemplum perfectionis dedit quod omnibus, pro sua cuique conditione, competeteret. Atqui licet summa illa vitæ severitas, qua quis cibi potusque abstinentiam colit, valde utilis sit, non tamen *per se* ad salutem pertinet, nec majori hominum parti convenit. Ergo sapientissimum fuit quod Christus, ad commendandam austriorem vitam, jejunio quidem plurium dierum se dederet, at frequentius commu-

nem vivendi morem, severo quam suavi proximorem, sectaretur¹.

Conclusio 2^a.—CHRISTUM DECUIT IN HOC MUNDO PAUPEREM VITAM DUCERE; QUÆ HUJUSMODI FUIT UT QUANDOQUE NULLIUS REI DOMINUM HABERET.

1^a Pars ostend. quadruplici ratione.—1^o Ex *prædicatio-nis officio*. Hoc enim Christi munus potissimum fuit ut mundo veritatem prædicaret. Atqui prædicatores verbi Dei a secularium rerum cura omnino absoluti sint oportet, tum ut liberius prædicationi vaceant, tum ne, divitias possidendo, cupiditatis suspicionem injiciant. Unde ipse Dominus Apostolos mittens dixit (Matth. X, 9): *Nolite possidere aurum, neque argentum.*—2^o Ex *Redemptionis economia*. Sicut enim mortem corporalem assumpsit Christus ut nobis vitam largitur spiritualem, ita corporalem paupertatem sustinuit ut nobis spirituales divitias prouereretur, juxta illud (2 Cor. VIII, 9): *Propter vos egenus factus est...ut illius inopia vos divites essetis.*—3^o Ex *Divinitatis manifestatione*; primum namque erat ut tanto major divinitatis virtus in Christo ostenderetur, quanto per paupertatem videbatur abjectior.—4^o Ex *humilitatis exemplo*; “in eo enim qui ex necessitate pauper est, humilitas non multum commendatur; sed in eo qui voluntarie pauper est (sicut fuit Christus), ipsa paupertas est maximæ humilitatis indicium” (art. 3 ad 3).

2^a Pars decl.—Et 1^o advertimus sermonem hic non esse de *dominio excellenti*, quod certe Christo ratione Unionis hypostaticæ super omnes creaturas competebat, sed de *dominio usuali* penes homines.—2^o Negandum non est Christum aliquando rerum quarundam *dominium*, saltem *in communi*, seu simul cum discipulis, habuisse: id enim definit *Joannes XXII* (in Extrav., tit. de verb. sign.) et eruitur ex variis Scripturæ locis, præsertim ex (Joan. XII, 6; XIII, 29), ubi videmus *loculos* fuisse Christi et collegii Apostolici communes.—At 3^o nec dubium est quin interdum Christus *communi* etiam *dominio caruerit*, prout declaravit *Nicolaus IV*² (cap. *Exiit*, de verb. signif. in 6); siquidem legitur.

1—Vid. plura particularia, v. g. de vestitu et calceatu Christi, ap. Suarez, in Q. XL, Disp. XXVIII, S. 3.

2—De conciliatione inter Nicolaum IV et Joan. XXII cfr. Bel-larm., *de Rom. Pont. I. IV*, c. 14.

(Matth. VIII, 20): *Filius hominis non habet ubi caput reclinet; et insuper mulieres aliquæ sequebantur Christum, quæ ministrabant ei de facultatibus suis* (Luc. VIII, 2-3). Quo Christi exemplo inducti sunt religiosi Mendicantes¹, qui neque in particulari neque in communi temporalium dominium retinenter.—^{4º} Immo probabile videtur (ut sentiunt Suarez, Billuart, etc) Christum, non quidem regulariter aut frequentius, sed nonnunquam *mendicasse*, puta in triduo quo duodennis a parentibus aberat (Luc. II, 4⁵). Id aperte docet S. Thomas, Opusc. XIX, c. 7, nec inconveniens est: quippe ea sola reprehenditur mendicitas quæ, voluntati contraria, ad furandum mentendumve impellit. Christus vero sponte pauper ac mendicus existit.

Conclusio 3º.—CHRISTUS IN OMNIBUS CONVERSATUS EST SECUNDUM PRÆCEPTA LEGIS, QUAM MULTIPLICITER IMPLEVIT.

^{1º} Jam supra plerasque tetigimus rationes, ob quas Christus se ultro veteri Legi subjicerit. Huic subjectioni minime repugnat quod curaret homines *sabbato* (Luc. XIII-XIV), Iudeis hoc illi exprobrantibus; siquidem opus istud divinum erat, de necessitate salutis, et ad Dei cultum seu glorificationem pertinens (art. 4 ad 1).—^{2º} *Sex modis* (docet Sylvius in h. l.) Christus *legem* veterem *implevit*: scil. illam servavit; manifestavat mysteria in eâ latentia: præstítit promissa et præfigurata in lege; verum legis sensum exposuit; dedit gratiam et virtutem qua legem impleamus; illam in passione consummavit.

1—De his contra calumniam tuendis fortiter ac egregie scripsit D. Thomas, Opusc. XIX; ubi reperies optimam nostrisque etiam temporibus accommodatam ordinum religiosorum defensionem.

QUÆSTIO SECUNDA

DE TENTATIONE CHRISTI

“Uti Moyses, foederis veteris mediator, in sacra solitudine et jejunio per 40 dies ante legis promulgationem cum Deo conversatus est, ita Christus novi foederis auctor; dein victoria triplici de diabolo reportata principem mundi ejusque regnum a se iri destructum portendit. Quare Messiae jejunium et tentatio præparatio est et præludium quoddam operis cor nissi” (Knabenbauer in Matth. IV).—Tentatio Christi spectari potest vel *absolute* (art. 1), vel in suis *circumstantiis* (art. 2): en dicendorum partitio.

ARTICULUS I.

De temptatione Christi absolute sumpta.

Duo circa Christi temptationem generatim spectatam exponna se præbent, *possibilitas* et *convenientia*; de quibus Auctoris doctrinam unica conclusione bimembri comprehendemus.

Conclusio.—POSSIBILE, QUIN IMO, CONVENIENS FUIT CHRISTUM A DIABOLO TENTARI.

1^a *Pars* eruitur 1^o ex *facto* ipso ab Evang. relato (Matth. IV, 1): *Tunc Jesus ductus est in desertum a Spiritu, ut tentaretur a diabolo.* Quibus verbis exprimitur causa simul efficiens et finalis secessionis Christi in desertum: *efficiens* quidem, quæ fuit interna ac divina motio; *finalis* vero, quia,

præter propositum sibi jejunium, volebat Christus, non activam diaboli tentationem (hanc Deus permittit tantum), sed passivam hujus temptationis experientiam, ex qua nullum sibi imminere posse periculum probe sciebat.

2º Tentatio significare potest duplice actum, nempe aut *explorandi* quod non plane constat, aut *inducendi ad malum*: utroque modo *potuit* diabolus Christum tentare.—*a)* Primo namque, quanquam dæmones pluribus ex signis, sive propheticis, sive miraculosis, conjectare poterant Christum esse Deum, tamen ex altera parte perspectis in eo infirmitatis humanæ vestigiis, non ut certam atque exploratam habebant ejus divinitatem, ideoque illum tentare voluerunt: quod colligitur ex eo quia tentator narratur ad Christum accessisse *postquam esuriit* (Matth. IV, 2), et tentando dixisse: *Si Filius Dei es, etc* (*ibid.* v. 3 et 6) ¹.—*b)* Præterea, tentatio ad malum inductiva tribus modis agitur, suggestione externa ac interna, delectatione et consensu. Christum autem a diabolo tentatum contendimus per solam *externam suggestionem*.

2ª Pars ostend. quadruplici argumento.—1º Ex *Redemptoris auxiliandi modo*. Congruum enim erat ut sic Christus tentationes nostras suæ temptationis merito vinceret, sicut mortem nostram sua venerat morte superare.—2º Ex *cautelæ nostræ studio*: nam *non est servus major domino suo* (Joan. XIII, 16), ideoque si Christum ipsum, mox de baptismo reducem, diabolus ausus est tentare, quis, quantumcumque sanctus, se a temptatione immunem aestimabit? Unde dicitur (Eccli. II, 1): *Fili, accedens ad servitutem Dei, sta in justitia et timore, et prepara animam tuam ad temptationem*.—3º Ex *beneficio exempli*, quo a Christo instruimur quali oporteat animi constantiæ temptationes vincere, ut coronam pugnæ mereamur.—4º Ex *fiducia* quam nobis de sua misericordia Christus inspirat; *non enim habemus pontificem*

1—Quanam ratione dæmones Christum successive cognoverint, eruditæ inquirit *Suarez*, Disp. XXXI, S. 3; ubi statuit priuum eos certo agnovisse in Christo Messiam, dein (ante mortem) probabiliter putasse ipsum esse Deum, post resurrectionem vero nullam de ejus Divinitate dubitationem habuisse.

qui non possit compati infirmitatibus nostris: tentatum autem per omnia etc (Heb. IV, 15) 1.

ARTICULUS II.

De circumstantiis temptationis Christi.

(Q. XLI, a. 2-4)

Tentatio Christi considerari potest quoad *locum, tempus et modum* seu ordinem; quæ tria trium conclusionum materiam suppeditant.

Conclusio 1^a.—CONGRUE CHRISTUS IN DESERTO TENTATIONEM PASSUS EST.

1^o Enim vero Christus, ob causas mox recensitas, propria voluntate se diabolo ad tentandum exhibuit. Atqui diabolus eo maxime ducitur ad aliquem attentandum, quod eum solitarium cernit suæque perfectionis studio vacantem. Igitur congruum fuit ut Salvator in eremum secederet quasi ad certaminis campum gradiens.—2^o Nemo objiciat, periculosum in hoc datum fuisse a Christo exemplum. Duplex enim *temptationis occasio* secernitur: *una ex parte hominis se peccato exponentis* (a qua Christus, utpote impeccabilis, longe absfuit), et hæc constanti opera vitanda est; *altera ex parte diaboli* invidentis iis qui magna in sūt bonum. Deique honorem suscipiunt, et hæc, nedum vitanda sit, magis est conquienda secundum Sp. Sancti consilium et Salvatoris exemplum.

1.—Consolatoria sunt quæ scribit Angelicus (Opuse. LIX, a. 11): “Sic paratus est (Christus) cadentem suscipere et eripere fugientem, ut videri possit, relictis omnibus, ei soli operam dare. Propterea expedit omni anime Deum semper intendere tanquam proprium, non tantum adjutorem, sed etiam *inspectorem*. Unde legitur de B. Antonio quod cum semel a dæmonibus in variis formas mutantis laceratus fuisset, subito quidam radius lucis dæmones effugavit, statimque sanatus, et Christum presentem intelligens, dixit: *Ubi eras, bone?* Et vox ad eum: *Antoni, hic eram, sed expectabam certamen tuum.*”

Conclusio 2^a. — CONVENIENS FUIT UT CHRISTUS POST JEJUNIUM TENTARETUR. — Ubi præmittendum censeo quod nonnulli (*S. Thom., Suarez, etc*) uti probabile habent, scil. Christum, per 40 dies secessus, frequentes diaboli impugnationes expertum esse; nunc vero non agitur nisi de *tentationibus visibilibus* quas narrant Matthæus et Lucas.

Itaque triplex ratio assignari potest temptationis Christi *post transactum in contemplatione et oratione jejunium*: — 1^a est, ut doceret austeritatem vitæ, temptationis probatione firmataam, optimam esse ad prædicandi officium dispositionem. Hinc dicitur (*Act. I, 1*) quod *cœpit Jesus fucere et docere*; — 2^a est, ut ostenderet quantum intersit nos jejunio sive carnis sive voluntatis contra temptationes armari. Unde Ecclesia ex Christi exemplo jejunium quadragesimale, veluti saluberriam virtutis initiationem, instituit; — 3^a est, ut demonstraret nec eos qui corpus proprium affligunt posse seipso ab omni incursu diabolico securos aestimare.

Conclusio 3^a. — CONVENIENTISSIMO MODO SE CHRISTUS A DÆMONE TENTARI PERMISIT, TENTATIONEMQUE PROPULSAVIT.

1^a *Pars* ostend. — 1^o Ex *ordine* temptationis. Astutus enim animarum hostis virum spiritualem non statim tentat de gravibus peccatis, sed a levioribus incipiens paulatim ad graviora progreditur: quod in tentando protoparente Adamo observatum est. Siquidem primo de esu ligni vetiti (*Gen. III, 1*), secundo de inani scientiæ gloria (v. 5), tertio de extrema cupiditate divinæ similitudinis (*ibid.*) mentem ejus sollicitavit. Jam vero hunc ipsum temptationis ordinem servavit diabolus in impugnando novo Adam, Christo. Quippe *a) primo* tentavit ipsum de *cibo* per miraculum conversionis lapidum in panem inordinate obtainendo, cum se cibandi media communia suppeterent. *b) Secundo* petiit a Christo ut per ostentationem seu *vanam gloriam* se de pinnaculo templi deorsum mitteret ac præsumptuose angelicam open exspectaret. *c) Tertio*¹ temptationem ad id perduxit quod es. *maxime cupiditatis*, gestu, sermone, descriptione proponens mundanas divitias ac illecebras quas Christus per adorationem mali Angeli

1—Hunc Matthæi ordinem ordini Lucæ in triplici Christi temptatione preferendum esse plures tum antiqui tum moderni sentiunt; inter quos Fouard, *La Vie de N. S. J. C.*, t. I, l. II, ch. 3.

adipisci suadebatur.—^{2º} Ex materia temptationis. Nam *a)* ex una parte tres illæ temptationes (ut scite demonstrat Cajet. in art. 4) hujusmodi erant quibus sperare poterat diabolus se exploraturum num Christus esset Filius Dei; *b)* ex altera parte, tria illa temptationum capita, que sunt *carnalis, spiritualis et mundana* cupiditas, virtute cunctas peccandi causas præcontinent.

^{2º} Pars ut illustretur, referre primum juverit verba *Angelici* (art. 4 ad 6): “Christus, cum passus fuisset temptationis injuriam, dicente sibi diabolo: *Si Filius Dei es* etc, non est turbatus nec diabolus increpavit. Quando vero diabolus Dei sibi usurpavit honorem, dicens: *Hæc omnia tibi dabo, si cadens adoraveris me, exasperatus* est et repulit eum dicens: *Vade, Satana;* ut nos illius discamus exemplo nostras quidem injurias æquanimiter sustinere, *Dei autem injurias nec usque ad auditum sufferre.*”—Succedit *Suarzeius* (in Q. XLI, Disp. XXIX, S. 4, n. 3) ex Christi exemplo docens temptationes superandas: “*primo*, verbo Dei et Scripturis Sanctis utendo; *secundo*, divina mandata in memoriam revocando; *tertio*, divinis promissionibus confidendo; *quarto*, tentatoris insidias percallendo, et nulla in re earum, quas intendit, ei cooperando, sed magnâ fiduciâ in Deum, et auctoritate etiam, si opus fuerit, illum repellendo.”

QUÆSTIO TERTIA

DE DOCTRINA CHRISTI

Qualis quantaque in Christo fuerit scientiæ perfectio qua totius humani generis doctor constitueretur, alibi (Disp. III, Q. IV) satis, ni fallor, declaratum est.—Neque sub presenti capite intenditur objectiva seu *dogmatica* eorum quæ Christus docuit discussio (id enim vario Theologiae tractu peragitur), sed magis *historica* Christi doctoris consideratio.—Scilicet inquiremus cum D. Thoma tum de genere *auditorum* quos Christus docere debuerit (art. 1), tum de *docendi modo* quem in tanto Magistro mirandum sane nemo ullus non confitebitur (art. 2).

ARTICULUS I.

De auditoribus Christi docentis.

(Q. XLII, a. 1)

Ex historia evangelica compertum habemus Christum, in obeundo munere sibi demandato, vix egressum esse de Palestinae limitibus solisque *Judeis* communiter prædicasse; quod ipse testatus est dicens (Math. XV, 24): *Non sum missus nisi ad oves quæ perierunt domus Israël*.—Dubium est modo dissipandum, num conveniens fuerit omnium hominum Salvatorem intra limites illos verbum veritatis coercere.

Conclusio.—CONVENIENTER CHRISTI PRÆDICATIO A JUDÆIS INSTRUENDIS, HISQUE SOLIS, PROFECTA EST, UT DEINCEPS MEDIANTIBUS APOSTOLIS AD GENTES DEVENIRET.

1^a *Pars* suadetur ex quatuor rationibus:—1^o est *historica*, nempe ut Christus ostenderet per suum adventum impleri promissiones antiquitus factas, non gentilibus, sed Judæis, qui eas religiose custodiebant, subindeque paratiiores erant ad Messiam agnoscendum. Hinc Ap. (Rom. XV, 8): *Dico Christum Jesum ministrum fuisse circumcisio[n]is (Juda[or]um) propter veritatem Dei, ad confirmandas promissiones*

patrum. — 2^a est *dogmatica*; cum enim divina Providentia ordinem hierarchicun in dispensandis suis beneficiis observet, v. g. penes Angelos superiores et inferiores, idem ordo exigebat ut Judæis vero Deo propinquioribus Christi doctrina prius proponeretur, et per eos ad gentes transmittetur. — 3^a est *apologetica*, ut ne mpe Judæos sibi conciliaret eisque excusationem auferret quam verisimiliter allegassent, dicentes ideo se Dominum rejecisse, quia ad gentes et Samaritanos processerit. — 4^a est *moralis*; licet enim jam ex unione hypostatica Christus super gentes æque ac Judæos potestatem generalem haberet, hujus tamen potestatis *exercitium* in gentiles meruit per passionem et crucis victoriam; quod significatum intelligitur his verbis (Joan. XII, 24-25): *Nisi granum frumenti, cadens in terram, mortuum fuerit, ipsum solvum manet; si autem mortuum fuerit, multum fructum affert.* Cf. Apoc. II, 26; Philipp. II, 8-10.

2^a *Pars manifesta* est ex pluribus Scripturæ locis, signatiis ex prophetia (Is. XLIX, 6): *Parum est ut sis mihi servus ad suscitandas tribus Jacob... Ecce dedi te in lucem gentium;* et (LXVI, 19): *Mittam ex eis qui salvati fuerint ad gentes... Et annuntiabunt gloriam meam gentibus.* Christus enim fuit in lumen et salutem gentium per discipulos ad prædicandum missos: quod universa Religionis historia confirmat. — Ne tamen populis exteris salutis spes præclusa videretur, aliquos gentilium, ut mulierem Samaranam et Chananæam, Salvator per se instruxit aut ad fidei beneficia admisit.

ARTICULUS II.

De Christi docendi ratione.

(Art. 2-4)

Narrat Evangelium quod Christus tanta doctrinæ vi Judæos edoceret et argueret ut ipsi pontificum et Phariseorum ministri exclamare coacti sint (Joan. VII, 46): *Nunquam sic locutus est homo sicut hic homo.* — Omissa doctrinæ Christi speculativæ et moralis *objectivæ excellentiæ* (qua

divinitas legationis Messiae ipsiusque personæ evincitur), præstantiam Christi doctoris modo illustrabimus ex singulari docendi ratione qua doctores omnes, velut sapientissimus antecessor, præcelluit.

Conclusio.—INTER EA QUÆ DOCTOREM CHRISTUM PRÆCIPUE COMMENDANT EMINENT FLAGRANS VERITATIS ZELUS, APTA DOCTRINÆ DIVULGATIO, NOBILIOR DOCENDI METHODUS, MAXIMA QUOQUE IN DICENDO POTESTAS.

1º *Flagrans veritatis zelus.*—*a)* Studium hoc potissime enituit in eo quod Christus acriter et publice obstinationem et vitia suorum auditorum intrepidus carperet, juxta illud prophetæ (Is. VIII, 14): *Erit... in lapidem offensionis, et in petram scandali, duabus domibus Israël.* — *b)* Sane “salus multitudinis est preferenda paci quorumcunque singularium hominum. Et ideo quando aliqui sua perversitate multitudinis salutem impediunt, non est timenda eorum offensio a predicatore vel doctore, ad hoc quod multitudinis saluti provideat. Scribe autem, et Pharisæi, et principes Iudeorum sua malitia plurimum impediabant populi salutem, tum quia repugnabant Christi doctrinæ, per quam solam poterat esse salus, tum etiam quia pravis suis moribus vitam populi corrumpebant. Et ideo, Dominus, non obstante offensione eorum, publice veritatem docebat quam illi oderant, et eorum vitia arguebat” (art. 2) ¹.

2º *Apta doctrinæ divulgatio.*—*a)* Christus enim, nedum ex invidia aliave de causa scientiam suam occultaverit, libenti prorsus ac generoso animo eam integraliter communicavit; quare ipse dixit (Joan. XVIII, 20): *In occulto locutus sum nihil.* Quod ex ejus persona jampridem auctor sacer sic asseruerat (Sap. VII, 13): *Quam (sapientiam) sine fictione didici, et sine invidia communico, et honestatem illius non abscondo.* — *b)* Præterea, non solum paucis, sed omnibus Iudeis, doctis et indoctis, discipulis et turbæ, doctrinam suam palam proposuit; ex quo prædicatores utiliter discant non solum honorificos ambire cœtus, sed et viles et rusticanas

1—Aureum plane documentum altoque animo retinendum; quo reprehenduntur et *molliorum prædicatorum* lenocinia et *liberum* hodiernorum placita, qui falsam pacem in veritatis detrimentum ac ruinam ore mellifluo dictitant.

animas haud deditnari.—*c*) Apto quoque et *accommodato* auditoribus sermone Christus locutus est, ita ut turbis quidem nonnulla sapientie divinæ arcana sub parabolam seu familiarium similitudinum cortice exponeret; discipulis vero magis ad illa capienda idoneis nudam et apertam veritatem proferret.

3º Nobilior docendi methodus.—*a*) Excellentior enim doctori excellentior congruit docendi modus. Porro nobilis est doctrinam auditrum cordibus *oraliter* imprimere quam *scripto* tradere; hoc enim ad illud ut medium ad finem ordinatur, atque immediata illa mentis impressio proprius ad Dei actionem accedit. Ergo etc.—*b*) Item, “lex vetus in sensibilibus figuris dabatur, ideo etiam convenienter sensibilibus signis scripta fuit. Sed doctrina Christi, quæ est *lex spiritus vitæ*, scribi debuit *non atramento, sed spiritu Dei vivi, non in tabulis lapideis, sed in tabulis cordis carnalibus*, ut Ap. dicit 2 Cor. III, 3” (art. 4 ad 2).—*c*) Rursus doctrina Christi altior et amplior est quam litteris comprehendendi valeat, juxta illud (Joan. XX, 30): *Multa quidem et alia signa fecit Jesus...quæ non sunt scripta in libro hoc*; cf. *ibid.* XXI, 23. Si autem Christus scripto doctrinam suam mandasset, nihil majus de ea homines aestimarent quam quod Scriptura contineret.—*d*) Tandem, Christo nihil scribente (nullum enim ejus librum canon Scripturæ exhibet), hoc modo provisum est ut *ordine quodam* doctrina, ab ipso discipulis proposita, per hos dein verbo et scripto ad omnes perveniret.

4º Maxima in dicendo potestas.—*a*) Hoc testatur Evang. (Matth. VII, 29): *Erat enim docens eos sicut potestatem habens.*—*b*) Præterea “in hoc maxime potestas divina in Christo monstrata est quod *discipulis suis tantam virtutem contulit* in docendo, ut gentes, quæ nihil de Christo audierant, converterent ad ipsum” (art. 1 ad 2).—*c*) “Potestas autem Christi in docendo attenditur et quantum ad *miracula* per quæ doctrinam suam confirmabat; et quantum ad *efficaciam persuadendi*; et quantum ad *auctoritatem loquentis*, quia loquebatur quasi dominium habens super legem, cum diceret: *Ego autem dico vobis*; et etiam quantum ad *virtutem rectitudinis*, quam in sua conversatione monstrabat, sine peccato vivendo” (*ibid.*)¹.

1—Leg. Monsabré, Conf. 45^o, *Le Docteur* (1880).

QUÆSTIO QUARTA

DE MIRACULIS CHRISTI

Post Doctorem, *Thaumaturgum* considerare libet; cuius opera tanto magis omnium sanctorum operibus præstiterunt, quanto perfectius Christi humanitas, seu docile instrumentum, Divinitati coniungebatur (cf. Disp. III, Q. V).—De miraculis Christi solita brevitate dissertabimus primum *in genere* (art. 1), deinde *in specie* (art. 2).

ARTICULUS I.

De miraculis Christi in genere.

(Q. XLIII, 1-3)

Exploratam hic sive in Philosophia sive in Theologia fundamentali præsupponimus theoriam generalem miraculorum.—Nec propositum est contra hodiernos incredulos et scientiam (ut aiunt) *criticam* singula Christi opera miraculosa vindicare; quod magis ad Apologetas¹ aut Commentatores Scripturæ pertinet.—Duo tantum pro instituti nostri modulo inquiremus, scil. *num* et *quando* Christus miracula operari debuerit.

Conclusio 1^a.—NON QUIDEM ABSOLUTE NECESSARIUM, AT VALDE CONVENIENS FUIT UT CHRISTUS MIRACULA PERPETRARET.

1^a *Pars* ex eo innotescit, “quia Christi virtus non erat alligata miraculis, sed poterat *aliis modis* veritatem doctrinæ sue ostendere et confirmare, atque ita eam prædicare ut exteriorius sufficienter proponeretur, et interiorius etiam sufficienter

1—Cf. Portmans, *La Divinité de J. C.*, Troisième Etude: *Les œuvres de J. C. sont les œuvres d'un Dieu.*

excitaret atque illuminaret hominem" (*Suarez*, Disp. XXXI, S, 1, n. 5).—Nec obstant verba Christi (Joan. XV, 24): *Si opera non fecissem in eis quæ nemo alius fecit, peccatum non haberent.* Ibi enim (ut probabilius exponitur) loquitur Christus *ex suppositione* prædictionum propheticarum de futuris Messiae miraculis; quæ si ipse non præstisset, nequam dignus esset cui fides Messiana adhiberetur.

2^a *Pars prob.*—Et 1^o hoc spectat commendatio suorum miraculorum a Christo facta (Joan. X, 38): *Si mihi non vultis credere, operibus credite;* nam (*ibid.* V, 36) *ipsa opera, quæ ego facio, testimonium perhibent de me.*—

2^o Divinitus homini conceditur miracula patrare propter duo: *primo* quidem et principaliter in *confirmationem doctrinæ* quæ rationem humanam excedit, ideoque per argumentum divinæ virtutis probari indiget; *secundo* ad ostendendam (saltem ordinarie) *præsentium Dei in homine* per gratiam. Atqui utrumque circa Christum erat hominibus manifestandum, scil. tum quod doctrinam traderet divinam, tum quod non adoptionis tantum, sed hypostaticæ unionis gratiâ esset Filius Dei. Ergo.—3^o Non diffitemur majoris esse meriti (per se) credere sine miraculis quam miracula ad credendum requirere, et illo primo modo nonnulli discipuli (de quibus Joan. I, 35 sqq.) Christo adhæserunt; at iis qui cor suum obdurant melius est ut vel per miracula convertantur ad fidem quam quod in infidelitate permaneant (art. 1 ad 3).

Conclusio 2^a.—CONGRUE CHRISTUS MIRACULA AGERE AUSPICATUS EST SUB INITIO VITÆ SUÆ PUBLICÆ, hoc est in Canæ nuptiis (art. 3).

1^o *Rem ipsam assertam legimus* (Joan. II, 11): *Hoc fecit initium signorum Jesus in Cana Galilææ.* Qua de causa fidem facere nequeunt quæ in pseudo-evangelio (*de infuntia Salvatoris*) narrantur circa miracula Christi-pueri, quæque intemperato cuidam pietatis studio adscribenda sunt. Nec enim, positis præmaturis illis operibus, opus fuisset ministerio Joannis præcursoris ad Messiam manifestandum.—2^o *Ratio rei superius enunciata est*, quia miracula patrata sunt a Christo ut et doctrinam suam confirmaret et se divina virtute pollere ostenderet. Porro, a) quod ad *primum* attinet, non erant miracula prius facienda quam Doctoris vox resonaret; Christus autem (ut jam constitit) nec incœpit nec incipere debuit

suum magisterium ante perfectam ætatem. b) Quantum ad secundum, sic decuit Christum signis portentosis deitatem suam demonstrare ut nullum fidei de veritate suæ humanitatis præjudicium fieret; quod exigebat eum in prima ætate a miraculis faciendis abstinere, ne a spectantibus existimaretur phantasma seu spiritus in carne magis quam homo.

ARTICULUS II.

De singulis miraculorum Christi speciebus.

(Q. XLIV)

Christum congruebat miraculose agere, nec qualitercumque, sed ita ut, quasi supremus omnium Dominus, universam naturam creatam ab angelicis spiritibus ad imas usque materiales creaturas sibi plene famulanterque subjectam moderari videretur. Idecirco miracula, quæ fecit, in quatuor classes a D. Thoma præclare distribuuntur vio quadruplici distinctione *Angelorum, corporum cœlestium, hominum rerumque inferiorum.* Totidem statuentur conclusiones.

Conclusio 1^a. — CONVENIENTER CHRISTUS MIRACULA OPERATUS EST CIRCA SPIRITUALES SUBSTANTIAS (art. 1).

1^o *Circa Angelos bonos.* — Etenim homines per Christum erant spiritibus cœlestibus consociandi, secundum illud (Coloss. I, 20): *Pacificans per sanguinem crucis ejus sive quæ in terris, sive quæ in cœlis sunt.* Jamvero ad extandum in hominibus desiderium angelicæ illius societatis apprime expediebat Angelos sensibiliter apparere: quod quidem opportune factum est in Christi nativitate, resurrectione et ascensione.

2^o *Circa Angelos malos.* — a) Ut enim significaretur dæmonum potestatem a fidelibus excludendam esse et principem hujus mundi ejiciendum foras (Joan. XII, 31), recte Christus obcessos a dæmonibus liberavit. — b) Porro hæc liberatio, miraculose effecta, principaliter ordinabatur ad salu-

*m ad
atem
uani-
cate a
retur*

*tem animæ, ideoque ut homines exemplis sensibilibus di-
scerent quam gravis et nefasta sit diaboli tyrannis, permisit
Dominus spiritus nequam, quos ejiciebat, nocumentum
aliquid inferre vel in corpore (v. g. hominem discerpendo)
vel in rebus (v. g. porcos ingrediendo et præcipitando in
mare).*

Conclusio 2^a. — CONVENIENTER CHRISTUS MIRACULA QUÆ-
DAM PATRAVIT CIRCA CŒLESTIA CORPORA (art. 2).

*1^o Namque miracula Christi talia esse debebant quæ mani-
festius ejus doctrinæ ac personæ divinitatem demonstrarent.
Hoc autem non ita evidenter ostenditur per transmutationes
corporum inferiorum, quæ tot causarum actioni particulari
subjacent, quam per immutationem cursus aut influxus cor-
porum cœlestium firmiores seu universaliores sidereæ cœco-
nomiæ leges observantium. Ergo conveniens fuit ut, quando-
que saltem, Christus etiam circa orbes cœlestes miracula
perageret.*

*2^o Id maxime fieri debuit, quando infirmitas humanæ
naturæ patentius se prodens illustriora quoque in Christo
divinitatis argumenta requireret :—a) Hinc in Christi *nati-
vitate*, ne tanta pueruli humilitas cœlestem ejus originem
offuscaret, insolita in cœlo stella visa est quasi Dei ipsius
protestatio.—b) Hinc etiam in *passione*, ubi major adhuc
apparuit humanitatis Christi demissio, stupendiora cœli phæ-
nomena produci oportuit; idcirco *tenebræ factæ sunt in
universam terram... et obscuratus est sol* (Luc. XXIII,
44-45) per radiorum suspensionem aut nubium interposi-
tionem, aut (prouti quidam senserunt) per eclipsim præter-
naturalen.*

Conclusio 3^a. — CONVENIENTER CHRISTUS INNUMERA FERE
EGIT MIRACULA CIRCA HOMINES (art. 3).

*1^o Circa animas.—a) Præter enim justificationem quæ
communiter non est miraculum, sed ad quam quasi ad finem
miracula ordinantur, Christus *corda* quorumdam peccatorum,
v. g. latronis in cruce, extraordinarie commovit et simplicibus
discipulis divinam *sapientiam* infudit, mirantibus Judæis
(Act. IV, 13); quæ duo possunt dici miracula non quidem
quantum ad internam mutationem, sed quantum ad externam
manifestationem.—b) Miraculosa Christi virtus non minus*

in hoc eluxit quod (sensu Patrum, *Hieron.*, *August.* etc.) modo majestate sua soloque faciei fulgore homines ad se *alliceret* (Matth. IX, 9), modo ignea quadam oculorum raditione eos *perterrereret* aut prosterneret (Matth. XXI, 12; Joan. XVIII, 6), modo vi occulta minitantibus turbis *se illico subduceret* (Luc. IV, 30; Joan. VIII, 59).

2º Circa corpora.—*a)* Nam ea quæ sunt ad finem debent fini esse proportionata. Atqui Christus ad hoc in mundum venerat et docebat ut homines salvos faceret (Joan. III, 17). Ergo conveniens fuit ut *curando miraculose* homines (quod frequentissime ac diversissime præstítit) se spiritualem ac universalem hominum salvatorem esse ostenderet. Quam ob rem, quoties alicui corpori sanitatem restituebat, toties ægrotantis animam etiam curabat aut utecumque reficiebat, sic demonstrans quanta sœpe connexio sit inter peccata animæ et vitium corporis.—*b)* *Modus* miraculorum, quibus Christus corporum infirmitatibus tanto misericordiae sensu subveniebat, ex tribus illustrari potest. *Primo* non quomodocumque, sed *perfecte* sanabantur niseri Christo oblati ejusque actioni beneficæ subjecti. *Secundo* frequenter in curandis infirmis Salvator non sola potestate divina *imperans* utebatur, sed ministeriū quoque *sui corporis* in bonum hominum assumpti adhibebat, ægrotos tangendo, manus eis imponendo, oculos eorum liuendo etc. *Tertio* communiter sanationes illas miraculosas *in instanti* exequebatur; attamen interdum eas gradatim perficere voluit, prout factum est in casu cæci (Marc. VIII, 23) qui, aut in pœnam sue infidelitatis, aut in uajorem humanæ caecitatis manifestationem, per gradus quosdam visum recuperavit.

Conclusio 4º.—CONVENIENTER CHRISTUS PLURA FECIT MIRACULA CIRCA CREATURES IRRATIONALES (art. 4).

Ratio luculenta suppetit ex demonstranda divinitate Christi per ejus dominium in omni creaturam: unde tum animalia, tum plantæ, tum varia naturæ elementa præpolenti Thaumaturgo obsequium miraculosum præstiterunt:—*a)* *animalia* quidem, saltem *aquatica* (terrestria enim, sensitivæ naturæ nostræ propinquiora, satis in homine comprehendebantur). Quo pertinet copiosa piscium captura, quam describunt Lucas (V) et Joannes (XXI).—*b)* *Plantæ* quoque, puta quando Christus verbo sicum arefecit (Matth. XXI, 19);

quod quidem, quanquam non erat tempus ficorum (Marc. XI, 18), congrue peregit ad significandam suam potestatem et justitiam in Judæos fructibus vacuos.—c) Varia tandem *naturæ elementa*: panes enim multiplicavit (non per creationem, sed per extraneæ materiæ conversionem), ventis et mari efficaciter imperavit. “Circa passionem *divisum est velum* ad ostendendum reserationem mysteriorum legis; *aperta sunt monumenta*, ad ostendendum quod per ejus mortem mortuis vita daretur; *terra mota est et petras scissæ sunt* ad ostendendum quod lapidea hominum corda per ejus passionem emolirentur, et quod totus mundus virtute passionis ejus erat in melius commutandus” (resp. ad 3)¹.

1—Leg. Monsabré, Conf. 46^o: *Le thaumaturge et le prophète.*

QUÆSTIO QUINTA

DE TRANSFIGURATIONE CHRISTI

Non solum circa cuncta creaturarum genera, sed et circa *seipsum* Christus præclara quædam edidit prodigia, inter quæ recensetur *transfiguratio*: de ea nunc agere propositum est illam considerando vel secundum *se* (art. 1), vel secundum *circumstantias* (art. 2).

ARTICULUS I.

De transfiguratione secundum se.

(Q. XLV, a. 1-2)

Transfigurationis nomine intelligitur illa “claritatis *assumptio*” ab Evangelistis descripta, qua *resplenduit facies* Christi *sicut sol, vestimenta autem ejus facta sunt alba sicut nix* (Matth. XVII, 2);—ex quo nemo intulerit substantiam ipsam corporis Christi fuisse immutatam: quippe per illa verba tantum significatur insolitus faciei splendor et candor vestium.—Duobus responsum dabiuus, nempe *qua de causa*, et quonam *claritatis genere* Christus se coram discipulis transfiguraverit.

Conclusio 1^a.—CONVENIENS FUIT UT CHRISTUS SE SUIS DISCIPULIS TRANSFIGURATUM OSTENDERET (art. 1).

Etenim Dominus, prenuntiata sua passione, discipulos induxerat ad sectanda magistri patientis vestigia, eo quod *per multas tribulationes oportet nos intrare in regnum Dei* (Act. XIV, 21); per hoc autem homo incitatur ad asperum iter ingrediendum, quod ei sub jucunda præmii specie viæ terminus reveletur. Atqui terminus passionis Christi fuit non solum gloria animæ (qua jam fruebatur), sed et corporis felicitas; cui justorum sors adsocianda est, juxta illud (Phil. III,

21) : *Reformabit corpus humilitatis nostræ, configuratum corpori claritatis sue.* Ergo etc.—Non absimilia locutus est S. Leo M. (Serm. 51, c. III) de transfiguratione dicens : “ Illud principaliter agebatur, ut de cordibus *discipulorum* crucis scandalum tolleretur ; nec conturbaret eorum fidem voluntariæ humilitas passionis, quibus revelata esset absconditæ excellentia dignitatis. Sed non minore providentia spes sancte Ecclesie fundabatur, ut *totum corpus Christi* agnosceret quali esset commutatio donandum, et ejus sibi honoris consortium membra promitterent qui in capite præfusisset.”

Conclusio 2^a.—CLARITAS CHRISTI IN TRANSFIGURATIONE FUIT CLARITAS GLORIÆ QUANTUM AD ESSENTIAM, NON TAMEN QUANTUM AD ESSENDI MODUM (art. 2).

1^a *Pars* ostend.—Claritas corporis gloriosi, juxta quamdam proportionis legem, ab animæ claritate derivatur ; quod autem in Christo mortalem vitam degente præmatura animæ gloria non redundaret ad corpus, dispensatione divina factum est, ut Salvator in corpore passibili redemptionem nostram expletet. Atqui ex una parte Christo per hoc adempta non est *potestas* extendendi gloriam animæ ad corpus ; ex altera parte constat de facto corpus ejus fuisse in transfiguratione claritate perfusum. Ergo reliquum est ut hæc corporea Christi claritas a Divinitate simul animæque gloria processisse dicatur.

2^a *Pars* decl. ex tribus differentiis inter corpus Christi *transfiguratum* et corpus *glorificatum*.—*a)* Nam ad corpus glorificatum redundant claritas ab anima sicut qualitas quædam permanentis ; in transfiguratione vero effulsiit eadem claritas per modum *passionis transcendentis*.—*b)* In glorificatione claritas, agilitas, subtilitas, impassibilitas, se habent ut *dotes* sibi invicem connexæ ; in transfiguratione autem sola fuit claritas (quin dici posset dos seu qualitas immanens), etsi Christus aliqua trium aliarum *dotium vestigia* interdum ostenderit, puta ambulando super mari, egressiendo de clauso utero Virginis, aut de manibus Judæorum se illæsum eripiendo.—*c)* Tandem fulgere corporaliter in corpore gloriose naturale quiddam, non miraculosum, est ; quod autem fulgor solis in corpore Christi passibili apparuerit, id *miraculi rationem* habuit.

ARTICULUS II.

De circumstantiis transfigurationis.

(Art. 3-4).

Ex Evangelio (Matth. XVII, 1) habemus transfigurationis *locum* fuisse *montem excelsum*¹, quem ideo Christus elegisse censetur, quia "necesse est omnibus qui Deum contemplari desiderant, ut non in infimis voluptatibus jaceant, sed amore supernorum semper ad cœlestia se erigant" (S. Th., Opusc. LIX, a. 16).—Porro ex gloria corporis transfigurati quasi effectus prodiit *vestium fulgor*, ad designandam futuram sanctorum claritatem quæ superabitur a claritate Christi, sicut candor nivis à solis splendore exceditur (art. 2 ad 3); justi enim sunt veluti Christi vestes et ornamentum.—Jam ad reliqua transfigurationis adjuncta, scil. *testes* et *Patris testimonium*, festipamus.

Conclusio 1^a. — CONVENIENTER CHRISTUS EX UTROQUE TESTAMENTO TESTES TRANSFIGURATIONIS ASSUMPSIT (art. 3), prout legitur (Matth. XVII; Marc. IX; Luc. IX).

1^o Christus transfigurari voluit ut suam hominibusque communicandam ostenderet gloriam. Jam vero ad gloriam cœlestem adducuntur per Christum homines, non solum qui post eum fuerunt, sed et qui eum praecesserunt; unde, eo ad passionem properante, turbæ praecedentes et sequentes ei clamabant *hosanna* (Matth. XXI), quasi salutem petentes. Ergo conveniens fuit ut tum de *Veteri*, tum de *Novo Testamento* communis redemptionis et gloriæ testes adessent.

2^o De *Veteri* Testamento apte inducti sunt *Moyses* et *Elias*; ² de *Novo* autem, *Petrus*, *Jacobus* et *Ioannes*.—Nam quantum ad 1^m, plures a Patribus assignantur rationes: e quibus a) una est, ut Christus præclarissimorum virorum

1—Per illas voces *Thabor* significari communior suasio est; quam contra quosdam recentiores defendant Fouard (*La Vie de N. S. J. C.*, l. V, c. 3) et Knabenbauer (in Matth. XVII, 1).

2—Juxta Auctorem (art. 3 ad 2), anima *Moysis* non in proprio, sed in *assumpto* corpore apparuit; *Elias* autem secundum proprium corpus venisse creditur de illo eminenti loco (quicunque sit) ad quem in curru igneo raptus est.

antiquæ Legis sibi obsequentium *Dominum* se demonstraret ; b) *altera* est, ut per *legem*, quam dedit Moyses, et per *prophetas*, inter quos præcipuus fuit Elias, se prædicatum ac præmonstratum fuisse ostenderet.—Quantum ad 2^m, advertemus alta mysteria non esse omnibus immediate exponenda, sed per majores, ceu veritatis nuntios, suo tempore ad alios deferenda esse. Quam ob rem Christus tres potiores gloriæ suæ testes assumpsit, nempe *Petrum* ardore et potestate summa, *Ioannem* virginitate divinoque amore, *Jacobum* futuri prærogativa martyrii excellentem.

Conclusio 2^a.—CHRISTUM IN TRANSFIGURATIONE DECEBAT TESTIMONIO PATERNÆ VOCIS HONORARI (art. 4).

Sane 1^o adoptio hominum in filios Dei fit secundum quamdam imaginis conformitatem ad Filium Dei naturalem, *imperfecte* quidem per gratiam viæ, *perfecte* vero per gloriam patriæ ; adeo ut imitandam illam Filii Dei dignitatem præcognoscere perutile sit planeque conveniens. Atqui primam gratiam per baptismum consequimur ; in transfiguratione autem revelata est claritas futuræ gloriæ. Ergo tam in baptismo quam in transfiguratione congruebat naturalem Christi filiationem hominibus manifestari testimonio Patris dicentis : *Hic est Filius meus dilectus etc.*—Quod quidem in utroque eventu factum est parallela *Trinitatis* demonstratione : sicut enim in baptismo, ita et in transfiguratione apparuit Pater in voce, Filius in homine, Sp. Sanctus vero (loco columbæ) visus est in nube lucida obumbrante discipulos electorumque protectionem contra adversa quæque designante.

2^o “ Conveniens fuit discipulos voce paterna *terreri* et prosterni ut ostenderetur quod excellentia illius gloriæ, quæ tunc demonstrabatur, excedit omnem sensum et facultatem mortalium... Ab hac autem fragilitate sanantur homines per Christum, eos in gloriam adducendo ; quod significatur per hoc quod dixit eis : *Surgite, nolite timere*” (resp. ad 4).

DISPUTATIO NONA

DE EXITU CHRISTI AB HOC MUNDO

Christo, rationalium creaturarum capiti, tria attribuuntur munera præcipua, scil. *Doctoris*, *Sacerdotis* et *Regis*.—Atque *Doctor* ille seu *Propheta* e cœlo profectus, quanta scientiæ laude, quanta docendi vi, auctoritate, nobilitate præstiterit, satis a nobis supra exploratum est; qui per totum vitæ suæ sive privatæ sive publicæ curriculum, et de imo antri bethlehemitici et de alta crucis cathedra, verbis et factis, documentis et exemplis, hominum mentes instruxit et collustravit.—Pari dignitate Mediator fuit Christus, *Sacerdos* et *Redemptor*, quatenus gratiam humanæ salutis, inchoative quidem singulis suis actibus, at consummative passionis merito et mortis sacrificio liberaliter procuravit.—*Rex* tandem, omnium præstantissimus, in eo manifeste agnoscitur quod Ecclesiam, doctrina custodem gratiæque dispensatricem, legibus constituerit, sacramentis muniverit, jugique (quem visibiliter Papa exserit) influxu potestatis illam gubernet, jam Patri in cœlis conregnans cunctosque homines judicaturus.

modo, pro instituti ordine et exigentia, declarandum aggredimur *Redemptionis* opus ac mysterium quo Christus patiens et moriens supremo Mediationis et Sacerdotii munere naturam humanam, protoparentum casu collapsam, restaurare dignatus est (quam tractationem moderni vocant *Soteriologiam*).—Eo in proposito, quinque quæstiones ad trutinam theologicam vocabimus: *primam* de passione Christi; *secundam* de causa passionis; *tertiam* de passionis effectu seu fructu; *quartam* de morte et sepultura Christi; *quintam* de ejus descensu ad inferos.

QUÆSTIO PRIMA

DE PASSIONE CHRISTI

Passionis nomine hic intelliguntur non ea quæ Christus ab ipsa nativitate et per varias laboris et egestatis vices perpessus effertur, sed persecutioes et dolores quibus usque ad mortem dire vexatus et obrutus est;—quæ quidem passio quadrupliciter spectari potest, et secundum *necessitatem* (art. 1), et secundum *convenientiam* (art. 2), et secundum *magnitudinem* (art. 3), et secundum temporis, loci ac personarum *circumstantias* (art. 4). Patet dicendorum ordo.

ARTICULUS I.

De necessitate passionis.

(Q. XLVI, a. 1-2)

Occasio articuli desumpta videtur tum ex Script' sæpius edicente quod *oportuit* Christum pati, tum ex gradu præcipuo quem passio Salvatoris tenet in toto christiano systemate et teconomia salutis.—Idcirco magni refert statim ab initio constituere quodnam *necessitatis* genus passioni illi salutiferæ tribui valeat.

Conclusio 1^a.—CHRISTUM PATI NON FUIT NECESSARIUM INTRINSECE SEU METAPHYSICE; FUIT TAMEN NECESSARIUM EXTRINSECE, NON EX CAUSA MOTIVA DETERMINANTE, SED EX FINE UTCUMQUE EXIGENTE (art. 1).—Tres accipe partes.

1^a *Pars* ullo vix negotio suadetur; nam necessarium *intrinsece* seu *metaphysice* dicitur quod secundum sui naturam impossibile est aliter se habere. Atqui perspicuum est neque ex principiis essentialibus Dei, neque ex natura hominis passionis mysterium necessario consequi. Ergo.

2^a Pars eadem evidenter claret; siquidem nec Deus, qui nequit cogi, stringente necessitate Christum pati definitivit, nec ipse Christus coactionem in patiendo subiit quæ voluntati suæ electivæ repugnaret: voluntarie enim passus est.

3^a Pars concedit aliqualem necessitatem secundum finem; quæ quidem triplici ex capite evinci potest:—*1^o Ex parte hominum*; hos enim quodammodo necessarium fuit per Christi passionem liberari, juxta illud (Joan. III, 14-15): *Sicut Moyses exaltavit serpentem in deserto, ita exaltari (in cruce) oportet Filium hominis, ut omnis qui credit in ipsum, non pereat, sed habeat vitam æternam.*—*2^o Ex parte Christi*, qui per humilitatem passionis meruit sublimationis gloriam; unde dicitur (Luc. XXIV, 26): *Nonne hec oportuit pati Christum, et ita intrare in gloriam suam?*—*3^o Ex parte Dei*, qui Domini passionem, in Scripturis prænuntiatam et in observantia V. L. præfiguratam, implendam definiverat; et hoc est quod profertur (Luc. XXII, 22): *Filius hominis, secundum quod definitum est, vadit;* et (*ibid.* XXIV, 44-46): *Necesse est impleri omnia quæ scripta sunt in lege Moysi, et Prophetis, et Psalmis de me... Quoniam sic scriptum est, et sic oportebat Christum pati.*

Conclusio 2^a.—NECESSITAS FINIS PASSIONEM CHRISTI EXIGENTIS NON FUIT ABSOLUTA, SED SUPPOSITIONIS TANTUM NECONON CONGRUENTIÆ (art. 2).

1^a Pars facile declaratur.

Et *1^o* simpliciter et *absolute* loquendo possibile fuit Christo hominem liberare aliter quam per passionem.—*a)* Operibus enim quibuscumque, imo uno caritatis actu promereri poterat salutem totius humani generis.—*b)* Nec Dei justitia omnino requirebat ut per opera penalia *satisfactio* pro peccatis exhiberetur: quemadmodum enim homo, remittens absque satisfactione offensam in se commissam, misericorditer at non injuste agit, ita Deus nemini injuriam fecisset peccata in se perpetrata impune condonando.

Item *2^o* ad ipsam satisfactionem pro peccatis necessaria non erat tetrica *mortis passi*, una etiam sufficiente Salvatoris lacryma.—Nam *a)* “injuria vel passio alicujus measuratur ex dignitate personæ; majorem enim injuriam patitur rex si percutiatur in facie, quam aliqua privata persona. Sed dignitas personæ Christi est infinita, quia est persona divina.

Ergo quælibet passio ejus, quantumcumque sit *minima*, est infinita; quælibet ergo passio ejus suffecisset ad redemptiōnem humani generis, etiam sine morte" (S. Th. Quodl. II, Q. I, a. 2).—"Præterea, Bernardus dicit quod *minima gutta sanguinis* Christi suffecisset ad redēptionem humati generis. Potuisset autem aliqua gutta sanguinis Christi effundi sine morte. Ergo etiam sine morte potuisset per aliquam passionem humanum genus redimere" (*ibid.*).

2^a Pars habet passionem Christi fuisse necessariam ex suppositione et congruentia, juxta verba Christi patientis (Matth. XXVI, 42): *Si non potest hic calix transire nisi bibam illum, fiat voluntas tua.*

1^o *Ex suppositione.* Impossibile enim est Dei præscientiam falli et ejus voluntatem seu dispositionem cassari. Atqui prædefiniverat Deus ab æterno ut omnia Christi merita ejusque antecedentes satisfactiones ad redimendum humanū genus *non deputarentur* nisi suprema passio et mors, quasi omnium passionum et meritorum consummativa, accederet. Ergo.—2^o *Ex congruentia;* medium enim ad finem necessarium dici potest non solum illud sine quo finis non attingitur, sed etiam illud, quo deficiente, *non tam convenienter* finis obtinetur. Hujusmodi autem fuit passio Christi respectu humanæ salutis (prouti in art. seq. proxime ostendetur). Ergo.

ARTICULUS II.

De convenientia passionis et supplicii Crucis.

(Art. 3-4)

" Si quid aliud humanæ menti et intelligentiae difficultatem affert, certe crucis mysterium omnium difficillimum existimandum est, vixque percipi a nobis potest, salutem nostram ex cruce ipsa, et ex eo qui pro nobis ligno illi affixus est, pendere. Sed in hoc, ut docet Ap. (1 Cor. I, 21), summam Dei providentiam licet admirari: *Nam, quia in Dei sapientia non cognovit mundus per sapientiam Deum, placuit Deo*

per stultitiam prædicationis salvos facere credentes" (Catech. Trid. P. I, a. 4, n. 5).

Porro præter ea quibus inde a tractatus exordio Incarnationem Verbi convenientissinam fuisse probavimus, aliae suppetunt rationes ad demonstrandum convenientiam passionis, qua est passio et electum medium ad finem humanæ salutis.—Passio autem considerari potest vel *in genere*, vel *speciatim* secundum quod in Cruce consummata est: hinc duo singillatimi concludenda.

Conclusio 1.—PASSIO CHRISTI, PRÆ CÆTERIS MEDIIS, CONGRUENTISSIME ELECTA EST AD LIBERATIONEM HOMINUM (art. 3).

Enim vero modus ad assequendum aliquem finem tanto convenientior est, quanto per ipsum plura fini expedientia concurrent. Atqui per Christi passionem multa humanæ saluti utilia, sive ad faciendum bonum, sive ad superandum malum concurrerunt quæ in quolibet alio medio liberativo deessent: ergo.

Prob. min:—*a)* nam primo per hoc Deus majorem homini caritatem et misericordiam ostendit quam si sola voluntatis benignitate ejus peccata dimisisset. Homo vero, tanto beneficio permotus, vehementius provocatur ad Deum diligendum, in quo perfectio humanæ salutis consistit; unde ait Ap. (Rom. V, 8-9): *Commendat caritatem suam Deus in nobis, quoniam cum adhuc peccatores essemus... Christus pro nobis mortuus est.*—*b)* Secundo Christus patiens singularissimum nobis dedit exemplum obedientie, humilitatis, justitiae, constantie aliarumque virtutum humanæ saluti deservientium¹: cuius exempli vis et meditatio non solum martyribus, sed et sanctis omnium temporum principium fuit calcandi mundi delicias altioraque petendi per viam asperam per-

1.—Juxta Catech. Trid. (P. I, art. IV, n. 26), dicere possumus: "Salvatorem nostrum, *quæcumque* vitæ *præcepta* toto prædicationis sue tempore verbis nos docuit, ea omnia uno passionis die *in seipso expressisse.*"—Jure S. Bernardus (Serm. de Pass. Dom. n. 1): "Quis tam irreligiosus, qui non compungatur? quis tam insolens, ut non humilietur? quis tam irascundus, ut non indulget? quis tam deliciosus, ut non abstineat? quis tam flagitosus, ut non contineat? quis tam malitiosus, ut non peniteat his diebus? Merito quidem. Nempe adest passio Domini, usque hodie terram movens, petras scindens, aperiens monumenta."

fectionis cacumina; unde dicitur (1 Pet. II, 21): *Christus passus est pro nobis, vobis relinquens exemplum, ut sequamini vestigia ejus.*—c) Tertio Christus per acerbissimam suam passionem ea ratione pro nobis satisfecit gratiaeque et gloriae dona promeruit quæ secundum *genus operis* proportionaretur immensis peneque infinitis hominum iniquitatibus atque necessitatibus.—d) Quarto per hoc major est inducta homini necessitas præcavendi peccatum, qui se a peccato redemptum cogitat pretioso Christi sanguine, secundum illud (1 Cor. VI, 20): *Empti enim estis pretio magno. Glorificate et portate Deum in corpore vestro.*—e) Quinto per passionem Hominis-Dei factum est ut homo qui, victus a diabolo, morteni meruerat, ipse sustinendo abjectionem et mortem diaboli superbiam vinceret mortemque superaret, adeoque propria veluti manu, justitiae armis instructa, sceptrum inimicum confringeret; quod commendat humanam dignitatem. Unde dicitur (1 Cor. XV, 57): *Deo gratias qui dedit nobis victoriam per D. N. J. C.*

Conclusio 2^a.—CONVENIENTISSIMUM FUIT CHRISTUM PATI CRUCIS SUPPLICIUM (art. 4);—quod duplici ex capite ostendamus, scil. ex septem facti rationibus et ex septem verbis a Domino moriente prolatis.

1^o Ex rationibus facti; quarum duæ petuntur ex genere mortis, quatror ex *forma* crucis, postrema ex *figuris*.—a) Congruebat primum *genus* illud supplicii *instructioni hominis*; quippe huic ad rectam vitam opus est nec mortem nec ullum mortis genus horrescere, de eoque expediebat haberi ipsum Christi exemplum. Porro inter omnia mortis genera nihil erat *formidabilius*, nec præsertim *execrabilius* supplicio crucis solis olim mancipiis seu servis reservato. Ergo. — Secundo supplicium hoc congruebat etiam *operi Redemptionis*; quatenus, sicuti homo pomum ligni vetiti sumens peccaverat, ita per Christum arbori crucis affixum a peccato liberaretur, unde diabolus “qui in ligno vincebat, in ligno quoque vinceretur” (Pref. de Pass.).

b) *Forma* ipsa crucis maxime est idonea fovendis in homine virtutibus fidei, spei, aliisque.—Per hoc enim quod sanctum illud patibulum et terram tangit et in aërem erigitur, persuasum habemus cuncta elementa fuisse contra dæmonum infestationes purgata et veluti consecrata.—Christus quoque

in alto moriens ascensum nobis in cœlum parare videtur, secundum illud (Joan. XII, 32): *Ego, si exaltatus fuero a terra, omnia traham ad me ipsum.* — Item, figura crucis, a centro in quatuor extrema partita, apte significat providentiam ejus qui in ea peperit ubique diffusam, cunctosque populos uno caritatis amplexu contingentem. — Amplius (secundum mysterium latitudinis, longitudinis, altitudinis et profundi) “in homine crucifixo pulchre relucet typus hominis Christiani, qui ad bona opera extendit manus suas, per patientiam et longanimitatem persistit in laboribus hujus vitæ, per spem futurorum bonorum emergit supra mundum, et per occultam Dei gratiam sustentatur ne succumbat” (*Billot* in h. loc. ex *S. Aug. Ep. 140, n. 64*)¹.

c) Tandem, lignum Crucis, in quo Christus passus est, plurimis respondet figuris; eas Auctor ex traditione recitat: “De diluvio aquarum humanum genus arca lignea liberavit; de Ægypto Dei populo recedente, Moyses mare virgæ divisit, et Pharaonem prostravit, et populum Dei redemit; idem Moyses lignum in aquam misit, et amaram aquam in dulcedinem commutavit; et lignæ virgæ de spirituali petra salutaris unda profertur; et ut Amalech vinceretur, circa virgam Moyses expansis manibus extenditur, et lex Dei arce Testamenti creditur lignæ, ut his omnibus ad lignum crucis, quasi per quosdam gradus, veniatur.” (Cf. *Suarez* in Q. XLVI, a. 4).

2º Ex septem verbis quæ Christus e cathedra crucis protulit, quæque gravissimis documentis referta sunt.—1^m verbum est (Luc. XXIII, 34): *Pater, dimitte illis; non enim sciunt quid faciunt;* ubi Christus sublimi exemplo nos edocet caritatem erga inimicos.—2^m verbum est (*ibid. v. 43*): *Amen, dico tibi, hodie tecum eris in paradyso;* quâ sententiâ Salvator, latroni pœnitenti beatitudinem promittens, homines præclare instituit de misericordia erga miseros.—3^m verbum

1—Meditare, lector, verba libelli aurei *de Imit. Chr.* I. II, c. 12: “In cruce salus, in cruce vita, in cruce protectio ab hostibus; — in cruce infusio superne suavitatis, in cruce robur mentis, in cruce gaudium spiritus; — in cruce summa virtutis, in cruce perfectio sanctitatis. — Non est salus animæ, nec spes æternæ vitæ, nisi in cruce. — Tolle ergo cruem tuam, et sequere Jesum, et ibis in vitam æternam.”

habetur ad Mariam et Joannem (Joan. XIX, 26-27): *Ecce filius tuus... Ecce mater tua*; ex quo, præter alia, discimus quodnam incumbat pietatis officium parentibus erga filios et filiis erga parentes.—4^m verbum sequitur (Matth. XXVII, 46): *Deus meus, Deus meus, ut quid dereliquisti me*; qua voce voluit Christus excessum suæ passionis et afflictionis declarare, subindeque nos ad fugam sacerdotalium deliciarum et ad amorem compassionis erga tam devotum Amicum excitare.—5^m verbum refertur (Joan. XIX, 28): *Sitio*; quod non solum de sitis corporeæ cruciatu intelligendum est, sed et de desiderio, quo flagrabat Christus, gloriæ Dei et salutis hominum; cuius exemplo nos ad similem benevolentiae ac zeli amorem erga Deum provocamur.—6^m verbum legitur (*ibid.* v. 30): *Consummatum est*, scil. Scripturas implevi, opus Redemptionis perfeci, passione victoriam de diabolo reportavi; qua recordatione nihil efficacius ad amorem gratitudinis erga Salvatorem in humanis cordibus gignendum aut confirmandum.—7^m verbum esto (Luc. XXIII, 46): *Pater, in manus tuas commendō spiritum meum*; quo Christus, se suamque vitam Patri committens, nos edocet amorem conformitatis ac fiduciae quem paternæ Dei providentiae debemus¹.

ARTICULUS III.

De magnitudine passionis.

(Art. 5-8)

1^o D. Thomæ voce planeque mirandis documentis et sententiis introducimur ad contemplandum ac (si fieri posset) ad dimetiendum doloris abyssum, in quam Deus Pater dilectum Filium suum pro nobis humanatum prolabi permisit, imo et constituit. Hæ sane de passione Christi doctrinæ quam proficue sint, quam efficaces in hortandis ad virtutem populis, quam uberum salutis fructuum feraces, nemo est qui non perspexerit.

1—Ampliora de hoc argumento legi possunt penes Bellarminum, Opusc. *De septem verbis a Christo in cruce prolatis*; ubi varii fructus singulorum verborum pie recensentur.

2º Clare liquet *passionem* hic sumi, non communiter pro qualibet mutatione, sed *proprie* pro abjectione dispositionis convenientis. Porro (ait *Cajetanus* in art. 5) "sunt duo genera passionum. Quædam *spirituales*, ut decipi, privari virtute, et hujusmodi; quæ longe fuerunt a Christo, quia derogarent perfectioni animæ ipsius. Quædam *corporales*, et haec sunt duplices: quædam *ab intrinseco*, ut ægritudines corporales; et de his non est quæstio, quia non decuit Christum infirmari, sed sat fuit ab intrinseco habere passiones naturales absque ægritudine, ut famem, situm, lassitudinem quoad corpus, et tristitiam, timorem et hujusmodi quoad partem sensitivam animæ. Quædam vero *ab extrinseco*, sive sint pure corporales, ut flagellatio, confossio et hujusmodi, sive aliqualiter *spirituales*, ut infamari et hujusmodi, et similiter, sive extrinsece, ut spoliari et hujusmodi, sive intus, ut tristari ex sensatis et objectis. De his enim quæ ab extrinseco inferri possunt passionibus, absque spirituali danno in anima patientis, quæstio est."

3º Magnitudo passionum Christi spectari potest aut secundum *vim ipsam passionum*, aut secundum rationem *subjecti patientis*; primo modo, tum *extensive*, tum *intensive*: quam ob rem tres statuendæ sunt conclusiones.

Conclusio 1º.—CHRISTUS PASSUS EST, NON QUIDEM OMNEM SPECIEM, SED OMNE GENUS PASSIONIS HUMANÆ (art. 5).

1º *Pars* evidens est; siquidem species passionum in infinitum multiplicari possunt, multæque sibi invicem contrariantur, ut combustio in igne et submersio in aqua.—Ubi (cum Suarezio) memoratam volumus blasphemiam *Culvini* aliorumque hæreticorum ponentium Christum pertulisse cruciatus etiam morales damnatorum; quod ejus sanctitati et felicitati spirituali plane repugnat.

2º *Pars* ab Auctore adeo pulchra expositione evolvitur ut satius eit propria ejus verba, ne deflorentur, referre. Ait ergo *generalitatem* passionum Christi considerari posse tripliciter:—"a) Uno modo ex parte hominum a quibus passus est. Passus est enim aliquid et a gentilibus et a Judæis, et a masculis et a foeminis, ut patet de ancillis accusantibus Petrum. Passus est etiam et a principibus, et a ministris eorum, et a popularibus, secundum illud (Ps. II, 1-2): *Quare fremuerunt gentes, et populi meditati sunt inania?* Astiterunt reges ter-

ræ, et principes convenerunt in unum adversus Dominum, et adversus Christum ejus. Passus est etiam a familiaribus et notis, sicut patet de Juda eum prodente et Petro ipsum negante.—*b)* *Alio modo patet idein ex parte eorum in quibus homo potest pati.* Passus est enim Christus in suis amicis eum deserentibus; in fama per blasphemias contra eum prolatas; in honore et gloria per irrisiones et contumelias ei illatas; in rebus per hoc quod etiam vestibus spoliatus est; in anima per tristitiam, tedium et timorem; in corpore per vulnera et flagella. —*c)* *Tertio, potest considerari quantum ad corporis membra.* Passus est enim Christus in capite pungentium spinarum coronam; in manibus et pedibus fixionem clavorum; in facie alapas et sputa, et in toto corpore flagella. Fuit etiam passus secundum omnem sensum corporeum: secundum tactum quidem, flagellatus et clavis confixus; secundum gustum, felle et aceto potatus; secundum olfactum, in loco fetido cadaverum mortuorum, qui dicitur calvariae, appensus patibulo; secundum auditum, lacesitus vocibus blasphemantium et irridentium; secundum visum, videns matrem et discipulum quem diligebat flentes.”—Ita Christus (apposite notat Cajet. in h. l.) universos dolores quodammodo *deificavit*, ut quæ naturaliter exosa et fugibilia sunt, tanto exemplo desiderabilia fierent super aurum et lapidem pretiosum et dulciora super mel et favum.

Conclusio 2a.—UTERQUE CHRISTI DOLOR, EXTERIOR SCIL. ET INTERIOR, FUIT MAXIMUS INTER DOLORES PRÆSENTIS VITÆ (art. 6).—Dico: inter dolores *præsentis* vitæ, ne comparatio fiat cum dolore alterius vitæ et statūs.

Prob. concl. quadrupliciter.

1º *Ex causis doloris.*—Nam *doloris exterioris* causa fuit lesio corporalis. Atqui haec lesio in Christo summa ac acerbitate habuit, tum propter generalitatem suam, nam *a planta pedis usque ad verticem non est in eo sanitas* (Is. I, 6); tum propter genus supplicii Christo inflictum: quippe crucifixioni atrocitas per se inest et ex nervositate ac sensitibilitate maxima partium confixarum, seu pedum et manuum, et ex pondere corporis continue dolorem augente et ex diuturnitate tormenti.—*Interioris autem Christi doloris* seu *tristitiae* vehementia incredibilis merito repetitur a) primo ex peccatis tam multis, tam gravibus humani generis, pro-

quibus sibi apprime notis satisfaciebat perinde ac essent sua, juxta illud (Ps. XXI, 1): *Longe a salute mea verba delictorum meorum; b) secundo* specialiter ex deicidio Iudeorum Salvatorem, insectantium præcipueque ex discipuloram infidelitate et fuga; c) *tertio* ex ammissione vitiæ corporalis quam Christi humanitas pro aestimatione tanti boni natura-liter ingentique repulsa abhorrebat.

2º Ex subjecto doloris.—Eo enim acutiores doloris stimuli sentiuntur quo subjectum patiens majori sit perceptibilitate præditum. Atqui perceptibilitas Christi patientis quam maxima fuit et secundum *corpus* optime complexionatum, utpote ipsa Sp. Sancti operatione formatum, ideoque sensui tactus, quo percipitur dolor, adaptatissimum, et secundum *animam* cuius vires interiores efficacissime poterant omnes tristitiae causas apprehendere. Ergo.

3º Ex indole doloris.—In aliis enim patientibus mitigatur pressurarum acerbitas virtutis ac rationis influxu directo vel indirecto: “sanctis hominibus, quicumque supplicia et cruciatus pertulerunt, non defuit animæ solatium divinitus datum, quo recreati tormentorum vim sequo animo ferre possent; imo vero in cruciatis plerique intimâ letitiâ efferebantur; inquit euim Ap. (Coloss. I, 24): *Gaudeo in passionibus pro vobis* etc. Verum Christus Dominus amarissimæ passionis calicem, quem babit, nulla suavitate permixta temperavit; humanæ enim naturæ, quam assumpserat, sentire omnia tormenta permisit, non secus ac si homo, non etiam Deus fuisset” (*Catech. Trid. P. I*, art. 4, n. 22).

4º Ex fine doloris.—In hunc enim finem Christus ultro se dolori subjicit, ut humanum genus a peccato liberaret; unde tantam doloris quantitatem assumpsit, quanta fructui desiderato responderet. Atqui fructus iste omni calculo major est: ergo et ipse dolor.—Quibus ex causis *simil consideratis* manifeste appetit incomparabilis passionis Christi intensitas, effatiique biblii prophethica veritas (Thren. I, 12): *Attendite et videte, si est dolor sicut dolor meus.*

Conclusio 3º.—SI CONSIDERETUR PASSIO ANIMÆ CHRISTI EX PARTE SUBJECTI, SIC TOTA ANIMA PATIEBATUR ET SECUNDUM ESSENTIAM ET SECUNDUM POTENTIAS; SI VERO CONSIDERETUR EX PARTE OBJECTI, SIC VIRES QUIDEM INFERIORES ANIMÆ PATIEBANTUR, NON TAMEN OMNIS POTENTIA, INCOLUMI MANENTE FRUCTIONE PARTIS SUPERIORIS (art. 7-8).

1^a. *Pars ostend.*—a) Etenim anima, qua informatur corpus passibile et dissolubile, paciente corpore et ipsa formaliter patitur. Atqui essentia animæ ita corpori conjungitur ut tota sit in toto et tota in qualibet parte ejus. Ergo tota anima Christi patientis *ratione essentiae* patiebatur.—b) Porro, in essentia animæ omnes potentias radicari philosophice exploratum est. Atqui paciente subjecto cui inest, necesse est ut potentia quodammodo patiatur. Ergo *omnes potentiae* animæ Christi aliqualiter, nempe *subjective*, passæ sunt.

2^a. *Pars prob.*—Secundum illas vires Christus passione propria et simpliciter dicta patiebatur, quarum objecta poterant esse causa tristitiae vel doloris. Atqui hujusmodi fuerunt *omnes vires inferiores* circa temporalia operantes, maxime visus et tactus, imaginatio et aestimativa, necnon ratio inferior¹ creatis rebus intendens; quibus mala apprehendens tum sensibilia tum moralia, anima Christi angebatur tum in appetitu sensitivo, tum quoque in parte inferiori voluntatis. Ergo.

3^a. *Pars colligitur* ex eo quod *ratio superior* in Christo visione Dei recreabatur, quæ sane non doloris, sed delectationis et gaudii causa existebat. Nec enim fruitio ista ulla-tenus impeditiebatur per passionem virium inferiorum, sicut nec passioni quidquam solatii ex fruitione obveniebat. Quocirca Christi patientis humanitas non incongrue comparatur monti cuidam excenso, vertice quidem emicanti et sereno, pedibus vere caliganti et tenebrato. — Igitur Salvatoris anima fruebatur simul et patiebatur *absque contradictione*, tum secundum essentiam, prouti subjectum erat hinc superioris illinc inferioris partis, tum secundum potentias, in quantum gaudium et tristitia vel non erant de eodem, vel non secundum idem. “Sic, ait Angelicus Opus. LIX, a. 18, de eisdem (defectibus seu peccatis) de quibus Christus dolebat secundum sensum, et imaginationem, et rationem inferiorem, secundum rationem superiorem gaudebat, in quantum ea ad ordinem divinæ sapientiæ referebat.”

1.—De distinctione inter rationem inferiorem et superiorem cf. I, Q. LXXIX, a. 9.

Solv. obj. (cont. 2^{am} concl.)—OBJ. 1.—Virtus mentis tristitiam mitigat. Atqui fuit in Christo virtus perfectissima. Ergo.

RESP. *D. M*:... quomodo cumque, *N*; secundum regulam rationis qua in passionibus quantitas proportionis constituitur, *C*.—*D.m*:...et ideo tristitiam assumpsit quæ regulam rationis non excederet, *C*; ratio in Christo non exigebat maximam tristitiae quantitatem, peccatorum expiandorum universitati respondentem, *N*.—*Neg. conseq.*

OBJ. 2.—Majoris boni amissio gignit majorem dolorem. Atqui peccator se privando vita gratiae majus bonum amittit quam Christus perdendo vitam naturæ. Ergo etc.

RESP. *C. M*.—*D.m*:...et Christus doluit tantum pro amissione vitae suæ corporeæ, *N*; doluit etiam pro amissa in hominibus vita gratiæ, et quidem dolore eo acerbiori quo ex majori sapientia et caritate ortus circa innumera simul peccata existeret, *C*.—*Neg. conseq.*

OBJ. 3.—Innocentia patientis dolorem minuit. Atqui Christus innocenter passus est. Ergo.

RESP. *D. M*:...eo sensu quod deest morsus culpæ propriæ, *C*; quasi patienti innocentiam suam apprehendenti nocumentum pœnæ, utpote indebitum, non sit longe gravius, *N*. *C.m*.—*Neg. conseq.*

OBJ. 4.—In his quæ Christi sunt, nihil fuit superfluum. Atqui minimus dolor ex infinita Christi dignitate sufficeret ad salutem humanam. Ergo.

RESP. *C. M*.—*D.m*:...secundum absolutum valorem, *C*; secundum humanorum operum proportionem cum immensis naturæ lapsæ debitibus, *N*.—*Neg. conseq.*¹

1—In prædicanda passione Christi excelluit magnus orator gallicus *Bossuet*; vid. ejus sermones de hoc argumento.

ARTICULUS IV.

De circumstantiis passionis.

(Art. 9-11)

Permulta, eaque non inutilia, passionis Christi adjuncta in quæstionem vocari possunt ac reapse penes plures auctores¹ fusori calamo tractantur; de quibus tria tantum, prout nostro congruit proposito, attingemus. Videlicet de tempore passionis Christi, de ejus loco, ac de crucifixionis comitibus summatim dicemus.

Conclusio 1^a.—CHRISTUS CONVENIENTI AETATIS ANNO ANNIQUE TEMPORE PASSUS EST (art. 9).

1^a *Pars de ætate* (hæc fuit circiter 33 annorum) tribus persuadetur:—1^o quia vitam suam pro nobis dando in eo statu quo perfectior erat, Christus magis dilectionem suam erga homines commendavit.—2^o Quia non congruebat ut in eo senilis naturæ diminutio, sicut nec morbus, appareret.—3^o Quia in plena floridaque ætate moriens et resurgens, jam in seipso futuram resurgentium qualitatem præmonstrabat (resp. ad 4).

2^a *Pars de anni tempore* (quatenus præcise determinari velit) magnis implexa est difficultatibus quæ diu exercuerunt atque etiam num excent scriptorum catholicorum aciem. Non vacat in iis immorari, sed unum generalius, reliquis supersedentes, proferemus.—Passio Christi figurabatur per immolationem Agni paschalis, juxta illud Ap. (1 Cor. V, 7): *Pascha nostrum immolatus est Christus*; quandoquidem in veteri Paschate celebrabatur memoria liberationis Judæorum a servitute Ægypti, Christus autem quasi Agnus in cruce occisus per mortem suam homines a servitute peccati liberavit. Atqui agnus paschalis immolabatur quarta decima die primi mensis, nomine Nisan, ad vesperam (Exod. XII, 6). Ergo conveniens fuit ut Christus circa idem tempus (quidquid sit de exacta die vel hora) pateretur.

1—Vid. Suarez et Billuart in h. quæst;—Knabenbauer, *Comm. in Evang.*, etc.

Conclusio 2^a. — CONVENIENTER CHRISTUS PASSUS EST IN JERUSALEM, MORTEMQUE OBIIT EXTRA PORTAM, IN CALVARIAE LOCO (art. 10).

1^a *Pars prob.* — 1^o *Jerusalem* locus erat a Deo electus ad sacrificia sibi offerenda; haec autem antiqua sacrificia præfigurabant sacrificium Crucis. — 2^o Virtus passionis Christi de urbe illa veluti *de centro quodam geographicó et ethnologicó ad totum mundum erat diffundenda*. — 3^o Maxime conveniebat *humilitati Christi ut*, sicut turpissimum genus mortis elegerat, ita in loco tam celebri pati non recusaret. — 4^o Per hoc quoque ostendebatur Deicidii scelus ortum ducere ab ambitione et invidia *principum* populi Judaici, in urbe Jerusalem morantium.

2^a *Pars ostend.* — Et 1^o figuræ figurato respondente, sicuti olim vitulus et hircus, qui solemniissimo sacrificio ad expiationem totius multitudinis offerebantur, *extra castra* comburbantur (Levit. XVI, 27), ita *Jesus, ut sanctificaret per suum sanguinem populum, extra portam passus est* (Heb. XIII, 12). — 2^o Sic nobis perhibetur exemplum exeundi a mundana conversatione sectandique viam dolorosam; *examus igitur ad eum extra castra, impropterum ejus portantes* (Heb. XIII, 13). — 3^o *Juxta Leonem M.* (Serm. VIII de Pass., c. 5), Christus non in templo, sed foris et extra castra crucifixus est, ut “nova hostia novo imponeretur altari, et crux Christi, non templi esset ara, sed mundi.”

3^a *Pars additur de loco Calvariae;* cuius denominationis ratio diverse assignatur (Knabenbauer in Matth.). — *Multi enim antiqui volunt locum illum sic appellandum, quia ibi primi hominis sit conditum caput; alii, quia ibi damnatorum capita truncarentur et crania jacerent; alii, quia locus formam haberet cranii.* In quacumque hypothesi congrue Christus ibi crucifixus est qui fuit secundus Adam, damnatorum hominum Redemptor, et totius humanitatis regeneratæ caput.

Conclusio 3^a. — NON SINE DIVINO CONSILIO FACTUM EST UT JUDÆI PERMITTERENTUR CHRISTUM CUM LATRONIBUS CRUCIFIGERE (art. 11).

Triplex enim symbolum vel mysterium in hoc deprehenditur: — 1^m est mysterium *humiliationis*, quatenus Christus.

non solum in se suscepit *maledictum crucis* (Gal. III, 13), sed et inter sceleratos quasi sceleratus crucifigi voluit, ut nos de maledicto peccati redimeret.—2^m est mysterium *gratiae et prædestinationis*, gratia omnibus sufficienter concessæ, prædestinationis vero qua unus, alio resistente, justificatur secundum dexteræ sinistræque divisionem.—3^m est mysterium *ultimi judicii*: tribunal enim ipsa crux fuit tunc ignominiosa, nunc gloriosa; judex, Christus in cruce pendens; salvandi et damnandi homines figurati sunt per latrones oppositi animi contrariæque positionis et sortis.

QUÆSTIO SECUNDA

DE CAUSA EFFICIENTE PASSIONIS CHRISTI

Quæstionem de passione Christi secundum se inspecta excipit altera de ejus *causa effectrix*: quæ causa tripliciter considerari potest, nempe aut ex parte *Christi ipsius* (art. 1), aut ex parte *Dei Patris* (art. 2), aut ex parte *persecutorum Salvatoris* (art. 3).

ARTICULUS I.

Uirum Christus sibi ipso obedientiæque motivo mortem pepererit.

(Q. XLVII, a. 1-2)

Geminum hoc titulo dubitationis momentum continetur, scil. an Christus suæ mortis *cursa* quodammodo extiterit et utrum ex motivo *obedientiæ* (de quo specialis difficultas est) mortem voluntariam passus fuerit.—Causa autem alicujus effectus duplex esse potest, directa et indirecta: *directa* quidem, quæ per se in effectum influit; *indirecta*, vero quæ illum non impedit, cum impedire possit. Persecutores Christi directe eum occidisse in manifestis est, quia *sufficientem ei mortis causam intulerunt intentione atque effectu* secuto perfectam. Quid autem de Christo? num seipsum aliqualiter morti tradiderit?

Conclusio 1^a. — CHRISTUS INDIRECTE FUIT CAUSA SUÆ PASSIONIS ET MORTIS (art. 1); — ubi Dominus ut *homo* spectatur.

Prob. — 1^o Ex Scriptura (Joan. X, 18): *Nemo tollit eam (animam meam) a me* (scil. me invito), *sed ego pono eam a meipso*; et (Eph. V, 2): *Tradidit semetipsum pro nobis*; quæ cum non possint intelligi de causalitate directa, ut evan-

gelica passionis historia demonstrat, de indirectâ accipienda sunt.

2º Ratione. — *a)* Poterat Christus passionem suam et mortem impedire, sive adversariorum velle aut posse cohibendo, sive naturam sue carnis contra quocumque læsivum tuendo. Atqui de facto, nedium ejus anima a proprio corpore nocumentum illatum repulerit, minitanti morti animo libenti succubuit, præferens vitæ corporis animarum salutem. Ergo. Circa maj. notetur (ex Cajet. contra Scotum in h. l.) potestatem illam tribui animæ Christi, non secundum virtutem propriam in ipsa manentem, sed secundum virtutem *instrumentalem* quam a Verbo sibi unito participabat¹; sic enim, i. e. ut organum Verbi, poterat et voluntates persecutorum immutare et eorum potestatem refrænare et carnem suam ne læderetur a flagellis cæterisque læsivis conservare. — *b)* Conf. arg. Nam, ut Christus ostenderet violentiam sibi illatam nou prævalere contra voluntatem suam sed ei obsequi, corpus suum extenuatissimum in eo tamen vigore conservavit, ut etiam in extremis positus voce magna clamare valeret; quod miraculosum visum est: siquidem *videns Centurio, qui ex adverso stabat, quia sic clamans expirasset, ait: Vere hic homo Filius Dei erat* (Marc. XV, 39).

Conclusio 2ª. — PATRIS MANDATO ET LEGI OBSEQUENS, CONVENIENTISSIME CHRISTUS EX OBEDIENTIA PASSUS EST (art. 2).

1ª Pars est de Patris *mandato* et *lege*, cui Christus obtinperavit. — Mandatum hoc moriendi non uno modo a theologis intelligitur: *alii* enim (ut Billot, th. 29) negant fuisse præceptum *proprie* dictum; *alii* ponunt præceptum vagum et dependens a Christi consensu; *alii* illud coarctant ad mortis substantiam, exclusis circumstantiis. Nos (quod D. Thomæ consonum putamus) tuemur præceptum verum, absolutum et generale.

1º Etenim suppetunt expressa Scripturae verba, quæ non sunt arbitrario a proprio sensu derivanda; sic dicitur (Joan. X, 18): *Hoc mandatum accepi a Patre meo, scil. ponendi animam et sumendi eam.* (*Ibid. XIV, 31*): *Sicut mandatum dedit mihi Pater, sic facio;* et (XV, 10): *Si præcepta mea serva-*

1—Cf. supra, Disp. III, Q. V, a. 2-3.

veritis...sicut et ego Patris mei præcepta servavi, ubi præcepta a Patre data recipiantur præceptis quæ Christus, non improprie sane, Apostolis imposuit.—Præterea Christus *factus est obediens usque ad mortem* (Phil. II, 8); vera autem et proprie dicta obedientia pro objecto habet voluntatem præceptivam superioris (II-II^o, Q. CIV).—Hinc S. Thomas (art. 2 ad 2): “Obedientia, etsi importet *necessitatem respectu ejus quoâ præcipitur*, tamen importat voluntatem respectu impletionis præcepti. Et talis fuit obedientia Christi.” Quis dubiam Angelici mentem cùm habitur?

2º Cum Auctore (resp. ad 1) merito colligitur Christum patiendo, se sacrificando, et satisfaciendo, omnia V. L. præcepta implevisse, tum *moralia* in amore Dei et proximi fundata, tum *cæremonialia* ad sacrificia et oblationes præsertim ordinata et sacrificii Crucis præfigurativa, tum *judicialia* reparandis injuriis præcipue destinata. Unde, cum in his tribus generice claudantur mandata cujuscumque juris, sive naturalis, sive divini ac positivi, patet quam vere Christus in sua passione *omnem justitiam* perfecerit.

2º Pars de convenientia *obedientiae* in Christo paciente (quæ sane alteram partem confirmat) ex tribus evincitur:—Nam 1º conveniebat justificationi humanæ ut, *sicut per inobedientiam unius hominis peccatores constituti sunt multi, ita et per unius obediitionem justi constituantur multi* (Rom. V, 19).—2º Expediebat hominem Deo reconciliari per sacrificium acceptissimum. Atqui sacrificia plurimum pretii mutuantur ex obedientia ipsis certe anteponenda juxta illud (1 Reg. XV, 22): *Melior est obdientia quam victimæ*. Ergo.—3º Hoc conveniens erat victoriæ, qua Christus de morte et auctore mortis triumphavit; vincere enim obedientiæ partus est (Prov. XXI, 28): *Vir obediens loquetur victoriam*.

Solv. obj.—OBJ. 1 (cont. 1^{am} concl.).—Qui per violentiam interimuntur, nequaquam sunt causa suæ mortis. Atqui Christus violentiam passus est. Ergo.

EESP. D. M: Qui per violentiam interimuntur, nec eam cohibere possunt... C; qui per violentiam interimuntur, quam possent at nolunt reprimere... N.—C.d.m.—Neg. conseq.

OBJ. 2 (cont. 2^{am} concl.).—Illud dicitur aliquis ex obedientia facere quod facit ex necessitate præcepti. Atqui

Christus non ex necessitate, sed voluntarie passus est.
Ergo.

RESP. D. M:...quatenus necessitas præcepti objective et moraliter urgeat, C; quasi hæc necessitas subjective et physice determinet, N.—C.d.m.—Neg. conseq.

1º Conceditur præcepto inesse vim quamdam necessitatem, scil. ex parte *objecti* et moraliter, non vero ex parte *subjecti* et per modum formæ physice determinantis.—Porro 2º libertas, ad virtutem requisita, essentialiter reponitur in immunitate a necessitate subjective, quin tamen excludatur moralis necessitas legis impositæ.—Imo 3º eo securius libertas in finem propositum contendit quo lex seu præceptum determinatorem et efficaciatrem influxum exerceat.—4º Igitur Christus moriens, moralique necessitati præcepti divini contra naturalem repugnantiam obsequens, et obedientiæ actum præstitit et liberrium voluntatis arbitrium demonstravit.

OBJ. 3.—Charitas excellentior est quam obedientia. Atqui Christus legitur ex charitate passus (Eph. V, 2). Ergo.

RESP. D. M:...ita ut una alteri connexa sit, C; sine mutuo nexo et influxu, N.—C.d.m.—Neg. conseq.

Eadem ratione Christus passus est ex charitate et obedientia, quia et præcepta charitatis ex obedientia implevit, et obedientis fuit ex dilectione erga Patrem præcipientem.

ARTICULUS II.

Utrum Deus Pater tradiderit Christum passioni.

Passio Christi non solum ex *causis proximis* judicanda est, sed altius repetenda et secundum ipsum *Supremæ Causæ* influxum consideranda.

Conclusio.—VERE DEUS PATER CHRISTUM FILIUM PASSIONI TRADIDIT.

Etenim 1º *Sacræ Litteræ* id expresse tradunt.—Legitur (Is. LIII, 8): *Propter scelus populi mei percussi eum*; et

paulo ante idem propheta, cum Dominum plagiis et vulneribus affectum prævideret, dixit (v. 6): *Omnes nos quasi oves erravimus, unusquisque in viam suam declinavit; et posuit Dominus in eo iniquitatem omnium nostrum.* — Eamdem rei gravioribus etiam verbis expressit Ap. (Rom. VIII, 32): *Proprio Filio suo non pepercit, sed pro nobis omnibus tradidit illum.*

2º Triplici ratione intelligitur Deum Patrem morti tradisse Filium. — *a)* Cum primis enim æterna sua voluntate præordinavit passionem Christi ad humani generis redemptionem, juxta illud (Is. LIII, 10): *Dominus voluit conterere eum in infirmitate.* Nam, licet passio ex nequitia Judæorum persequentium et corruptione naturæ mala sit, tamen secundum quod est in Christo paciente cum omnibus circumstantibus, scil. cum ejus caritate et vi sua salvifica, bona dicenda est (3 S. D. XX, Q. I, a. 5), ideoque hoc modo potuit subvoluntatem et præceptum Dei directe cadere. — *b)* Deus quoque Christo inspiravit, caritate ei infusa, generosam voluntatem patiendi pro nobis; unde Salvator oblatus est, *quia ipse voluit* (Is. LIII, 7). — *c)* Amplius Deus ex una parte permisit ut persecutores Christi, malis passionibus abrepti, contra eum verbis et factis insurgerent; ex altera parte, nedum illum a passione protegeret, miserandum Filium, omni ope destitutum, hostilibus manibus veluti exposuit. Unde ait Christus Pilato (Joan. XIX, 11): *Non haberes potestatem adversum me ullam, nisi tibi datum esset desuper.*

Solv. obj. — OBJ. 1. — Iniquum et crudele est hominem innocentem passioni et morti tradere. Atqui Deus nec ini quis nec crudelis est. Ergo.

RESP. *D. M.* : ... secundum absolutum Dei dominium, *N.*; secundum suavem Providentiæ dispositionem, *S.d.* : tradere morti innocentem contra ejus voluntatem, *C.*; posita in eo voluntate patiendi et satisfaciendi pro aliis, *N.* — *C.m.* — *Neg. conseq.*

OBJ. 2. — Non videtur quod aliquis a seipso et ab alio simul morti tradatur. Atqui Christus tradidit semetipsum pro nobis. Ergo.

RESP. *D. M.* : ... eadem ratione, *C.*; diversa ratione, *N.* — *D.m.* : ... scil. ut *Deus*, tradidit seipsum eadem voluntate et

actione qua Pater tradidit eum, et ut *homo*, voluntate a Patre inspirata, *C*; secus, *N*.—*Neg. consecq.*

OBJ. 3.—Et Judas, et Judæi, et Pilatus vituperantur, quia, suo quisque modo, Justum tradiderint. Atqui repugnat quod Deus consortium habeat cum iniestate. Ergo.

RESP. D. M :...quia justum tradiderint, Judas ex cupiditate, Judæi ex invidia, Pilatus ex timore Cæsaris, *C*; quasi non licuerit illum ex caritate tradere, *N*.—*D.m* :...consortium formale seu ex parte intentionis, *C*; consortium materiale seu ex parte rei factæ, *N*.—*Neg. consecq.*

ARTICULUS III.

Quanam scientia et malitia Christi persecutores eum ad mortem dederunt.

(Art. 4-6)

Ex narratione evangelica compertum habemus mortis Christi facinus (a dæmone instigatum) fuisse a Judæis velut præcipuis *auctoribus* machinatum, quod et ipsi confessi sunt dicentes (Matth. XXVII, 25): *Sanguis ejus super nos et super filios nostros*; gentiles vero, scil. Pilatum et milites, fuisse tanti sceleris *executores*.—Id vero mysterio non vacat; quippe per hoc satis præfiguratus est effectus passionis, quæ primum apud Judæos salutis fructus ubertim peperit (Act. II-III), mox vero Judæis prædicantibus in ipsas gentes convertendas est collata.—Modo discutiendum proponitur, quoniam *scientiae* et *malitiae* gradu persecutores Christi horrendum Deicidii crimen perpetraverint.

Conclusio 1^a.—CHRISTUM ESSE MESSIAM PROBABILIUS COGNOVERUNT PRIMATES JUDÆORUM, HAUD PLENE TAMEN POPULARES SEU PLEBEII; NEUTRI VERO EUM UT FILIUM DEI AGNOVISSE VIDENTUR (art. 5).

1^a *Pars* explicite ab Auctore traditur, nec sine fundamento. Nam *principes* populi Scripturas noverant; vitam, miracula, doctrinamque Christi perspiciebant: unde primum

erat ut ex tot signis sagaciores saltem colligerent eum esse Messiam in Lege promissum, licet ignorarent *qualiter* Messiae munus consummaturus esset. — *Populares* vero seu plebeii, quibus Scripturæ mysteria impervia erant, vix dubitative (paucis exceptis) ad hanc notitiam devenerunt; et si qui aliquando signorum Christi multitudine doctrinæque efficacia permoti visi sunt, puta (Joan. VII), postea tamen a suis doctoribus decepti fuerunt et ab omni fide in Christum aversi.

2^a *Pars decl.* — 1^o Huc quadrant plura sacra eloquia; nam dicitur (1 Cor. II, 8): *Si cognovissent, nunquam Dominum gloriæ crucifixissent*; (Act. III, 17) ait Petrus Judæis: *Scio quia per ignorantiam fecistis, sicut et principes vestri*, scil. per principes seducti; et Dominus in cruce pendens (Luc. XXIII, 34): *Puter, inquit, dimitte illis; non enim sciunt quid faciunt*. — 2^o Non diffitemur presto fuisse Judæis et prodigia et vaticinia, et ipsa Salvatoris verba quæ luculentter Filium Dei demonstrarent; nec omnino defuere, tum ante tum præsertim post resurrectionem, qui tam altum mystrium præfiterentur. At de plerisque valet *D. Thomæ* assertum “quod cognoverunt eum esse Filium Dei non per naturam, sed per excellentiam gratiæ singularis. Possumus tamen dicere quod etiam verum Dei Filium cognovisse dicuntur, quia evidenter signa hujus rei habebant; quibus tamen assentire propter invidiam et odium noluerunt” (art. 5 ad 1). — Igitur 3^o ignorantia, qua laborarunt, affectata erat, neque eos excusabat, sed magis eorum culpam aggravasse videtur. De eis dixit Christus (Joan. XV, 22): *Si non venissem et locutus fuissem eis, peccatum non haberent; nunc autem excusationem non habent de peccato suo*. Unde “*Judei peccaverunt, non solum tanquam hominis-Christi, sed etiam tanquam Dei crucifiores*” (resp. ad 3).

Conclusio 2^a. — PECCATUM CRUCIFIGENTIUM CHRISTUM GRAVISSIMUM FUIT EX GENERE SUO, INÆQUALE TAMEN EX PARTE PECCANTIUM (art. 6).

1^a *Pars elucet* ex eo quod genus peccati suunitur ex objecto seu materia circa quam versatur. Atqui occisio Christi, non solum hominis, sed et Dei fuit occisio, ita ut verissima sit propositio “*Deus crucifixus est*.” Ergo. — Notandum tamen est ex *D. Thoma* (III, Q. LXXX, a. 5) peccatum illud, etsi

valde grave vereque abominandum, cedere odio Dei, blasphemiae, aliquisque peccatis formaliter Deum impotentibus; quippe, quanquam materialiter Divinitatem attingebat, *formaliter* tamen magis humanitati adversabatur.

2^a *Pars decl.* secundum tres gradus.—1^{us} gradus est *principum* Judæorum, quorum peccatum gravissimum fuit tum ex genere suo, tum ex voluntatis malitia, prouti ipse Christus prophetice eis exprobrans prænuntiaverat (Matth. XXIII, 32): *Et vos implete mensuram patrum vestrorum* (qui prophetas occiderunt). Inter illos vero tristem primatum tenet *Judas proditor* ob majorem Christi cognitionem, altiorem statum, viliorum ingratitudinem et prodictionis turpitudinem (*Cajet.* in h. 1.).—2^{us} gradus est *plebis* Judaicæ, in qua certe minuebatur peccatum pro rata ignorantiae. Unde illos plebeios excusavit S. Petrus (Act. III, 17): *Et nunc, fratres, scio quia per ignorantiam fecistis.*—3^{us} gradus est *gentilium*, scil. Pilati maximeque militum, quorum peccatum magis adhuc excusabile fuit propter completam Legis nescientiam: Pilatus quidem timore Cæsaris Christum damnavit; milites vero de præsidis mandato, non ex cupiditate sicut Judas, nec ex invido animo sicut Pharisæi, eum crucifixerunt.

QUÆSTIO TERTIA

DE EFFECTU PASSIONIS CHRISTI

Cum passio Christi æternaliter fuerit in bonum salutemque humani generis ordinata, potior omnibus ac suavior de tam suavi mysterio disputatione versatur circa ejus *effectus*.—Hoc autem gratissimum argumentum duplice considerari potest, aut quoad *effectus* productos (art. 6), aut quoad varios producendi modos (art. 1-5): qui quinque recenseantur, scil. meritum (art. 1), satisfactio (art. 2), sacrificium (art. 3), redemptio (art. 4), et efficientia instrumentalis (art. 5), idcirco sex articuli instituentur.

Admirationi esse non debet quod una Christi passio tot diversis rationibus humanam operata sit salutem: quo enim altior et universalior est causa, eo plures causalitatis modos sortitur.—Porro ad insinuandum jam ab initio discrimen proprium inter hos diversos modos, observabimus passionem Christi posse salutem nobis afferre vel *per se*, scil. virtute instrumentaliter agente, vel *per alium*, scil. per Deum quem ad salutem principaliter operandam moyeat. Movet autem passio Deum quadruplici ratione: primo, *dignitate* actionis exigentis, uti mercedem, gratiam nobis elargiendam, et hoc est *meritum* (ad quod respicit *justitia remunerativa*); secundo, gravitate *pænalitatis* voluntarie susceptæ ad solvendum pro nobis debitum, et hoc est *satisfactio* (pertinens ad *justitiam vindicativam*); tertio, caractere *victime* in Cruce immolate ad honorandum et placandum Deum, et hoc est *sacrificium* (pertinens ad virtutem *religionis*); quarto, oblatione vite Christi ceu pretii liberationis nostræ, et hoc est *redemptio* (pertinens ad *justitiam secundum quamdam commutationis rationem*).

ARTICULUS I.

*Utrum passio Christi causaverit nostram salutem
per modum meriti.*

Plura jam alibi (Disp. IV, Q. IV, a. 3-4) de Christi meritis in genere disserta sunt; modo ergo quæstio suboritur de vi meritoria *passionis*, cui præcipua quadam ratione humana salus attribuitur.—Quia autem meritum esse potest *de condigno* et *de congruo*, vix præmonere oportebit salutiferæ Christi passioni vindicari meritum simpliciter seu *condignum*, in justitiae lege ac exigentia fundatum.

Conclusio.—CHRISTUS PER PASSIONEM SUAM NOBIS SALUTEM PROMERUIT; prout definivit *Conc. Trid.* (Sess. VI, c. 7): “*Sua sanctissima passione in ligno crucis nobis justificationem meruit.*”

Sane 1º meruit Christus per supplicium crucis exaltari et clarificari, juxta illa verba (Phil. II, 8-9): *Factus obediens usque ad mortem... propter quod et Deus exaltavit illum.* Atqui Christum ipsum testantem habemus (Joan. XVII, 10), quod clarificatus est non solum in seipso, sed etiam in suis fidelibus. Ergo.

2º Perspicua est *ratio generalis*.—Nam Christo data est gratia non solum tanquam singulari personæ, sed insuper tanquam Ecclesie capiti et homini universalis seu generis humani personam quodammodo gerenti: ergo ita se habent opera Christi relate ad totum humanum genus, sicut se habent opera alterius hominis in gratia constituti relate ad ipsum. Atqui negaverit nemo quod in manifesto est, scil. quemcumque hominem justum, patiendo propter justitiam, sibi salutem mereri; siquidem *beati qui persecutionem patiuntur propter justitiam* (Matth. V, 10). Ergo.

3º Accedit *arg. speciale* ex conditionibus meriti.—Meritum enim subaudit actionem liberam, honestam, in alterius bonum vertentem, cui idcirco ex præordinatione quadam jus insit ad præmium. Atqui conditiones istæ apprime convenient passioni Christi: hæc enim per *liberrimum voluntatis actum* a Christo tolerata est; *bonitatem* habuit non solum naturalis honestatis, sed et supernaturalis virtutis, maximo pollens

valore eoque ferventiores caritatem demonstrans quo acerbior fuit; *Deum extrinsecus glorificavit*; et ex Dei *præordinatione* (supra, Q. I, a. 1-2) sortita est ut *in salutem totius humani generis* redundaret. Ergo salutem illam verissime a Deo, quasi condignum præmium, promeruit.

Solv. obj.—OBJ. 1.—Passio Christi fuit ab exteriori principio. Atqui nullus meretur nisi per id cuius ipse est auctor. Ergo.

RESP. *D. M*:...in quantum passio, *C*; in quantum voluntatis actu acceptata, *N*.—*C.m.*—*Neg. consecq.*

OBJ. 2.—Christus ab initio conceptionis meruit et sibi et nobis. Atqui superfluum est aliquem iterum mereri quod ante meruerat. Ergo.

RESP. *D. M*:...ita ut merita illa ex se et sine passione valerent juxta Dei dispositionem arcere omnia impedimenta salutis, *N*; ita ut (disponente Deo) subordinarentur passioni *meritoriae simul et satisfactoriae* tanquam convenientiori medio salvandi genus humanum, *C*.—*Trans. m.*—*Neg. consecq.*

OBJ. 3.—Radix merendi est charitas. Atqui charitas Christi non crevit in passione. Ergo.

RESP. *D. M*:...nempe *vis ipsa meritoria ex charitate* dependet, *C*; nec meriti *utilitates ex genere operis* pensandæ sunt, *N*.—*C.d.m*:...quin etiam partæ fuerint novæ utilitates, *N*; plurimæ utilitates ex ipsa indole passionis ortæ sunt, *C*.—*Neg. consecq.*

ARTICULUS II.

*Utrum passio Christi causaverit nostram salutem
per modum satisfactionis.*

Plura *præobservanda* occurunt. —^{1º} Licet, *communius spectata, satisfactio dici possit cujuslibet debiti integra solutio*, attamen *strictius* definienda est *injuriæ alteri illatae compensatio*. Quæ cum importet pœnale quiddam offense exhibitum, patet discrimen inter satisfactionem et meritum:

satisfactio enim maxime attenditur penes ipsum *opus pœnæ* litter præstatum in reparationem injuriæ, *meritum* vero penes voluntatem bene operantis in alterius commodum seu obsequium; unde non omnis actio meritoria est satisfactoria, nec vice versa.—Itaque nomine *satisfactionis Christi* intelligenda est “reparatio injuriæ Deo per peccata hominum irrogatae et solutio pœna debitæ.”

2º Christum *improprie* tantum satisfecisse tenuerunt Sociniani eorumque sequaces, ejus satisfactionem in eo ponentes quod et nos exemplo moverit ad poenitendum et Deum Patrem oratione impulerit ad condonandum; at catholici omnes in Christo agnoscent verum ac *proprie* dictum satisfactorem.—Ex iis tamen nonnulli, ut Durandus, negant Christi operibus seu passionibus inesse (citra benevolam Dei acceptationem) valorem satisfactorum *de se* plene sufficientem, dum plerique *condignitatem intrinsecam* satisfactionum Christi tueruntur.—Tandem inter eos qui postremam hanc verioremque sententiam propugnant, quidam, ut Billot (th. 51), arbitrantur Christum nequaquam potuisse secunduir omnes *rigorosæ* justitiae conditiones satisfacere; sed alii plures id signate affirmant.

3º Duo determinare propositum est, nempe (contra Sociianos) Christum proprie pro nobis satisfecisse, et (contra dissidentes catholicos) satisfactionem ejus omnibus strictæ justitiae conditionibus honestatain fuisse.

Conclusio 1^a.—CHRISTUS, SE VADEM SEU SPONSOREM NOSTRUM CONSTITUENS, PROPRIE PRO NOBIS SATISFECIT; quod expressis verbis continetur in *Trid.* (Sess. VI, c. 7).

1º Locupletia sunt *Scripturarum* eloquia; pauca tamen proferam.—Ex V. T. habemus integrum caput (Is. LIII); ubi, inter alia, dicitur (v. 5 6): *Ipse vulneratus est propter iniquitates nostras... livore ejus sanati sumus... posuit Dominus in eo iniquitatem omnium nostrum*¹.—Ex N. T. præsto est illud (Gal. III, 13): *Christus nos redemit de maledicto Legis, factus pro nobis maledictum*, quatenus (S. Thom. in h. l.) in se suscepit tum maledictionem culpæ in opinione hominum, tum maledictionem pœnæ. Nam, ut

1.—Prophetiam istam *Messianam* esse docte evincit Knabenbauer, (*Comm.* in h. l., p. 325 sqq.).

expressius tradit S. Petrus (1 Ep. II, 24), *peccata nostra ipse pertulit in corpore suo super lignum, ut peccatis mortui, justitiae vivamus.*

2º Quandocumque Scripturæ vel Patres passionem ac mortem Christi exhibent velut salutis humanæ *premium*, validum enunciatae doctrinæ argumentum efferunt.—Præterea, ut quis *pro alio* satisfaciat, requiritur præexistens *debitum*, *opus* de se *aptum* ad satisfaciendum, et *acceptatio* illius substitutionis ex parte personæ Iesæ. Atqui totum humanum genus, peccato Adæ infectum, tenebatur debito culpæ et poenæ; Christi autem passio, maximæ caritatis religionisque sensu informata (fuit quippe sacrificium), non solum esse poterat expletiva poenæ, sed et reparativa injuriæ; insuper substitutio Christi satisfacientis in hominum vicem per hoc habita est quod Deus factus homo Caput nostrum juridicum ipsa Incarnatione et missione sua constitueretur. Ergo.—*Ratio* autem præfatæ subrogationis Christi ea fuit quam passim SS. Literæ (v. g. Rom. III, 25) innuunt sanctique Patres et Doctores explicatius tradunt, ut nempe *justitiae æqualitas* restitueretur: “quod factum est, dum ipse, qui absque peccato erat, mortem peccato debitam pati voluit, ut in se poenam aliis debitam satisfaciendo susciperet” (C. G. IV, 55).

3º Nec thesi nostræ contradicit necessitas *pœnalitatum quibus*, etiam post Christum passum, *subjicimur*. Tria enim, ut S. Thomas (*ibid.*) ostendit, evincent quam congruae sint illæ pœnalandates: 1^m est, “ut esset conformitas fidelium ad Christum, sicut membrorum ad caput; unde, sicut Christus prius multas passiones sustinuit et sic ad immortalitatis gloriam pervenit, sic decuit ut fideles ejus prius subjacerent passionibus et sic ad immortalitatem pervenirent, quasi *poriantes in seipsis insignia passionis Christi*, ut similitudinem gloriae ejus consequerentur, sicut Ap. dicit: *Hæredes quidem Dei, cohæredes autem Christi; si tamen compatimur, ut et conglorificemur*” (Rom. VIII, 17).—2^m est, “quia, si homines venientes ad Christum statim immortalitatem impassibilitatemque consequerentur, plures homines ad Christum accederent magis propter hæc corporalia beneficia quam propter spiritualia bona; quod est contra intentionem Christi, venientis in mundum ut homines ab amore corporalium ad spiritualia transferret.”—3^m est, “quia, si accedentes ad Christum statim

impassibiles et immortales redderentur, hoc quodammodo compelleret homines ad fidem Christi suscipiendam; et sic meritum fidei minueretur^{1.}

Conclusio 2^a.—SATISFACTIO CHRISTI FUIT EX SE VALORE INFINITA, IDEOQUE NON SOLUM CONDIGNA SEU ÆQUIVALENS, SED ET SUPERABUNDANS, IMO AD IPSUM JUSTITIÆ RIGOREM EXACTA.—Discurramus per partes.

1^a Pars de *infinitate* valoris satisfactionum Christi jam innotescere potest ex dictis de Christi meritis (Disp. IV, Q. IV, a. 4); at non abs re erit illam (contra Durandum et Scotistas) specialiter comprobare.

Igitur 1^o Clemens VI (in Extrav. *Unigenitus*) docet Christum non guttam sanguinis modicam, quæ tamen “*propter unionem ad Verbum*” pro redemptione totius generis humani suffecisset, sed quoddam profluvium effudisse; ex quo “*infinitus thesaurus*” hominibus comparatus est. Certe hic agitur de *infinitate* ab intrinseco, non ex sola Dei acceptatione.—² In merito et satisfactione seu injuriæ compensatione magis attenditur valor moralis quam physicus operis prestiti. Atqui ex infinita dignitate personæ agentis in Christo (S. Thom. h. art. ad 3) merita et satisfactiones *infinitum* ducebant valorem *moralement*: ergo. *Min. decl.* ex Cajet. (*Comm. in III, Q. I, a. 2*): “Actiones Christi humanæ, scil. amare Deum, voluntarie pati, et hujusmodi, habent duas conditiones. Altera est, quod sunt res quædam *creatae*, et sic sunt *finita* entia simpliciter: non enim sunt Deitas. Altera est, quod sunt res *personæ divinae*, ut proprii suppositi cuius sunt, et sic sunt *infinita* entia personaliter; et sunt infinitæ efficaciam in tali genere, puta meriti seu satisfactionis, ex hoc ipso quod sunt opera ipsius Dei, ut propriæ personæ exercitentis opera^{2.}”

2^a Pars sponte sequitur, sc. Christi satisfactionem fuisse non solum *æquivalentem*, sed cumulatam et *superabundantem*.

Sane 1^o a) *æquivalentem* seu condignam eam demonstrat frequens Scriptura, puta quod in persona Christi dicitur

1.—Sermonem contra Socinianos late persequitur Billuart (Diss. XIX, a. 4), qui cuncta eorum argumenta refellit.

2.—Cf. Billuart, l. cit. a. 5.

(Ps. LXVIII, 5): *Quæ non rapui, tunc exsolvebam*, hoc est, debita ab aliis contracta integraliter solvi; item illud (1 Joan. II, 2): *Ipse est propitiatio pro peccatis nostris, non pro nostris autem tantum, sed etiam pro totius mundi.*
b) Superabundantia autem perspicue eruitur ex (Rom. V, 15-21), cuius loci vis veluti summatur in hac sententia (v. 20): *Ubi abundavit delictum, superabundavit gratia.* Unde Chrysostomus (Hom. 10 in Ep. Rom. n. 2): “*Multo plura quam debemus, persolvit Christus, ac tanto plura, quanto stillam exigua immensum pelagus excedit.*”

2º Ille condigne satisfacit pro offensa qui exhibet offensam quod æque vel magis diligit quam oderit offensam. Atqui Christus ex charitate et obedientia patiendo majus aliquid Deo exhibuit quam exigeret recompensatio totius offensæ humani generis: ergo. *Min. decl. ex duplice capite. a) Primo ex parte rei exhibite;* nam non solum Christus passionem ac dolorem assumpsit immensuratum facileque omnium peccatorum debitum æquivalentem, sed in hostiam Patri obtulit propriam vitam dignitatem infinitam, quoniam vita erat Dei-Hominis. *b) Secundo ex parte subjecti satisfacientis:* gratia enim subindeque *charitas*, ex qua Christus passus est, *infinita* fuit non solum ea objectiva ratione que convenit omni gratiae et charitati, in quantum tendit in Deum, sed etiam secundum plenitudinem illam quæ proprio Christo competit ut principio universalis salutis (Disp. III, Q. I, a. 6). Amplius, personalitas Verbi, morali modo influens (ut mox diximus) in passiones humanitatis, eas *per infinite dignificabat*; quæ infinitas, immediate a Deo emanantes, erat subjectiva et *simpliciter*, longeque superior infinitate objectiva et *secundum quid* quam peccatum, mediante apprehensione hominis finita, ex offensa Dei inaestate derivat.

3º *Pars subjicitur* (contra quosdam theologos), et sic evinci potest.

Quatuor conditiones ad *rigorosam satisfactionem* requiri videntur: 1º, ut sit *ad alterum*; id quippe postulat justitia proprie dicta (II-IIº, Q. LVIII, a. 2); 2º, ut fiat *ex bonis propriis satisfacientis, independenter a gratia seu favore personæ offensæ*; secus enim satisfactio non solutio esset rigorosa debiti, sed remissio implicita vel explicita, partialis vel totalis; 3º, ut bona, de quibus satisfit, *non sint alio-*

saltem *justitiae titulo debita*, quamvis forte debeantur titulo gratitudinis, amicitiae, etc; 4^a, ut satisfactio talis sit quæ *acceptationem ex parte personæ læsæ quodammodo necessitet* debitumque, etiam ea nolente, extinguat. Atqui hæc conditiones in satisfactione Christi sufficienter reperiuntur: ergo. *Min. decl* :—*a) Primo* enim (ut quidam dicunt) Christus ut Verbum subsistens in humana natura poterat, servata tum naturarum tum suppositorum distinctione, *Patri* subsistenti in Deitate satisfacere. At, quia satisfactio illa erat debita Deo proindeque tribus personis divinis¹, aliam explicationem rectiorem censemus et amplectimur: scilicet, ut verificaretur prima conditio, unam personam Verbi *virtualiter* seu æquivalenter distingui in duo suppositiones pro reali discrimine naturarum in quibus subsistebat; siquidem distinctioni naturalium innititur distinctio jurium et officiorum. Unde Christus homo sibi Deo totique Trinitati reapsa satisfecit.—*b) Secundo*, quod spectat ad alteram conditionem, difficultas est omnia hominum bona sive naturalia sive supernaturalia esse a Deo; qua de causa merita nostra (quamvis condigna) nostræque satisfactiones, quæ in gratia Dei fundantur gratiæque auxiliis exeruntur, nunquam ad rigorem *justitiae* pertingunt. Verum (et hæc, p[ro]e aliis, solidior videtur responsio), cum principium *quod satisfactionis* in Christo sit Verbum divinum, naturæque ab eo assumpta, ipso Unionis hypostaticæ jure, debeantur gratia et charitas ceteraque dona quibus humanitas ornatur, legitimate infertur Christum *de bonis propriis* satisfecisse, quin satisfaciendi vis vel facultas ex mero Dei favore dependet (ita *Cajet.* in III, Q. I, a. 2; *Franzelin*, th. 47; etc).—*c) Tertio*, humanitas in Christo nulla adstringebatur personali debito culpæ vel poenæ, sed solum gratitudinis, religionis, obedientiæ, etc; hæc autem debita, juxta communem sententiam, *eodem actu* solvi possunt ac debitum *justitiae*, puta si quis ex contractu rependat pecuniam quam ex voto debet. Cæterum valor satisfactionum Christi erat *infinitus*, ideoque sufficiens ad adæquandum et excedendum quælibet creaturæ debita.—*d) Quarto* tandem uberrimam Christi satisfactionem tenebatur Deus velut ex *justitia* accipere, non quidem absolute, sed *hypothetice*, i. e. supposito quod decrevisset substi-

1—Cf. Suarez, Disp. IV, S. 5, n. 7-8.

tutionem Christi in locum perditorum hominum; eo magis quia sic humanum genus, in Capite juridico totius naturæ nostræ repræsentatum, *pro se* quodammodo satisfaciebat. Ex ea autem justitiae obligatione, quam in Deo ponimus, nulla ipsi imperfectio accessit; siquidem non homini, sed *sibi* seu suæ sapientiae præordinationi *debitor* factus est (cf. I, Q. XXI, a. 1, ad 2 et 3)¹.

Solv. obj.—OBJ. 1 (cont. 1^{am} concl.).—Satisfactio, non secus ac contritio et confessio, ipsius est peccantis. Atqui Christus non peccavit. Ergo.

RESP. D. M.: Satisfactio convenit cum contritione et confessione in hoc quod aliquo modo pertinet ad peccantem, C; in hoc quod debeat esse ejusdem personæ physicæ, N.—D.m:... in se, C; in suis membris, N.—*Neg. conseq.*

1^o Cum ex Christo-capite et membris seu fidelibus exsurgat una persona mystica, pro membrorum culpa satisfecit Christus ita ut expiatio haec pertineat ad omnes fideles; nam et apud homines charitate conjunctos contingit quod unus pro alio satisfaciat.—Neque 2^o similis est ratio de satisfactione ceterisque poenitentiae partibus: nam *contritio* et *confessio* maximie dijudicantur secundum internum animi motum qui uniuscujusque proprius est; *satisfactio* vero potissime accipitur secundum rem exhibitam quæ ab amicis suppleri potest.

OBJ. 2.—Nulli satisfit per majorem offensam. Atqui maxima Dei offensa in passione Christi insontis perpetrata est. Ergo.

RESP. C. M.—D.m:...ex parte crucifigentium Christum, C; nec acceptior fuit charitas Christi patientis vitaque ab eo Patri oblata quam exosa crucifixorum malitia, N.—*Neg. conseq.*

OBJ. 3 (cont. 2^{am} concl.).—Ap. de se ait (Col. I, 24): *Nunc gaudeo in passionibus pro vobis, et adimpleo ea quæ desunt passionum Christi.* Ergo satisfactio Christi manca fuit.

RESP. D. antec :...et haec intelligenda sunt de satisfactione Christi secundum se, N; de ejus applicatione, C.—*Neg. conseq.*

1.—De satisfactionis Christi indole ampliora docteque edisserit Billuart (Diss. XIX, a. 7).

“ Hæc verba, inquit *S. Thomas* (*Comm. in h. l.*), secundum superficiem malum possent habere intellectum, scil. quod Christi passio non esset sufficiens ad redemptionem, sed additæ sunt ad complendum passiones sanctorum. Sed hoc est hæreticum, quia sanguis Christi est *sufficiens* ad redempctionem etiam multorum mundorum.”—Igitur tenendum est eo sensu *passiones Christi adimpleri*, quatenus, mediantibus sanctorum passionibus, variis Ecclesiæ membris *applicantur*, eaque ratione servatur ordo prædestinationis qua statutum est ut satisfactiones corporis Christi mystici, in satisfactione Capitis fundatæ, ad certam copiosamque mensuram pertinenterent.

ARTICULUS III.

Utrum passio Christi operata sit per modum sacrificii.

Juverit nonnulla præobservare.—^{1º} Ex *D. Thoma* (II-II^a, Q. LXXXV) accipimus sacrificium, generice sumptum, in eo esse positum quod aliquid fiat in signum divinae subjectionis et honoris; unde ad virtutem religionis pertinet. Illud vero duplíciter contingere potest: vel enim actus elicitus alterius virtutis, v. g. eleemosyna, afflictio carnis, in finem divinae reverentie ordinatur, et hoc est sacrificium *improprie* sen *participative* dictum; vel efficitur aliquid speciale cuius tota laus est in contestando supremo Dei dominio, et hoc est sacrificium *proprie* acceptum.—Porro licet *consummative* seu perfective sacrificium consistat in actu animæ se suaque Deo offerentis (quod est sacrificium spirituale materiali excellentius), tamen, communi et *strictiori* sensu, nomine sacrificii intelligitur “aliquid exterius oblatum sacroque ritu destructum vel immutatum.” Immediate quidem et *symbolice* ritus ille ordinatur ad significandum sacrificium spirituale, mediate vero et *mystice* potest esse vel *commemorativus* vel *præfigurativus* alterius sacrificii.—Tandem aliud est sacrificium *privatum*, aliud *publicum* seu lege præscriptum quod *propriissime* sacrificium nuncupatur.

2º Cum superius (Disp. V, Q. I, a. 3) ostensum fuerit Christum esse sacerdotem omnibusque pateat sacerdotem dici maxime per respectum ad sacrificium (Heb. V, 1), *a priori* jam inferri posset munus illud sacerdotale expletum fuisse in cruce: nulla enim *alia* hostia in Scripturis commemoratur præter Christum ipsum, cuius incruenta immolatio sub specie panis et vini cruentam alteram morte Victimæ perfectam subaudit.—At, *Socinianis* negantibus mortem Christi fuisse verum sacrificium piacularē seu expiatorium, opere pretium erit rem ulterius declarare intimiusque investigare.

Conclusio.—CHRISTUS IN ARA CRUCIS VERUM, NECNON EXCELLENTISSIMUM, OBTULIT SACRIFICIUM.

1º *Pars de veritate sacrificii Crucis fide* constat tum ex *Conc. Ephes.* (can. 10) tum ex *Trid.* (Sess. XXII, cap. 1-2).

Prob. 1º ex *Scriptura* utriusque Testamenti.

a) In V. T. præsto sunt *figuræ*: quippe, secundum figuralem illius temporis œconomiam, cruenta sacrificia in Lege præcepta (quibus inerat vis symbolicæ substitutionis in locum hominum peccatorum)¹ *typum* gerebant futuræ immolationis cruentæ Novi Fœderis. Atqui immolatio hæc manifeste agnoscitur in morte Christi, qua Agnus immaculatus *realiter* subrogatus est in vicem nostram nostraque peccata *per se* expiavit: unde *D. Paulus* (Heb. IX-X) opponit umbræ veritatem, imagini realitatem, scil. sacrificiis inefficacibus crebroque iteratis antiquæ Legis unicam et efficacissimam Christi oblationem et hostiam.—His consonat præclara Isaïæ *prophetia* (c. LIII), qua et substitutio Christi in locum hominum graphicè describitur et mors ejus plane expiatoria sub specie sacrificii exhibetur, puta (vers. 7): *Oblatus est quia ipse voluit...* *sicut ovis ad occisionem ducetur* etc, et præsertim (v. 10): *Si posuerit pro peccato² animam suam* etc.

b) In N. T. præ aliis pluribus eligimus sequentia B. Pauli testimonia (Eph. V, 2): *Christus... tradidit semetipsum pro nobis oblationem et hostiam Deo in odorem suavitatis;*—(Heb. V, 9-10): *Consummatus (eh immolatio victimæ) factus est omnibus obtemperantibus sibi causa salutis æternæ*

1—Cf. Franzelin, th. 48-49.

2—Juxta Knabenbauer (*Comm. in h. l.*), hec loquendi ratio ex textu hebraico optime designat *sacrificium* vel *hostiam* pro delicto.

(en effectus sacrificii), *appellatus a Deo pontifex* (en potestas sacerdotalis); — (*ibid.* VII, 26-27): *Pontifex sanctus ... non habet necessitatem quotidie, quemadmodum sacerdotes, prius pro suis delictis hostias offerre, deinde pro populi: hoc enim fecit semel, seipsum offerendo; quam oblationem sacrificalem factam fuisse in morte Christi alia verba declarant* (*ibid.* IX, 12): *Per proprium sanguinem introivit semel in Sancta, æterna redemptione inventa*¹.

Prob. 2º ratione. — Sacrificium in genere describi potest (cum Bellarmino, de Euch. l. V, c. 2): “Oblatio externa facta soli Deo ad eum honorandum maximeque placandum, in qua res sensibilis et permanens ritu quadam sacro a legitimo ministro destruitur vel immutatur.” Atqui conditiones in hac definitione clausæ optime convenient morti Christi in Cruce: ergo.

Maj. decl. Secundum præfatam descriptionem quatuor causæ sacrificii accipi possunt: — 1^a est *causa efficiens*, quæ in legitimo ministro seu in sacerdote consistit (unde in præsenti economia, secundum Dei legem, nullum datur sine sacerdote verum sacrificium). — 2^a est *causa materialis*, constans ex genere remoto et proximo. *Remotum* quidem *genus* habetur in re sensibili et permanenti (unde excluduntur actiones transentes, ut psalmodie, genuflexiones, etc); *proximum* genus vero reponitur in externa rei illius oblatione, siquidem actio sacrificandi species est oblationis, adeo ut quandoque (etsi minus proprie) una vox pro alia adhibetur. — 3^a est *causa formalis*; quam in ritu sacro hostiæ destructivo vel immutativo sitam esse sic adstruit *D. Thomas* (II-II^æ, Q. LXXXV, a. 3 ad 3): “Sacrificia proprie dicuntur, quando circa res Deo oblatas aliquid fit; sicut quod animalia occidebantur et comburebantur, quod panis frangitur, et comeditur et benedicitur. Et hoc ipsum nomen sonat: nam sacrificium dicitur ex hoc quod homo facit *aliquid sacrum*... Unde omne sacrificium est oblatio, sed non convertitur.” —

1—Billuart (Diss. XIX, a. 4) et Knoll (P. III, S. II, c. 2, a. 2) biblica argumenta contra Socinianos solide propugnant.—Argumenta ex traditione hausta, a S. Clem. Rom. deinceps, vide penes eundem Knoll (*l. cit.*).

4^a est *causa finalis*; qua comprehenditur finis latreuticus, eucharisticus, impetratorius, præcipueque propitiatorius.

Min. ostend.—Et a) primo ipse Christus sacrificium crucis obtulit: quippe verus erat sacerdos, seque ipsum cœu mactandam victimam libens persecutoribus tradidit (quæst. præc., a. 1), juxta illud (Joan. X, 17): *Ego pono animam meam, ut iterum sumam eam.*—b) Secundo itaque res oblata fuit Christi humanitas, quasi flos creaturarum, quo nihil pretiosius nec convenientius Deo exhiberi poterat: siquidem caro erat naturæ peccatarum, secundum passibilitatem apta immolationi, peccati expers ideoque efficax ad emundanda peccata, item eo acceptior Deo quo major demonstrabatur charitas ex parte Christi se ipsum offerentis.—c) Tertio non defuit in hac oblatione ratio formalis et *specifica* sacrificii. Nam victima in sanguineo crucis altari immolata est; id autem non est factum sine aliqua ejusdem victimæ consecratione, quatenus scil. humana natura, ut hostia oblata Deo, novo modo sacra est seu *actualem* tunc acquisivit sanctificationem ex primævo gratiæ et Unionis hypostaticæ dono (III, Q. XXII, a. 2 ad 3); ritus vero sacrificialis in eo fuit quod Christus tempore paschali et extra portam, manibus extensis, pateretur.—d) Quarto finis sacrificii sub quadruplici respectu reperitur. Fuit enim latreuticus (Joan. XVII, 4): *Ego te clarificavi super terram; opus consummavi, quod dedisti mihi, ut faciam.* Fuit eucharisticus, ut probat gratiarum actio habita in instituenda Eucharistia passionis commemorativa (Marc. XIV; Luc. XXII). Fuit impetratorius (Heb. X, 10): *Sanctificati sumus per oblationem corporis J. C. semel.* Fuit maxime propitiatorius; nam Christus (Rom. IV, 25) *traditus est propter delicta nostra*, et iram Dei, quasi poenam ex peccato seutam, placavit: quod propriissime ad sacrificium pertinet.

2^a Pars concl. de *summa sacrificii Crucis excellentia paucis verbis absolvetur*.—Huc 1^o referantur quæ supra (Disp. V, Q. I, a. 4) de excellentia sacerdotii Christi disseruimus; ex quibus sponte profluit sacrificium Crucis fuisse *ex se maxime acceptabile, infinite efficax, vi perpetuum et universale*.—2^o Id singularissimum ejusdem sacrificii præstantiam commendat quod omnia in eo elementa sacrificia velut in unum coïverint: “ut, quoniam quatuor considerantur in omni-

sacrificio, *cui* offeratur, *a quo* offeratur, *quid* offeratur, *pro quibus* offeratur, idem ipse unus verusque Mediator, per sacrificium pacis reconcilians nos Deo, unum cum illo maneret cui offerebat, unum in se faceret pro quibus offerebat, unus ipse esset qui offerebat, et quod offerebat" (*August. de Trin. l. IV, c. 14*).

Solv. obj.—OBJ. 1.—Veritas debet figuræ respondere. Atqui in sacrificiis V. L., quæ erant figuræ Christi, nunquam offerebatur caro humana. Ergo.

RESP. D. M:... quantum ad aliquid, C; quantum ad omnia, N.—D.m: nec offerebatur caro animalium, N; per hanc animalium carnem præsignabatur caro Christi in perfectioni sacrificio immolanda, C.—*Neg. conseq.*

OBJ. 2.—Quicumque offerit sacrificium, aliquod sacrum facit. Atqui Christi occisores non sacrum quiddam, sed sacrilegium fecerunt. Ergo.

RESP. C. M.—D.m: et illi dicuntur sacrificium Crucis obtulisse, N; Christus seipsum sacrificavit caritatis igne et spontanea oblatione, C.—*Neg. conseq.*

OBJ. 3.—Martyres, Christi ad instar, supplicia et mortem perpessi sunt. Atqui eorum passiones non dicuntur proprie sacrificia. Ergo.

RESP. D. M:...i. e. datur quædam materialis similitudo inter Christum et martyres, C; similitudo formalis, N.—C.m.—*Neg. conseq.*

Martyres a Christo distinguuntur, quia nec sacerdotes plerumque fuerunt, nec proprie seipso sacrificabant (a quibus non dependebat mori vel non mori), nec sub saecro ritu mortem obierunt, nec *elictus religionis* actus fuit mors eorum, sed actus *fortitudinis* quo magis elegerunt vitam perdere quam fidem negare.

ARTICULUS IV.

*Utrum passio Christi operata sit nostram salutem
per modum redemptionis.*

(Q. XLVIII, a. 4-5)

Nullum e nominibus usu destinatis ad exprimendum salutis nostrae mysterium frequentius recurrit quam *redemptio*; nec immerito: siquidem huic voci propria inest significatio, qua beneficium humanae restorationis clarissimum profertur altiusque extollitur.—Et sane redimere generatim sibi vult “aliquem a servitute vel captivitate, soluto pretio, liberare”; quod quidem lapso homini per Christi mortem feliciter contigisse, ita ut Christo eique soli Redemptoris nomen simpliciter congruat, brevi nunc oratione declarabitur.

Conclusio 1^a.—VERE CHRISTUS PASSIONE ET MORTE SUA NOS REDEMIS; uti habet *Trid.* (Sess. XXII, c. 1).

1^o Suffragatur *auctoritas*.—Nam legitur (1 Pet. I, 18-19): *Non corruptibilibus, auro vel argento, redempti estis... sed pretioso sanguine quasi agni immaculati Christi et incontaminati*; et (Gal. III, 13): *Christus nos redemit de maledicto legis, factus pro nobis maledictum, quatenus scilicet maledictionis penam in cruce tulit*.—Abstinemus, in re tam evidenti, a referendis Patrum sententiis.

2^o Succeedit *ratio*.—Homo lapsus subjacebat servituti culpæ et poenæ. Atqui Christus, soluto pretio, eum ab utraque captivitate liberavit: ergo, *Maj.* constat. a) *Primo* quoad servitutem *culpæ*: nam *qui facit peccatum, servus est peccati* (Joan. VIII, 34), diaboloque incitanti consentiens in ejus incidit tyrannidem, quippe *a quo quis superatus est, hujus et servus est* (2 Pet. II, 19). b) *Secundo* quoad reatum *poenæ*: servitus enim est, quod homo contra suam voluntatem sit poenæ debito obligatus. *Min.* innotescit ex eo quod satisfactio Christi, sufficiens et superabundans pro peccato et reatu poenæ humani generis, fuit quasi quoddam pretium Deo exhibitum ad liberandum hominem ab utraque servitute.—*Conf. arg*: nam ipsa satisfactio hominis pretium quoddam dicitur, quo quis se ipsum vel alium quodammodo redimit a peccato et pena, secundum illud (Dan. IV, 24): *Peccata tua eleemosynis redime*; ergo *a fortiori* etc.

Conclusio 2^a.—SIMPLICITER LOQUENDO, REDEMPTIONIS MUNUS PROPRIMUM CHRISTI DICENDUM EST.

Revera ad redimendum duo requiruntur, scil. actus solutionis et pretium solutum. Atqui, in redemptione humani generis, utrumque *simpliciter* a Christo solo præstatum est: ergo,—*Min. decl.* ex comparatione sive cum Trinitate, sive cum sanctis.

1^o Cum *Trinitate*.—Enim vero, si Redemptionis opus *personaliter* sumatur, manifestum est solum Christum fuisse personam *quaæ* de suo hominem redemerit.—Sin vero *causaliter* spectetur, cum tota Trinitas sit prima causa operum ad extra, sic quidem *mediate* et *remote* redemptio tribus personis divinis attribui potest, secundum illud (Ps. XXX, 6): *Redemisti me, Domine, Deus veritatis*; verum *immediate* et *proxime* propria est Christi, in quantum homo-Deus pretium sui sanguinis pro nobis exsolvit (cf. *Cajet.* in h. l.).

2^o Cum *sanctis*.—Passiones enim sanctorum proficiunt quidem Ecclesiae per modum exempli et exhortationis, imo et per modum satisfactionis (ut patet ex doctrina *de Indulgentiis*), non tamen absolute et simpliciter, sed diminute et secundum *quid*: quandoquidem supponunt redemptionem Christi, prosunt ex abundantia tantum, nec nisi a poena temporali liberare valent.

Solv. obj. (cont. 1^{am} concl.).—OBJ. 1.—Nullus redimit quod suum esse non desiit. Atqui homines nunquam desierunt esse Dei. Ergo.

RESP. C. M.—*D.m* :...nunquam subducti sunt supremæ ejus *potestati*, *C*; nunquam per peccatum a suavi divinæ *caritatis* jugo recesserunt, *N*.—*Neg. conseq.*

OBJ. 2.—Exigit justitia ut injustus possessor rei alienæ ei privetur sine accepto pretio. Atqui diabolus injuste sibi hominem subjugaverat. Ergo.

RESP. D. M:....i. e. non est solvendum pretium invasori injusto, *C*; nec domino juste hanc invasionem et possessionem permittenti, *N*.—*D.m*: independenter a Deo, *N*; ita ut juste Deus permiserit hanc invasionem quantum ad culpam, hominisque judex cum diabolo, cœu carcerario et tortori, æque tradiderit quantum ad poenam, *C*.—*Neg. conseq.*

ARTICULUS V.

Utrum passio Christi operata sit nostram salutem per modum efficientiae.

Titulus ipse satis insinuat dubium hic non moveri de influxu pure *moralis*: quantum enim sit influxus hujusmodi quamque uberes salutis fructus meditantibus quibusque suavissimum Christi patientis mysterium parere valeat, quotidiana experientia testatur.—At inquiritur de causalitate passionis stricte dicta seu per modum *efficientiae* non quidem principalis, sed instrumentalis, quam generatim humanitati Christi attribuendam esse alibi (Disp. III, Q. V, a. 2) demonstravimus.

Conclusio.—PASSIO CHRISTI EFFICIENTIA INSTRUMENTALI POTISSIMA SALUTEM NOSTRAM OPERATUR. — Est conclusio theologica.

1^o Indicium hujus veritatis deductur ex eo quod legimus (1 Cor. I, 18): *Verbum crucis... ies qui salvi sunt, id est nobis, Dei virtus est*, seu agit in virtute Dei; unde (*Ibid.* v. 25) additur: *Quod infirmum est Dei, fortius est hominibus*, seu infirmitate Dei patientis virtutem ex Divinitate sortitur omni vi humana praestantiorem. Atqui virtus Dei efficienter operatur salutem nostram. Ergo et passio Christi etc.

2^o Memoranti distinctionem inter agens principale et instrumentalē, duo jam constare arbitramur: scil. a Deo solo *principaliter* effici opus salutis, sed humanitatem Christi esse praecipuum Divinitatis instrumentum. Atqui haec efficacia instrumentalis ad omnes extendi debet Christi actiones et passiones; quippe omnium fuit vis salvifica, maxime vero finalis passionis et mortis. Ergo.—*Conf.* quia passio Christi se habet veluti spiritualis *medicina* a cœlesti Medico infirmis hominibus adhibenda; medicina vero, quando applicatur, physice agit et sanat.

3^o In *Conc. Trid.* (Sess. VI, c. 7) recensetur causa salutis efficiens Deus, instrumentalis vero sacramentum Baptismi (cui adjungas cetera sacramenta). Atqui, juxta Patrum Ecclesiæque sensum, sacramenta N. L. ex latere Christi pendentis in cruce fluxerunt; nec *fluxus* ille verius quam per

motum virtutis instrumentalis intelligi potest. Ergo humana-
ritas Christi patientis habenda est veluti instrumentum per
quod gratia defluens ingreditur sacramenta, præsertim sacra-
mentum peccati originalis deletivum, scil. Baptismum.

Solv. obj.—OBJ. 1.—Quod non est, non potest efficienter
operari. Atqui mors seu passio Christi amplius non est. Ergo.

RESP. D. M: Quod non est neque formaliter, neque virtua-
liter...C; quod non est formaliter, sed est virtualiter...N.—
C.d.m: formaliter, C; nec est virtualiter in cicatricibus et
gloria humanitatis Salvatoris, N.—*Neg. conseq.*

OBJ. 2.—Nullum agens efficienter agit nisi per contactum.
Atqui humanitas Christi passi nequit contingere omnes
homines. Ergo.

RESP. D. M: ... nisi per contactum suppositi vel virtutis,
C; suppositi tantum, N.—C.d.m: ... contactu suppositi, C;
virtutis, S.d: ex se, C; ex influxu Dei omnipræsentis ejus-
que viam applicantis per motum fidei¹ et sacramenta, N.—
Neg. conseq.

OBJ. 3.—Eiusdem non est per meritum sollicitare effectum
ab alio et per efficientiam illum ex se producere. Atqui passio
Christi meritoria fuit humanæ salutis. Ergo.

RESP. D. M: ...sub eodem respectu, C; sub diverso res-
pectu, N.—D.m: ...secundum quod comparatur ad voluntatem
et veluti in ordine intentionis, C; quin etiam possit
efficienter in salutem influere, secundum quod comparatur
ad Divinitatem principaliter agentem et in ordine applica-
tionis gratiae ad singulos homines, N.—*Neg. conseq.*

1—Juxta D. Thomam (II-II^o, Q. CLXXVII, l ad l) Deus etiam
“*interiori* motu hominis” instrumentaliter utitur ad exequenda
opera supernaturalia.

ARTICULUS VI.

Quinam sunt effectus passionis Christi;—de eorum extensione et applicatione.

(Q. XLIX)

Fructus passionis Christi spectari possunt vel respectu Christi ipsius, vel respectu nostri. — Christum quidem potuisse nonnulla sibi mereri, supra (Disp. IV, Q. IV, a. 3) accepimus; ea autem *de facto sibi meruisse* summatim evincitur, quia æquum est ut si quis subtraxerit sibi justa ex voluntate quod debebat habere, liberali compensatione munetur. Atqui Christus in sua passione seipsum infra suam dignitatem humiliaverat quantum ad quatuor, scil. quantum ad mortem, sepulcri infernique locum, confusionis opprobrium, et demissioneum sub humana potestate. Igitur jure optimo dicitur exaltationem meruisse etiam quantum ad quatuor, nempe quantum ad resurrectionem, ascensionem in cœlum, gloriam manifestatæ Divinitatis, et influxum judiciarice potestatis (art. 6).

Verum præcipua hujus articuli intentio est, describere effectus quos passio nobis peperit, eosque inspicere tum secundum se, tum ex parte subjecti cui destinantur.

Conclusio 1^a.—EFFECTUS PASSIONIS CHRISTI QUINQUE GENERATIM NUMERANTUR, REMISSIONIS PECCATI, LIBERATIO A POTESTATE DIABOLI, LIBERATIO A PENA PECCATI, RECONCILIATIO CUM DEO ET APERTIO JANUÆ CELORUM;—quorum tres sunt de malo removendo, duo de bono obtinendo.

1^o Remissio peccati.—Hic fundamentalis effectus expresse continetur (Apoc. I, 5): *Dilexit nos, et lavit nos a peccatis nostris in sanguine suo*; cf. Heb. IX, 14.—Tripliciter autem passio Christi causa est remissionis peccati: *a)* primo *dispositive* seu per modum provocantis, ineffabilis amoris exemplo, ad charitatem, qua veluti ultimo dispositi peccatorum veniam consequimur. *b)* Secundo *exigitive*; Christus enim per suam passiōnem et merendi et satisfaciendi et sacrificandi et redimendi actum exercuit tanquam Caput humani generis, ex quo membra sibi conjuncta vitam derivarent.

Porro secundum singulos illos causalitatis modos, jure dato ad gratiam, primum seu præcipuum arcetur salutis obstaculum, scil. peccatum sub variis rationibus aversionis a Deo, offendit Doi, masculæ, servitutis, etc. c) Tertio efficienter, caro enim, secundum quam Christus passus est, instrumentaliter operatur ex virtute divina ad expellendum peccatum.

2º Liberatio a potestate diaboli. — Dicit enim Dominus (Joan. XII, 31-32): *Nunc princeps hujus mundi ejicietur foras, et ego, si exaltatus fuero a terra* (per crucis passionem), *omnia traham ad me ipsum;* cf. Coloss. I, 13. — Sane homo sub potestate diaboli tenebatur triplici vinculo, scil. peccato ipso quo diabolo consenserat, justitiâ Dei eum adversæ dominationi relinquentis, et nequitia dæmonis omnem artem contra humanum genus exercentis. Jam vero triplex illud vinculum vi passionis fortunatim solutum est: quippe per eam consecuti sumus remissionem peccatorum necnon reconciliationem cum Deo, justique Deus nos dæmonis imperio in pœnam ejus iniquæ machinationis contra Christum subduxit. — Ubi subnotabo potestatem diabolicam aliam fuisse *impugnationis*, aliam detentionis seu *domini* super humanum genus singulosque peccatores. “Potestatem igitur diaboli qua victos detinet, Christus per passionem ex toto amovit quantum ad sufficientiam, licet non quantum ad efficientiam... Sed potestatem quia impugnat non ex toto evacuavit, sed debilitavit, dum ipsam hostem vicit et hominibus auxilia multa ad resistendum tribuit” (3 S. D. XIX, Q. I, a. 2).

3º Liberatio a pœna peccati. — Pœna, cuius reatus fundatur in culpa, duplex est, *æterna* et *temporalis*. Porro ab utraque Christus eos liberavit qui effectum ejus passionis percipiunt aut percipere possunt: — a) A pœna quidem *æterna* sive originali sive actuali peccato debita; quippe, remissa culpa per passionem, necesse erat (indirecte) dissolvi reatum immediatus et formaliter culpæ connexum, scil. reatum pœnæ *æternæ*. — b) A pœna vero *temporali*; quia passio fuit sufficiens et superabundans satisfactio pro peccatis totius humani generis. *De fucto* tamen pœna *temporalis* respondens *peccato naturæ*, ut mors, passibilitas, etc, non tolletur nisi in fine mundi, quando universa natura reparabitur; pœna vero respondens *peccatis personalibus* totaliter auferitur per bap-

tismum et poenitentiam perfectam, quibus mediantibus passio Christi nobis sufficienter applicatur; imperfectam autem poenitentiam supplet purgatorium¹.

4º Reconciliatio per gratiam cum Deo.—Id explicite tradit Ap. (Rom. V, 10): *Reconciliati sumus Deo per mortem Filii ejus*; cf. Rom. III, 24; 2 Cor. V, 18-19, etc.—Revera, sicut homo per peccatum efficitur Dei inimicus, ita per gratiam eidem reconciliatur seu in amicitia divina redintegratur, propterea quod formalis est gratiae effectus reddere justum et amicum Dei. Atqui per passionem suam Christus removit peccatum, Deique iram odore tam acceptabilis sacrificii placavit, quatenus copiosissimam gratiam humano generi meruit ac procuravit. Ergo passio Christi effecit reconciliationem hominis cum Deo, non quidem ex parte divinæ erga nos benevolentie (que fuit principium passionis nec potest sub aliquo merito cadere), sed secundum objectivam et formalem reconciliationis rationem.

5º Apertio januae celi.—Hominem per Christi passionem admissum fuisse ad fruendum beatitudine nondum ulli justo concessa, liquido constat ex verbis Ap. (Heb. X, 19): *Habentes fiducium in introitu sanctorum in sanguine Christi*; cf. Heb. IX, 12.—Et sane, duplex peccatum prohibet ab ingressu regni cœlestis: unum quidem *commune* totius humanæ naturæ, a primo parente derivatum; aliud *speciale* seu personale, proprio uniuscujusque actu commissum. Atqui passio Christi nos liberavit ab utroque peccato et quantum ad culpam et quantum ad reatum poenæ. Ergo.—Circa min. advertatur peccatum originale inficere primario naturam, secundario vero personam: quo circa 8. patres V. T. poterant per fidem passionis Christi mundari a peccato tum actuali, tum originali secundum maculam personalem, non tamen secundum quod directe et primario ipsa natura communem reatum patiebatur. Ad hunc igitur abolendum

1—Nota hic quæ scribit S. Thomas (3 S. D. XIX, Q. I, a. 3, sol. 2):
 “ Non oportet quod sit conformatio ad passionem Christi secundum experientiam tantæ poenæ ad quantam aliquis obligatur ex culpa; quia passio capit in membra redundant, et tanto plus quanto est ei aliquis per caritatem magis conjunctus; unde ex vi passionis Christi diminuitur quantitas debitæ poenæ; et secundum hoc dicitur has poenas auferre, in quantum eas diuinuit.”

reatum passio Christi *in actu* necessaria fuit, citra quam nemo intrare poterat regnum celeste.

Conclusio 2^a. — CHRISTI PASSIO AD OMNES HOMINES SALVANDOS INTENDITUR; SED HUJUS UNIVERSALIS REDEMPTIONIS FRUCTUS NECESSUS EST SINGULIS HOMINIBUS PER MEDIA IDONEA APPLICARI. — Utrumque eruitur ex verbis *Trid.* (Sess. VI, c. 2-3), ubi Christus missus pronuntiatur ut “*omnes* adoptionem filiorum recipierent,” et additur: “*Verum, etsi ille pro omnibus mortuus est¹, non omnes tameu mortis ejus beneficium recipiunt, sed ii dumtaxat quibus meritum passionis ejus communicatur.*”

1^a Pars dirigitur contra quosdam antiquos *Prædestinatianismi* accusatos, præsertim vero contra *Calvinum*² et *Jansenium*³. — Refert *S. Alphonsus Lig.* (Hist. hær., Confut. XIII, n. 12) quosdam theologos sensisse quod Christus fuerit Redemptor omnium *sufficientia pretii*, non *sufficientia voluntatis*; at Christum pro omnibus *voluisse* (scil. antecedenter) pretium salutis offerre, sententia communior est.

1^b Demonstravimus (*de Reparat.* Disp. IV, Q. II) omnibus hominibus etiam infidelibus gratias proxime vel remote sufficietes exhiberi. Jamvero harum gratiarum fons est Christi passio. Cf. (*ibid.* a. 4) plures Scripturæ textus, 1 Tim. II, 4; II, 6; IV, 10; 1 Joan. II, 2; qui nisi a naturali sensu detorseantur, rem nostram plane conficiunt: asseritur enim Christus mortuus *pro omnibus*, Redemptor et Salvator *omnium*, propitiator *pro toto mundo*, absque distinctione *Judæi* et *Græci*, etc.

2^a Ex traditionis thesauro unum deponam suffragium *Augustini*, quem adversarii pro se vindicant; ait enim

1—2 Cor. V, 15.

2—Calvini de *limitata* ad electos redemptione detestandam doctrinam (quoniam ali singulis etatibus tuiti sunt) intra ipsum Protestantismi sinum maxime impugnarunt *Arminiani, Remonstrantes* etiam dicti (cf. Schaff, *The Creeds of Christendom*, Vol. I, p. 517). — Plerique Calvinistæ seu Presbyteriani moderni (uti Hodge, *Syst. theol.*, Vol. II, P. III, ch. 1) patrii systematis rigiditatem emollire satius judicant.

3—Damnata est tanquam *falsa* et *temeraria* sequens prop. *Janessianæ*: *Semipelagianum est dicere Christum pro omnibus omnino hominibus mortuum esse aut sanguinem fudisse.*

S. Doctor (De Civ. Dei l. XX, c. 6, n. 1): "Pro *omnibus mortuis* vivus mortuus est unus, i. e. nullum omnino habens peccatum;" imo, de *Juda* proditore loquens, expresse eum Christi sanguine redemptum tradit (Enarr. in Ps. 68, Serm. 2, n. 11): "Projecit, inquit, pretium argenti, quo ab illo Dominus venditus erat; nec agnovit pretium, quo *ipse a Domino* redemptus erat¹."

3º De mente *D. Thomae* non est cur vel uno momento ambigatur; dicit enim (III, Q. XLIX, a. 1 ad 3): "Christus sua passione nos a peccatis liberavit causaliter, i. e. instituens causam nostræ liberationis, ex qua possent *quecumque* peccata quandoque remitti, vel præterita, vel præsentia, vel futura;" et (*ibid.* a. 2 ad 3): "Semper per passionem Christi est paratum hominibus remedium se tuendi contra nequitas dæmonum, etiam tempore Antichristi²."

4º Universalem fuisse Redemptionem satis clare, præter ea, ostendit constans et indefessum *Ecclesiæ studium* in propaganda fide Christi ejusque meritorum divitiis deferendis usque ad remotissimas et incoltissimas gentes: ubique enim terrarum versati sunt ac versantur missionarii prædicantes "Christum crucifixum" omnibusque etiam despiciuntis hominibus ministrantes religionis auxilia atque sacramenta³.

2º Pars concl. 1º generatim evincitur ex ratione allata a *D. Thoma* (C. G. IV, 55): "Mors Christi est quasi quædam *universalis causa* salutis, sicut peccatum primi hominis fuit quasi universalis causa damnationis. Oportet autem universalem causam applicari ad unumquodque specialiter, ut effectum universalis causæ participet. Effectus igitur peccati primi parentis pervenit ad uniuersumque per carnis originem; effectus autem mortis Christi pertingit ad unumquemque per spiritualem regenerationem, per quam homo Christo quodammodo conjungitur et incorporatur; et ideo

1—Vid. plura penes Petavium, *de Incarn.* l. XIII, c. 2 sqq;—Knoll, P. III, S. II, c. 2, a. 4.


2—Eodem spectabant oratio Christi ejusque passio. Porro "Christus quantum est de se, *pro omnibus* oravit" (S. Th. in Joan. XVII, l. 2).

3—Cf. Leonis XIII ep. encycl. *Sancta Dei civitas*, de tribus piis operibus gallice dictis *Propagation de la Foi*; *Sainte Enfance*; *Ecole d' Orient*.

oportet quod unusquisque querat regenerari per Christum et alia suscipere in quibus virtus mortis Christi operatur."

2º Quantum ad media quibus passio Christi nobis applicatur, "baptismus, pœnitentia et alia sacramenta exiguntur ad deletionem peccatorum sicut instrumentaliter agentia... unde agunt in virtute passionis dominicæ, et ipsam passionis virtutem in nos quodammodo transfundunt" (3 S. D. XIX, Q. I, a. 1, quæstiunc. 2 ad 4).—Etiam per fidem explicitam vel implicitam passionis Christi fructum Redemptionis percipimus, secundum illud (Rom. III, 25): *Quem proposuit Deus propitiationem per fidem in sanguine ipsius.* Hæc tamen fides non mundat a peccato nisi sit caritate formata, cum voto sacramentali saltem implicito.—Tandem homo per passionem Christi ab omnibus peccati sequelis liberatur, sed certo ordine nec sine propria cooperatione; unde, licet merita et satisfactiones Salvatoris superabundaverint, datur tamen locus, absque Redemptionis præjudicio, meritis et satisfactionibus nostris. a) Sane merita justoruin, nedum opponantur meritis Christi (ut *Novatores* volunt), in eorum laudem redundant, tum quia ab illis nascuntur, tum quia inde habet homo quod nobili sue activitatis usu salvetur¹. b) *Satisfactiones* nostræ quare requirantur, supra (art. 2) declaravimus; cujusque tamen satisfactio "multo minor sufficit quam esset condigna peccato, cooperante satisfactione Christi" (III, Q. XLIX, a. 3 ad 2). c) *Indulgenciarum* quoque thesaurus includit passiones sanctorum Christi passionibus adjunctas, non quasi hæ per se non sufficient, sed quia æquum est ut illæ fructu non frustrantur, præsertim cum id sit Christo, a quo omne bonum nostrum manat, gloriosum, ipsisque sanctis honorificum.

1—Bellarm., *de Justific.* I. V, c. 5.










IMAGE EVALUATION TEST TARGET (MT-3)



6"



Photographic
Sciences
Corporation

23 WEST MAIN STREET
WEBSTER, N.Y. 14580
(716) 872-4503



QUÆSTIO QUARTA

DE MORTE ET SEPULTURA CHRISTI

Quæ S. Thomas de hoc arguento per duas distinctas quæstiones edisserit, nos, brevitatis gratia, ad tres articulos sub uno disquisitionis capite reducemus sequenti ordine: nimirum dicemus de *convenientia mortis Christi* (art. 1), de propria illius *mortis indole* (art. 2), deque Christi *sepultura* (art. 3).

ARTICULUS I.

De convenientia mortis Christi.

(Q. L, a. 1 et 6)

Contra *Paulusium* aliosque scientiæ biblicæ corruptores admissum supponimus factum fundamentale mortis *veræ* (non lethargice tantum) Salvatoris in cruce; quod quidem non solum Scriptura explicite impliciteque attestatur, sed et universa Christianitas omnis ævi pro certo indubitateque habuit.—Altissimum profecto stupendumque mysterium, in quo Auctor vitæ vitam verissimo verborum sensu amisit!

Conclusio.—OMNINO CONVENIENS FUIT CHRISTUM MORI.

1º Id colligitur ex sententia prophetica Caiphæ qui, licet in mente haberet bonum temporale suæ gentis, Deo tamen inspirante et intendente bonum humani generis spirituale, hæc effatus est (Joan. XI, 50): *Expedit vobis, ut unus moriatur homo pro populo, et non tota gens pereat.*

2º Hoc convenientissimum fuit quod procurandæ saluti nostræ tum *immediate* tum *mediate* deservire maxime poterat. Atqui hujusmodi est mors Christi: ergo. *Min.* ostend. per partes.

1^a pars min. decl:—etenim mors Christi spectari potest tum *in fieri* tum *in facto esse.*—a) Porro, sub primo res-

pectu, congruentissime Christus se morti subjecit, ut sic satisfaceret sustinendo pénam ipsam quam humanitas prævaricatrix meruerat.—*b*) Sub altero respectu, more seu emortuum Christi corpus aptum fuit instrumentum Divinitatis sibi unite ad quosdam effectus salutis *efficienter* producendos: quippe congruit instrumentum quo simul producitur atque significatur aliquali similitudine intentus effectus. Jamvero evidens analogia similitudo hic reperitur, quatenus per mortem Christi destructa dicitur et mors animæ seu peccatum, et mors corporis ex peccato consecuta; quod Ecclesia canit (Præf. Pasch.): *Qui mortem nostram moriendo destruxit. Ergo.*

2^a pars min. evincitur, quia *mediate* et per modum doctrinæ mors Christi plures nobis utilitates præstitit.—*a*) Nos imprimis certiores fecit de *veritate naturæ* a Verbo Dei assumptæ.—*b*) Christo mortem fortiter aggrediente, facilius quoque imbecilles homines poterant a *timore mortis* liberari, prout expresse notavit Ap. (Heb. II, 15).—*c*) Item, congruebat mors Domini, ut corporaliter moriens in pœnam peccati daret nobis exemplum *spiritualiter moriendi* peccato, juxta illud (Rom. VI, 10-11): *Quod mortuus est peccato, mortuus est semel; quod autem vivit, vivit Deo. Ita et vos existimate vos mortuos quidem esse peccato, viventes autem Deo.*—*d*) Tandem hoc ipsum conveniebat ut opportunitas daretur admodum proficue ac gloriose Salvatoris resurrectioni.

ARTICULUS II.

De indole propria mortis Christi.

(Art. 2-5)

Ut ea quæ ad mortem Christi peculiari modo pertinent plane appareant, tria (præter separationem animæ a corpore in qua mors communiter consistit) investiganda sunt: 1^m, quenam fuerit in *triduo mortis* habitudo Divinitatis ad carnem et animam Christi; 2^m, num Christus tunc retinuerit

rationem *specificam* hominis; ^{3^m, num fuerit *idem numero* corpus Christi viventis et mortui.}

Conclusio 1^a.—DIVINITAS IN MORTE CHRISTI NON EST A CARNE ANIMAQUE SEPARATA, IMO NEC A SANGUINE.

1^a *Pars* (juxta Suarez, Disp. XXXVIII, S. 2, n. 4) communis est sententia theologorum, quæ certe innititur in traditione ¹ et consensu Ecclesiæ.—Sequenti processu argumentabimur.

1^o Ea quæ sunt humanæ naturæ non dicuntur de Filio Dei nisi ratione unionis. Atqui, in *Symbolo*, de Filio Dei prædicatur id quod corpori Christi emortuo separataeque animæ convenit, scil. esse *sepultum et descendisse ad inferos*. Ergo.—2^o Dona de se *permanentia* divinæ gratiæ nunquam sine culpa hominis revocantur, siquidem *sine pœnitentia sunt dona et vocatio Dei* (Rom. XI, 29); ex altera parte, gratia unionis, per quam divinitas unita est hypostatice carni et animæ Christi, de se maxime permanens est, in quantum ordinatur non ad affectualem tantum, ut gratia adoptionis, sed ab substantialem unionem. Atqui in Christo nullum fuit peccatum, quo conjunctio divinitatis cum carne et anima dissolveretur. Ergo hæc conjunctio post mortem perseveravit (cf. supra Disp. II, Q. III, a. 5).—3^o Ad præcavendas quasdam objectiones, duo advertemus. a) *Primo*, quemadmodum Verbum Dei propter unionem humane naturæ non dicitur humanitas, sed habens humanitatem, ita ex ejus conjunctione cum corpore et anima in triduo mortis non sequitur quod fuerit anima et corpus, sed *habens* animam et corpus. b) *Secundo* (ut expresse docet *Damascenus*, Orth. Fid. III, 27), licet durante morte divinitas conjuncta manserit animæ et corpori, *non* propterea persona una *in duas* divisa fuit, sed eadem Verbi hypostasis subsistentiam utrique, tum animæ, tum corpori, communicavit.

2^a *Pars* respicit *sanguinem* in passione effusum; de quo magna olim exarsit controversia inter *Franciscanos* et *Dominicanos*, his propugnantibus permanentiam unionis Verbi cum sanguine illo, primis vero eam negantibus. Res (prouti refert Billuart, Diss. VII, a. 2) delata est ad Pium II et

1.—Patrum doctrinam erudite, ut assolet, expendit Petavius, *de Incarn.* l. XII, c. 19.

coram eo agitata, quin S. Pontifex quæstionem definierit: *communior tamen longeque securior videtur sententia affirmans.*

1^o In ejus gratiam suppetit auctoritas et ratio *D. Thomæ* (*Quodl. V. a. 5*): “Sanguis ille, ait, in passione effusus humani genus sanctificavit, secundum illud (*Heb. XIII, 12*): *Jesus, ut sanctificaret per suum sanguinem populum, extra portam passus est.* Humanitas autem Christi salutiferam virtutem habuit ex virtute Verbi sibi uniti (*Damasc.*). Unde manifestum est quod sanguis in passione effusus, qui maxime fuit salubris, fuit Divinitati unitus.”—2^o Accedit quod sanguis, utpote pertinens ad integratatem humanæ naturæ, fuit a Verbo simul cum carne, scil. a conceptionis initio, assumpsitus: ergo, sicuti caro mansit Verbo unita in triduo mortis, ita et sanguis; cui, non secus ac reliquis humanæ naturæ partibus, congruit axioma: *Quod Verbum semel assumpsit, nunquam dimisit.*

Conclusio 2^a.—SIMPLICITER ET ABSOLUTE LOQUENDO, ERRONEUM EST DICERE QUOD CHRISTUS IN TRIDUO MORTIS FUERIT HOMO.—Dico *simpliciter* et absolute; nam conceditur Christum tunc fuisse hominem *mortuum*, quod est conditio diminuens.

Thesis 1^o fundatur in *veritate fidei*.—*a)* Etenim fide tenemus (juxta definitionem *Conc. Ephes.*) Christum *vere fuisse mortuum*. Atqui huic propositioni immediata oppositio contradicit altera, scil. Christum in triduo mortis retinuisse rationem specificam hominis. Ergo postremum hoc est error contra fidem. *Min.* liquet, quia pertinet ad veritatem mortis in homine quod destinat esse homo, disjunctâ a corpore animâ per quam compleetur humana natura.—*b)* Praeterea, remoto superiori seu universaliori, removetur inferius seu magis particulare; vivum vero superius est ratione animalis et hominis. Atqui ex fide novimus corpus Christi in triduo mortis *non fuisse vivum*. Ergo a fortiori non fuit humanum nec proinde Christus fuit homo.

Conf. 2^o ex *falso fundamento* adversariorum.—*a)* Ideo quidam aestimarunt Christum in triduo fuisse hominem, quia vel tenebant hominem constitui per *solam animam* (*Hug. de S. Victore*), vel arbitrabantur unionem animæ et carnis non omnino requiri ad rationem hominis, verum hæc duo

elementa sufficere etiam *sejuncta*, præsertim si in uno supposito convenient (*Petr. Lombardus*). Atqui sancæ philosophiæ dogma est, rationem humanæ naturæ essentialiter coalescere ex corpore et anima corpus informante. Ergo.—*b*) Argumentum etiam desumebant ex eo quod Christus nunquam desiit esse sacerdos (*Ps. CIX, 5*); sacerdos autem est homo. At “esse sacerdotem convenit homini *ratione animæ*, in qua est ordinis character; unde per mortem homo non perdit ordinem sacerdotalem, et multo minus Christus, qui est totius sacerdotii origo” (*a. 4 ad 3*).

Conclusio 3^o.—IDEM FUIT CORPUS CHRISTI VIVENTIS ET MORTUI MATERIALITER ET SUPPOSITALITER, NON TAMEN FORMALITER.

1^a *Pars* facile innotescit:—siquidem *a*) ex eadem *materia* constabat corpus Christi ante mortem et in triduo mortis.—*b*) Similiter idem *supposito* fuit corpus Christi vivum et mortuum, propterea quod non desiit subsistere per hypostasim Verbi.—*c*) Jamvero quod servat idem suppositum potest *absolute* dici idem numero: unde, sub hoc respectu, retinuit corpus Christi in triduo mortis unitatem *numeralem*.

2^a *Pars 1^o prob.* duplice medio.—*a*) Corpus, quod mutatur secundum speciem humanæ naturæ, non manet *formaliter* idem. Atqui corpus Christi mortuum non habuit amplius de vita quæ ingreditur essentialiter humanam naturam. Ergo.—*b*) Accedit ratio *ex opposito*. Si enim diceretur corpus Christi mansisse totaliter idem, sequeretur quod non esset corruptum corruptione mortis: id autem ipsa est hæresis *Gaiani*, quam Patres repudiarunt velut contrariam veritati humanæ salutis.

2^o *Decl. assertum.*—Docuit *Scotus* corpus, qua tale, in humano composito constitui, nou per gradum inferiorem animæ, sed per formam quamdam corporeitatis ab anima distinctam; unde, secundum hanc sententiam, corpus Christi, in quantum *corpus*, iūcū omnino mansisset post separationem ab anima. Verum positio Scotistica adversatur sanae doctrinæ¹ saltem philosophicæ, ideoque tenendum est corpus Christi, irruente morte, formam induisse *cadavericam*, qua ejus species immutata est.—Hanc vero formam sibi cum corpore

1—Vid. tract. nost. *de Creatione*, Disp. VI, Q. I, a. 3.

hypostaticē conjunctam, nihil vetat quin *Verbum* mox dimiserit; quippe perpetuitas assumptionis a Verbo (quam Patres efferunt) intelligi debet de iis quae *per se* et permauenter, non vero de iis quae *per accidens* et transeūter tantum, ut forma cadaverica in triduo mortis, ad naturam humanam pertinent.

ARTICULUS III.

De sepultura Christi.

(Q. LI)

Circa propositum argumentum tria considerabimus, scil. convenientiam sepulturæ, modum quo facta est, et qualitatem corporis sepulti.

Conclusio 1^a.—CONVENIENS FUIT CHRISTUM SEPELIRI.

Id congruisse evincit D. Thomas tribus rationibus, dogmatica una, aliis moralibus (art. 1):—“ *Primo*, ait, ad comprobandum veritatem mortis; non enim in sepulcro aliquis ponitur, nisi quando jam de veritate mortis constat. Unde et Marc. XV legitur quod Pilatus, antequam concederet Christum sepeliri, diligenti inquisitione cognovit eum mortuum esse.—*Secundo*, quia per hoc quod Christus de sepulcro resurrexit, datur spes resurgendi per ipsum his qui sunt in sepulchro, secundum illud (Joan. V, 28): *Omnes qui in monumentis sunt, audient vocem Filii Dei, et (v. 25) qui audierint vivent.*—*Tertio*, ad exemplum eorum qui per mortem Christi spiritualiter moriuntur peccatis, qui scil. absconduntur a turbatione hominum. Unde dicitur (Coloss. III, 3): *Mortui estis et vita vestra est abscondita cum Christo in Deo.*”

Conclusio 2^a.—MODUS SEPULTURÆ CHRISTI CONVENIENS QUOQUE DICENDUS EST.

Constat ex Scriptura nobilem decurionem Joseph ab Arimathæa corpus Jesu honorifice sepeliisse, illud ungendo copiosis aromatibus a Nicodemo acceptis, involvendo siudone munda, ponendoque in monumento suo novo, quod in horto vicino excisum erat de petra, et cuius ostio saxum magnum advolvit. Atqui hæc omnia convenienter facta dicimus:

1º *Ex parte personarum*; laudabilis namque illa pietas in sepeliendo Christo præfigurabat devotionem fidelium, qui erant Christo mortuo servituri.

2º *Ex parte rerum*.—*a)* Aromata enim *myrrhæ* et *alðes* ob suū amaritudinem significabant poenitentiam, per quam homo debet Christum in seipso absque corruptione peccati conservare.—*b)* *Involutio corporis* pertinebat ad decentiam honestatis ubique servandam.—*c)* Salvator sepultus est *in horto*, ut ostenderetur nos per ejus mortem liberari a morte quam incurrimus per peccatum Adæ in horto paradisi commisum.—*d)* *Sepulcrum* autem Christi erat et alienum et novum: *alienum*, prouti congruebat paupertati ejus qui domum in vita non habuit; *novum* vero, ut daretur intelligi quod per illam sepulturam omnes innovamur, morte et corruptione destructa.—*e)* *Excisum* erat *in petra*, ne si multis lapidibus exstructum fuisset, tumuli fundamentis suffossis vel semiotis lapidibus, Christus furto ablatus diceretur.—*f)* Tandem *saxum magnum*, ostio monumenti appositum, demonstrabat (*contra resurrectionis adversarios*) quod non absq; urimorum auxilio sepulcrum potuisse reserari.

C. clusio 3a.—CORPUS CHRISTI IN SEPULCRO INCORRUPTUM MANSIT.

1º Huc pertinet sententia prophetica (Ps. XV, 10): *Nec dabis sanctum tuum videre corruptionem*; quippe (teste Suarez, *Comm. in art. 3*) conveniunt Patres in loco illo expnendo de Christo; imo hanc interpretationem expresse tradit Scriptura (Act. II, 27 et 31).

2º *a)* Fatendum est corpus Christi quantum ad conditio-
nem naturæ passibilis *putrefactibile* fuisse, licet non quan-
tum ad meritum putrefactionis, quod est ex peccato; sed
virtus divina illud a corruptione præservavit, sicut et resus-
citavit a morte.—*b)* *Ratio sumnia est*, quia putrefactio vel
incineratio provenit ex infirmitate naturæ, quæ non valet
amplius corporis unitatem continere. Jamvero Christus
sponte, non coacte nec ex naturæ debilitate, mortem passus
est. Ergo, ne ejus mors naturali infirmitati adscriberetur,
noluit corpus suum putrefieri vel incinerari, sed illud intac-
tum servavit.

In morte se mortis victorem Christus demonstravit.

QUÆSTIO QUINTA

DE DESCENSU CHRISTI AD INFEROS

Postremam hanc Christi humiliationem (si tamen fas est ea voce nuncupare demissionem pure localem et extrinsecam)¹ tripliciter inspiciemus, ut responsio detur triplici quæsito, *an*, *quomodo* et *ad quid* Christus descenderit ad inferos.

ARTICULUS I.

Utrum vere congrueque Christus ad infernum descenderit.

(Q. LII, a. 1)

Hoc in titulo duo distincte investiganda proponuntur, scil. *veritas* descensus ad inferos ejusque *convenientia*.—Veritatem vero offenderunt duplex adversariorum genus, nempe tum ii protestantes qui, post *Bucerum* et *Bezam*, nomine inferni intellexerunt sepulcrum vel statum invisibilem², tum *Durandus* cuius sententia fuit Christum fuisse in inferno, non secundum animæ *essentiam*, sed secundum effectum tantum.

Conclusio 1^a.—VERE CHRISTUS AD REGIONEM INFERNALEM DESCENDIT, NEC SECUNDUM EFFECTUM TANTUM, SED ET SECUNDUM ANIMÆ SUBSTANTIAM.

1^a *Pars fide* constat non solum ex *Conc. Later. IV* (cap. *Firmiter*), sed et ex *Symbolo Apost.* in quo verba *descendit ad inferos* adjecta non fuissent, nisi quidpiam a sepultura distinctum expimerent.

1.—Plerique theologi, ut Suarez, Bellarminus, Billuart (contra Cajetanum) sentiunt descensum ad inferos haud fuisse Christo pœnam *proprie* dictam.

2.—E recentioribus Hodge, *Syst. theol.*, huic positioni assentitur.

Sane 1º firma exstant *Scripturarum* testimonia : duo præcipua proferemus.—S. Petrus (Act. II) Christo applicat verba (Ps. XV) : *Non derelinques animam meam in inferno*, inquiens (v. 31) : *Neque derelictus est in inferno, neque caro ejus vidit corruptionem*. Perperam vero Beza (contra Patrum interpretationem) “ animam in inferno ” intelligit de cadavere in sepulcro, cum et verborum proprietas et ipse contextus, juxta quem anima distinguitur a carne, hunc sensum prohibeat.—Alter locus est (Eph. IV, 8-9) : *Ascendens in altum captivam duxit captivitatem... Quod autem ascendit, quid est, nisi quia et descendit primum in inferiores partes terræ*. Extrema verba de descensione ad *infernum* exponenda esse non solum plures Patres suadent, sed D. Thomas (*Comm.* in h. l.) verisimiliter colligit ex predicta *captivitate* quam solvit Christus, in altum deducens animas sanctas de regionibus in quibus detinebantur (cf. Bellarm. *de Christo*, l. IV, c. 10 et 12, qui Bezæ argumentias docebat persequitur et exsufflat).

2º *Traditionis* effata laudatus auctor (*ibid.* c. 14) eruditè coegit inde ab antiquissimis temporibus, ita ut sensus Græcorum aequæ ac Latinorum unanimus videatur. Scripsit S. Irenæus (c. Hær. l. IV, c. 27, n. 2) “ Dcminum in ea, quæ sunt sub terra, descendisse, evangelizante et illis adventum suum, remissione peccatorum existente his qui credunt in eum.” S. Cyrill. *Hieros.* (Catech. IV, n. 11) : “ Descendit ad subterranea, ut illinc justos liberaret ;” cf. Catech. XIV, n. 19. Et S. Augustinus (*Ep. 57 ad Dard.* c. 2) : “ Neque ipso die in cœlo futurus erat homo Christus Jesus ; sed in inferno secundum animum, in sepulcro autem secundum carnem.”

2º *Pars* dirigitur contra Durandi sententiam, quæ temeraria ac *erronea* declaranda est.

Etenim 1º *Concilia*, *Scripturæ* et *Patres* diserte habent, Christi animam descendisse ad inferos, dum caro mansit in sepulcro. Atqui certum est carnem dominicam in sepulcro jacuisse per se, non per effectum. Ergo a pari etc.

2º *Falsæ* manarent *consequentiae*.—*a)* Siquidem in primis sequeretur quod Christus fuisset in inferno et anima et carne, quoniam per utrumque in unum compositum humanum conveniens operatus est hominum salutem.—*b)* Sequeretur

etiam quod anima Christi simul *in pluribus locis* versata fuisset, quandoquidem in illo mortis triduo influxum aliquem exercebat et in inferno, et in teria, et in celo, liberans animas patrum, ingerens discipulis contritionem et spem, Angelos laetificans, etc.—c) Demum, quia pergit defunctorum animas jugiter solari, quidhi *in purgatorio* saltem remansisse dicitur?

Conclusio 2^a.—CONVENIENTER CHRISTUS AD INFERNUM DESCENDIT.

Prob. 1^o ex *analogia Redemptionis*.—Christus enim, innocens at sub specie rei, venerat pœnam nostram portare, ut nos a pœna eriperet. Atqui ex peccato homo incurriterat non solum mortem corporis, sed etiam descensum animæ ad inferos. Ergo sicut fuit conveniens Christum mori ut nos a morte (scil. per resurrectionem) liberaret, ita expediebat eum ad inferos descendere ut nos ad cœlum traheret. Unde dicitur (Os. XIII, 14): *Ero mors tua, o mors; morsus tuus ero, in ferne.*

2^o Ex *effectu* producendo.—Decebat Christi triumphum ut, diabolo per passionem devicto, vinctos ejus in inferno detentos manu veluti propria eriperet. Atqui hoc admirabiliter perfectum est, Christo secundum animam ad inferos procedente; quod exprimitur (Zach. IX, 11): *Tu quoque in sanguine testamenti tui emisisti vincitos tuos de lacu;* et (Coloss. II, 15): *Expolians principatus et potestates traduxit confidenter.*

3^o Ex *gloria Christi* manifestanda.—Congruë enim rex interdum carceres visitat ut, liberatis nonnullis inancipatis, aliis vero perterritis, auctoritatem et majestatem suam demonstret. Atqui Christus rex est totius mundi, superioris et inferioris. Igitur congruebat ut, infernum visitans suæque radiis gloriae illuminans, ibidem regiam suam potestatem ostenderet, et sic *in nomine Jesu omne genu flecteretur cœlestium, terrestrium et infernorum* (Phil. II, 10).

Solv. obj.—OBJ. 1.—Infernus est mali regio. Atqui non decuit sanctissimam Christi animam ingredi regionem mali. Ergo.

Resp. D. M. ...aut mali culpa, aut mali pœna, C; culpa tantum; N.—C.d.m.:...regionem mali culpæ, C; mali pœnae, S.d.: perinde ac esset debitor pœnae, C; ut alios pœnae obnoxios liberaret, N.—Neg. conseq.

OBJ. 2.—Quæ Christus egit ordinabantur ad humanam salutem. Atqui humana salus iam sufficienter procurata erat per passionem, quin descensus ad inferos requireretur. Ergo.

RESP. D. M:... ad humanam salutem aut universaliter operandam aut singulariter applicandam, C; ad salutem universaliter operandam tantum, N.—C.d.m: passio erat universaliter causa salutis nostræ, C; nec causam illam decebat mortuis applicari per descensum Christi ad inferos, N.—Neg. conseq.

OBJ. 3.—Anima, separata a corpore, non potest localiter moveri. Atqui descensus importat motum localem. Ergo.

RESP. D. M:...eo genere motus quo moventur corpora, C; nec eo genere motus quo moventur Angeli, scil. per contactum virtualem quo alicubi agit et definitive sistit, N.—C.m.—Neg. conseq.

ARTICULUS II.

Quanam ratione Christus in inferno versatus est.

(Art. 2-4)

Agitur hic de describendis *circumstantiis* descensionis Christi ad inferos; quo sub capite tria investigationi nostræ offeruntur: unum de determinatione *loci*, aliud de modo *essendi* in loco, tertium de tempore seu duratione mansionis.

Conclusio 1^a.—RECENSITIS VARIIS INFERNI GENERIBUS, STATUITUR IN QUO CHRISTUS STETERIT.

1^a *Pars* absolvetur verbis D. Thomæ (3 S. D. XXII, Q. II, a. 1, sol. 2): “Quadruplex est infernus. Unus est infernus damnatorum, in quo sunt tenebræ et quantum ad parentiam divinæ visionis et quantum ad parentiam gratiæ, et est ibi pena sensibilis; et hic infernus est *locus damnatorum*.—Alius est infernus supra istum, in quo sunt tenebræ et propter parentiam divinæ visionis et propter parentiam gratiæ, sed non est ibi pena sensibilis; et dicitur *limbus puerorum*.—Alius supra hunc est, in quo sunt tenebræ quantum

ad parentiam divinæ visionis, sed non quantum ad parentiam gratiæ, sed est ibi poena sensibilis; et dicitur *purgatorium*.—Alius magis supra est, in quo est tenebra quantum ad parentiam divinæ visionis, sed non quantum ad parentiam gratiæ, neque est ibi poena sensibilis; et hic est *infernus ss. patrum* (qui etiam *limbus patrum*, aut ob quietem *sinus Abrahæ*, nominatur).

2^a *Pars ita accipienda est quod Christus secundum suæ præsentiam descendisse credatur ad limbum patrum tantum* (alii addunt, ad purgatorium); quamvis secundum effectum quemlibet inferorum attigerit.

Revera 1^o eos tantum expediebat Christum localiter invisiere secundum animam humanam, quos interius per gratiam visitabat secundum divinitatem, cœu liberator et gloriæ dator. Atqui Christus beneficium liberationis et gloriæ largitus est primario animabus ss. patrum et secundario nonnullis animabus purgatorii (ut mox dicemus). Ergo.—Cæterum, in una inferni parte existens, influxum suum sive consolantem sive terrificantem ad reliqua loca infernalia uteumque derivavit, sicut et in uno loco terræ passus totum mundum passionem redemit.

2^o Nec *Scriptura* reapse insinuat Christum descendisse ad infernum *damnatorum*.—*a)* Nam quod legitur (Act. II, 24), *Deus (Christum) suscitavit solutis doloribus inferni*, non est interpretandum de iis quæ damnati patiuntur, sed de dolore proveniente in ss. patribus ex dilatione speratæ gloriæ; quem dolorem præsentia et opere dissipavit Christus.—*b)* Dubium est circa alium textum (1 Pet. III, 19): *In quo (spiritu) et his, qui in carcere erant, spiritibus veniens prædicavit, qui increduli fuerant aliquando*, etc. Equidem fatemur verba ista diversimode ab interpretibus explicari; probabilior tamen hic videtur sensus conclusioni nostræ consonus, nempe quod Christus in carcere inferni nuncium Redemptionis prædicaverit omnibus bonis spiritibus, nominatim vero iis qui, in diebus Noë increduli, finaliter penitentiam egerunt et salvi facti sunt¹.

Conclusio 2^a.—TOTUS FUIT CHRISTUS IN INFERNO, NON TAMEN TOTALITER.—Est conclusio *theologica*.

1—Cf. Bellarm., *op. cit.* c. 13.

Sane masculinum genus refertur ad hypostasim vel personam, neutrum vero ad naturam: ergo vere Christus totus fuisse dicitur, ubi tota ejus persona fuit secundum aliquid sibi unitum. Atqui post mortem perseveravit in Christo unio hypostatica Verbi cum corpore sepulto animaque ad inferos recepta. Ergo vere Christus totus in inferno fuit.—*Non tamen totaliter*: quia persona Christi nullo loco circumscribitur; unde, dum totus erat in inferno ratione animæ, totus etiam fuit in sepulcro ratione corporis.

Conclusio 3^a.—ANIMA CHRISTI TAMDIU CREDITUR MANSSE IN INFERO, QUAMDIU CORPUS EJUS MANSIT IN SEPULCRO.

1^o Biblicum arg. habemus (Matth. XII, 40): *Sicut fuit Jonas in ventre ceti tribus diebus et tribus noctibus, sic erit Filius hominis in corde terræ tribus diebus et tribus noctibus.* Plerique enim (teste Knabenbauer in h. l.) verius *cor terræ* accipiunt pro inferno, in quo Christus versatus est secundum animam; tres vero dies et noctes syncedochice ponuntur pro parte parasceves, tota die sabbati et parte diei sequentis.—2^o Sicut Christus, ut nostras poenas in se susciperet, voluit corpus suum in sepulcro jacere, ita etiam voluit animam suam ad infernum descendere. Atqui corpus ejus in sepulcro remansit per diem integrum et duas noctes, ad comprobandum veritatem mortis suæ. Ergo etiam tantumdem credendum est animam ejus fuisse in inferno.—3^o Id non vetat quin Christus, *statim* ad infernum accedens, vectes illius carceris confregerit sanctosque ibi existentes liberaverit, eos luce gloriæ illustrando; unde hac gloria donatum fuisse latronem ab instantे mortis intelligitur ex dicto Christi (Luc. XXIII, 43): *Hodie mecum eris in paradyso* (i. e. in paradyso spirituali). Attamen latro, etsi jam anima beatus, cum Christo ad infernum descendit: quo de loco mox, resurgente mortis Victore, cum ss. patribus egressus est.

ARTICULUS III.

Quosnam Christus ad inferos descendens exinde liberavit.

(Art. 5-8)

Subit hic in specie determinandus effectus quem jam in genere convenire admisisimus descensui animæ Christi ad infernum. Circa quod inquirere opus est utrum *ss. patribus*, utrum *damnatis*, necnon animabus purgatorii salutifera illa descensio profecerit.

Conclusio 1^o. —CHRISTUS DESCENSU SUO SANCTOS PATRES AB INFERIS LIBERAVIT; scil., levato obstaculo, eos actu beatificavit, nec diu post de loco inferni in cœlum eduxit: quorum primum *fide* certum existimat Suarez (Disp. XLIII, S. 3), alterum vero *communi* Ecclesiae sensu firmatur.

1^o Huc faciunt quæ supra constituimus, tum recensendo inter effectus passionis *apertionem januae* cœlorum (quest. III, a. 6), tum demonstrando *veritatem et convenientiam* descensus Christi ad inferos (quest. præs., a. 1); plerique enim textus biblici vel patristici ibidem allati præsentem conclusionem speciatim adstruunt.

2^o Ideo animæ justorum V. T. nondum fruebantur divina gloria, quia (etiam supposita purgatione ab omni labe personali) prohibebantur reatu totius humanæ naturæ. Atqui hunc reatum sustulit Christus, oblato per passionem pretio Redemptionis eoque per descensum ad inferos mortuis applicato. Ergo Christus descensu suo animas illas *actu beatificavit*. Atqui propter hoc sancti patres detinebantur in inferno, quod nondum eis aditus ad vitam glorie pateret. Ergo etiam Christus eos *de inferni claustro in cœlum* eduxit.—*Evolv. arg. a)* In primis *ss. patres* caruisse visione Dei, docet Ap. (Heb. XI, 13): *Juxta fidem defuncti sunt omnes isti, non acceptis reprobationibus, sed a longe eas aspicientes.* b) Hæc *pœna* fuit originalis peccati; cuius figuram agnoscit Angelicus (art. 5) in ejectione hominis de paradiſo terrestri. c) Unde animæ sanctæ¹, etsi impeccabiles

1—C. Hodge (*Syst. Theol.* Vol. II, p. 621) præjudiciois protestanticis indulget aperteque catholicos calumniatur, quando his tribuit doctrinam quod ante Christi Ecclesiam nulla esset peccati remissio ac sanctificatio.

futuræque felicitati certo fidentes, haud poterant quin internum quemdam *dolorē* seu tristitiam experirentur ex dilatione expectatæ gloriæ, pieque orantes suspirabant in Christi adventum. *d)* Verum firma spes magnumque ex ea promanans *gaudium* dolorem temperabat, secundum illud (Joan. VIII, 56): *Abraham pater vester exultavit, ut videret diem meum; vidit, et gavisus est.* *e)* Nihilominus non in loco cœlesti, sed in secessu *inferni* (de cuius natura non plane constat) detinebantur animæ illæ, prout communis habet traditio ipsaque Scriptura declarat, puta (Gen. XXXVII, 35): *Descendam, ait Jacob, ad filium meum lugens in infernum*¹. *f)* Patet igitur quam vere Christus, exhibens sanctis in inferno reclusis fructum suæ passionis, eos liberaverit.

Conclusio 2^a. — CHRISTUS DÉLAPSUS AD INFEROS NEC DAMNATOS ADULTOS, NEC PUEROS CUM ORIGINALI PECCATO DECESSOS, A DAMNATIONE ERIPUIT; — quod Suarez (Disp. XLIII, S. 3, n. 6) de fide esse opinatur saltem in genere.

Prob. communis argumento. — L'escensus Christi ad inferos, vim passionis applicans, illis solis liberationis fructum contulit qui fuerant eidem passioni conjuncti per fidem charitate formatam et peccati deletricem; nam Christum *proposuit Deus propitiationem per fidem in sanguine ipsius* (Rom. III, 25). Atqui damnatis omnibus deerat hæc conditio: quippe *adulti* aut penitus fide caruerant, aut saltem charitate et gratia, unde in peccatis suis decesserant; *pueri* vero, rationis usus expertes, nec fidem propriam habere potuerant, nec per fidem parentum vel aliquod fidei sacramentum (ut supponitur) fuerant a peccato originali mundati. Ergo.

Duae subjiciantur *animadversiones*. — *a)* Quantuni ad *adultos* damnatos; ad eos usque devenit effectus descensionis Christi, non quo consolationem et levamen acciperent, sed quo confutationem et confusionem sibi debitam subirent. — *b)* Quantum ad *pueros* in originali culpa decessos, eorum status omnino differebat a statu ss. patrum: siquidem patres, etsi detinerentur ad stricti reatu poenæ originalis, erant tamen ab omni peccati macula mundati, ideoque liberationis capaces; pueri vero tenebantur tum reatu poenæ tum reatu culpe.

1.—De toto hoc argumendo vid. ampliora penes Suarezium (Disp. XLI, S. 1-2).

Conclusio 3^a.—LICET CHRISTUS DESCENDENS AD INFEROS PURGATORIUM (PROBABILIUS SALTEM) NON EVACUAVERIT, RECTE CREDITUR QUASDAM ANIMAS INIBI DETENTAS LIBERASSE; CERTE VERO IN RELIQUIS SPEM AUXIT CONSEQUENDÆ GLORIÆ.

1^a *Pars*, cui plures olim contradixisse referuntur, hac *D. Thomæ* ratione nititur.—Descensus Christi ad inferos liberatorius fuit in virtute passionis ejus; Christi autem passio non habuit tunc majorem efficaciam quam nunc habeat. Atqui nunc non liberat omnes animas purgatori universim sumptas, sed eas tantum quæ participant ejus virtutem per aliquid *specialiter ad unamquamque pertinens*, scil. per satisfactionem propriam vel alienam sibi applicatam, aut per vim sacramentalem. Ergo.

2^a *Pars* colligitur ex *Auctore* (art. 8 a 1). Concedit enim S. Th. aliquibus in purgatorio detentis fuisse collatum liberatio-nis beneficium, “scil. a) illis qui jam sufficienter purgati erant, b) vel etiam qui, dum adhuc viverent, meruerunt per fidem et devotionem ad mortem Christi, ut eo descendente, libera-rentur a temporali purgatori poena¹.”

3^a *Pars* patet ex duobus: primo, quia Christus omnes animas purgatori liberavit a *communi* reatu quo, propter peccatum Adæ, excludebantur a gloria; secundo, quia in eis spem confirmavit multiplicium auxiliorum quibus, ex applicata Christi passione, possunt nunc debita *personalia* illa-rum animarum exsolvi.

1—Id ita commentatur *Cajetanus* (in h. l.): “Rationabiliter dicitur quod Christus descendens ad inferos multos in purgatorio existentes, qui non tam cito fuissent liberati, ex *speciali gratia descensus sui* liberavit. Consentaneum siquidem est ut multæ personæ propinquæ temporis mortis Christi, ante ipsum mortuæ, præparatos sint a Deo cum simili devotione, ut sicut nascens Simeonem et Annam perfectos invenit, et Pastores et Magos præparatos, ut digni essent consolatione nativitatis suæ, ita moriens non soluir Patres sanctos perfectos, sed etiam in purgatorio speciali devotione præparatos inveniret qui digni essent consolari ex descensu ad inferos libera-torio.”

DISPUTATIO DECIMA

DE CHRISTI TRIUMPHO

Expletis iis quæ spectant ad passionem Christi, consideranda supersunt ea quæ respiciunt ejus exaltationem seu triumphum; nam *qui se humiliat, exaltabitur* (Luc. XIV, 11). Unde, secundum ipsum *Symboli* ordinem, successive agemus: *primo* de Christi resurrectione; *secundo*, de ejus ascensione; *tertio*, de ejus sessione ad dextram Patris et judicaria potestate, quæ duo ad supernam Christi gloriam pertinent.

QUÆSTIO PRIMA

DE RESURRECTIONE CHRISTI

Doctrinam D. Thomæ quatuor articulorum spatio comprehendemus, in quibus ex ordine tractabitur *factum* resurrectionis (art. 1), *qualitas* Christi resurgentis (art. 2), ejus *manifestatio* (art. 3), necnon resurrectionis *causalitas* seu efficacia (art. 4).

ARTICULUS I.

De facto resurrectionis Christi.

(Q. LIII)

Resurrectio in genere suui potest passive vel active: *passive* quidem sumpta, *resurrectio* est “*animæ cum corpore iterata unio per mortem;*” quam unionem si spectes ex parte causæ producentis, habebis *resurrectionem active sumptam*

seu melius *resuscitationem*.—Tria circa *factum resurrectionis Christi determinanda* hic se objiciunt, *necessitas, tempus et causa*.

Conclusio 1^a. — **NECESSARIUM FUIT CHRISTUM RESURGERE.**—Necessarium intellige (recte monet Billuart) non absolute, sed *ex suppositione Incarnationis, prophetiarum, meritorum Christi nostræque utilitatis afferendæ*.

1^o *Scripturæ* indubium est suffragium; legitur enim (Luc. XXIV, 46): *Oportebat Christum pati, et resurgere a mortuis.* Quam resurrectionem prænuntiaverant antiqua oracula, juxta illud Ap. (1 Cor. XV, 4): *Resurrexit tertia die, secundum Scripturas.*

2^o Triplici ex capite ratiocinabimur:

Primo, ex commendatione divinæ justitiae.—Ad hanc enim justitiam pertinet eos exaltare qui se propter Deum humiliant, secundum illud (Luc. I, 52): *Deposuit potentes de sede, et exaltavit humiles.* Atqui Christus, Deo amiorique obediens, humiliacionum calicem penitus exhauserat. Ergo ad tantum meritum remunerandum requirebatur exaltatio resurrectionis.

*Secondo, ex conditione naturæ assumptæ*¹.—Naturæ a Verbo Dei assumptæ debebatur omnis perfectio omniumque defectuum remotio (exceptis iis defectibus quos postulabat redemptions finis). Atqui ad perfectionem naturæ humanæ pertinet conjunctio substantialis animæ cum corpore; nec, passione expleta, humana redemptio amplius requirebat animæ corporisque disjunctionem. Ergo.

Tertio, ex utilitate nostra.—*a)* Utilis est enim resurrectio ad confirmandam fidem de divinitate Christi, revelationis et prophetiarum; adeo ut Ap. dixerit (1 Cor. XV, 14): *Si Christus non resurrexit, inanis est prædicatio nostra, inanis est et fides vestra* (suppositis scil. prædictionibus et promissis divinis, etc).—*b)* Sublevat spem nostram; quia dum videmus Christum, caput nostrum, resurgere, speramus et nos, ejus membra, resurrecturos. Hac fiducia confortatus exclamabat Job (XIX, 25-27): *Scio quod Redemptor meus vivit, et in novissimo die de terra surrecturus sum...reposita est hæc spes mea in sinu meo.*—*c)* Confert ad infor-

mandam vitam fidelium, juxta illud Ap. (Rom. VI, 4) : Quomodo Christus surrexit a mortuis per gloriam Patris, ita et nos in novitate vitae ambulemus.—d) Denique sic completur humana salus ; disposuerat enim Deus ut fructus passionis nobis applicarentur mediante gloria Christi humanitate, vi cuius homo reformari debet et in bonum promoveri. Ex quo intelligitur illud (Joan. VII, 39) : *Nondum erat Spiritus datus, quia Jesus nondum erat glorificatus.*

Conclusio 2^a. — CONGRUUM FUIT UT CHRISTUS TERTIA DIE RESURGERET, RESURGENTIUM PRIMUS.

1^a Pars (omissis variis rationibus mysticis) uno arguento suadebitur. — Resurrectio Christi, ut dictum est, necessaria fuit ad instructionem *fidei nostræ*; haec autem est tum de *divinitate* tum de *humanitate* Christi. Atqui, ut divinitas ejus declararetur, non oportebat resurrectionem longiori tempore differri ; rursus vero, ut eum vere hominem vereque mortuum esse crederemus, requirebatur et sufficiebat inter mortem et resurrectionem aliqualis mora, protracta usque ad tertium diem. Ergo convenienter Christus tertia die revixit, secundum id quod de suo corpore prædixerat (Joan. II, 19) : *Solvite templum hoc, et in tribus diebus excitabo illud.*

2^a Pars sibi vult neminem ante Christum *perfecte* resurrexisse.

1^b Namque duplex esse potest resurrectio : una *imperfecta*, qua quis ab actuali tantum morte eripitur ; alia verior et *perfecta*, qua quis non solum a morte, sed et ab ipso mortis dominio seu a moriendi necessitate liberatur. — **a)** *Primo modo* aliquos ante Christum resurrexisse diffitebitur nemo ; ipse enim Salvator, dum publicam vitam ageret, quosdam suscitasse ab Evangelistis narratur. — **b)** Sin autem loquamur de resurrectione perfecta et *simpliciter*, sic procul dubio Christus exstigit primus resurgentium, prouti decebat insignem illum mortis Victorem ; quod testatus est Ap. dicens (1 Cor. XV, 20) : *Christus resurrexit a mortuis, primitiæ dormientium.*

2^b Nec difficultatem ingerere debent verba Matthæi narrantis (XXVII, 52) quod, moriente Christo, *monumenta aperta sunt, et multa corpora sanctorum, qui dormierunt, surrexerunt.* — **a)** Nam in primis *incertum* videtur, utrum necne sancti illi resurrexerint ad vitam immortalem. Plures

quidem probabiliterque id sentiunt¹, at nonnulli negant, quos inter S. Augustinus; D. Thomas heic in *Summa* (art. 3 ad 2) in partem negativam inclinat, licet alibi² oppositæ sententiae adhæserit.—*b)* Quidquid sit de ea re, patet ex vers. sequente corpora illorum sanctorum non exiisse de sepulcris nisi post *resurrectionem Christi*; quia vero supponi nequit rediviva corpora toto mortis Christi triduo mansisse in tumulis; concludere fas est sanctos illos reapse resurrexisse post Christum, Matthæum vero per *anticipationem* quamdam factum illud recensuisse inter miracula quæ mortem Christi comitata sunt.

Conclusio 3^a.—CHRISTUS PROPRIA VIRTUTE DIVINA, NON HUMANA, RESURREXIT.

Huc 1^o spectat illud Ap. (2 Cor. XIII, 4): *Etsi crucifixus est ex infirmitate, vivit ex virtute Dei*, quæ simul erat virtus Christi; unde ipse dixit (Joan. X, 17): *Ego pono animam meam, ut iterum sumam eam.*—² Potest tam anima Christi mortui quam ejus caro considerari dupliciter: ratione ipsius naturæ creatæ, et ratione divinitatis sibi hypostatice unitæ. Atqui non potuit quidem resurrectio prodire ex sola natura creata, ut satis liquet³; sed, vi conjuncti suppositi divini, corpus resumpsit animam quam deposuerat, et vice versa. Ergo Christus propria virtute, scil. divina, resurrexit.

1—Cf. Knabenbauer, *Comm. in Matth. XXVII*.—Disceptationem hanc fuse exponit Suarez in Q. LIII, a. 3.

2—4 S. D. XLIII, Q. I, a. 3, quæstiunc. 4 ad 3; ubi in rationem affert confirmationem resurrectionis Christi. Consentit Cajet. in III, Q. LIII, a. 3.—Porro inter eos qui, juxta hanc sententiam, gloriose cum Christo resurrexisserint nunquam morituri, Suarez (Disp. VIII, S. 2, n. 8) aliquæ pie annumerant S. Josephum, B. Maris sponsum

3—Cf. 4 S. D. XLIII, Q. I, a. 1, sol. 3.

ARTICULUS II.

De qualitate Christi resurgentis.

(Q. LIV)

Posito quod Christus, divina vi excitatus, mortis sigillum invictè perruperit, inquirendum succedit *qualis* in resurrectione illa visus fuerit. Quæ quæstio cum ad corpus maxime pertineat, indolem corporis Christi resurgentis determinabimus tum quoad *naturalem*, tum quod *supernaturalem* conditionem.

Conclusio 1^a.—CHRISTUS RESURREXIT IN SUO VERO CORPORE EOQUE INTEGRO.

1^a *Pars prob:*—1^o ex *verbis* Christi ad discipulos dubitantes de resurrectionis veritate (Luc. XXIV, 39): *Palpate et videte, quia spiritus carnem et ossa non habet, sicut me videtis habere.*—2^o Ex *ratione resurrectionis*. Christus vere, non apparenter tantum resurrexit. Atqui vera resurrectio exigit ut idem tum *specie* tum *numero* corpus, ab anima per mortem disjunctum, eidem animæ ceu formalí principio uniatur ad efformandum idem compositum. Ergo.—3^o Ex *solutione contrarii argumenti*. Ideo enim videretur corpus Christi resurgentis non fuisse verum, quia intravit ad discipulos januis clausis (Joan. XX, 19). Atqui verum corpus potuisse miraculose penetrare clausas januas, ex dictis superiorius (de egressu Christi ex utero Virginis) colligi potest: quippe non repugnat divinitus impediri id quod secundarium est tantum in quantitate. Atqui primario ad quantitatem pertinet quod sit *intrinsece* extensa in partes; secundarium vero est quod hanc extensionem exerat *in loco* et aliud corpus expellat. Ergo.

2^a *Pars est de integritate corporis Christi.*

1^o *Suadetur in genere.*—Resurrectio Christi fuit non solum vera, sed et *perfecta*. Atqui resurrectio, ut perfecta sit, talis esse debet qua redintegretur quidquid per mortem ceciderit et ad integratatem humani corporis pertineat, puta ossa, carnes aliaque hujusmodi, sine imminutione. Ergo corpus Christi integerrimum omnique naturali perfectione donatum resurrexit.

2º In specie a) de sanguine dicam (cum Auctore, art. 2 ad 3) quod et ipse a Christo resurgente resumptus fuerit in ea circiter quantitate quæ in passione effusa erat: siquidem sanguis est de veritate et integritate humani corporis. *Conf.* quia in Eucharistia vi verborum sanguis Christi consecratur et per concomitantiam reperitur sub speciebus panis ob naturalem cum corpore vivo conjunctionem.—b) Fidei tamen non repugnat (ut declaravit Pius II)¹ asserere quod Chr^t tus modicam partem sui sanguinis in terris reliquerit: verum id critice non constat². Quod si constaret, certe non existimandum esset Divinitatem manere illi sanguini hypostaticē unitam.

Conclusio 2º.—CORPUS CHRISTI RESURREXIT GLORIOSUM GLORIOSEQUĒ CICATRICATUM.

1º *Pars prob:*

1º *Generaliter.*—Legitur enim (Phil. III, 21): *Reformatbit corpus humilitatis nostræ, configuratum corpori claritatis suæ;* — quod appetet tripliciter. a) *Primo*, ratione exemplaritatis. Fuit enim Christi resurrectio exemplar resurrectionis nostræ; sancti autem in resurrectione induent corpora gloria: ergo a fortiori etc. b) *Secundo*, ratione meriti: Christus namque eo majorem gloriam meruerat, quo demissus se patiendo humiliaverat. c) *Tertio*, ratione redundantiae ab anima: nam dispensative factum fuerat ut ab anima Christi, initio glorificata, gloria in corpus non derivaret propter mysterium nostræ salutis. Hoc autem mysterium passione et morte impletum est. Ergo in resurrectione nil amplius vetuit quominus anima gloriam suam corpori communicaret.

2º *Specialiter.*—Quatuor sunt supernaturales corporum beatorum dotes: *impassibilitas*, qua corpus perfecte coaptatur animæ ut *formæ imperitare*; *subtilitas* seu *spiritualitas*, qua corpus perfecte subjicitur animæ ut *spiritui libero*; *agilitas*, qua corpus totaliter subditur animæ ut *motori*; *claritas*, qua corpus mirifice splendet ex resurgentia animæ beatæ³. Atqui dotibus istis ornatum dicendum est corpus

1—Cf. Suarez, Disp. XLVII, S. 3, n. 9.

2—Scribit Angelicus (art. 2 ad 3): “Sanguis qui in quibusdam Ecclesiis pro reliquiis conservatur, non fluxit de latere Christi, sed miraculose dicitur effluxisse de quadam imagine Christi percussa.”

3—De his uberior agitur in *Eschatologia seu Tract. de Novissimis.*

Christi resurgentis: habuit enim *impassibilitatem*, nam *Christus resurgens ex mortuis jam non moritur* (Rom. VI, 9) nec ulli poenae obnoxius est; habuit *subtilitatem*, nam, ad nutum, poterat Christus videri vel non videri (Luc. XXIV, 31) aut in ea specie apparere quæ proposito congrueret (Marc. XVI, 12); habuit *agilitatem*, ut mysterium ascensionis demonstravit; habuit tandem *claritatem*, ut patet ex recitato textu Ap. (Phil. III, 21). Ergo.

2^a Pars additur quoad *cicatrices* quas in gloriose Christi corpore servatas fuisse perspicue elucet ex verbis ipsius Domini (Joan. XX, 27): *Infer digitum tuum huc, et vide manus meas, et affer manum tuam, et mitte in latus meum.*—Nec desunt convenientiæ rationes: quarum 1^a est, ut in illis cicatricibus speciali decore fulgentibus *gloria Christi* veluti in perpetuis reportatae victoriae monumentis splendeat; 2^a est, quia volebat Christus circa *fidem* suæ resurrectionis corda discipulorum confirmare; 3^a est, ut eloquentia illa suæ passionis signa jugiter ostendens, Patri pro nobis convenientius *supplicet*; 4^a est, ut homines sua morte redemptos, quam *misericorditer salvati sint*, clarissim persuadeat, impios vero et reprobos, quam *juste damnentur*, vehementius convincat.

ARTICULUS III.

De manifestatione resurrectionis.

(Q. LV)

Cum resurrectio sit factum quoddam supernaturale et extraordinarium, operæ pretium est in ejus *manifestationem* et declarationem specialiter inquirere. Circa quod tria considerationi objiciuntur: *unum* quoad eos quibus Christus se manifestavit; *alterum* de ratione seu modo hujus *manifestationis*; *tertium* de *signis* quibus confirmata est.

Conclusio 1^a.—**QUIBUSDAM ELECTIS TESTIBUS CHRISTUS RESURGENS CONVENIENTI ORDINE SEIPSUM REVELAVIT;** aliis verbis decuit Christum non statim omnibus promiscue se

manifestare, sed Angelis primum, dein piis mulieribus et discipulis (art. 1-2).

1^a Pars.—Licet ea quæ sunt naturæ omnibus communiter pateant, ea tamen quæ naturam excedunt hac manifestationis lege reguntur ut a Deo immediate superioribus revelentur iisque mediantibus ac auctoritate sua testificantibus deferantur ad inferiores. Atqui resurrectio præsertim gloria communem hominum cognitionem excedit. Ergo resurrectio Christi non statim debuit omnibus patefieri, sed quibusdam tantum *testibus præordinatis a Deo* (Act. X, 41).

2^a Pars.—Hi testes fuerunt in primis *Angeli*: quippe sat generalis est Providentiae ordo ut ea quæ supra homines sunt, hominibus per Angelos denuntientur; presto sunt exempla non pauca. Atqui Christus resurgens (ut constat) non ad conditionem communiter notam rediit, sed ad vitam quamdam immortalem et divinam. Ergo ejus resurrectio non debuit immediate hominibus videri, sed eis Angelorum ministerio nuntiari, prout *Scriptura* tradit (Luc. XXIV).

3^a Pars.—Quorsum cœleste nuncium primi mulieribus¹ commissum est, per quas dein ad Apostolos discipulosque perveniret? Duplicem ea de re rationem perhibet *Angelicus* (art. 1 ad 3). *a)* Una est, quia sicuti olim mulier primo nuntium mortis ad hominem detulerat, ita congruebat ut ipsa primum spem vitae in resurrectione Christi nuntiaret. *b)* Altera est, ut significaretur sexum fœmineum nullum ex infirmitate sua pati detrimentum in his quæ ad statum gloriae pertinent: siquidem mulieres, quæ arctius Christum amaverant, nec ab ejus sepulcro discipulis recedentibus recesserant, primo eum in gloria resurgentem videre meruerunt.

Conclusio 2^a.—NON OPORTUIT CHRISTUM POST RESURRECTIONEM CONTINUE CUM DISCIPULIS CONVERSARI, QUANQUAM FREUENTER APPARUISSE TRADITUR (art. 3).

1—Quamvis Scriptura in describendis Christi apparitionibus taceat nomen B. M. Virginis, pia tamen est ac *probabilis sententia*, a nonnullis Patribus pluribusque scriptoribus propugnata, quod Christus post resurrectionem primum omnium augustissimæ sue Matri apparuerit. Unde illud (Marc. XVI, 9), *apparuit primo Maria Magdalena*, intelligunt non absolute, sed *relative* seu de prioritate inter testes præordinatos resurrectionis quos Evangelium recenset (of. Suarez, Disp. XLIX, S. 1).

1^a Pars ostend.—Circa resurrectionem Christi duo erant discipulis declaranda, veritas resurrectionis et resurgentis gloria. Jamvero plures iterata Domini apparitio sufficiebat ad certificandum discipulos de *veritate* resurrectionis; conversatio autem continua eos potuisset circa *gloriam* resurgentis decipere, opinionem inducens quod talem vitam resurgendo suscepisset quam prius habuerat. Ergo.

2^a Pars decl. verbis *D. Thomæ* (resp. ad 3): “ Ideo prima die frequentius apparuit, quia per plura indicia erant admonendi ut a principio fidem resurrectionis recipieren; postquam autem jam eam receperant, non oportebat eos jam certificatos tam frequentibus apparitionibus instrui. Unde in Evangelio non legitur quod post primum diem eis apparuerit, nisi quinque. Ut enim Augustinus dicit (l. 3 de Consensu Evang.), post *primas quinque* apparitiones *sesto* eis apparuit, ubi vidit eum Thomas; *septimo* ad mare Tiberiadis in cappione piscium; *octavo* in monte Galilææ, secundum Matthæum; *nono*, quod dicit Marcus, *novissime recumbentibus*, quia jam non erant in terra cum illo convivaturi; *decimo* in ipso die ascensionis, non jam in terra, sed elevatus in nube, cum in cœlum ascenderet.—Sed non omnia scripta sunt, sicut Joannes fatetur. *Crebra* enim erat ejus cum eis conversatio, priusquam ascendisset in cœlum; et hoc ad consolationem ipsorum. Unde et 1 Cor. XV, 6 dicitur quod *visus est plus quingentis fratribus simul... deinde visus est Jacobo*: de quibus apparitionibus in Evangelio non habetur mentio¹.

Conclusio 3^a.—EXPEDIEBAT UT CHRISTUS RESURRECTIONEM SUAM ARGUMENTIS DECLARARET; QUÆ NUM FUERINT NECNE CONGRUA, BREVITER APERITUR (art. 5-6).

1^a Pars prob.—Argumentum duplicitis est generis: aliud enim est argumentum *propter quid* seu ipsis rei principiis innixum; aliud argumentum *quia*, quo res certificatur quin intrinsece patefiat. Jamvero resurrectio Christi, utpote supernaturalis, non poterat quidem primo argumentorum genere demonstrari; at utile erat Christum illam secundo modo

1.—Advertit *Auctor* (a. 3 ad 2): “ Incognitum autem est quibus in locis intermedio tempore corporaliter esset, cum hoc Scriptura non tradat, et in omni loco sit dominatio ejus.”—Verisimiliter praesumitur amantissimum Filium, aliquando saltem, cum dilecta *Matre* versatum fuisse eamque suavi sua praesentia recreasse.

adstruere, vid. per *auctoritatem S. Scripturæ* maximeque per *signa* quædam evidentia, quæ dogma illud attestarentur salva manente fidei ratione (licet forte nimia signorum aviditas ejus meritum imminueret). *Taliū signorum utilitatem dicit S. Thomas* (art. 5) ex duobus: *primo*, quia corda discipulorum non erant sufficienter disposita ad fidem resurrectionis de facili accipieudam, quod eis Christus exprobavit (Luc. XXIV et Marc. XVI); *secundo*, quia sic primum erat fore ut eorum testimonium efficacius redderetur, juxta illud (1 Joan. I, 1): *Quod audivimus, quod vidimus oculis nostris... et manus nostræ contrectaverunt... testamur.*

2^a Pars evincitur ex *testimoniis* et *signis* quibus resurrectionis Christi manifestata est, quæque, *simul* accepta, perfectam fidem faciunt.

1^o Christus "est usus *duplici testimonio* ad manifestandum suam resurrectionem discipulis, quorum neutrum potest refelli: quorum primum est testimonium *Angelorum*, qui mulieribus resurrectionem annuntiaverunt, ut patet per omnes evangelistas: aliud autem est testimonium *Scripturarum*, quas ipse proposuit ad ostensionem suæ resurrectionis, ut dicitur Luc. ult." (*S. Thom. art. 6.*)

2^o Congrua etiam fuerunt *signa* a Christo adducta: "Quod fuerit *vera resurreccio*, a) ostendit uno modo *ex parte corporis*; circa quod tria ostendit: *primo* quidem quod esset corpus *verum* et *solidum*, non corpus phantasticum vel rarum, sicut est aer. Et hoc ostendit per hoc quod corpus suum palpabile prebuit (quod esse poterat naturaliter palpabile et supernaturaliter incorruptibile)... *Secundo* ostendit quod esset corpus *humanum*, ostendendo eis veram effigiem, quam oculis intuerentur. *Tertio* ostendit eis quod esset *idem numero* corpus quod prius habuerat, ostendendo eis vulnerum cicatrices... b) Alio modo ostendit eis veritatem suæ resurrectionis *ex parte animæ* iterato corpori unitæ. Et hoc ostendit per opera triplicis vitæ: *primo* quidem per opera vitæ *nutritivæ* in hoc quod cum discipulis manducavit et bibit, ut legitur Luc. ult. (que fuit vera, etsi non nutritiva, comestio, secus ac comestio apparenſ angelorum in corporibus assumptis). *Secundo* per opera vitæ *sensitivæ* in hoc quod discipulis ad interrogata respondebat et præsentes salutabat; in quo ostendebat se et videre et audire. *Tertio* per opera vitæ *intellectivæ*

in hoc quod eis loquebatur, et de Scripturis disserebat. Et ne quid deesset ad perfectionem manifestationis, ostendit etiam se habere *divinam naturam* per miraculum quod fecit in piscibus capiendis et ulterius per hoc quod eis videntibus ascendit in cœlum" (*ibid.*).—Resurrectionem illam esse *gloriosam* sufficienter demonstravit Christus ex conditionibus sui corporis, quas (art. præc.) descrepsimus¹.

ARTICULUS IV.

De resurrectionis causalitate seu efficacia.

(Q. LVI)

Postremo loco dicendum superest de influxu quem resurrectionis Christi sibi vindicat respectu resurrectionis nostræ sive corporalis sive spiritualis.—Ubi observabimus resurrectionem sumi, non pro ipso eventu transitorio in Evangelii narrato, sed pro *gloriosa humanitate*, secundum quam Christus resurrexit et in cœlis triumphat.

Conclusio 1^a.—RESURRECTIO CHRISTI HABERI DEBET TAN-
QUAM CAUSA RESURRECTIONIS CORPORUM, CAUSA, INQUAM,
EFFICIENS INSTRUMENTALIS NECONON EXEMPLARIS.

Prob. generaliter.—*a)* Enimvero quod est *primum* in aliquo genere, reliqua ad genus illud spectantia causalitate aliquâ attingat necesse est. Atqui *primum* in genere veræ resurrectionis fuit resurrectionis Christi. Ergo resurrectionis Christi dicenda est (sub principali auctore Deo) causa resurrectionis nostræ, juxta illud Ap. (1 Cor. XV, 20-21): *Christus resurrexit a mortuis primitiæ dormientium; quoniam quidem per hominem mors, et per hominem resurrexit mortuorum.*—*b)* Id eo rationabilius videbitur, quod principium

1.—Non est cur hoc loco orationem de veritate resurrectionis Domini latius persequamur, cum miraculum istud solent in *Theol. dogmatica fundamentali*, seu validissimum religionis Christianæ firmamentum, diligenter expendi. Plura insuper de eodem argumento magis proprie disputantur a tractatoribus *rerum biblicarum*.

humanæ vivificationis est *Verbum Dei*, in quo est *fons vitæ* (Ps. XXXV, 10). Atqui hoc habet naturalis rerum ordo ut causa primo influat in id quod est sibi propinquum et per illud operetur in alia remotiora, ut patet de igne calefaciente aërem et per aërem corpora magis distantia. Ergo Verbum Dei primo tribuit vitam immortalem corpori sibi naturaliter unito, et per ipsum resurrectionem in omnibus operatur.

Decl. specialiter.—*a)* Et dico causalitatem illam resurrectionis Christi esse in primis *efficientem instrumentalem*, quatenus scil. humanitas Christi *rediviva* aptissimum erit instrumentum per quod Deus, sive vocis imperio, sive alio modo, tum *bonos* tum *malos* ad vitam revocabit. —*b)* Rursus, tribuenda est resurrectioni Christi, utpote perfectissimæ in tali genere, causalitas *exemplaris* respectu resurrectionis nostræ; verum haec exemplis itas proprie se extendet solum ad *bonos*, quippe hi soli accipiunt spiritum adoptionis filiorum et Christo compatientes conglorificabuntur (Rom. VIII).

Conclusio 2^a. — RESURRECTIO CHRISTI CENSENDÄ EST INFLUERE ETIAM IN ANIMARUM RESURRECTIONEM SEU JUSTIFICATIONEM.

Ratio est, quia proportio quædam servanda est inter effectum et agens etiam instrumentale. Atqui ex una parte passio et mors Christi majorem proportionem dicunt quam resurrection ad effectum destructionis peccati in anima; ex altera vero parte, major humanitatem Christi redivivæ quam patienti et mortuæ inest proportio ad effectum vitæ spiritualis per gratiam producendum. Ergo divina virtus per Christi humanitatem tum passam tum gloriosam, quasi per instrumentum virtualiter multiplex, simul sub diverso respectu justificationem animarum *efficienter* operatur; ex quo illud intelligitur (Rom. IV, 25): *Resurrexit propter justificationem nostram.* — Jam ex hoc quoque colligitur, quam apte ratio *exemplaritatis* convenient resurrectioni Christi respectu resurrectionis animarum, quoniam Christo resurgentí debemus, etiam secundum animam conformari et ad ejus similitudinem in *novitate vitæ* perpetuo ambulare (Rom. VI, 4).

QUÆSTIO SECUNDA

DE ASCENSIONE CHRISTI

Primum triumphi Dominici stadium fuit resurrectio, secundum vero *ascensio*.—Porro ascensio Christi dupliciter investigari potest, vel *secundum se* (art. 1), vel *secundum effectus salutiferos* quos parit (art. 2): utriusque veritatis explorationi incumbendum est.

ARTICULUS I.

De Christi ascensione secundum se.

(Q. LVII, a. 1-5)

Fuerunt olim (teste *Damasc.* de *Hæres.* in 93) quidam hæretici quos *Christolytas* seu "Christum solventes" appellat, sentientes "D. N. J. Christum, posteaquam surrexit a mortuis, relicto in terra animato corpore, nuda solaque deitate ad cœlos ascendisse." Positionem hanc, a Conciliis Patribusque proscriptam, una refellat Scripturæ sententia (*Heb. XIII, 8*): *Jesus Christus, heri et hodie, ipse et in secula.*—Ascensionem Christi, catholica fide creditam, singillatim considerabimus et quoad *motum*, et quoad *subjectum*, et quoad *causam* et quoad *terminum*.

Conclusio 1^a.—CONVENIENS FUIT QUOD CHRISTUS IN CŒLUM ASCENDERET.—Motum hic seu factum ipsum inspicimus, de quo Scriptura (*Joan. XX, 17*): *Ascendo ad Patrem meum et Patrem vestrum.*

Sane a) locus debet esse *proportionatus* locato. Atqui Christus per resurrectionem vitam immortalem et gloriosam inchoavit; terra autem, quam habitamus, obscurum domici-

lium est nec satis sejunctum a miseria et corruptione præsentis conditionis. Ergo conveniebat ut Christus nobiliorem locum seu cælum peteret (id ipsum probant plerique *effectus* describendi in seq. art.).—*b)* Per hoc autem quod Christus ascendit in cælum, “ nihil ei accrevit quantum ad ea quæ sunt de *essentia gloriae* sive secundum corpus, sive secundum animam; tamen accrevit ei aliquid quantum ad *loci decentiam*, quod est ad bene esse gloriae” (art. 1 ad 2); de quo, antea præviso, iam *novo modo* gavisus est uti de re impleta¹.

Conclusio 2^a.—CHRISTUS ASCENDIT IN CŒLUM SECUNDUM HUMANAM NATURAM; — ubi determinatur, non ascensionis causa, sed *conditio subjectiva* ascendentis.

Re quidem vera, ascensio nequit Christo convenire nisi ratione illius naturæ quæ capax sit *motus localis* in aliquid *altius*. Atqui nihil datur divinitate altius quo ea possit ascendere, nec naturæ illi immobili et omnipræsenti competit motus localis; at hæ duæ conditiones bene conveniunt humanæ naturæ, quæ loco continentur, et motui subest. Ergo Christus secundum humanam naturam seu ut homo in cœlum profectus est.

Conclusio 3^a.—CHRISTUS ASCENDIT IN CŒLUM PROPRIA VIRTUTE, TUM DIVINA, TUM CREATA SECUNDUM GLORIAM.

Etenim, cum in Christo sit duplex natura, divina et humana, secundum utramque accipi potest *propria* Christi virtus.—Virtus autem humanæ naturæ alia est *naturalis* seu ex principiis naturæ procedens, alia est *gloriosa* seu naturæ glorificata competens.

Igitur 1^o manifestum est quod Christus in cœlum non ascenderit *virtute naturali*; siquidem ascendere sursum, secundum statum presentem, contrariatur legi gravitatis humani corporis.—2^o At potuit Christus creata *virtute gloriae* ascensionis motum exercere: quippe erat corpus Christi post

1.—Certum *fide* est Christum ascendisse in cœlum post quadragesima dies a resurrectione, juxta illud (Act. I, 3): *Per dies quadragesima apparet eis et loquens de regno Dei.* Ideo autem sic suam ascensionem distulit, quia volebat et veritatem resurrectionis efficaciter comprobare et discipulos de regno Dei instruere et Ecclesiam suam, institutis sacris ritibus, perfecte fundare.—Prætereundas ducimus rationes mysticas.

resurrectionem vestitum dotibus gloriosis, inter quas subtilitas et agilitas. Jamvero, juxta has dotes, corpus tam perfecte animæ beatae obsequitur, ut in hujus potestate sit illud quo voluerit, eaque velocitate quæ congruat, deducere. Ergo etc.—Verum 3^o sicuti corpus efficitur gloriosum ex redundantia animæ, ita ipsa anima gloriam et virtutem suam supernaturalem obtinet ex participatione Dei. Unde prima origo ascensionis Christi in cœlum est *virtus divina*; quæ cum eadem sit Patris et Filii, optime intelligitur Christum et propria virtute ascendisse et simul a Patre esse *assumptum* et *elevatum* (Marc. XVI, 19; Act. I, 9).

Conclusio 4^a.—DE TERMINO ASCENSIONIS ID TENENDUM PROPONITUR QUOD SIT LOCUS MATERIALIS, CERTUS SEU DETERMINATUS, AC DIGNITATE PRÆCELLENS.

1^o Est locus *materialis*.—Quamvis enim *cœlum* aliquando in Scripturis spirituali sensu accipiatur, tamen, spectato contextu attentisque Patrum interpretationibus, dubium non est quin materialiter sumi oporteat in sequentibus textibus (Joan. XIV, 2): *Vado parare vobis locum*; (Luc. XXIV, 51): *Dum benediceret illis, recessit ab eis, et ferebatur in cœlum*; etc.—Hoc certe exigit *realitas* corporis Christi, cui materialis locus debetur.—Pulchre S. Ambrosius (l. 4 de Fid. cap. 1) de Christo triumphante eloquitur: “Veniebat novis victor redimitus exuvias, Dominus in templo sancto suo. Praebant Angeli et Archangeli, mirantes spolium ex morte quæsitus... Debuit novo victori novum iter parari... quia non unus homo, sed totus in omnium Redemptore mundus intrabat.”

2^o Est locus *certus* seu *determinatus*.—a) *Lutherani* quidem¹ ascensionem Christi explicant per hoc quod Christus, mutato statu, *ubiquitatem* humanitatis *actu*, tunc exercere incœperit. At doctrina hæc manifeste repugnat definitis corporis Christi dimensionibus, prouti jam olim *Augustinus* adverterat (Ep. CLXXXVII al. 57 ad Dardanum, n. 10): “Noli dubitare ibi nunc esse hominem Christum Jesum, unde venturus est... Secundum hanc formam non est putandum ubique diffusus. Cavendum est enim ne ita divinitatem adstruamus hominis, ut veritatem corporis auferamus. Non est autem consequens ut quod in Deo est, ita sit ubique ut

1—Apud Hodge, *Syst. theolog.*, P. III, c. 13.

Deus."—*b)* Licet vero mansio cœlestis Christo in perpetuum debeatur, tamen ejus "dignitati non derogat, si ex aliqua dispensatione quandoque corporaliter ad terram descendat¹, vel ut ostendat se omnibus, sicut in iudicio, vel ut ostendat se alicui specialiter, sicut *Paulo*, ut habetur Act. IX. Et ne quis credat hoc factum esse non Christo ibi corporaliter præsente, sed aliqualiter apparente, contrarium apparet per hoc quod ipse Ap. dicit (1 Cor. XV, 8) ad confirmandam resurrectionis fidem: *Novissime omnium tanquam abortivo, visus est et mihi.* Quæ quidem visio veritatem resurrectionis non probaret, nisi ipsum verum Christi corpus visum fuisse ab eo" (art. 6 ad 3)².

3º Est locus *dignitate præcellens*.—*a)* Patet hoc ex Scripturarum dictis (Eph. IV, 10): *Ascendit super omnes cœlos, ut impleret omnia;* et (*ibid.* I, 20-21) Deus dicitur Christum *constituens in cœlestibus supra omnem principatum et potestatem... et omne nomen quod nominatur non solum in hoc sæculo, sed etiam in futuro.* Scilicet Christus, pro dignitate sua nobiliorem locum in cœlestibus occupans, sub se habet Angelorum et beatorum hierarchias secundum loca³ sibi congruentia ordinate distributas.—*b)* Ubinam vero situm sit cœlum quanamve constitutum ratione quæ felicitati supremæ respondeat, nec revelatio nos docuit nec assequibile est nisi conjecturis quas peritoribus in re physica relinquimus. Sapienter *Cajetanus* (in art. 4): "Mittamus hæc supernaturalia futuri sæculi scientiæ futuri sæculi."

1—Nec enim per miraculum fieri posse videtur (secus ac Suarez aliisque nonnulli sentiunt) quod corpus Christi sit *simul præsentia dimensio in cœlo et in terra seu in pluribus locis.* Nam "aliquid corpus esse localiter in aliquo loco, nihil est aliud quam corpus circumscribi et comprehendendi a loco secundum commensurationem propriarum dimensionum. Quod autem comprehenditur a loco aliquo ita est in ipso loco, quod nihil ejus est extra locum illum: unde ponere quod sit localiter in hoc loco, et tamen sit in alio loco, est ponere contradictionia esse simul" (Quodl. III, a. 2).

2—Præter plures Christi apparitiones in Sanctorum vita relatas, probabile videtur quod a Patribus pie traditum accepimus, Christum Dominum in *assumptione B. V. Mariæ* hunc Matri honorem præstisset ut in ejus occursum corporaliter veniret (cf. Suarez, Disp. XXI, S. 2, n. 11).

3—Circa modum quo *Angeli* sunt *in loco vid. tract. nost. de Creatione* (Disp. III, Q. II, a. 4).

ARTICULUS II.

De effectibus ascensionis Christi.

(Art. 6)

Quidquid egit Christus miro Providentiae consilio in nostrum bonum et profectum spirituale ordinabatur: hujus rei novum ac præclarum specimen perhibet ascensio.

Conclusio.—ASCENSIO CHRISTI MULTIPLEXM CONTULIT UTILITATEM HUMANÆ SALUTI;—quod dupli ex capite probari aut illustrari potest, tum ex parte nostra, tum ex parte Christi ipsius (*S. Thom. et Catech. Trid.*).

1^o *Ex parte nostra.*—*a)* Quantum ad fidei meritum: fides enim earum est rerum quæ sub aspectum non cadunt. Quare si Dominus a nobis non discessisset, minus nobis conveniret illa fidei laus (*Joan. XX, 29*): *Beati qui non videbunt et crediderunt.*—*b)* Quantum ad spei vim: per hoc enim quod Christus humanam naturam assumptam in cœlo collocavit, spem in nobis erexit illuc pervenienti, juxta illud (*Joan. XIV, 3*): *Si abierto et preparavero vobis locum, iterum venio et accipiam vos ad me ipsum, ut ubi sum ego, et vos sitis.*—*c)* Quantum ad caritatis affectum: quippe ascensus Christi amorem nostrum de terrenis in cœlestia rapuit, juxta verbum Dominicum (*Matth. VI, 21*): *Ubi est thesaurus tuus, ibi est et cor tuum.* Quia vero vis amoris Spiritui S. appropriatur, jam optime intelligitur illud Domini ad discipulos (*Joan. XVI, 7*): *Expedit vobis ut ego vadam; si enim non abierto, Purusculus non veniet ad vos* (nimis carnaliter mihi adhærentes); *si autem abierto, mittam eum ad vos.*—*d)* Quantum ad reverentiae seu religionis sensum: siquidem ascensio id quoque efficit ut Christum aestimaremus non ut hominem et regem terrenum, sed ut Deum et principem cœlestem; unde Ap. (2 Cor. V, 16): *Si cognovimus secundum carnem Christum, sed nunc jam non novimus.*

2^o *Ex parte Christi.*—*a)* Nam in cœlum abiens, portas, quæ Adami peccato interclusæ fuerant, patefecit, nobisque viam munivit qua ad cœlestem beatitudinem perveniremus, juxta illud (*Mich. II, 13*): *Ascendet pandens iter ante eos,* quasi Caput eo procedens quo membra securata sunt. In

hujus rei signum animas sanctorum, quas ab inferno eripuerat, secum in patriam introduxit.—*b)* Præterea, jam superius (Disp. V, Q. I. a. 2) asseruimus Christo competere in cœlis munus *interpellandi pro nobis*; quod prefiguratum habetur in pontifice V. Legis sanctuarium ingrediente ut Deo pro populo assisteret. “Nec vero (*Catech. Trid. P. I*, art. 6, n. 9) quidquam est, unde fideles majorem lætitiam et animi jucunditatem capere debeant, quam Jesum Christum *patronum* causæ ac *deprecatorem* salutis nostræ constitutum esse, cuius sit apud æternum Patrem summa gratia et auctoritas.”—*c)* Demum ascensu Christi factum est ut, in cœlorum sede Deus et Dominus constitutus, exinde *quasi ex proprio fonte* divinarum gratiarum dona ubertim in homines effundaret.

QUÆSTIO TERTIA

DE SUPERNA CHRISTI GLORIA

Usu biblico et catholico gloria Christi in coelis ea sub ratione describi solet quod *sedeat ad dexteram Patris* et *potestate* polleat *judicandi* vivos et mortuos. Hæc autem potestas dupliciter spectari potest, nempe vel *in se* et subjective, vel in *universalitate* eorum ad quæ se extendit.—Jam inde præsignatam habemus materiam trium articulorum.

ARTICULUS I.

De sessione Christi ad dexteram Patris.

(Q. LVIII)

Præadvertisendum est locutionem illam, *sedere ad dexteram Patris*, non esse propriæ et Anthropomorphitarum sensu accipiendam¹, sed metaphorice. Nomine enim *dexteræ Patris* recte significantur *gloria* divinitatis, ejus *beatitudo* ac *regia* seu *judicia* potestas; nomine vero *sessionis*, *quieta*, *stabilis* ac *magnifica* illorum bonorum *possessio*.—Duo in dubitacionem veniunt, num sessio illa Christo conveniat, eique soli attribuenda sit.

Conclusio 1^a.—SEDERE AD DEXTERAM PATRIS COMPETIT CHRISTO ET SECUNDUM QUOD DEUS ET SECUNDUM QUOD HOMO (art. 1-3).

Prob. 1^o generaliter.—Jam in V. T. dignitas illa confenda Christo prædicta fuerat (Ps. CIX, 1-2): *Dixit Dominus*

1.—Reapso (notat Cajetanus in art. 1) si de positione Christi hominis queratur, num stet vel *sedeat*, dicendus est potius *stare*, quod naturalis est perfecti corporis situs.

Domino meo: sede a dextris meis, donec ponam inimicos tuos scabellum pedum tuorum.—*Paginæ N. T. frequenter de eodem testimonium perhibent, puta (Marc. XVI, 19): Dominus quidem Jesus...assumptus est in cœlum, et sedet a dextris Dei; et (Heb. I, 3); Locutus est nobis in Filio quem constituit hæredem universorum...qui sedet ad dexterum maiestatis in excelsis.*

Ostend. 2^o specialiter.

a) *Primo*, dignitas illa convenit *Christo, secundum quod Deus.*—Ratio in promptu est; siquidem Filius Dei ab æterno fuit æqualis Patri in gloria, beatitudine et potestate.—Cum vero in laudata locutione, *sedere ad dexteram*, importetur relatio originis secundum quam unus intelligitur suam alteri dignitatem communicare, nullo modo potest dici quod *Pater* sedeat ad dexteram *Fili* vel *Sp. Sancti*, licet concedatur *Sp. Sanctum* sedere ad dexteram *Patris* vel *Filii*.—Nihilo minus prefata locutio per appropriationem melius tribuitur *Filio*, qui procedit a *Patre secundum rationem æqualitatis*.

b) *Secundo*, propriissime sessio ad dexteram *Patris* prædatur de *Christo, secundum quod homo.*—Sensus est in primis, quod Christus-homo per gratiam unionis est simul Filius Dei, ex quo factum est ut esset *perfecte consors* divini honoris paternæque dignitatis.—Sensus maxime est, quia Christus per abundantiam gratiæ habitualis excellenter *participat*, præ omnibus aliis creaturis, in sua humanitate de divinitatis gloria, beatitudine et potestate judiciaria, cuius jam, post resurrectionem et ascensionem, tranquillam ac stabilem, omniq[ue] miseria liberam, possessionem sortitus est: uide sessio ad dexteram *Patris* solet exhiberi tanquam ascensionis terminus.

Conclusio 2^a.—NULLI, NEC ANGELO, NEC HOMINI, CONVENTIT SEDERE AD DEXTERAM PATRIS, NISI SOLI CHRISTO.

1^o Etenim legitur (Heb. I, 13): *Ad quem Angelorum (a fortiori houiuium) dixit aliquando: Sede a dextris meis?* quasi dicatur, ad nullum.—Re quidem vera, Christus intelligitur sedere ad dexteram *Patris*, in quantum secundum divinitatem æqualis est Patri, secundum humanitatem vero gaudet excellenti bonorum divinorum possessione præ ceteris creaturis. Atqui utrumque Christo proprium est. Ergo.

2º a) Evidenter aliae creaturee praeter Christum divinae beatitudinis beneficia potiuntur; at sedere ad dexteram non significat simpliciter esse beatum, sed habere beatitudinem cum quadam dominativa potestate et veluti jure proprio; quod solius Christi est.—b) Hinc, quando legimus de aliis sanctis quod regnabunt cum Christo (Apoc. III, 21), vel sedebunt super sedes duodecim, judicantes duodecim tribus Israel (Matth. IX, 28), haec aliaque similia intelligi debent de secundaria quadam potestate a Christo accepta et ab eo dependente.

ARTICULUS II.

De judiciaria Christi potestate subjective sumpta.

(Q. LIX, a. 1-3)

Solemne est Scripturæ Ecclesiæque effatum quod Christus, pro regia sua potestate, supremum quemdam judicatum in mundum exerceat, juxta illud (Act. X, 42): *Ipse est qui constitutus est a Deo iudex vivorum et mortuorum.*—At, cum in comperto sit judicandi munus Christo *in genere* tribuendum esse, quaestio sponte suboritur, hoc in articulo enucleanda, num dignitas illa ei specialiter conveniat simul quatenus est *Deus* et quatenus est *homo*: duarum hinc offeratur conclusionum opportunitas.

Conclusio 1º.—CHRISTO, QUATENUS EST PERSONA DIVINA, CONVENIENTER ATTRIBUITUR SEU APPROPRIIATUR JUDICIARIA POTESTAS.—Dico *appropriatur* propter specialem convenientiam, licet potestas reapse communis sit toti Trinitati.

1º Huc pertinet (juxta Augustinum aliosque graves interpres) quod legitur (Joan. V, 22): *Neque Pater iudicat quemquam, sed omne iudicium dedit Filio;* quanquam non diffitemur multos quoque hunc textum intelligere de potestate judiciaria *homini* Christo demandata.

2º a) Ad judicium faciendum tria concurrunt, quorum duo quasi *prærequisita*, scil. *jurisdictio* et *rectitudinis* zelus, tertium vero quasi *formale constitutivum*, scil. *sapientia*: quandoquidem proprie et formaliter ratio judicii consistit in lege sapientiae et veritatis secundum quam judicatur. Atqui Filius Dei est sapientia genita et veritas a Patre procedens, quem perfecte repræsentat. Ergo non absque causa judiciaria dignitas eidem Filio appropriatur.—b) *Arg. illustratur* ex distinctione facienda inter *auctoritatem* judicandi et *formalem judicii rationem* (art. 1 ad 2): cum enim Pater sit principium Filii, auctoritas judiciaria aptius Patri attribuitur, verum ratio ipsa judicii convenientius de Filio, qui est sapientia Patris, prædicatur; adeo ut, sicut Pater omnia efficit per Filium ceu per artem suam, ita etiam omnia judicit per Filium ceu per propriam veritatem et sapientiam.

Conclusio 2º.—ETIAM QUATENUS EST HOMO, CHRISTO CONVENIT POTESTAS JUDICIARIA, QUAM ALIQUALITER MERITIS ADEPTUS EST.

1º Pars prob.—1º Ex *Scriptura* (Joan. V, 27): *Potestatem dedit ei judicium facere, quia Filius hominis est*, i. e. non præcise propter solam conditionem naturæ humanæ, sed propter gratiam Capitis quam habuit Christus in humana natura.—Omnes sane textus qui probant Christum-hominem fuisse *Regem universorum* (cf. Disp. III, Q. II, a. 1-2), eo ipso evincent ipsi insidere judiciariam potestatem; unum enim in alio continetur, juxta illud (Prov. XX, 8): *Rex, qui sedet in solio judicii, dissipat omne malum intuitu suo*.

2º Quamvis apud Deum remaneat primæva auctoritas judicandi, hæc tamen potest secundario committi seu *delegari* inferiori potestati; ita ut inferior potestas *vere* judicet, non autem tantum sententiam superioris potestatis promulget. Atqui animæ Christi maxime competebat quidquid requiritur ad judicatum exercendum, scil. tum *scientia*¹ intellectus,

1—Præclara hic habet *D. Thomas* (art. 2 ad 1): “*Judicium, inquit, pertinet ad veritatem sicut ad regulam judicii; sed ad hominem, qui est veritate imbutus, pertinet, secundum quod est unum quodammodo cum ipsa veritate, quasi quædam lex et justitia animata... Anima autem Christi præ cæteris creaturis magis fuit unita veritati et magis eâ repleta.*”

tum justitia voluntatis, tum efficacia potestatis (ut patet ex superiorius disputatis). Ergo.

3º Suppetunt rationes convenientiae.—a) *Primo ex affinitate Christi ad homines*: sicut enim Deus per causas medias, tanquam effectibus propinquiores, operatur, ita homines per hominem Christum judicat “ut sit suavius judicium” (*S. Thom. a. 2*).—b) *Secundo ex analogia cum resurrectione*: resurrectio enim corporum ordinatur ad finale judicium, quasi medium ad finem. Atqui constat Deum suscitaturum corpora per ministerium Christi hominis. Ergo.—c) *Tertio ex circumstantia judicii*: consentaneum enim erat ut judicandi, tum boni, tum mali, viderent suum judicem, nec malis licet eum aliter adspicere quam in forma humana, siquidem visio Dei, qua Deus est, beatos facit.

2º *Pars insinuatur his verbis* (*Apoc. III, 21*): *Ego vici, et sedi cum Patre meo in throno ejus*, quasi nempe sedere in throno seu regnare et judicare fuerit præmium certaminis et victoriae Christi in passione.—Et vere nihil prohibet unum et idem deberi alicui ex causis diversis, ut patet de gloria corporis Christo conveniente tum ob exigentiam divinitatis et gloriam animæ, tum ob passionis humilitatem et meritum. Atqui judicaria potestas Christo quidem competebat triplici ex titulo anteriore, scil. ex nobilitate divinæ personæ, ex vi capitalis seu regiæ dignitatis, et ex congruentia maximæ scientiæ et sanctitatis; at simul æquum erat ut qui pro justitia pugnaverat injusteque judicatus fuerat, judicis munus Dei providentiâ consequeretur. Ergo Christus passione sua sibi saltem quantum ad usum potestatem judicariam promeruit, quam (nisi aliter habuisset) etiam quantum ad substantiam merito comparasset.

ARTICULUS III.

De extensione judiciorum potestatis in Christo.

(Art. 4-6)

Extrema superest consideratio de potestate judiciorum Christi *objective* spectata et secundum *universalitatem* quam sibi vindicat. Cum enim et homines et Angeli totiusque creaturæ regimen sub judicium cadere valeant, horum omnium judicem Christum esse mox ex dicendis comperietur.

Conclusio 1^a.—JUDICIARIO CHRISTI MUNERI SUBJICIUNTUR OMNES RES HUMANÆ; ET DE OMNIBUS HOMINIBUS TUM PROXIMUM TUM FINALE JUDICIJUM CENSERI DEBET AB EO FERENDUM.

1^a *Pars* ostendit :

1^o Si de Christo loquamur secundum *divinam naturam*, veritas intenta manifeste liquet, propterea quod vis iudicatoria Filii adæquat potestatem Patris a quo processit, juxta illud (Joan. V, 22) : *Omne iudicium dedit Filio.*

2^o Si sermo sit de Christo secundum *naturam humanam*, idem affirmandum est triplici ex motivo :—*a*) Primo propter *habititudinem animæ Christi ad Verbum*. Mens enim Christi ita Verbo inhærebat ut per quamdam fontis illius refluientiam vel occulta humanorum cordium cognosceret et veritatis plena existeret. Atqui *spiritualis iudicat omnia* (1 Cor. II, 15), hoc est, qui Spiritu Dei et illuminatur et agitur de singulis ad salutem spectantibus recte iudicat (S. Thom. *Comm. in h. l.*). Ergo *a fortiori* id Christo tribuendum est, juxta illud (Rom. II, 16) : *In die, cum iudicabit Deus occulta hominum... per Jesum Christum.*—*b*) Secundo propter *meritum mortis Christi*: nam *in hoc Christus mortuus est et resurrexit, ut et mortuorum et vivorum dominetur* (Rom. XIV, 9). Atqui non est cur hanc sententiam generalem restringamus; imo diserte subdit Ap. (v. 10) : *Omnes stabimus ante tribunal Christi*; cf. Dan. VII, 14.—*c*) Tertio ob *comparationem rerum humanarum ad finem humanae salutis*. Cuicunque committitur principale seu iudicium de fine, committitur et accessorium seu iudicium de mediis. Atqui omnes res humanæ aliqualiter ordinantur in finem bea-

titudinis, ad quam homines admittuntur vel a qua repelluntur judicio Christi, ut patet ex Matth. XXV, 31-46, ubi duplex Domini sententia circa bonos et malos refertur. Ergo.

2^a Pars (quia magis ad *Eschatologiam* pertinet) summam absolvetur.

1^o De *proximo* seu *privato judicio* singulis animabus statim post mortem contingente testem *Scripturam* habemus (Heb. IX, 27): *Hominibus statutum est semel mori, post hoc autem judicium;* unde Christus in cruce *latronem* penitentem illico salvatum pronuntiavit (Luc. XXIII, 43), et *divitem epulonem* sepultum in inferno commemoravit (*ibid.* XVI, 22).—Ratio est quia, quantum ad ea quæ sunt animæ, homo post mortem sortitur quemdam statum immutabilem, ita ut de animæ sorte non oporeat ulterius differri judicium.

2^o Quod ad *finale judicium* attinet, *Scriptura* quoque illud attestatur (Joan. XII, 48): *Sermo quem locutus sum, ille judicabit eum in novissimo die,* i. e. Pater judicabit per Christum.—Nam suavis Dei providentia exigit ut definitivum judicium non feratur nisi præteritis iis quæ utcumque ad vitam humanam pertinent, ac eo tempore quo corpus jam præmiari potest. Atqui licet terrenum nostrum curriculum secundum se per mortem terminetur, homo tamen quodammodo supervivit in pluribus, puta in memoria concivium, in filiis, in operibus, in corporis reliquiis, in affectionum objectis, nec nisi post resurrectionem præmium corpori decernitur. Ergo.

Conclusio 2^a.—JUDICIUM HABET HOMO-DEUS SUPER IPSOS ANGELOS, IMO SUPER ADMINISTRATIONEM TOTIUS CREATURÆ.

1^a Pars suadetur:—1^o ex *Scriptura*, ubi legimus (1 Cor. VI, 3): *Nescitis quoniam angelos judicabimus.* At apostoli non judicabant nisi veluti Christi assessorēs. Ergo etc.

2^o Tribus ex *rationibus*.—1^a ratio sumitur ex *superioritate* animæ Christi, quæ, utpote Verbo Dei unita, longe exceedit Angelos et scientiâ et gratiâ.—2^a ratio petitur ex humilitate passionis qua meruit Christus gloriae et potestatis exaltationem super omnes Angelos; unde dicitur (Apoc. VII, 11) quod *omnes Angeli stabant in circuitu throni.*—3^a ratio ducitur ex *ministerio Angelorum* circa homines; quod prestant depeudenter a Christo et propter quod accidentalia premia seu gaudia, judice Domino, percipiunt, dum


mali angeli seu dæmones ex opposito pœnis accidentalibus subjiciuntur.

2^a Pars adjicitur de judicio Christi "super administratiō nem totius creaturæ" (ut loquitur *S. Thomas*, art. 6 ad 3).— Licit enim Christus in terris vivens non exercuerit terrenam potestatem (ut alibi indicavimus), dubium esse non potest quin, ex quo in cœlum ascendit, primatu quodam regio et judiciali actualiter dominetur universo mundo; de ipso quippe vaticinatus est David (*Ps. LXXI*, 8-11): *Dominabitur a mari usque ad mare et a flumine usque ad terminos orbis terrarum... Et adorabunt eum omnes reges terre, omnes gentes servient ei.*

Huic Supremo Regi expletum jam opus, quod de ipso scribendum suscepimus, humili obsequentique animo offerimus.—Lectoribus vero nobilia *S. Petri* verba replicamus: *Crescite in gratia et in cognitione Domini nostri et Salvatoris Jesu Christi. Ipsi gloria et nunc, et in diem æternitatis. Amen* (*ad Pet. III, 18*).

LAUDETUR

JESUS CHRISTUS



INDEX RERUM

QUE IN HOC VOLUMINE CONTINENTUR

	PAG.
Epistola Em. Card. Rampolla.....	3
Præfatio.....	5

PARS PRIMA

DE MYSTERIO INCARNATIONIS

	PAG.
Proœmium.....	7

DISPUTATIO PRIMA

Quæstio unica.—DE CONVENIENTIA INCARNATIONIS

ART. 1.—Utrum conveniens fuerit Deum incarnari.....	12
ART. 2.—Utrum necessarium fuerit ad reparationem generis humani Verbum Dei incarnari.....	16
ART. 3.—Utrum, si homo non peccasset, Deus incarnatus fuisset.	21
ART. 4.—Utrum principalius Christi incarnatio facta fuerit ad tollendum peccatum originale quam actuale.....	25
ART. 5.—Utrum conveniens fuerit Deum incarnari ab initio mundi.....	26
ART. 6.—Utrum Incarnatio differri debuerit usque ad finem mundi.....	29

DISPUTATIO SECUNDA

DE MODO SEU NATURA UNIONIS HYPOSTATICÆ

Quæstio I.—De UNIONE HYPOSTATICA IN SE

	PAG.
ART. 1.—Utrum unio Verbi incarnati sit facta in natura	32
ART. 2.—Utrum unio Verbi incarnati sit facta in persona ;—de Divinitate Christi.....	35
ART. 3.—Utrum unio Verbi incarnati facta sit in supposito vel hypostasi	46
ART. 4.—De proprietatibus Unionis hypostaticæ	48
ART. 5.—De causa Unionis Verbi incarnati.....	53

**Quæstio II.—De modo UNIONIS EX PARTE PERSONÆ ASSU-
MENTIS**

ART. 1.—Utrum personæ divinæ conveniat assumere naturam creatam.....	57
ART. 2.—Utrum divinæ naturæ conveniat assumere.....	60
ART. 3.—Utrum una quælibet persona possit sine alia unam vel plures naturas, et plures personæ unam numero naturam, assumere.....	63
ART. 4.—Utrum fuerit magis conveniens quod persona Filiī assumeret humanam naturam quam alia persona divina	66

Quæstio III.—De modo UNIONIS EX PARTE NATURÆ ASSUMPTÆ

ART. 1.—Utrum natura humana fuerit magis assumptibilis a Filio Dei quam aliqua alia natura.....	70
ART. 2.—Utrum conveniens fuerit ut Filius Dei assumeret naturam humanam singularem et numero unam ex stirpe Adæ.....	74
ART. 3.—Utrum Dei Filius verum et terrenum corpus assump- serit.....	78
ART. 4.—Utrum Filius Dei assumpserit animam eamque ratio- nalem.....	81
ART. 5.—De ordine assumptionis humane naturæ.....	85

DISPUTATIO TERTIA

DE COASSUMPTIS A FILIO DEI IN HUMANA NATURA

Quæstio I.—DE GRATIA CHRISTI UT EST SINGULARIS HOMO

	PAG.
ART. 1.—Utrum in anima Christi fuerit aliqua gratia habitualis.	90
ART. 2.—Utrum in Christo fuerint virtutes.....	94
ART. 3.—Utrum in Christo fuerint dona Sp. Sancti.....	97
ART. 4.—Utrum in Christo fuerint gratiae gratis datæ.....	99
ART. 5.—Utrum et quænam fuerit in Christo plenitudo gratiæ.	101
ART. 6.—Utrum Christi gratia sit infinita neque augeri valeat...	105
ART. 7.—Qualiter gratia habitualis Christi se habeat ad Unionem.	103

Quæstio II.—DE GRATIA CHRISTI CAPITIS

ART. 1.—Utrum Christus sit Ecclesiæ caput et rex.....	111
ART. 2.—Utrum Christus sit rex universorum omniumque hominum caput.....	114
ART. 3.—Utrum Christus sit caput Angelorum.....	118
ART. 4.—Utrum gratia capitalis Christi sit in ipso eadem cum gratia habituali.....	121
ART. 5.—Utrum esse caput Ecclesiæ sit proprium Christo.....	123

Quæstio III.—DE SCIENTIA CHRISTI IN COMMUNI

ART. 1.—Utrum Christus habuerit aliquam scientiam præter divinam.....	125
ART. 2.—Utrum Christus habuerit scientiam beatorum.....	128
ART. 3.—Utrum Christus habuerit scientiam inditam vel infusam.....	131
ART. 4.—Utrum Christus habuerit aliquam scientiam acquisitam.....	133

Quæstio IV.—DE SCIENTIA CHRISTI IN SPECIE

ART. 1.—De perfectione intensiva scientiæ beatæ in Christo...	138
ART. 2.—De extensione scientiæ beatæ in Christo.....	140
ART. 3.—De objecto et actu scientiæ infusæ Christi.....	144
ART. 4.—De scientia infusa Christi sub ratione habitus	147
ART. 5.—De objecto scientiæ Christi acquisitæ.....	149
ART. 6.—De modo originis scientiæ acquisitæ in Christo.....	151

Quæstio V.—DE POTENTIA ANIMÆ CHRISTI

	PAG.
ART. 1.—Utrum anima Christi habuerit omnipotentiam simpliciter.....	154
ART. 2.—Utrum anima Christi habuerit omnipotentiam respectu immutationis creaturarum.....	156
ART. 3.—Utrum anima Christi habuerit omnipotentiam respectu proprii corporis siveque exequendæ voluntatis.....	162

Quæstio VI.—DE DEFECTIBUS CORPORIS A VERBO COASSUMPTIS

ART. 1.—Utrum Filius Dei in humana natura assumere debuerit corporis defectus.....	165
ART. 2.—Quomodo Christus defectibus corporalibus subjacuit.	168
ART. 3.—Utrum Christus omnes defectus corporales hominum assumere debuerit ;—de pulchritudine Christi.....	170

Quæstio VII.—DE DEFECTIBUS ANIMÆ A CHRISTO COASSUMPTIS

ART. 1.—Utrum in Christo fuerit peccatum.....	173
ART. 2.—Utrum in Christo fuerit fomes peccati peccandique possibilitas.....	175
ART. 3.—Utrum in Christo fuerit ignorantia et admiratio.....	179
ART. 4.—Utrum anima Christi fuerit passibilis.....	180
ART. 5.—Utrum in Christo fuerint dolor et tristitia, timor et ira	183

DISPUTATIO QUARTA**DE CONSEQUENTIBUS UNIONEM ABSOLUTE****Quæstio I.—De modo loquendi seu de communicatione idiomatum**

ART. 1.—De mutua naturarum predicatione in Christo.....	189
ART. 2.—De alterna proprietatum communicatione in Christo.	193
ART. 3.—De formulis significantibus fieri Incarnationis.....	197
ART. 4.—De locutionibus quibusdam reduplicativis	200

Quæstio II.—De unitate Christi quantum ad esse

ART. 1.—Utrum Christus sit unum vel duo.....	202
ART. 2.—Utrum in Christo sit tantum unum esse.....	205

Quæstio III.—DE UNITATE CHRISTI QUANTUM AD VOLUNTATEM

	PAG.
ART. 1.—Utrum in Christo sint duæ voluntates.....	210
ART. 2.—Utrum in Christo fuerit liberum arbitrium	215
ART. 3.—Utrum voluntas humana Christi fuerit omnino confor-	
mis divinæ voluntati in volito.....	218
ART. 4.—Utrum in Christo fuerit contrarietas voluntatum.....	220

Quæstio IV.—DE UNITATE CHRISTI QUANTUM AD OPERATIONEM

ART. 1.—Utrum in Christo sit una tantum operatio divinitatis et humanitatis.....	222
ART. 2.—Utrum in Christo sint plures operationes humanæ....	226
ART. 3.—Utrum actio humana Christi potuerit esse sibi meri-	
toria	227
ART. 4.—Utrum Christus aliis mereri potuerit.....	230

DISPUTATIO QUINTA**DE CONSEQUENTIBUS UNIONEM RELATIVE****Quæstio I.—DE SUBJECTIONE, ORATIONE ET SACERDOTIO
CHRISTI**

ART. 1.—De subjectione Christi.....	233
ART. 2.—De oratione Christi.....	236
ART. 3.—De veritate sacerdotii Christi.....	239
ART. 4.—De excellentia sacerdotii Christi.....	242

Quæstio II.—DE FILIATIONE ET PRÆDESTINATIONE CHRISTI

ART. 1.—Utrum Christus, secundum quod homo, sit filius Dei adoptivus	246
ART. 2.—Utrum Christo conveniat prædestinatum esse.....	251
ART. 3.—Utrum prædestinatio Christi sit nostre prædestina-	
tionis exemplar et causa.....	254

Quæstio III.—DE ADORATIONE CHRISTI

ART. 1.—Utrum una et eadem adoratione sit adoranda divinitas Christi et ejus humanitas.....	256
--	-----

PAG.

ART. 2.—Utrum humanitas Christi adoranda sit adoratione latrīæ ;—de cultu SS. Cordis Jesu.....	260
ART. 3.—Utrum imago Christi sit adoranda adoratione latrīæ... .	268
ART. 4.—Utrum crux Christi sit adoranda adoratione latrīæ..	275

Quæstio IV.—DE CULTU SANOTORUM

ART. 1.—De cultu sanctorum in genere	278
ART. 2.—De invocatione sanctorum.....	281
ART. 3.—De cultu reliquiarum.....	288
ART. 4.—De imaginibus sanctorum.....	291

PARS SECUNDA**DE MATRE ET MYSTERICIS VITÆ CHRISTI****DISPUTATIO SEXTA****MARIALOGIA****Quæstio I.—De B. V. MARIE SANCTIFICATIONE**

ART. 1.—Utrum B. Virgo fuerit sanctificata in conceptione sua.	296
ART. 2.—Utrum per sanctificationem Maria consecuta sit immunitatem a fomite peccati et a quovis peccato.....	307
ART. 3.—Utrum B. Virgo per primam sanctificationem adepta fuerit plenitudinem omnium gratiarum.....	310

Quæstio II.—De VIRGINITATE ET DESPONSATIONE B. MARIE

ART. 1.—Utrum B. Maria virgo extiterit ante partum, in partu et post partum.....	312
ART. 2.—Utrum mater Dei virginitatem voverit.....	318
ART. 3.—De matris Dei despensatione.....	321

Quæstio III.—De B. M. VIRGINIS ANNUNTIATIONE

ART. 1.—Utrum necessarium fuerit annuntiari B. Virginis quod in ea erat generandum.....	324
ART. 2.—Utrum annuntiatio fieri debuerit per Angelum visibiliter apparentem	326.

PAG.
260
268
275

278
281
288
291

Quæstio IV.—DE MATERNITATE DIVINA

- | PAG. | |
|----------|--|
| ART. 1.— | Utrum et quomodo Sp. Sanctus fuerit principium acti-
yum conceptionis Christi..... 329. |
| ART. 2.— | Utrum secundum temporalem Christi nativitatem B.
Virgo possit dici mater ejus 331 |
| ART. 3.— | Utrum B. Virgo debeat dici mater Dei..... 334 |

Quæstio V.—DE SUMMA B. VIRGINIS PERFECTIONE

- | | |
|----------|---|
| ART. 1.— | Quanta fuerit B. M. Virginis sapientia 340 |
| ART. 2.— | Quantus fuerit B. Virginis in sanctitate profectus..... 342 |

Quæstio VI.—DE ASSUMPTIONE ET GLORIA B. M. VIRGINIS

- | | |
|----------|---|
| ART. 1.— | Utrum B. Virgo paulo post mortem surrexerit et as-
sumpta in cœlum fuerit..... 346 |
| ART. 2.— | Quanta sit gloria Deipare in cœlis..... 350 |

Quæstio VII.—DE MEDIATIONE B. M. VIRGINIS

- | | |
|----------|---|
| ART. 1.— | Utrum B. Virgo cooperata sit humanae redēptioni... 353 |
| ART. 2.— | Utrum B. Virgo vices Conciliatricis in procuranda
hominum salute impleat 355 |

Quæstio VIII.—DE CULTU B. VIRGINIS MARIE

- | | |
|----------|--|
| ART. 1.— | Utrum cultus aliquis sit B. M. Virginis exhibendus:... 361 |
| ART. 2.— | Quinam cultus Marie impertiendus est..... 365 |

DISPUTATIO SEPTIMA

DE INGRESSU CHRISTI IN MUNDUM

Quæstio I.—DE CONCEPTIONE CHRISTI

- | | |
|----------|--|
| ART. 1.— | De materia conceptionis Christi hujusque genealogia. 370 |
| ART. 2.— | De modo et ordine conceptionis Christi.....,..... 372 |

Quæstio II.—DE NATIVITATE CHRISTI

- | | |
|----------|---|
| ART. 1.— | De loco et tempore nativitatis Christi.....,..... 375 |
| ART. 2.— | De iis quibus Christi nativitas manifestata est..... 377 |
| ART. 3.— | De mediis per quæ nascens Christus innotuit..... 379 |
| ART. 4.— | De ordine et modo manifestationis Christi:.....,..... 380 |

296

307

310

312

318

321

324

326.

Quæstio III.—DE LEGALIBUS CIRCA PUERUM JESUM SERVATIS

	PAG.
ART. 1.—De Christi circumcisione et nominatione.....	383
ART. 2.—De oblatione Christi in templo.....	386

Quæstio IV.—DE BAPTIZATIONE CHRISTI

ART. 1.—De baptismo Joannis.....	388
ART. 2.—De baptizatione Christi.....	391
ART. 3.—De signis cœlestibus in baptizatione Christi proditis..	392

DISPUTATIO OCTAVA

DE PROGRESSU CHRISTI IN MUNDO

Quæstio I.—DE MODO CONVERSATIONIS CHRISTI

ART. 1.—De conversatione Christi inter homines.....	396
ART. 2.—De vivendi more Christi Domini.....	398

Quæstio II.—DE TENTATIONE CHRISTI

ART. 1.—De tentatione Christi absolute sumpta.....	401
ART. 2.—De circumstantiis temptationis Christi.....	403

Quæstio III.—DE DOCTRINA CHRISTI

ART. 1.—De auditoribus Christi docentis.....	406
ART. 2.—De Christi docendi ratione.....	407

Quæstio IV.—DE MIRACULIS CHRISTI

ART. 1.—De miraculis Christi in genere.....	410
ART. 2.—De singulis miraculorum Christi speciebus.....	412

Quæstio V.—DE TRANFIGURATIONE CHRISTI

ART. 1.—De transfiguratione secundum se.....	416
ART. 2.—De circumstantiis transfigurationis.....	418

DISPUTATIO NONA

DE EXITU CHRISTI AB HOC MUNDO

Quæstio I.—DE PASSIONE CHRISTI

	PAG.
ART. 1.—De necessitate passionis.....	421
ART. 2.—De convenientia passionis et supplicii Crucis.....	423
ART. 3.—De magnitudine passionis.....	427
ART. 4.—De circumstantiis passionis.....	433

Quæstio II.—DE CAUSA EFFICIENTE PASSIONIS CHRISTI

ART. 1.—Utrum Christus sibi ipsi obedientiæque motivo mortem pepererit.....	436
ART. 2.—Utrum Deus Pater tradiderit Christum passioni.....	439
ART. 3.—Quanam scientia et malitia Christi persecutores eum ad mortem dederunt.....	441

Quæstio III.—DE EFFECTU PASSIONIS CHRISTI

ART. 1.—Utrum passio Christi causaverit nostram salutem per modum meriti.....	445
ART. 2.—Utrum passio Christi causaverit nostram salutem per modum satisfactionis.....	446
ART. 3.—Utrum passio Christi operata sit per modum sacrificii.	453
ART. 4.—Utrum passio Christi operata sit nostram salutem per modum redemptionis.....	458
ART. 5.—Utrum passio Christi operata sit nostram salutem per modum efficientie.....	460
ART. 6.—Quinam sunt effectus passionis Christi;—de eorum extensione et applicatione.....	462

Quæstio IV.—DE MORTE ET SEPULTURA CHRISTI

ART. 1.—De convenientia mortis Christi.....	468
ART. 2.—De indole propria mortis Christi.....	469
ART. 3.—De sepultura Christi.....	473

Quæstio V.—DE DESCENSU CHRISTI AD INFEROS

ART. 1.—Utrum vere congrueque Christus ad infernum descendit.....	475
ART. 2.—Quanam ratione Christus in inferno versatus est.....	478

ART. 3.—Quosnam Christus ad inferos descendens exinde libe-	
ravit.....	481

DISPUTATIO DECIMA

DE CHRISTI TRIUMPHO

Quæstio I.—DE RESURRECTIONE CHRISTI

ART. 1.—De facto resurrectionis Christi.....	484
ART. 2.—De qualitate Christi resurgentis.....	488
ART. 3.—De manifestatione resurrectionis.....	490
ART. 4.—De resurrectionis causalitate seu efficacia.....	494

Quæstio II.—DE ASCENSIONE CHRISTI

ART. 1.—De Christi ascensione secundum se.....	496
ART. 2.—De effectibus ascensionis Christi.....	500

Quæstio III.—DE SUPERNA CHRISTI GLORIA

ART. 1.—De sessione Christi ad dexteram Patris.....	501
ART. 2.—De judicaria Christi potestate subjective sumpta.....	504
ART. 3.—De extensione judicariæ potestatis in Christo.....	507

FINIS

ADDENDA

Pag. 141, hæc adde:—Dr *Schell*, in opere “Catholica dogmatica,” tenet Christum secundum quamlibet scientiam creatam ignorasse diem et horam judicii (Marc. XIII, 32); at opus illud prohibitum est a S. C. Indicis, Dec. 1898.

Pag. 295, adde omissum titulum: PARS SECUNDA, *de Matre et mysteriis vite Christi.*

PAG.
ibe-

.... 481

.... 484

.... 488

.... 490

.... 494

.... 496

.... 500

.... 501

.... 504

.... 507

atica,"
orasse
ibitum

et mys-

